

王充著

論

衡

世界書局印行

懷疑與迷信

王繡塵

——讀論衡——

近來學者，都說『懷疑』爲治學的不二法門，西洋人因能懷疑，故各種科學，突飛猛進，遂爲全世界的主人翁；而中國人則知拘守舊說，不善懷疑，甚者變成迷信，所以凡百事業，無不落後。這句話，說得固然不錯。但以我看來，中國人如東漢時的王仲王氏，何嘗不善懷疑？只看論衡一書，對於經典舊說，社會謬見，不合事理之處，無不盡量排斥，不遺餘力；倘有人因其說而作進一步的探究，則一切科學，早發明於中國，何待數千年後，尚在撿拾西洋科學家的牙慧呢？此則社會情性，不肯信從善言之所致，不可謂中國絕無懷疑的人物也。

原仲王氏著論衡之目的，他自己判定三個大字，是『疾虛妄』。我細讀論衡全書，對於這三個字的判語，可謂真確極了。因爲疾虛妄，所以凡百事理，必須求其真實；凡百事理，求其真實，非即科學的根源嗎？論衡全書，完全注重在這一點。他對於舊說謬見的批評，我可不必舉他。今所說的，就是他因疾虛妄而探求出來的真理。物勢篇曰：

儒者論曰：『天地故生人；』此言妄也。夫天地合氣，人偶自生也。猶夫婦合氣，子則自生也。夫婦合氣，非嘗時欲得生子，情欲動而合，合而生子矣！且夫婦不故生子，以知天地不故生人也。然則人生於天地也，猶魚之於淵，蠃虱之於人也。因氣而生，種類相產，萬物生天地之間，皆一實也。……夫天地不能故生人，則其生萬物，亦不能故也。天地合氣，物偶自生也。

西人上帝造物說，流衍數千年，故人智錮蔽，進化極少。及達爾文之物種由來出世，知人物皆由自然而生，自

然而變，天演之學興，而使世界易一新面目。改近數十年來之學者，無不推本於達氏。豈知我國於千六七百年以前，早已有人說破生物之理由，苟繼起有人，因仲王氏之說而益探究其極，則天演之學，早興於亞洲大陸之黃人，豈讓歐洲白種人誇稱為天之驕子哉！

上古蒙昧之世，人智閉塞，只能爲自然界所束縛，而不能制服自然界。至人智進步，始能探悉自然界之理例，而有以制服自然界。如此，人才嘗得趕萬物之靈的笑稱。故一切科學家，無不對自然界之現象而爲研究的工夫。結果，竟能將自然界之萬物以供我人類之役使。故仲王氏於自然篇復申明之曰：

天地合氣，萬物自生，猶夫婦合氣，子自生矣！萬物之生，含血之類，知飢知寒，見五穀可食，取而食之，見絲麻可衣，取而衣之。或說以爲天生五穀以食人，生絲麻以衣人，此謂天爲人作農夫桑女之徒也。不合自然，故其義疑，未可從也。

看此數語，可見仲王氏之學，確從懷疑入手，與西洋之科學家，一般無二，而其對於古經典之懷疑，有如寒溫篇曰：

案易無妄之應，水旱之至，自有期節。百災萬變，殆同一曲。變復之家，疑且失實。何以爲疑？夫大人與天地合德，先天而天不違，後天而奉天時。洪範曰：『急恆寒若，舒恆燠若。』如洪範之言，天氣隨人易徙，當先天而天不違耳，何故復言後天而奉天時乎？後者，天已寒溫於前，而人賞罰於後也。由此言之，人言與尚書不合一疑也。京氏占寒溫，以陰陽升降變復之家，以刑賞喜怒兩家乖迹，二疑也。民間占寒溫，今日寒而明日溫，朝有繁霜，夕有烈光，且雨氣溫，且陽氣寒，夫兩者陰，陽者陽也，寒者陰，溫者陽也，兩且陽反寒，陽且雨反溫，

不以類相應，三疑也。三疑不定，自然之說，亦未立也。

此仲王氏讀古經典而致其懷疑的第一步也。自漢人以洪範五行，合於春秋災異，周易象數，并爲一談，號稱『天人相與』之學，遂爲迷信的淵藪。班固復搜集謬說，於漢書中作五行志，歷代史家，無不因之，以迄於清，二千年間，信爲不刊之令典，而仲王氏生於述信，空氣最濃厚的漢代，獨能不爲社會錮俗所束縛，豈不是出類拔萃的豪傑嗎？使我國有千百仲王，則迷信的陰霾，早已掃除，科學成立，當在千年以前矣！然而獨木不能成林，一繩不能維大廈，雖有仲王，其奈只一人何！

以真實破虛妄，必有真實的理論，古人成說，既已虛妄，惟有引自然界真實之事物，以之作證，此爲一定不易之理。說曰：篇曰：

今視日入，非入也，亦遠也。當日入西方之時，其下民亦將謂之日中。

東半球日入，正西半球日出，今言『其下民亦將謂之日中』，則仲王氏似已思得地圖之理。惜乎繼起無人，致使哥白尼得產於歐洲也。說曰：篇又曰：

日中近而日出遠，何以驗之？以植竿於屋下，夫屋高三丈，竿於屋棟之下，正而樹之，上扣棟，下抵地，是以屋棟去地三丈。如旁邪倚之，則竿末旁跌，不得扣棟，是爲去地過三丈也。日中時，日正在天上，猶竿之正樹，去地三丈也。日出入邪在人旁，猶竿之旁跌，去地過三丈也。夫如是，日中爲近，出入爲遠，可知明矣。試復以屋中堂而坐一人，一人行於屋上，其行中屋之時，正在坐人之上，是爲屋上之人，與屋下坐人，相去三丈矣。如屋上人在東危若西危上，其與屋下坐人，相去過三丈矣。日中時，猶人正在屋上矣。其始出與入，猶人在東

危與西危也。日中去人近，故溫；日出入遠，故寒；然則日中時，日小；其出入時，日大者，日中光明，故小；其出入時，光暗，故大。猶晝日，察火光，小；夜，察之光，大也。既以火爲效，又以星爲驗。晝日，星不見者，光耀滅之也。夜無光，耀星乃見。夫日月星之類也。平旦日入光銷，故視大也。

俞樾云：『此論甚精。且以鐘火爲喻，遠視甚大，近視轉小矣。列子湯問篇載兩小兒論日遠近，孔子不能答，此可以解之。』按世界上極精深的學理，無不從極淺近的地方衍出，牛頓因蘋果落下而悟地心吸力，瓦特因沸水掀壺蓋而悟汽機，無不皆然。今看仲王氏說日，何以異於牛頓瓦特乎？至雲雨霜雪，舊說皆歸之天文，而仲王氏說日篇，則曰：

儒者又曰：『雨從天下；』謂正從天墜也。如實論之，雨從地上，不從天下。見雨從上集，則謂從天下矣。其實地上也。……夫雲則雨，雨則雲矣。……雲霧，雨之微也；夏則爲露，冬則爲霜；溫則爲雨，寒則爲雪。雨露凍凝者，皆由地發，不從天降也。

此處說地文，何等明白。又如近人因地球旋轉，引人坐船中以作喻；以人在船中，船行時，只見兩岸倒退，不見己船前進。而說日篇中，亦早已說及，如：

天行已疾，去人高遠，視之若遲。蓋望遠物者，動若不動，行若不行。何以驗之？乘船江海之中，順風而飄，近岸則行疾，遠岸則行遲，船行一實也。或疾或遲，遠近之視使然也。

此雖言天行，不及地轉，然亦只去一問。若再進一步，則地圖地轉之說，不難發明於千年前之中國矣。我故曰：所可惜者，無繼起之人也。

中國進化之遲緩，根本皆由於迷信，故『雷殛說』在數千年間，繫縛於一般人之腦中而不能去。雖因此說，社會間殘暴行爲，或可減少，但亦祇能施之於愚夫愚婦，至狡黠姦徒，終不因懼怕雷殛而消失其惡念，苟明此雷殛迷信之說之所得甚微，何如竟說明雷電之理之爲得乎？然昔人之不說，非不敢說，實不知其故，不能說也。獨仲王氏則於雷虛篇中，早明白說之。曰：

雷者，太陽之激氣也。何以明之？……陰陽分事，（按孫詒讓云：『分事，黃氏曰：鈔引作「交爭」。疑當作「分爭」。爭，事，形近而誤。』）則相校軫，校軫則激射，激射爲毒，中人輒死，中木木折，中屋屋壞，人在木下屋間，偶中而死矣。何以驗之？試以一斗水灌冶鐵之火，氣激鑿裂，若雷之音矣！或近之，必灼人體。天地爲鑪，大矣！陽氣爲火，猛矣！雷雨爲水，多矣！分爭激射，安得不迅？中傷人身，安得不死？當冶工之消鐵也，以土爲形，燥則鐵下，不則躍盜而射。射中人身，則皮膚灼刺，陽氣之熱，非直消鐵之烈也。陰氣激之，非直土泥之濕也。陽氣中人，非直灼刺之痛也。夫雷，火也。氣剝人，人不得無迹，如炙處狀似文字，人見之謂天記，書其過以示百姓，是復虛妄也。使人盡有過，天用雷殺人，殺人當彰其惡，以懲其後，明著其文字，不當闇昧……

按今科學家言電，謂一切物體，都有一種感應的勢力，分爲兩方面：一方面叫陽電，一方面叫陰電，這兩種電，生在空中最多，平時不顯露出來，若兩電相遇，便發生一種極大的聲響，就是雷。而電氣觸人致死之說，今已明白，並無所謂『天罰』。豈知仲王氏於千六七百年前，已明這個道理呢。

我嘗說一般人有最大的兩種弊病：一種是言過其實，如說人好處，必說得無以復加，說人壞處亦然。一種是崇古薄今，動說『現在如何不好』。其實古時，何嘗不是如此。仲王氏於此二事，却也已提出。他於『言過其

實』一項，藝增篇曰：

世俗所患，患言事增其實，著文垂辭，辭出溢其真，稱笑過其實，進惡沒其罪。何則？俗人好奇，不奇，言不用也。故譽人不增其美，則聞者不快其意；毀人不益其惡，則聽者不愜於心。聞一增以爲十，見百益以爲千。

此卽世俗所謂『添枝加葉』。明明一件平淡無奇的事，一個庸碌無能的人，而一經人口稱譽，或非毀譽轉傳述，遂至盡失其真相。論語記『仲尼不爲已甚者』。又子貢曰：『紂之不善，不如是之甚。』可見古時的好人和壞人，都是經後人口頭裝點，添枝加葉而成的。所以孟子有『盡信書，不如無書』之歎。但是世俗習焉不察，竟以說誑爲正當的言語，豈不可歎嗎？又如堅決地認『現在如何不好』者，要知一個人不過數十寒暑的壽命，現在不好，試問數十年之前，如何好法？就使果好，又何能知之？無奈世俗對於『現在如何不好』的口頭話，積久遂衍成社會心理，因之而崇古薄今的念頭，橫拄胸中，牢不可破。於是只知追慕古昔，而不知改造將來，此亦中國進化遲緩一大原因。獨仲王氏則大聲喝破之，齊世篇曰：

畫工好畫上代之人，秦漢之士功行譎奇，不肯圖今世之士者，尊古卑今也。貴鵠賤鷄，鵠遠而雞近也。使嘗今說道深於孔墨，名不得與之同；立行崇於曾顏，聲不得與之鈞。何則？世俗之性，賤所見，貴所聞也。有人於此，立義建節，實核其操，古無以過爲文書者，肯載於篇籍，表以爲行事乎？作奇論，造新文，不損於前人好事者，肯舍久遠之書，而垂意觀讀之乎？楊子雲作太玄，造法言，張伯松不肯一觀與之併肩，故賤其言，使子雲在伯松前，伯松以爲金匱矣！

世俗之見，由來如此，可爲一歎。張伯松不肯一觀楊子雲之書，然楊子雲之書，至今流傳不絕，而張伯松之名，

恐博學之士，亦未必皆知。而在當時，則傲視『侏肩』，『真可謂俗物，不足與之言天地了！』但是豈止張伯樞一人而已！

上面所舉，不過論衡中百分之一，其精義妙旨，在全書者，佔十之七八，讀者自能知之。有此奇書而人多不肯讀，豈不可惜！且其書在當時，蔡邕得之，秘之帳中，以爲談助。王朗得之，及來許下，人稱其才進，則其價值，可以概見。況當今日，正在祛除迷信，探索真理的時候，學者安可不人手一編呢？我今再述仲王氏論爲學之道，以告於一般學者。謝短篇曰：

夫知古不知今，謂之陸沉；然則儒生，所謂陸沉者也。五經之前，至於天地始開，帝王初立者，主名者誰？儒生又不知也。夫知今不知古，謂之盲瞽；五經比於上古，古猶今也。徒能說經，不曉上古，然則儒生，所謂盲瞽者也。……人問之曰：居宅幾年？祖先何爲？不能知者，愚子弟也。然則儒生不能知漢事，世之愚蔽人也。

今日醜詆舊有典籍者，每說『所謂國故，無非是數千年前陳腐之說；居今之世而創行國學，社會思想必日趨腐敗。』而斥西來學術者，則曰：『近代人因科學發達，生出工業革命，外部生活，變遷急劇；內部生活，隨而動搖……一百年物質的進步，比從前三千年所得，還加幾倍。我們人類，不惟沒有得着幸福，反帶來許多災難。歐洲人做了一場科學萬能的大夢，到如今卻叫起科學破產來！』凡作上面兩種話的，偏都是當世的碩學，或名流，尙請平心靜氣，細味仲王氏『陸沉』、『盲瞽』之言，當知『知古不知今』，與『知今不知古』，都不是真正大學問家所許可的！

論衡目錄

逢遇篇	一	異虛篇	四四
累害篇	三	感虛篇	四七
命祿篇	五	福虛篇	五四
氣壽篇	七	禍虛篇	五七
幸偶篇	八	龍虛篇	六〇
命義篇	一〇	雷虛篇	六二
無形篇	一三	道虛篇	六七
率性篇	一五	語增篇	七四
吉驗篇	一八	儒增篇	七八
偶會篇	二一	藝增篇	八三
骨相篇	二三	閻孔篇	八六
初稟篇	二六	非韓篇	九五
本性篇	二八	刺孟篇	九九
物勢篇	三〇	談天篇	一〇五
奇怪篇	三二	說日篇	一〇七
書虛篇	三五	答佞篇	一一四
變虛篇	四一	程材篇	一一八

量知篇	一二三	感類篇	一八一
謝短篇	一二四	齊世篇	一八五
效力篇	一二七	宣漢篇	一八九
別通篇	一三〇	懷國篇	一九一
超奇篇	一三四	驗符篇	一九四
狀留篇	一三八	須頌篇	一九六
寒溫篇	一四〇	佚文篇	一九九
體告篇	一四二	論死篇	二〇二
變動篇	一四六	死僞篇	二〇六
明零篇	一四九	紀妖篇	二一三
順鼓篇	一五三	訂鬼篇	二一九
亂龍篇	一五六	言毒篇	二二二
遭虎篇	一五九	薄葬篇	二二四
商蟲篇	一六〇	四諱篇	二二七
講瑞篇	一六三	調時篇	二三〇
指瑞篇	一六八	譏日篇	二三二
是應篇	一七一	卜筮篇	二三五
治期篇	一七四	辯異篇	二三七
自然篇	一七七	難歲篇	二四〇

詰術篇	二四二	定賢篇	二六二
解除篇	二四五	正說篇	二六九
祀義篇	二四七	書解篇	二七四
祭意篇	二四九	案書篇	二七七
實知篇	二五二	對作篇	二七九
知寔篇	二五七	自紀篇	二八二

論衡

世漢會稽王充撰

逢遇篇

操行有常賢，仕宦無常遇。賢不賢，才也；遇不遇，時也。才高行潔，不可保以必尊貴；能薄操濁，不可保以必卑賤。或高才潔行不遇，退在下流；薄能濁操（而）遇（進）在衆上。世各自有以取士，士亦各自得以進（退）。進在遇，退在不遇。處尊居顯，未必賢；退也，位卑在下，未必愚。不遇也，故遇或抱滄行，辱於桀之朝；不遇或持潔節，卑於堯之廷。所以遇不遇，非一也。或時賢而輔惡，或以大才從於小才，或俱大才。道有清濁，或無道德而以技合，或無技能而以色幸。伍員、卞喜（宜讀作伯嚭字），俱事夫差，卞喜尊重，伍員誅死。此異操而同主也。或操同而主異，亦有遇不遇。伊尹箕子，是也。伊尹箕子，才俱也。伊尹為相，箕子為奴。伊尹遇成湯，箕子遇商紂也。夫以賢事賢君，君欲為治，臣以賢才輔之，趨舍偶合，其遇固宜。以賢事惡君，君不欲為治，臣以忠行佐之，操志乖忤，不遇固宜。或以賢聖之臣，遭欲為治之君，而終有不遇。孔子孟軻是也。孔子絕糧陳蔡，孟軻困於齊梁，非時君主不用善也。才下知淺，不能用大才也。夫能御驥騁者，必王良也；能臣禹稷臯陶者，必堯舜也。御百里之手，而以調千里之足，必有摧衡折輓之患；有接具臣之才，而以御大臣之知，必有閉心塞意之變。故至言棄捐，聖賢距逆，非憎聖賢，不甘至言也。聖賢務高，至言難行也。

夫以大才干小才，小才不能受；不遇固宜。以大才之臣，遇大才之主，乃有遇不遇。虞舜許由，太公伯夷是也。虞舜許由，俱聖人也，並生唐世，俱面於堯。虞舜紹帝統，許由入山林。太公伯夷，俱賢也，並出周國，皆見武王。太公受封，伯夷餓死。夫賢聖道同志合，趨齊虞舜，太公行耦，許由伯夷，操違者，生非其世，出非其時也。道雖同，同中有異，志雖合，合中有離。何則？道有精麤，志有清濁也。許由，皇者之輔也，生於帝者之時；伯夷，帝者之佐也，出於王者之世。並由道德，俱發仁義，主行道德，不精不留，主為仁義，不高不止。此其所以不遇也。堯、舜、禹、武王，誅殘，太公討

暴，同獨皆蠱，舉措鈞齊，此其所以為遇者也。故舜王天下，臯陶佐政，北人無擇，深隱不見；禹王天下，伯益輔治，伯正成子高，委位而耕，非臯陶才愈無擇，伯益能出子高也。然而臯陶伯益進用，無擇子高退隱，進用行耦，退隱操違也。退隱勢異，身雖屈，不願進；人主不須其言，廢之意亦不恨，是兩不相慕也。

商鞅三說秦孝公，前二說不聽，後一說用者，前二帝王之論；後一，霸者之議也。夫持帝王之論，說霸者之主，雖精見拒，更謂霸說，雖蠱見受。何則？精遇孝公，所不得，蠱遇孝公，所欲行也。故說者不在善，在所說者善之；才不待賢，在所事者賢之。馬圖之說無方，而野人說之；子貢之說有義，野人不聽。吹簫工為簫聲，因越王不喜，更為野聲。越王大說，故為簫於不欲得簫之主，雖簫不見愛，為不簫於欲得不簫之主，雖不簫不見憎。此以曲伎合，合則遇，不合則不遇。或無伎妄以姦巧合上志，亦有以遇者：竊簫之臣，雞鳴之客是「也」；竊簫之臣，親於子反，雞鳴之客，幸於孟嘗；子反好偷臣，孟嘗愛僞客也。以有補於人君，人君賴之，其遇固宜；或無補益，為上所好，竊簫鄧通是也。竊簫幸於孝惠，鄧通愛於孝文，無細簡之才，微薄之能，偶以形佳骨媚，皮媚色稱，夫好容，人所好也，其遇固宜。或以醜面惡色，稱媚於上，嬖母，無鹽是也。嬖母進於黃帝，無鹽納於齊王，故賢不肖可豫知，遇難先圖。何則？人主好惡無常，人臣所進無豫，偶合為是，適可為上，進者未必賢，退者未必愚，合幸得進，不幸失之。

世俗之議曰：賢人可遇不遇，亦自其咎也。生不希世，准主觀鑒，治內調能，定說審詞，際會能進，有補瞻主，何不遇之？有今則不然：作無益之能，納無補之說，以夏進鑪，以冬奏扇，為所不欲得之事，獻所不欲不聞之語，其不遇禍幸矣！何福祐之有乎？進能有益，納說有補，人之所知也。或以不補而得祿，或以有益而獲罪，且夏時鑪以炙，冬時扇以驅火，世可希，主不可准也；說可轉，能不可易也。世主好文，已為文則遇；主好武，已則不遇。主好辯，有口則遇；主不好辯，已則不遇。文王不好武，武王不好文；辯主不好行，行主不好辯。文與言尚，可暴習，行與能不可卒成。學不借習，無以明名；名不素著，無以遇主。倉卒之業，須臾之名，日力不足不預聞，何以准主而納其說，進身而託其能哉？

昔周人有仕數不遇，年老白首，位僻於塗者。人或問之：『何爲位乎？』對曰：『吾仕數不遇，自傷年者失時，是以泣也。』人曰：『仕奈何不一遇也？』對曰：『吾年少之時，學爲文，文德成就，始欲仕宦，人君好用老，用老主亡，後主又用武，吾更爲武，武節始就，武主又亡。少主始立，好用少年，吾年又老，是以未嘗一遇。』仕宦有時，不可求也。夫希世准主，尙不可爲，況節志高妙，不爲利動，性定質成，不爲主顧者乎？且夫遇也，能不預設，說不宿具，邂逅逢喜，遭觸上意，故謂之遇。如准推主調說，以取尊貴，是名爲揣，不名曰遇。春種穀生，秋刈穀收，求物得物，作事事成，不名爲遇；不求自至，不作自成，是名爲遇，猶拾遺於途，撫棄於野。若天授地生，鬼助神輔，禽息之精，陰慶，飽叔之魂，默舉若是者，乃遇耳。今俗人既不能定遇不遇之論，又就遇而與之，因不遇而毀之，是據見效，案成事，不能量操審才能也。

累害篇

凡人仕宦有稽留不進，行節有毀傷不全，罪過有累積不除，聲名有暗昧不明，才非下，行非悖也；又知非昏，策非昧也；逢遭外禍，累害之也。非唯人行，凡物皆然。生動之類，咸殺累害。累害自外，不由其內。夫不本累害所從生起，而徒歸責於被累害者，智不明，闇塞於理者也。物以春生，人保之；以秋成，人必不能保之。卒然牛馬踐根，刀鎌割莖，生者不育，至秋不成，不成之類，遇害不遂，不得生也。夫鼠涉飯中，捐而不食；捐飯之味，與彼不污者鉤，以鼠爲害，棄而不御。君子之累害，與彼不育之物，不御之飯，同一實也，俱由外來，故爲累害。

修身正行，才能來福；戰栗戒慎，不能避禍。禍福之至，幸不幸也，故曰：『得非己力，故謂之福；來不由我，故謂之禍。』不由我者，謂之何由？由鄉里與朝廷也。夫鄉里有三累，朝廷有三害；累生於鄉里，害發於朝廷；古今才洪行淑之人，遇此多矣。何謂三累三害？凡人操行，不能慎擇友；友同心恩篤，異心疎薄；疎薄怨恨，毀傷其行，一累也。人才高下，不能鈞同；同時並進，高者得榮，下者漸慙，毀傷其行，二累也。人之交遊，不能常歡，歡則相親，忿則疎遠，疎

遠怨恨，毀傷其行，三累也。位少人衆，仕者爭進，進者爭位，見將相毀，增加傳致，將昧不明，然納其言，一害也。將吏異好，清濁殊操，清吏增郁郁之白，舉涓涓之言，濁吏懷惡恨，徐求其過，因纖微之謗，被以罪罰，二害也。將或幸佐吏之身，納信其言，佐吏非清節，必拔人越次，迭失其意，毀之過度，清之仕，抗行伸志，遂爲所憎，毀傷於將，三害也。夫未進也，身被三累；已用也，身蒙三害。雖孔丘墨翟，不能自免，顏回曾參，不能全身也。

動百行，作萬事，嫉妬之人，隨而雲起，枳棘鉤掛容體，蠶蠶之黨，喙齧懷操，豈徒六哉？六者章章，世曾不見。夫不原士之操行，有三累；仕宦有三害，身完全者謂之潔，被毀謗者謂之辱，升官進者謂之善，位廢退者謂之惡，完全升進，幸也，而稱之毀謗廢退，不遇也，而譽之，用心若此，必爲三累三害也。論者既不知累害者，行賢潔也，以塗擗泥，以黑點繪，孰有知之？清受塵，白取垢，青蠅所好，常在練素，虞顛者危，勢豐者虧，頽墜之類，常在懸垂，屈平潔白，邑犬羣吠，吠所怪也。非俊疑僂，庸庸能也。偉士坐以俊傑之才，（坐讀爲生）招致羣吠之聲，夫如是，豈宜更勉奴下，循不肖哉？不肖奴下，非所勉也，豈宜更偶俗全身以弭謗哉？偶俗全身，則鄉原也；鄉原之人，行全無闕，非之無辜，刺之無刺也，此又孔子之所罪，孟軻之所愆也。

古賢美極，無以衛身，故循性行以俟累害者，果賢潔之人也。極累害之謗，而賢潔之實見焉。立賢潔之跡，毀謗之塵，安得不生？絃者思折伯牙之指，御者願摧王良之手，何則？欲專良善之名，惡彼之勝己也。是故魏女色豔，鄒袖鼻之朝，吳忠貞，無忌逐之，戚施彌妒，蘊除多佞，是故涇堂不灑塵，卑屋不蔽風，風衝之物不得育，長湍之岸不得峭，如是，牖里陳蔡可得知，而沈江蹈河也，以軼才取容媚於俗，求全功名於將，不遭鄧析之禍，取子胥之誅，幸矣。孟賁之尸，人不刃者，氣絕也；死灰百斛，人不沃者，光滅也。動身章智，顯光氣於世，奮志敖黨，立卓異於俗，固常通人所讒嫉也。以方心偶俗之累，求益反損，蓋孔子所以憂心，孟軻所以惆悵也。德鳴者招謗，爲士者多口，以休熾之聲，彌口舌之患，求無危傾之害，遠矣。滅倉之毀，未嘗絕也；公伯寮之毀，未嘗滅也。埵成丘山，奸爲江河，毫髮之善，小人不獨有也。以玷好言之，清受塵而白取垢，以毀謗言之，貞良見妬，高奇見忌，以過罪言之，忠言招患，高

行拒以不納言之玉有瑕而珠有毀焦陳留君兄名得宛州行完跡處無微不之毀及其嘗爲從事刺史焦廉細而不用夫未進也被三累已用也蒙三害雖孔丘墨翟不能自免顧回曾參不能全身也何則衆好純譽之人非真賢也公侯已下玉石雜糅賢士之行善惡相苞夫采玉者破石拔玉選土者棄惡取善夫如是累害之人真世以行指擿之者從何往哉

命祿篇

凡人遇偶及遭累害皆由命也。有死生壽夭之命。亦有貴賤貧富之命。自王公逮庶人。聖賢及下愚。凡有首目之類。含血之屬。莫不有命。命當貧賤。雖富貴之。猶涉禍患矣。命當富貴。雖貧賤之。猶逢福善矣。故命貴從賤地自達。命賤從富位自危。故夫富貴若有神助。貧賤若有鬼禍。命貴之人。俱學獨達。並仕獨遷。命富之人。俱求獨得。並爲獨成。貧賤反此。難達。難遷。難成。獲過受罪。疾病亡遺。失其富貴。貧賤矣。是故才高行厚。未必保其必富貴。智寡德薄。未可信其必貧賤。或時才高行厚。命惡廢而不進。知寡德薄。命善興而超踰。故夫臨事知愚。操行清濁。性與才也。仕宦貴賤。治產貧富。命與時也。命則不可勉。時則不可力。知者歸之於天。故坦蕩恬忽。雖其貧賤。使富貴若鑿溝伐薪。加勉力之趣。致強健之勢。鑿不休則溝深。斧不止則薪多。無命之人。皆得所願。安得貧賤凶危之患哉。然則或時溝未通而遇澹。薪未多而遇虎。仕宦不貴。治產不富。鑿溝遇澹。伐薪逢虎之類也。有才不得施。有智不得行。或施而功不立。或行而事不成。雖才智如孔子。猶無成立之功。

世俗見人節行高。則曰：『賢哲如此。何不貴？』見人謀慮深。則曰：『辯慧如此。何不富？』富貴有命。福祿不在賢哲與辯慧。故曰：富不可以籌筴得。貴不可以才能成。智慮深而無財。才能高而無官。懷銀紆紫。未必覆契之才。積金累玉。未必陶朱之智。或時下愚而千金。頑魯而典城。故官御同才。其貴殊命。治生鈎知。其富異祿。祿命有貧富。知不能豐殺。性命有貴賤。才不能進退。成王之才。不如周公。桓公之智。不若管仲。然成桓受尊命。而周管稟卑

秩也。案古人君希有不學於人臣，知博希有不爲父師，然而人君猶以無能處主位，人臣猶以鴻才爲廝役。故貴賤在命，不在智愚；貧富在祿，不在頑慧。世之論事者，以才高當爲將相，能下者宜爲農商；見智能之士，官位不至，怪而訾之曰：『是必毀於行操。』行操之士，亦怪毀之曰：『是必乏於才知。』殊不知才知行操雖高，官位富祿有命。才智之以以吉盛時，舉事而福至，人謂才智明審；凶衰禍來，謂愚闇不知。吉凶之命，盛衰之祿也。

白圭子貢轉貨致富，積累金玉，人謂術善學明。主父偃辱賤於齊，排擯不用，赴闕舉疏，遂用於漢，官至齊相。趙人徐樂亦上書與偃章會，上善其言，徵拜爲郎。人謂偃之才，樂之慧，非也。儒者明說一經，習之京師，明如匡、穉、主，深如趙、子都，初階甲乙之科，遷轉至郎博士，人謂經明才高所得，非也。而詭若范雎之於秦，明封爲應侯，蔡澤之說范雎，拜爲客卿，人謂范澤笑善所致，非也。皆命祿貴富善至之時也。孔子曰：『死生有命，富貴在天。』魯平公欲見孟子，嬖人臧倉毀孟子而止。孟子曰：『天也。』孔子聖人，孟子賢者，誨人安道，不失是非，稱言命者，有命審也。淮南書曰：『仁鄙在時，不在行，利害在命，不在智。』賈生曰：『天不可與期，道不可與謀，遠速有命，焉識其時。』高祖擊黥布，爲流矢所中，疾甚，呂后迎良醫，醫曰：『可治。』高祖罵之曰：『吾以布衣，提三尺劍，取天下，此非天命乎？命乃在天，雖扁鵲何益。』韓信與帝論兵，謂高祖曰：『陛下所謂天授，非智力所得。』揚子雲曰：『遇不遇，命也。』太史公曰：『富貴不違貧賤，貧賤不違富貴。』是謂從富貴爲貧賤，從貧賤爲富貴也。夫富貴不欲爲貧賤，貧賤自至；貧賤不求爲富貴，富貴自得也。

春夏囚死，秋冬旺相，非能爲之也。日朝出而暮入，非求之也。天道自然，代王自代，入爲文帝，周亞夫以庶子爲條侯，此時代王非太子，亞夫非適嗣，逢時遇會，卓然卒至。命貧以力勤致富，富至而死；命賤以才能取貴，貴至而免。才力而致富貴，命祿不能奉持，猶器之盈量，手之持重也。器受一升，一升則平；受之如過一升，則滿溢也。手舉一鈞，以一鈞則平；舉之過一鈞，則墮仆矣。前世明是非，諱之於命也；命審然也。信命者，則可幽居俟時，不須勞神苦形求索之也。猶珠玉之在山澤，天命難知，人不計索，雖有厚命，猶不自信，故必求之也。如自知，雖逢富貴，終

不得難。故曰力勝貧，慎勝禍，勉才勤事以致富，砥才明操以取貴。廢時失務，欲望富貴，不可得也。雖云有命，當須索之。如信命不求，謂當自至，可不假而自得，不作而自成，不行而自至。夫命富之人，筋力自強，命貴之人，才智自高。若千里之馬，頭目蹄足自相副也。有求而不得者矣，未必不求而得之者也。精學不求貴，貴自至矣。力作不求富，富自到矣。富貴之福，不可求致；貧賤之禍，不可苟除也。由此言之，有富貴之命，不求自得。信命者曰：『自知吉，不待求也；天命吉厚，不求自得；天命凶厚，求之無益。』夫物不求而自生，則人亦有不求貴而貴者矣。人情有不教而自善者，有教而終不善者矣。天性猶命也。越王翳逃山中，至誠不願自冀得代。越人燻其穴，遂不得免，疆立爲君。而天命當然，雖逃避之，終不得離，故六不求自得之貴歟。

氣壽篇

凡人稟命有二品：一曰所當觸值之命，二曰強弱壽夭之命。所當觸值，謂兵燒壓溺也；強弱壽夭，謂稟氣渥薄也。兵燒壓溺，遭以所稟爲命，未必有審期也。若夫強弱夭壽，以百爲數，不至百者，氣自不足也。夫稟氣渥則其體強，體強則其命長；氣薄則其體弱，體弱則命短，命短則多病。壽短始生而死，未產而傷，稟之薄弱也。渥強之人，不卒其壽。若夫無所遭遇，虛后困劣，短氣而死，此稟之薄，用之竭也。此與始生而死，未產而傷，一命也。皆由稟氣不足，不自致於百也。人之稟氣，或充實而堅強，或虛劣而軟弱。充實堅強，其年壽；虛劣軟弱，失棄其身。天地生物，物有不遂；父母生子，子有不就。物實有爲實枯死而墮，人有爲兒天命而傷。使實不枯，亦至滿歲，使兒不傷，亦至百年。

然爲實兒而死枯者，稟氣薄，則雖形體完，其虛劣氣少，不能充也。兒生號啼之聲，鴻朗高暢者壽，嘶喝濕下者夭。何則？稟壽夭之命，以氣多少爲主性也。婦人疏字者子活，數乳者子死。何則？疏而氣渥，子堅強，數而氣薄，子軟弱也。懷子而前已產子死，則謂所懷不活，名之曰懷，其意以爲已產之子死，故感傷之，子失其性矣。所產子死，所

懷子凶者，字乳亟數，氣薄不能成也。雖成人形體，則易感傷，獨先疾病，病獨不治。百歲之命，是其正也；不能滿百者，雖非正，猶爲命也。譬猶人形一丈，正形也，各男子爲丈夫，尊公嫗爲丈人，不滿丈者，失其正也。雖失其正，猶乃爲形也。夫形不可以不滿丈之故，謂之非形；猶命不可以不滿百之故，謂之非命也。非天有長短之命，而人各有稟受也。由此言之，人受氣於天，卒與不卒同也。語曰：『國王不成，其弊可以霸。』霸者，王之弊也。霸本當至於王，猶壽當至於百也。不能或王，退而爲霸；不能至百，淪而爲王。王霸同一業，優劣異名，壽夭或一氣，長短殊數。何以知不滿百爲夭者，百歲之命也，以其形體小大長短，同一等也。百歲之身，五十之體，無以異也。身體不異，血氣不殊，鳥獸與人異形，故其年壽與人殊數。

何以明人年以百爲壽也？世間有矣。儒者說曰：『太平之時，人民侗長，百歲左右。』氣和之所生也。堯典曰：『朕在位七十載，求禪得舜。』舜徵三十歲在位，堯退而老，八歲而終，至姒落九十八歲。未在位之時，必已成，人今計數百有餘年矣。又曰：『舜生三十徵庸，三十在位，五十載陟方乃死。』適百歲矣。文王謂武王曰：『我百爾九十，吾與爾三焉。』文王九十七而薨，武王九十三而崩，周公、武王之弟也，兄弟相差不過十年。武王崩，周公居攝七年，復政退老，出入百歲矣。邵公，周公之兄也，至康王之時，尙爲太保，出入百有餘歲矣。聖人稟和氣，故年命得正數，氣和爲治平，故太平之世多長壽人。百歲之壽，蓋人年之正數也。猶物至秋而死，物命之正期也。物先秋後秋，則亦如人死，或增百歲，或減百也。先秋後秋爲期，增百減百爲數。物或出地而死，猶人始生而夭也。物或踰秋不死，亦如人年多度百至於三百也。傳稱老子二百餘歲，邵公百八十，高宗享國百年，周穆王享國百年，并未享國之時，皆出百三十四十歲矣。

幸偶篇

凡人操行有賢有愚，及遭禍福，有幸有不幸，寧事有是有非，及得實罰，有偶有不偶。並時遭兵，害者不中；同日

被殺者不傷。中傷未必惡，隱蔽未必善；隱蔽幸，中傷不幸。俱欲納忠，或賞或罰，並欲有益，或信或疑，賞而信者未必真，罰而疑者未必偽；賞信者偏，罰疑不偏也。

孔子門徒七十有餘，顏回蚤夭，孔子曰：『不幸短命死矣！』短命稱不幸，得知長命者幸也，短命者不幸也。服聖賢之道，韓仁義之業，宜蒙福祐，伯牛有疾，亦復顏回之類，俱不幸也。蟻蟻行於地，人舉足而涉之，足所履，蟻蟻卒死，足所不蹈，全活不傷。火燔野草，車轍所致，火所不燔，俗或喜之，名曰幸草。夫足所不蹈，火所不及，未必善也，舉火行有適然也。由是以論，癘疽之發，亦一實也。氣結關積，聚爲癰疽，創流血出膿，豈癘疽所發身之善穴哉？營衛之行，遇不通也。蜘蛛結網，蜚蟲過之，或脫或獲；獵者張羅，百獸羣擾，或得或失；漁者罾江湖之魚，或存或亡，或奸盜大辟而不知，或罰贖小罪而發覺，災氣加入，亦此類也。不幸遭觸而死，幸者免脫而生，不幸者不徵幸也。孔子曰：『人之生也直，罔之生也幸。』則夫順道而觸者爲不幸矣。立巖牆之下，爲壞所壓，蹈圯岸之上，爲崩所墜，輕過無端，故爲不幸。魯城門久朽欲墮，孔子適之，趨而疾行。左右曰：『久矣！』孔子曰：『惡其久也。』孔子戒慎已甚，如過遭壞，可謂不幸也。故孔子曰：『君子有不幸而無有幸，小人有幸而無不幸。』又曰：『君子處易以俟命，小人行險以徵倖。』倖幸之徒，閭閻孺之輩，無德薄才，以色稱媚，不宜愛而受寵，不當親而得附，非道理之宜，故太史公爲之作傳。邪人反道而受恩寵，與此同科，故合其名謂之倖幸。無德受恩，無過遇禍，同一實也。俱稟氣，或獨爲人，或爲禽獸，並爲人，或貴或賤，或貧或富，富或累金，貧或乞食，貴至封侯，賤至奴僕，非天稟施有左右也，人物受性有厚薄也。俱行道德，禍福不均，並爲仁義，利害不同。晉文修文德，徐偃行仁義，文公以賞賜，偃王以破滅，魯人爲父報仇，安行不走，追者捨之，牛缺爲盜所奪，和意不恐，盜還殺之。文德與仁義同，不走與不恐等，然文公魯人得福，偃王牛缺得禍者，文公魯人幸，而偃王牛缺不幸也。

韓昭侯醉臥而褻，典冠加之，以衣覺而問之，知典冠愛己也，以越職之故，加之罪，衛之驂乘者，見御者之過，從後呼車，有救危之義，不救其罪。夫驂乘之呼車，典冠之加衣，同一意也，加衣恐主之褻，呼車恐君之危，仁惠之

情，俱發於心。然而於韓有罪，於衛爲忘；驂乘偶，典冠不偶也。非唯人行，物亦有之。長數仞之竹，大連抱之木，工技之人，裁而用之。或成器而見舉持，或遺材而遭廢棄，非工技之人有愛憎也。刀斧如有偶然也。蒸穀爲飯，讓飯爲酒。酒之成也，甘苦異味，飯之熟也，剛柔殊和，非庖廚人有意異也。手指之調有偶適也。調飯也，殊篋而居。甘酒也，異器而處。蟲隨一器，酒棄不飲；風涉一篋，飯捐不食。夫百草之類，皆有補益，遭醫人採掇，成爲良藥；或遭枯澤，爲火所鑠。

等之金也，或爲劍戟，或爲鋒鉞；同之木也，或梁於宮，或柱於橋；俱之火也，或灤脂燭，或燔枯草；均之土也，或基殿堂，或塗軒戶，皆之水也，或凝鼎釜，或灤腐臭。物善惡同，遭爲人用，其不幸偶，猶可傷痛，況含精氣之徒乎？虞舜聖人也，在世宜蒙全安之福；父頑母嚚，弟象敖狂，無過見憎，不惡而得罪，不幸甚矣。孔子，舜之次也，生無尺土，周流應聘，削迹絕糧，俱以聖才，並不幸偶；舜尙遭堯受禪，孔子已死於闕里。以聖人之才，猶不幸偶，庸人之中，被不幸偶，禍必衆多矣！

人命義篇

墨家之論，以爲人死無命；儒家之議，以爲人死有命。言有命者，見子夏言死生有命，富貴在天。言無命者，聞墨陽之都，一宿沈而爲湖；秦將白起坑趙降卒於長平之下，四十萬衆，同時皆死；春秋之時，敗績之軍，死者蔽草，尸且萬數；饑饉之歲，餓者滿道，瘟疫疫癘，千戶滅門。如必有命，何其秦齊同也？言有命者曰：『夫天下之大，人民之衆，一歷陽之都，一長平之坑，同命俱死，未可怪也。命當溺死，故相聚於歷陽；命當壓死，故相積於長平。猶高祖初起，相工入豐沛之邦，多封侯之人矣；未必老少男女，俱貴而有相也。卓犖時見，往往皆然。而歷陽之都，男女俱沒；長平之坑，老少並陷，萬數之中，必有長命未當死之人；遭時衰微，兵革並起，不得終其壽。人命有長短，時有盛衰，衰則疾病，被災蒙禍之數也。宋衛陳鄭同日並災，四國之民，必有祿盛未嘗衰之人；然而俱災，國稱饑之也。故國

命勝人命，壽命勝祿命。人有壽夭之相，亦有貧富貴賤之法，俱見於體。故壽命偕短，皆稟於天；骨法善惡，皆見於體。命當天折，雖稟異行，終不得長；祿當貧賤，雖有善性，終不得遂。項羽且死，顧謂其徒曰：『吾敗乃命，非用兵之過。』此言實也。實者項羽用兵過於高祖，高祖之起，有天命焉。國命繫於衆星，列宿吉凶，國有禍福；衆星推移，人有盛衰。

人之有吉凶，猶歲之有豐耗，命有衰盛，物有貴賤。一歲之中，一貴一賤；一壽之間，一衰一盛。物之貴賤，不在豐耗；人之盛衰，不在賢愚。子夏曰：『死生有命，富貴在天。』而不曰『死生在天，富貴有命』者，何則？死生者，無象在天，以性爲主，稟得堅強之性，則氣渥厚而體堅強；堅強則壽命長，壽命長則不夭死。稟性軟弱者，氣少泊而性羸瘵，羸瘵則壽命短，短則蚤死。故言有命，命則性也。至於富貴，所稟猶性。所稟之氣，得衆星之精，衆星在天，天有其象，得富貴象則富貴，得貧賤象則貧賤，故曰：『在天。』在天如何？天有百官，有衆星。天施氣而衆星布精，天所施氣，衆星之氣，在其中矣。人稟氣而生，含氣而長，得貴則貴，得賤則賤，貴或秩有高下，富或貴有多少，皆星位尊卑小大之所授也。故天有百官，天有衆星，地有萬民，五帝三王之精，天有王梁造父，人亦有之，稟受其氣，故巧於御。

傳曰：『詎命有三：一曰正命，二曰隨命，三曰遭命。』正命謂本稟之自得吉也。性然骨善，故不假操行以求福，而吉自至，故曰正命。隨命者，戮力操行而吉福至，縱情施欲而凶禍到，故曰隨命。遭命者，行善得惡，非所冀望，逢遭於外而得凶禍，故曰遭命。凡人受命，在父母施氣之時，已得吉凶矣。夫性與命異，或性善而命凶，或性惡而命吉。操行善惡者，性也；禍福吉凶者，命也。或行善而得禍，是性善而命凶；或行惡而得福，是性惡而命吉也。性自有善惡，命自有吉凶。使命吉之人，雖不行善，未必無福；凶命之人，雖勉操行，未必無禍。孟子曰：『求之有道，得之有命。』性善乃能求之，命善乃能得之。性善命凶，求之不能得也。行惡者，禍隨而至，而盜跖莊蹻，橫行天下，聚黨數千，攻奪人物，斷斬人身，無道甚矣！宜遇其禍，乃以壽終。夫如是，隨命之說，安所驗乎？遭命者，行善於內，遭凶於外。

也。若顏淵伯牛之徒，如何遭凶。顏淵伯牛，行善者也，當得隨命，福祐隨至，何故遭凶。顏淵困於學，以才自殺。伯牛空居而遭惡疾，及屈平伍員之徒，盡忠輔上，竭王臣之節，而楚放其身，吳烹其尸。行善當得隨命之福，乃觸隨命之禍，何哉？言隨命則無遭命，言遭命則無隨命。儒者三命之說，竟何所定？且命在初生，骨表著見。今言隨操行而至，此命在未不在本也。則富貴貧賤，皆在初稟之時，不在長大之後，隨操行而至也。正命者至百而死，隨命者五十而死，遭命者初稟氣時遭凶惡也。謂姪姬之時，遭得惡也。故遭雷雨之變，長大夭死。

此謂三命，亦有二性：有正，有隨，有遭。正者，稟五常之性也；隨者，隨父母之性也；遭者，遭得惡物象之故也。故姪姬食兔，子生缺臂。月令曰：『是月也，雷將發聲。』有不戒其容者，生子不備，必有大凶。瘖聾跛盲，氣遭胎傷，故受性狂悖。羊舌食我，初生之時，聲似豺狼，長大性惡，被禍而死。在母身時，遭受此性，丹朱商均之類是也。性命在本，故禮有胎教之法：子在身時，席不正不坐，割不正不食，非正色目不視，非正聲耳不聽，及長，置以賢師良傅，教君臣父子之道，賢不肖在此時矣。受氣時，母不謹慎，心妄慮邪，則子長大，狂悖不循，形體醜惡。素女對黃帝陳五女之法，非徒傷父母之身，乃又賊男女之性。人有命有祿，有遭遇，有幸偶。命者，貧富貴賤也；祿者，盛衰興廢也。以命當富貴，遭當盛之祿，常安不危；以命當貧賤，遇當衰之祿，則禍殃乃至，常苦不樂。遭者，遭逢非常之變，若成湯囚夏臺，文王厄羑里矣。以聖明之德，而有囚厄之變，可謂遭矣。變雖甚大，命善祿盛，變不為害，故稱遭逢之禍。墨子所遭，可謂大矣。直兵指胸，白刃加頸，蹈死亡之地，當劍戟之鋒，執死得生還，命善祿盛，遭逢之禍，不能害也。墨子所都，長平之坑，其中必有命善祿盛之人，一宿同填而死者，遭逢之禍，不能却也。譬猶水火相更也，水盛勝火，火盛勝水，過其主而用也。雖有善命盛祿，不遇知己之主，不得效驗。幸者謂所遭觸得善惡也。獲罪得脫，幸也；無罪見拘，不幸也；執拘未久，蒙令得出，命善祿盛，天災之禍，不能傷也。偶也。謂事君也，以道事君，君善其言，遂用其身，偶也；行與主乖，退而遠，不偶也；退遠未久，上官錄召，命善祿盛，不偶之害，不能留也。故夫遭遇幸偶，或與命祿并，或與命離。遭遇幸偶，遂以成完；遭遇不幸偶，遂以敗傷，是與命并者也。中不遂成，善惡惡惡，若是與命離。

離者也。故人之在世，有吉凶之性命，有盛衰之禍福，重以遭遇幸偶之逢，獲從生死而卒其善惡之行，得其胸中之志，希矣。

無形篇

人稟元氣於天，各受壽夭之命，以立長短之形，猶陶者用土爲簋廉，冶者用銅爲杵杆矣。器形已成，不可小大；人體已定，不可減增。用氣爲性，性成命定，體氣與形骸相抱，生死與期節相須，形不可變化，命不可減加。以陶冶言之，人命短長，可得論也。或難曰：『陶者用填爲簋廉，簋廉一成，遂至毀敗，不可復變。若夫冶者用銅爲杵杆，杵杆雖已成器，杵可復鑠，杵可得爲尊，尊不可爲簋。人稟氣於天，雖各受壽夭之命，立以形體，如得善道神藥，形可變化，命可加增。』曰：冶者變更成器，須先以火煅灼，乃可大小短長。人冀延年，欲比於銅器，宜有若鍾炭之化，乃易形，形易壽亦可增。人何由變易其形，便如火鑠銅器乎？禮曰：『水潦降，不獻魚鱉。』何則？雨水暴下，蟲蛇變化，化爲魚鱉，離本真暫變之蟲，臣子謹慎，故不敢獻。人願身之變，冀若蟲蛇之化乎？夫蟲蛇未化者，不若不化者，蟲蛇未化，人不食也；化爲魚鱉，人則食之。食則壽命乃短，非所冀也。歲月推移，氣變物類，蝦蟆爲鶩，雀爲蜃蛤。人願身之變，冀若鶩與蜃蛤魚鱉之類也。人穀捕蜃蛤，得者食之，雖身之不化，壽命不得長，非所冀也。魯公牛哀癯疾，七日變而成虎，蜃蜃羽山，化爲黃能（能音奴來反）。願身變者，冀牛哀之爲虎，蜃之爲能乎？則夫虎能之壽，不能過人。天地之性，人最爲貴，變人之形，更爲禽獸，非所冀也。凡可冀者，以老翁變爲嬰兒，其次白髮復黑，齒落復生，身氣丁強，超乘不衰，乃可貴也。徒變其形，壽命不延，其何益哉？

且物之變隨氣，若應政治，有所象爲，非天所欲壽長之故，變易其形也；又非得神草珍藥食之而變化也。人恆服藥固壽，能增加本性，益其身年也。遭時變化，非天之正氣，人所受之真性也。天地不變，日月不易，星辰不沒，正也。人受正氣，故體不變。時或男化爲女，女化爲男，由高岸爲谷，深谷爲陵也。應政爲變，爲政變，非常性也。漢興，老

父授張良書，已化爲石；是以石之精爲漢興之瑞也。猶河精爲人持璧與秦使者，秦亡之徵也。蠶食桑老，績而爲繭，繭又化而爲蛾；蛾有兩翼，變去蠶形。蟬蟪化爲復育，復育轉而爲蟬，蟬生兩翼，不類蟬蟪。凡諸命蟬蟪之類，多變其形，易其體；至人獨不變者，稟得正也。生爲嬰兒，長爲丈夫，老爲父翁，從生至死，未嘗變更者，天性然也。天性不變者，不可令復變；變者，不可不變。若夫變者之壽，不若不變者；人欲變其形，輒增益其年可也。如徒變其形而年不增，則蟬之類也；何謂人願之？龍之爲蟲，一存一亡，一短一長，龍之爲性也，變化斯須，輒復非常。由此言之，人物也，受不變之形，不可變更；年不可增減。傳稱高宗有桑穀之異，悔過反政，享福百年，是虛也。傳言宋景公出三筭言，營惑却三舍，延年二十一載，是又虛也。又言秦繆公有明德，上帝賜之十九年，是又虛也。稱赤松王喬好道爲仙，度世不死，是又虛也。假令人生立形謂之甲，終老至死，常守甲形；如好道爲仙，未有使甲變爲乙者也。夫形不可變更，年不可減增。何則？形氣，天性也。形爲春，氣爲夏。人以氣爲壽，形隨氣爲動。氣性不均，則於體不同。牛壽半馬，馬壽半人，然則牛馬之形，與人異矣。稟牛馬之形，當自得牛馬之壽。牛馬之不變爲人，則年壽亦短於人。世稱高宗之徒，不言其身形變異，而徒言其增延年壽，故有信矣。

形之「包」血氣也，猶囊之貯粟米也。一石囊之高，大亦適一石。如損益粟米，囊亦增減。人以氣爲壽，氣猶粟米，形猶囊也。增減其壽，亦當增減其身，形安得如故？如以人形與囊異，氣與粟米殊，更以苞瓜喻之。苞瓜之汁，猶人之血也，其肌膚肉也。試令人損益苞瓜之汁，令其形如故，耐爲之乎？人不耐損益苞瓜之汁，天安耐增減人之年？人年不可增減，高宗之徒，誰益之者，而云增加？如言高宗之徒，形體變易，其年亦增，乃可信也。今言年增，不言其體變，未可信也。何則？人稟氣於天，氣成而形立，則命相須以至，終死形不可變化，年亦不可增加，以何驗之？人生能行，死則僵仆，死則氣滅，形消而壞。稟生人形，不可得變，其年安可增？人生至老身變者，髮與膚也。人少則髮黑，老則髮白，白久則黃。髮之變形，非變也。人少則膚白，老則膚黑，黑久則皺，若有垢矣。髮黃而膚爲垢，故禮曰：「黃者無疆。」髮變異，故人老壽遲死。骨肉不可變更，壽益則死矣。五行之物，可變改者，唯土也。疑以爲馬，變以爲

人是謂未入陶竈更火者也。如使成器，入竈更火，牢堅不可復變，今人以爲天地所陶冶矣。形已成定，何可復更也。圖仙人之形，體生毛，臂變爲翼，行於雲，則年增矣，千歲不死，此虛圖也。世有虛語，亦有虛圖，假使之然，蟬蛾之類，非真正人也。海外三十五國，有毛民羽民，羽則翼矣。毛羽之民，土形所出，非言爲道，身生毛羽也。禹益見西王母，不言有毛羽，不死之民，亦在外國，不言有毛羽。毛羽之民，不言不死；不死之民，不言毛羽。毛羽未可以效不死；仙人之有翼，安足以驗長壽乎？

牽性篇

論人之性，定有善有惡。其善者，固自善矣；其惡者，故可教告率勉，使之爲善。凡人君父，審觀臣子之性，善則養育勸率，無令近惡；近惡則輔保禁防，令漸於善。善漸於惡，惡化於善，成爲性行。召公戒成王曰：『令王初服厥命，於戲！若生子，罔不在厥初。』生子謂十五，子初生，意於善，終以善。初生，意於惡，終以惡。詩曰：『彼姝者子，何以與之。』傳言譬猶練絲，染之藍則青，染之丹則赤。十五之子，其猶絲也。其有所漸化，爲善惡，猶藍丹之染練絲，使之爲青赤也。青赤一成，真色無異。是故楊子哭歧道，墨子哭練絲也。蓋傷離本不可復變也。人之性善，可變爲惡，惡可變爲善，猶此類也。蓬生麻間，不扶自直，白紗入緇，不練自黑。彼蓬之性不直，紗之質不黑，麻扶緇染，使之直黑。夫人之性猶蓬紗也，在所漸染而善惡變矣。王良造父，稱爲善御，不能使不良爲良也。如徒能御良，其不良者不能馴服，此則驅工庸師服馴，技能何奇，而世稱之。故曰：『王良登車，馬不罷驚；堯舜爲政，民無狂愚。』傳曰：堯舜之民，可比屋而封；桀紂之民，可比屋而誅。斯民也，三代所以直道而行也。聖主之民如彼，惡主之民如此，竟在化不在性也。聞伯夷之風者，貪夫廉而懦夫有立志；聞柳下惠之風者，薄夫敦而鄙夫寬。徒聞風名，猶或變節，况親接形面，相教告乎？孔門弟子七十之徒，皆任卿相之用，被服聖教，文才雕琢，知能十倍，教訓之功，而漸漬之力也。未入孔子之門時，閭巷常庸無奇，其尤甚不率者，唯子路也。世稱子路無恆之庸人，未入孔門時，戴雞佩豚，勇

猛無禮；聞誦讀之聲，搖雞奮豚，揚膏吻之音，聒賢聖之耳，惡至甚矣。孔子引而教之，漸漬磨礪，圖導牖進，猛氣消損，驕節屈折，卒能政事，序在四科。斯蓋變性使惡爲善之明效也。

夫肥沃境塢，土地之本性也。肥而沃者性美，樹稼豐茂。境而塢者性惡，深耕細鋤，厚加糞壤，勉致人功，以助地力，其樹稼與彼肥沃者相似類也。地之高下亦如此焉，以鑿鍾鑿地，以埤增下，則其下與高者齊。如復增鍾鍾，則夫下者不徒齊者也，反更爲高，而其高者反爲下。使人之性有善有惡，「使」彼地有高有下，勉致其教令之善，則將善者同之矣。善以化溼，醖其教令，變更爲善，善則且更宜反過於往善，猶下地增加鍾鍾，更崇於高地也。『賜不受命而貨殖焉。』賜本不受天之富命，所加貨財積聚，爲世富人者，得貨殖之術也。夫得其術，雖不受命，猶自益饒富，性惡之人，亦不稟天善性，得聖人之教，志行變化，世稱利劍有千金之價，棠谿魚腸之屬，龍泉太阿之輩，其本鋌山中之恆鐵也；冶工鍛鍊，成爲鋒利。豈利劍之鍛與鍊，乃異質哉？工良師巧，鍊一數至也。試取東下直一金之劍，更熱鍛鍊，足其火，齊其銍，猶千金之劍也。夫鐵石天然，尙爲鍛鍊者變易故質，況人含五常之性，賢聖未之熱鍛鍊耳，奚患性之不善哉？古貴良醫者，能知篤劇之病所從生起，而以針藥治而已之。如徒知病之名而坐觀之，何以爲奇？夫人有不善，則乃性命之疾也，無其教治而欲令變更，豈不難哉？

天道有真偽，真者固自與天相應，僞者人加知巧，亦與真者，無以異也。何以驗之？禹貢曰『璆琳琅玕』者，此則土地所生真玉珠也。然而道人消燦五石，作五色之玉，比之真玉，光不殊別，兼魚蚌之珠，與禹貢璆琳皆真玉珠也。然而隨侯以藥作珠，精耀如真，道士之教至，知巧之意加也。陽遂取火於天，五月丙午日中之時，消鍊五石，鑄以爲器，磨礪生光，仰以嚮日，則火來至此，真取火之道也。今妄以刀劍之鉤月，摩拭朗白，仰以嚮日，亦得火焉。夫鉤月，非陽遂也，所以耐取火者，摩拭之所致也。今夫性惡之人，使與性善者同類乎，可率勉之，令其爲善，使之異類乎，亦可令與道人之所鑄玉，隨侯之所作珠，人之所摩刀劍鉤石焉，教導以學，漸漬以德，亦將日有仁義之操。

黃帝與炎帝爭爲天子，教熊羆貔虎以戰於阪泉之野；三戰得志，炎帝敗績，堯以天下讓舜，鯀爲諸侯，欲得三公而堯不聽。怒甚，猛獸欲以爲亂，比獸之角，可以爲城，羣尾以爲旌，奮心盛氣，阻戰爲強。夫禽獸與人殊形，猶可命戰，況人同類乎？推此以論，百獸率舞，潭魚出聽，六馬仰秣，不復疑矣。異類以殊爲同，同類以鈞爲異，所由在於物，在於人也。凡含血氣者，教之所以異化也。三苗之民，或賢或不肖，堯舜齊之，恩教加也。楚越之人，處莊嶽之間，經歷歲月，變爲舒緩，風俗移也。故曰：『齊舒緩，秦慢易，楚促急，燕蘧投。』以莊嶽言之，四國之民，更相出入，久居單處，性必變易。夫性惡者，心比木石，木石猶爲人用，况非木石，在君子之迹，庶幾可見。

有癡狂之疾，歌啼於路，不曉東西，不睹燥溼，不覺疾病，不知饑飽，性已毀傷，不可如何；前無所觀，却無所畏也。是故王法不廢學校之官，不除獄理之吏，欲令凡衆見禮義之教，學校勉其前，法禁防其後，使丹朱之志，亦將可勉。何以驗之？三軍之士，非能制也，勇將率勉，視死如歸。且圖廬嘗試其士於湖之側，皆加刃於肩，血流至地，勾踐亦試其士於寢宮之庭，赴火死者，不可勝數。夫刃火，非人性之所貪也，二主激率，念不顧生，是故軍之法輕刺血。孟賁勇也，聞軍令懼，是故叔孫通制定禮儀，拔劍爭功之臣，奉禮拜伏，初驕倨而後遜順，教威德變易性也。不患性惡，患其不服聖教，自遇而以生禍也。豆麥之種，與稻粱殊，然食能去饑，小人君子，稟性異類乎？譬諸五穀，皆爲用，實不異而效殊者，稟氣有厚泊，故性有善惡也。殘則授不仁之氣，泊而怒則稟勇渥也。仁泊則戾而少愈，勇渥則猛而無義，而又和氣不足，喜怒失時，計慮輕惡，妄行之人，罪故爲惡。

人受五常含五臟，皆具於身。稟之泊少，故其操行不及善人，猶或厚或泊也。非厚與泊殊其稟也，稟蘊多少使之然也。是故酒之泊厚，同一醜蘊，人之善惡，共一元氣，氣有少多，故性有賢愚。西門豹急，佩章以自緩，宣安千緩，帶弦以自促，急之與緩，俱失中和，然而韋弦附身，成爲完具之人，能納韋弦之教，補接不足，則豹安千之名可得參也。貧劣宅屋，不具牆壁宇，違人指譬之，如財貨富愈，起屋築牆，以自蔽障，爲之具宅，人弗復非，魏之行田百畝，鄰獨二百，西門豹灌以澮水，成爲膏腴，則畝收一鍾，夫人之質猶鄰田，道教猶澮水也。患不能化，不患人性之難。

率也。雒陽城中之道無水，水工激上雒中之水，日夜馳流，水工之功也。由此言之，道近君子，而仁義之道數加於身。孟母之徙宅，蓋得其驗。人間之水污濁，在野外者清潔，俱爲一水，源從天錕，或濁或清，所在之勢使之然也。南越王趙佗，本漢賢人也，化南夷之俗，背畔王制，椎髻箕坐，好之若性。陸賈說以漢德，懼以聖威，蹶然起坐，心覺改悔，奉制稱藩。其於椎髻箕坐也，惡之若性，前則若彼，後則若此。由此言之，亦在於教，不獨在性也。

吉驗篇

凡人稟貴命於天，必有吉驗見於地；見於地，故有天命也。驗見非一，或以人物，或以禳祥，或以光氣。傳言黃帝姁二十月而生，生而神靈，弱而能言，長大率諸侯，諸侯歸之，教熊羆戰，以伐炎帝。炎帝敗績，性與人異，故在母之身，留多十月，命當爲帝，故能教物，物爲之使。堯體就之如日，望之若雲，洪水滔天，蛇龍爲害，堯使禹治水，驅蛇龍，水治東流，蛇龍潛處，有殊奇之骨，故有詭異之驗，有神靈之命，故有驗物之效。天命當貴，故從唐侯入嗣帝后之位。舜未逢堯，鯀在側陋，瞽瞍與象謀欲殺之，使之完廬，火燔其下，令之浚井，土掩其上。舜得下廬，不被火災，穿井旁出，不觸土窖。（一有「故」字）堯聞徵用，試之於職，官治職修，事無廢亂，使入大麓之野，虎狼不搏，螭蛇不噬，逢烈風疾雨，行不迷惑。夫人欲殺之，不能害之；毒螫之野，禽蟲不能傷，卒受帝命，踐天子祚。后稷之時，履大人跡，或言衣帝服，之服坐息，帝服之虞，姁身怪而棄之隘巷，牛馬不敢踐之，實之冰上，鳥以翼覆之，稷集其身，母知其神怪，乃收養之。長大佐堯，位至司馬。鳥孫王號昆莫，匈奴攻殺其父而昆莫生，棄於野，鳥啣肉往食之。單于怪之，以爲神而收長，及壯使兵數有功，單于乃復以其父之民予昆莫，命令長守於西城。夫后稷不當棄，故牛馬不踐，鳥以羽翼覆愛其身，昆莫不當死，故鳥啣肉就而食之。

北夷曩離國王，侍婢有娠，王欲殺之。婢對曰：「有氣大如雞子，從天是下，我故有娠。」後產子，捐於猗狹中，猗狹以口氣噓之不死；復徙置馬欄中，欲使馬藉殺之，馬復以口氣噓之不死。王疑以爲天子，令其母收取，取奴畜之，名

東明令牧牛馬。東明善射，王恐奪其國也，欲殺之。東明走，南至洹水，以弓擊水，魚驚浮爲橋。東明得渡，魚驚解散，追兵不得渡。因都王夫餘，故北夷有夫餘國焉。東明之母初妊時，見氣從天下，及生棄之，猪馬以氣噓之而生之。長大，王欲殺之，以弓擊水，魚驚爲橋，天命不當死，故有猪馬之救命。當都王夫餘，故有魚驚爲橋之助也。伊尹且生之時，其母夢人爲己曰：『日出水，疾東走。』母明旦視曰：『日出水，』既而東走十里，顧其鄉皆爲水矣。伊尹命不當沒，故其母感夢而走。推此以論，歷陽之鄰，其策命若伊尹之類，必有先時感動在他地之效。齊襄公之難，桓公爲公子，與子糾爭立。管仲輔子糾，鮑叔佐桓公。管仲與桓公爭，引弓射之，中其帶鉤。夫人身長七尺，帶約其要，鉤挂於帶，在身所掩，不過一寸之內，既微小難中，又滑澤鉅靡，鋒刃中鉤者，莫不蹉跌。管仲射之，正中其鉤中，矢觸因落，不跌中旁肉，命當富貴，有神靈之助，故有射鉤不中之驗。

楚共王有五子，子招子圉子干子皙棄疾。五人皆有寵，共王無適立，乃望祭山川，請神決之。乃與巴姬埋璧於太室之庭，令五子齊而入拜。康王跨之，子圉肘加焉，子干子皙皆遠之。棄疾弱，抱而入，再拜皆壓紐。故共王死，招爲康王，至子失之，國爲靈王。及身而弑，子干爲王十有餘日，子皙不立，又懼誅死，皆絕無後。棄疾後立，竟續趙祀，如其神符。共王日之長短，與拜去璧遠近相應也。夫璧在地中，五子不知，相隨入拜，遠近不同，壓紐若神將教臨之矣。晉屠岸賈作難，誅趙盾之子朔死，其妻有遺腹子。及岸賈聞之，索於宮。母置兒於褥中，祝曰：『趙氏宗滅乎，若當啼，卽不滅，若無聲。』及索之而終不啼，遂脫得活。程嬰齊負之，匿於山中。至景公時，韓厥言於景公，景公乃與韓厥共立趙孤，續趙氏祀，是爲文子。當趙孤子無聲，若有掩其口者矣。由此言之，趙文子立，命也。

高皇帝母曰劉媪，嘗息大澤之陂，夢與神遇，是時雷電晦冥，蛟龍在上。及生而有美，（一有「質」字）性好用酒，嘗從王姬武負黃酒，飲醉止臥。媪負見其身常有神怪，每留飲酒，酒售數倍。後行澤中，手斬大蛇。一姬當道而哭云：『赤帝子殺吾子。』此驗既著聞矣。秦始皇帝常曰：『東南有天子氣。』於是東游以厭當之。——高祖之氣也。與呂后隱於芒碭山澤間。呂后與人求之，見其上常有氣直起，往求輒得其處。後與項羽約，先入秦關，王

之。高祖先至，項羽怨恨。范增曰：「吾令人望其氣，氣皆爲龍，成五采，此皆天子之氣也，急擊之。」高祖往謝項羽，與亞父謀殺高祖，使項莊拔劍起舞。項伯知之，因與項莊俱起，每劍加高祖之上。項伯輒以身覆高祖之身，劍遂不得下殺，勢不得成。會有張良樊噲之救，卒得免脫，遂王天下。初，妊身有蛟龍之祥，既生，酒舍見雲起之怪，夜行斬蛇，蛇煙悲哭。始皇呂后望見光氣，項羽謀殺項伯，爲蔽，謀遂不成，得良噲。蓋富貴之驗，氣見而物應，人助輔援也。

竇太后弟名曰廣國，年四五歲，家貧爲人所掠賣，其家不知其所在。傳賣十餘家，至宜陽，爲其主人入山作炭，暮寒臥炭下，百餘人炭崩盡壓死，廣國獨得脫，自卜數日當爲侯，從其家之長安，聞竇皇后新立，家在清河觀津，乃上書自陳。竇太后言於景帝，召見問其故，果是，乃厚賜之。文帝立，拜廣國爲韋武侯。夫積炭崩百餘人皆死，廣國獨脫，命當富貴，非徒得活，又封爲侯。虞子大，陳留東莞人也，其生時以夜，適免母身，母見其上若一疋練狀，經上天，明以問人，人皆曰：「吉！」貴氣與天通，長大仕宦，位至司徒公。廣文伯，河東蒲坂人也，其生亦以夜半時，適生，有人從門呼其父名，父出應之，不見人，有大木杖植其門側，好善異於衆，其父持杖入門以示人，人占曰：「吉！」文伯長大學宦，位至廣漢太守。文伯嘗富貴，故父得賜杖，其占者若曰：「杖當子力矣。」

光武帝建平元年十二月甲子，生於濟陽宮後殿第二內中，皇考爲濟陽令，時夜無火，室內自明，皇考怪之，即召功曹吏充蘭使出問卜工。蘭與馬下卒蘇永俱之，卜王長孫所長，孫卜謂永蘭曰：「此吉事也，毋多言。」是歲有禾生景天備火中，三本一莖九穗，長於禾一二尺，蓋嘉禾也。元帝之初，有鳳凰下濟陽宮，故今濟陽宮有鳳凰廡。始與李父等俱起，到柴界中，遇賊兵徭惑，走濟陽舊廡。比到，見光若火正赤，在舊廡道南，光耀燿燿上屬天，有頃不見。王莽時，謁者蘇阿伯能望氣，使過春陵，城郭鬱鬱葱葱，及光武到河北，與阿伯見，問曰：「卿前過春陵，何用知其氣佳也？」阿伯對曰：「見其鬱鬱葱葱耳。」蓋天命當興，聖王嘗出，前後氣驗，昭然明著，繼體守文，因據前基稟，天光氣驗不足言。創業龍興，由微賤起於黑龍，若謂祖光武者，曷嘗無天人神怪光顯之證乎。

偶會篇

命，吉凶之主也，自然之道，適偶之數；非有他氣旁物，厭勝感動，使之然也。世謂子胥伏劍，屈原自沈，子蘭宰誣，誣讒吳楚之君，冤殺之也。偶二子命當絕，子蘭宰誣適爲讒，而懷王夫差適信姦也。君適不明，臣適爲讒，二子之命，偶自不長。二偶三合，似若有之，其實自然，非他爲也。夏殷之朝適窮，桀紂之惡適稔，商周之數適起，湯武之德適豐，關龍逢殺，箕子比干囚死，當紂惡盛之時，亦二子命訖之期也。任伊尹之言，納呂望之義，湯武且與之會，亦二臣當用之際也。人臣命有吉凶，賢不肖之主與之相逢，文王時當昌，呂望命當貴，高宗治當平，傳說德當遂，非文王高宗爲二臣生，呂望傳說爲兩君出也。君明臣賢，光耀相察，上修下治，度數相得。

顏淵死，子曰：『天喪予！』子路死，子曰：『天祝予！』孔子自傷之辭，非實然之道也。孔子命不王，二子壽不長也。不王不長，所稟不同，度數並放，適相應也。二龍之祿當效，周濟適闔，褒姒當喪，周幽王稟性偶惡，非二龍使厲王發孽，褒姒令幽王愚惑也。遭逢會遇，自相得也。僮謠之語當驗，鬲雞之變適生，鸛鶴之占當應，魯昭之惡適成，非僮謠致鬲，鸛鶴招君惡也。期數自至，人行偶合也。堯命當禪，舜丹朱爲無道，虞統當傳，夏商均行不軌，非舜禹當得天下，能使二子惡也。美惡是非，適相逢也。

火星與昂星出入，昂星低時火星出，昂星見時火星伏，非火之性厭服昂也；時偶不並，度轉乖也。正月建寅，斗魁破申，非寅建使申破也；轉運之衡，偶自應也。父歿而子嗣，姑死而婦代，非子婦嗣代，使父姑終歿也；老少年次，自相承也。世謂秋氣擊殺穀草，穀草不任凋傷而死，此言失實。夫物以春生夏長，秋而熟老，適自枯死，陰氣適盛，與之會遇，何以驗之？物有秋不死者，生性未極也。人生百歲而終，物生一歲而死，死謂陰氣殺之，人終觸何氣而亡，論者猶或謂鬼喪之。夫人終見鬼，物死寒至，皆適遭也。人終見鬼，或見鬼而不死，物死觸寒，或觸寒而不枯，壤屋所壓，巖崖所墜，非屋精崖氣殺此人也。屋老崖沮，命凶之人，遭居適屢，月毀於天，螺涪於淵，風從虎，雲從龍，同

類通氣，性相感動。若夫物事相遭吉凶，同時偶遭相遇，非氣感也。殺人者罪至大辟，殺者罪當重，死者命當盡也。故害氣下降，囚命先中，聖王德施厚祿先逢，是故德令降於殿堂，命長之囚，出於牢中。天非爲囚未當死，使聖王出德令也；聖王適下赦，拘囚適當免死。猶人以夜臥驚起矣，夜月光盡，不可以作，人力亦倦，欲壹休息，晝日光明，人臥亦覺，力亦復足。非天以日作之，以夜息之也；作與日相應，息與夜相得也。

鴈鵠集於會稽，去避碣石之寒，來遭民田之旱，蹈履民田，啄食草糧，糧盡食索，春雨適作，避熱北去，復之碣石，象耕靈陵亦如此焉。傳曰：『舜葬蒼梧，象爲之耕，禹葬會稽，鳥爲之佃。』失事之實，虛妄之言也。丈夫有短壽之相，娶必得早寡之妻；早寡之妻，嫁亦遇夭折之夫也。世曰：『男女早死者，夫賊妻，妻害夫。』非相賊害，命自然也。使火燃以水沃之，可謂水賊火；火適自滅，水適自覆，兩名各自敗，不爲相賊。今男女之早夭，非水沃火之比；適自滅覆之類也。賊父之子，妨兄之弟，與此同召，同宅而處，氣相加凌，羸瘠消瘦，至於死亡。何謂相賊？或客死千里之外，兵燒厭溺，氣不相犯，相賊如何？王莽姊正君，許嫁二夫，二夫死，當適趙，而王薨，氣未相加，逢賊三家，何其痛也！黃公取隣巫之女，卜謂女相貴，故次公位至丞相，其實不然。次公當貴，行與女會，女亦自尊，故入次公門，偶適然自相遭遇，時也。

無祿之人，商而無盈，農而無播，非其性賤貨而命妨槩也；命貧，居無利之貨，祿惡，殖不滋之槩也。世謂宅有吉凶，徙有歲月，實事則不然。天道難知，假令有命凶之人，當衰之家，治宅適得不吉之地，移徙適觸歲月之忌，一家犯忌，口以十數，坐而死者，必祿衰命泊之人也。推此以論，仕宦進退遷徙，可復見也。時適當遷，君用讒口，時適當起，賢人薦已，故仕且得官也；君子輔等，且失位也；小人毀奇，公伯寮黜子路於季孫，孔子稱命，魯人臧倉讒孟子於平公，孟子言天，道未嘗行，與讒相遇，天未與已，惡人用口，故孔子稱命，不怨公伯寮；孟子言天，不尤臧倉，誠知時命當自然也。推此以論，人君治道功化，可復言也。命當貴，時適平，斯當富，祿適衰，治亂成敗之時，與人與衰吉凶，適相遭遇，因此論聖賢迭起，猶此類也。

聖主龍興於倉卒，良輔超拔於際會。世謂韓信、張良、輔助漢王，故秦滅漢，高祖得王。夫高祖命當自王，信、良之輩，時當自異，兩相遭遇，若故相求，是故高祖起於豐沛，信、良子弟，相多富貴，非天以子弟助高祖也。命相小大，適相應也。趙簡子廢太子伯魯，立庶子，無恤，無恤遭害，命亦當君趙也。世謂伯魯不肖，不如無恤，伯魯命當賤，知慮多泯亂也。韓生仕至太傅，世謂賴倪，實謂不然。太傅當貴，遭與倪實遇也。趙武藏於袴中，終日不啼，非或掩其口闕其聲也。命時當生，睡臥遭出也。故軍功之侯，必斬兵死之頭，富家之商，必奪貧室之財。削土免侯，罷退令相，罪法明白，祿秩適極。故厲氣所中，必加命短之人，凶歲所著，必饑虛耗之家矣。

骨相篇

人曰命難知，命甚易知。知之何用？用之骨體。人命稟於天，則有表候於體。察表候以知命，猶察斗斛以知容矣。表候者，骨法之謂也。傳言黃帝龍顏，顓頊戴牛，帝嚳駢齒，堯眉八采，舜目重瞳，禹耳三漏，湯臂再肘，文王四乳，武王望陽，周公背偃，皋陶馬口，孔子反羽。斯十二聖者，皆在帝王之位，或輔主憂世，世所共聞，儒所共說。在經傳者，較著可信；若夫短書俗記，竹帛胤文，非儒者所見，衆多非一。蒼頡四目，爲黃帝史；晉公子重耳，佻脇，爲諸侯霸；蘇秦骨鼻，爲六國相；張儀佻脇，亦相秦；魏項羽重瞳，云虞，舜之後，與高祖分王天下。陳平貧而飲食不足，貌體佼好而衆人怪之，曰：『平何食而肥？』及韓信爲陳公所鑒，免於鐵質，亦以面狀有異——面狀肥佼，亦一相也。高祖隆準龍顏，美鬚，左股有七十二黑子。單父呂公善相，見高祖狀貌奇之，因以其女妻高祖——呂后是也——卒生孝惠王魯元公主。高祖爲泗上亭長，嘗去歸之田，與呂后及兩子居，田有一老公過請飲，因相呂后，曰：『夫人，天下貴人也。』令相兩子，見孝惠，曰：『夫人所以貴者，乃此男也。』相魯元，曰：『皆貴。』老公去，高祖從外來。呂后言於高祖，高祖追及老公，止使自相。老公曰：『鄉者夫人嬰兒相皆似君，君相貴不可言也。』後高祖得天下，如老公言。推此以況一望之人，皆有富貴之相矣。

類同氣鈞，性體法相，固自相似，異氣殊類，亦兩相遇。富貴之男，娶得富貴之妻，女亦得富貴之男。夫二相不鈞而相遇，則有立死；若未相適，有豫亡之禍也。王莽姓王，君許嫁，至期當行時，夫輒死，如此者再，乃獻之趙王。趙王未取又薨。清河南宮大有與正君父禪君等者，遇相相曰：『貴爲天下母。』是時宣帝世，元帝爲太子，禪君乃因魏郡都尉納之太子。太子幸之，生子君上。宣帝崩，太子立，正君爲皇后，君上爲太子。元帝崩，太子立，是爲成帝。正君爲皇太后，竟爲天下母。夫正君之相當爲天子母，而前所許二家及趙王，爲無天下父之相，故未行而二夫死，趙王薨。是則二夫趙王無帝王大命，而正君不當與三家相遇之驗也。丞相黃次，公故爲陽夏游徼，與善相者同車俱行。見一婦人年十七八，相者指之曰：『此婦人嘗大富貴，爲封侯者夫人。』次公止車審視之。相者曰：『今此婦人不富貴，卜書不用也。』次公問之，乃其旁里人巫家子也，卽妻以爲妻。其後次公果大富貴，位至丞相，封爲列侯。夫次公富貴，婦人當配之，故果相遇，遂俱富貴。使次公命賤，不得婦人爲偶，不宜爲夫婦之時，則有二夫趙王之禍。夫舉家皆富貴之命，然後乃任富貴之事。骨法形體有不應者，則必別離死亡，不得久享介福。故富貴之家，役使奴僮，膏養牛馬，必有與衆不同者矣。僮奴則有不死亡之相，牛馬則有數字乳之性，田則有種華速熟之穀，商則有居善疾售之貨。是故知命之人，見富貴於貧賤，睹貧賤於富貴，案骨節之法，察皮膚之理，以審人之性命，無不應者。

趙簡子使姑布子卿相諸子，莫吉，至翟婢之子無恤，而以爲貴。無恤最賢，又有貴相。簡子後廢太子而立無恤，卒爲諸侯。襄子是矣。相工相黥布當先刑而乃王，後竟被刑乃封王。衛青父鄭季與楊信公主家僮衛媼通，生青在建章宮時，鉗徒相之曰：『貴至封侯。』青曰：『人奴之道，得不答罵足矣。安敢望封侯？』其後青爲軍吏，戰數有功，超封增官，遂爲大將軍，封爲萬戶侯。周亞夫未封侯之時，許負相之曰：『君後三歲而入將相，持（一有「重」字）國秉貴重矣，於人臣無兩；其後九歲而君餓死。』亞夫笑曰：『臣之兄已代侯矣，有如父卒子當代，亞夫何說侯乎？然既已貴，如負言，又何說餓死？指示我。』許負指其口，有縱理入口，曰：『此餓死法也。』居三歲，其

兄絳侯有罪，文帝釋絳侯子賢者，推亞夫通封條侯，續絳侯後。文帝之後六年，匈奴入邊，乃以亞夫爲將。至景帝之時，亞夫爲丞相，後以疾免。其子爲亞夫買工官劍方甲盾五百被，可以爲葬者，取庸苦之，不與錢。庸知其盜買官器，怒而上告其子。景帝下吏責問，因不食五日，嘔血而死。嘗鄧通之幸文帝也，貴在公卿之上，賞賜億萬，與上齊體。相工相之曰：『嘗貧賤餓死。』文帝崩，景帝立，通有盜鑄錢之罪，景帝考通，通亡，寄死人家，不名一錢。韓太傅爲諸生時，借相工五十錢，與之俱入璧雍之中，相璧雍弟子誰當貴者？相工指倪寬曰：『彼生當貴，秩至三公。』韓生謝遣相工，通刺倪寬，結膠漆之交，盡勸力之敬，徙舍從寬，深自附納之。寬嘗甚疾，韓生養視如僕狀，恩深踰於骨肉，後名聞於天下。倪寬位至御史大夫，州郡承旨，召請擢用，舉在本朝，遂至太傅。

夫鉗徒許負及相鄧通倪寬之工，可謂知命之工矣。故知命之工，察骨體之證，賭富貴貧賤，猶人見盤盂之器，知所設用也。簠器必用貴人，惡器必施賤者，尊鼎不在陪廁之側，匏瓜不在堂殿之上，明矣。富貴之骨，不過貧賤之苦，貧賤之相，不遭富貴之樂，亦猶此也。器之盛物，有斗石之量，猶人爵有高下之差也。器過其量，物溢棄遺，爵過其差，死亡不存。論命者如比之於器，以察骨體之法，則命在於身，形定矣。非徒富貴貧賤有骨體也，而操行清濁亦有法理，貴賤貧富，命也，操行清濁，性也。

非徒命有骨法，性亦有骨法。惟知命有明相，莫知性有骨法。此見命之表證，不見性之符驗也。范蠡去越，自齊遺大夫種書曰：『飛鳥盡，良弓藏；狡兔死，走犬烹。越王爲人，長頸烏喙，可與共患難，不可與共榮樂。子何不去？』大夫種不能去，稱病不朝，賜劍而死。大梁人尉繚說秦始皇以併天下之計，始皇從其冊，與之亢禮，衣服飲食，與之齊同。繚曰：『秦王爲人，隆準長目，鸞鵠豺聲，少恩，虎視狼心，居約易以下人，得志亦輕視人。我布衣也，然見我常身自下我，誠使秦王須得志，天下皆爲虜矣，不可與交游。』乃亡去。故范蠡尉繚見性行之證，而以定處來事之實，實有其效，如其法相。由此言之，性命繫於形體明矣。以尺書所載，世所共見，況古今不聞者，必衆多非一，皆有其實。稟氣於天，立形於地，察在地之形，以知在天之命，莫不得其實也。

有傳孔子相瞻臺子羽，唐舉占蔡澤不驗之文，此失之不審，何隱匿微妙之表也？相或在內，或在外，或在形體，或在聲氣。察外者遺其內，在形體者亡其聲氣。孔子適鄭，與弟子相失，孔子獨立鄭東門。鄭人或問子貢曰：「東門有人，其頭似堯，其項若皋陶，肩類子產，然自腰以下，不及周三寸，儼然若喪家之狗。」子貢以告孔子。孔子欣然笑曰：「形狀未也，如喪家狗，然哉！然哉！」夫孔子之相，鄭人失其寶，鄭人不明法術淺也。孔子之失子羽，唐舉惑於蔡澤，猶鄭人相孔子，不能具見形狀之寶也。以貌取人，失於子羽；以言取人，失於宰予也。

初稟篇

人生性命當富貴者，初稟自然之氣，養育長大，富貴之命效矣。文王得赤雀，武王得白魚，赤鳥，儒者論之，以爲雀則文王受命，魚則武王受命。文武受命於天，天用雀魚爲命授之也。天用赤雀命文王，文王不受，天復用魚爲命武王也。若此者，謂本無命於天，修己行善，善行聞天，天乃授以帝王之命也。故雀與魚鳥，天使爲王之命也，王所奉以行誅者也。如實論之，非命也，命謂初所稟得而生也。人生受性，則受命矣。性命俱稟，同時並得，非先稟性，後乃受命也。何以明之？案事堯爲司馬，居稷官，故爲后稷。曾孫公劉居邠，後徙居邠，後孫古公亶甫三子：太伯、仲雍、季歷。季歷生文王昌，昌在襁褓之中，聖瑞見矣。故古公曰：「我世嘗有興者，其在昌乎？」於是太伯知之，乃辭之。吳、文身斷髮，以讓王季。文王受命，謂此時也。天命在人本矣。太王、古公見之早也。此猶爲未，文王在母身之中，已受命也。王者一受命，內以爲性，外以爲體。體者面輔骨法，生而稟之。吏秩百石以上，王侯以下，即將大夫，以至元士，外及刺史、太守、居祿秩之吏，稟富貴之命，生而有表見於面，故許負始布子卿，輒見其驗。仕者隨秩遷轉，遷轉之人，或至公卿，命祿尊貴，位望高大。王者尊貴之率，高大之最也。生有高大之命，其時身有尊貴之奇，古公知之，見四乳之怪也。夫四乳，聖人證也，在母身中，稟天聖命，豈長大之後，修行道德，四乳乃生，以四乳論望年，亦知爲胎之時已受之矣。劉超息於大澤，夢與神遇，遂生高祖，此時已受命也。光武生於鄧州，宣，半夜無火，內中光

明單下卒，顯永謂公賈史充，謂曰：『此吉事也，毋多言！』此時已受命，獨謂文王、武王得赤雀、魚鳥乃受命，非也。上天壹命，王者乃與，不復更也。

得富貴大命，自起王矣，何以驗之？富家之命，貲累千金，生有富骨，治生積貨，至於年老，成爲富翁矣。夫王者，天下之翁也，稟命定於身中，猶鳥之別雌雄於卵殼之中也。卵殼孕而雌雄生，日月至而骨節強，強則雄自率將雌，雄非生長之後，或教使爲雄，然後乃敢將雌，此氣性剛強，自爲之矣。夫王者，天下之雄也，其命當王，王命定於懷妊，猶富貴骨生，有鳥雄卵成也，非唯人鳥也，萬物皆然，草木生於實核，出土爲栽，蓂稍生莖葉，成爲長短巨細，皆由實核。王者，長巨之最也。朱草之莖如鍼，紫芝之栽如豆，成爲瑞矣。王者稟氣而生，亦猶此也。

或曰：『王者生，稟天命，及其將王，天復命之，猶公卿以下，詔書封拜，乃敢卽位。赤雀、魚鳥，上天封拜之命也。』天道人事，有相命使之義，自然無爲，天之道也。命文以赤雀，武以白魚，是有爲也。管仲與鮑叔分財取多，鮑叔不與，管仲不求，內有以相知，視彼猶我，取之不疑。聖人取王，猶管之取財也。朋友彼我，無有授與之義。上天自然，有命使之驗，是則天道有爲，朋友自然也。嘗漢祖斬大地之時，誰使斬者？豈有天道先至，而乃敢斬之哉？勇氣奮發，性自然也。

夫斬大地，誅秦殺項，同一實也。周之文武受命，代殷亦一義也。高祖不受命使之將，獨謂文、武受雀、魚之命，誤矣。難曰：『康叔之誥曰：「冒聞於上帝，帝休，天乃大命文王。」』如無命，史經何爲言天乃大命文王？『所謂大命者，非天乃命文王也。』聖人動作，天命之意也，與天合同，若天使之矣。書方敷勸康叔，勉使爲誓，故言文王行道，上闕於天，天乃大命之也。詩曰：『乃眷西顧，此惟予度。』與此同義。天無頭面，眷顧如何？人有顧視，以人倣天，事易見，故曰眷顧。天乃大命文王，眷顧之義，實天不命也。何以驗之？夫大人與天地合其德，與日月合其明，與四時合其序，與鬼神合其吉凶。先天而天不違，後天而逢天時，如必須天有命，乃以從事，安得先天而後天乎？以其不待天命，直以心發，故有先天後天之勤，言合天時，故有不違奉天之文。

論語曰：『大哉，堯之爲君，唯天爲大，唯堯則之。』王者則天不違，奉天之義也。推自然之性，與天合同，是則所謂大命文王也。自文王意，文王自爲，非天驅赤雀，使告文王，云當爲王，乃敢起也。然則文王赤雀，及武王白魚，非天之命，曷熾祐也。古人舉事，無不利者，人徒不召而至，瑞物不招而來，黯然而合，若或使之。出門聞告，顧視見善，自然道也。文王嘗與赤雀適來，魚躍鳥飛，武王偶見，非天使雀至白魚來也。吉物動飛而聖遇也。白魚入于王舟，王陽曰：『偶適也。』光祿大夫劉琨，前爲弘農太守，虎渡河，光武皇帝曰：『偶適自然，非或使之也。』故夫王陽之言，適光武之曰偶，可謂合於自然也。

本性篇

情性者，人治之本，禮樂所由生也。故原情性之極，禮爲之防，樂爲之節。性有卑謙辭讓，故制禮以適其宜；情有好惡喜怒哀樂，故作樂以通其敬。禮所以制，樂所爲作者，情與性也。昔儒舊生，著作篇章，莫不論說，莫能實定。周人世碩，以爲人性有善有惡。舉人之善性，養而致之，則善長；性惡，養而致之，則惡長。如此，則（一有「情」字）性各有陰陽善惡，在所養焉。故世子作養一篇，密子賤漆雕開公孫尼子之徒，亦論情性，與世子相出入，皆言性有善有惡。孟子作性善之篇，以爲人性皆善；及其不善，物亂之也。謂人生於天地，皆稟善性，長大與物交接者，放縱悖亂，不善日以生矣。

若孟子之言，人幼小之時，無有不善也。微子曰：『我舊云，孩子，王子不出。』紂爲孩子之時，微子睹其不善之性，性惡不出衆庶，長大爲亂不變，故云也。辛吉食我初生之時，叔姬視之，及堂，聞其啼聲而還曰：『其聲豺狼之聲，野心無親，非是莫滅辛吉氏。』遂不肯見。及長，祁勝爲亂，食我與焉。國人殺食我，辛吉氏由是滅矣。紂之惡，在孩子之時，食我之亂，見始生之聲。孩子始生，未與物接，誰令悖者？丹朱生於唐宮，商均生於虞室，唐虞之時，可比屋而封，所與接者，必多善矣。二帝之弟，必多賢矣。然而丹朱微而商均虐，並失帝統，歷世爲戒。且孟子相人以眸子

焉心清而眸子隱，心濁而眸子眦。人生目眦眦眦，眦眦眦之於元，不同氣也；非幼小之時眦，長大與人接乃更眦也。性本自然，善惡有質，孟子之言清性，未爲實也。

然而性善之論，亦有所緣，或仁或義，性術乖也；動作趨翔，性識詭也。面色或白或黑，身形或長或短，至老極死，不可變易，天性然也。皆知水土器物形性不同，而莫知善惡稟之異也。（一有「告子曰」字）「一歲嬰兒，無爭奪之心，長大之後，或漸利色，狂心悖行，由此生也。」告子與孟子同時，其論性無善惡之分，譬之湍水，決之東則東，決之西則西。夫水無分於東西，猶人無分於善惡也。夫告子之言，謂人之性與水同也。使性若水，可以水喻性，猶金之爲金，木之爲木也。人善因善，惡亦因惡，初稟天然之姿，受純一之質，故生而兆見，善惡可察，無分於善惡，可推移者，謂中人也；不善不惡，須教成者也。故孔子曰：「中人以上，可以語上也；中人以下，不可以語上也。」告子之以決水喻者，徒謂中人，不指極善極惡也。孔子曰：「性相近也，習相遠也。」夫中人之性，在所習焉。習善而爲善，習惡而爲惡也。至於極善極惡，非復在習，故孔子曰：「惟上智與下愚不移。」性有善不善，聖化賢教，不能移復易也。孔子道德之祖，諸子之中最卓者也，而道：「上智下愚不移。」故知告子之言未得實也。

夫告子之言亦有緣也。詩曰：「彼姝者子，何以與之。」其傳曰：「譬猶練絲，染之藍則青，染之朱則赤。」夫決水使之東西，猶染絲令之青赤也。丹朱商均已染於唐虞之化矣，然而丹朱傲而商均虐者，至惡之質，不受藍朱變也。孫（即荀）卿有反孟子作性惡之篇，以爲人性惡，其善者僞也。性惡者，以爲人生皆得惡性也；僞者，長大之後勉使爲善也。若孫卿之言，人幼小無有善也。視爲兒，以種樹爲戲，孔子能行，以俎豆爲弄，石生而堅，蘭生而香，稟善氣長大就成，故種樹之戲，爲唐司馬俎豆之弄，爲周聖師稟蘭石之性，故有堅香之驗。

夫孫卿之言，未爲得實，然而性惡之言有緣也。一歲嬰兒，無推讓之心，見食，號欲食之；嗜好，嗜欲玩之。長大之後，禁情割欲，勉勵爲善矣。劉子政非之曰：「如此，則天無氣也。陰陽善惡不相當，則人之爲善安從生？」陸賈曰：「天地生人也，以禮義之性，人能察己所以受命則順，順之謂道。」夫陸賈知人禮義爲性，人亦能察己所以受

命。性善者不待察而自善；性惡者雖能察之，猶背禮畔義，義挹於善，不能爲也。故貪者能言廉，亂者能言治，盜跖非人之竊也，莊蹻刺人之濫也。明能察己，口能論賢，性惡不爲，何益於善？陸賈之言，未能得實。

董仲舒覽孫孟之書，作情性之說曰：『天之大經，一陰一陽；人之大經，一情一性。性生於陽，情生於陰。陰氣鄙陽氣仁。曰：性善者，是見其陽也；謂惡者，是見其陰者也。』若仲舒之言，謂孟子見其陽，孫卿見其陰也。處二家各有見可也；不處人情性，情性有善有惡，未也。夫人情性，同生於陰陽，其生於陰陽，有溷有泊；玉生於石，有純有駁。情性於陰陽，安能純善？仲舒之言，未能得實。劉子政曰：『性生而然者也，在於身而不發，情接於物而然者也，出形於外。形外則謂之陽，不發者則謂之陰。』夫子政之言，謂性在身而不發，情接於物，形出於外，故謂之陽；性不發，不與物接，故謂之陰。夫如子政言之，乃謂情爲陽，性爲陰也。不據本所生起，苟以形出與不發見定陰陽也，必以形出爲陽，性亦與物接，造次必於是，顛沛必於是。惻隱不忍，不忍，仁之氣也。卑謙辭讓，性之發也。有與接會，故惻隱卑謙形出於外，謂性在內不與物接，恐非其實。不論性之善惡，徒議外內陰陽，理難以知。且從子政之言，以性爲陰，情爲陽，夫人稟情，竟有善惡不也。

自孟子以下，至劉子政、鳩儒傳生，聞見多矣。然而論情性竟無定是，唯世碩、公孫尼子之徒，頗得其正。由此言之，事易知，道難論也。鄧文茂記，繁如榮華，詭譎劇談，甘如飴蜜，未必得實。實者，人性有善有惡，猶人才有高有下也。高不可下，下不可高，謂性無善惡，是謂人才無高下也。稟性受命，同一實也。命有貴賤，性有善惡，謂性無善惡，是謂人命無貴賤也。九州田土之性，善惡不均，故有黃赤黑之別，上中下之差；水潦不同，故有清濁之流。東西南北之趨，人稟天地之性，懷五常之氣，或仁或義，性術乖也；動作趨翔，或重或輕，性識詭也。面色或白或黑，身形或長或短，至老極死，不可變易，天性然也。余固以孟軻言人性善者，中人以上者也；孫卿言人性惡者，中人以下者也；揚雄言人性善惡混者，中人也。若反經合道，則可以爲教，盡性之理，則未也。

儒者論曰：『天地故生人。』此言妄也。夫天地合氣，人偶自生也。猶夫婦合氣，子則自生也。夫婦合氣，非當時欲得生子，情欲動而合，合而生子矣。且夫婦不故生子，以知天地不故生人也。然則人生於天地也，猶魚之於淵，與風之於人也。因氣而生，種類相產，萬物生天地之間，皆一實也。傳曰：『天地不故生人，人偶自生。』若此論事者，何故云天地爲鍾，萬物爲銅，陰陽爲火，造化爲工乎？案陶冶者之用火，鑠銅鑄器，故爲之也。而云天地不故生人，人偶自生耳，可謂陶冶者不故爲器，而器偶自成乎？夫比不應事，未可謂喻；文不稱實，未可謂是也。曰：是喻人稟氣不能純一，若鑠銅之下形，鑄器之得火也，非謂天地生人，與陶冶同也。與喻人皆引人事，人事有禮，不可斷絕，以目視頭，頭不得不動；以手相足，足不得不搖。目與頭同形，手與足同體。今夫陶冶者，初埏埴作器，必模範爲形，故作之也；燃炭生火，必調和鍾竈，故爲之也。及銅鑠不能皆成器，鑄不能盡善，不能故生也。夫天不能故生人，則其生萬物，亦不能故也。天地合氣，物偶自生矣。

夫耕耘播種，故爲之也；及其成與不熟，偶自然也。何以驗之？如天故生萬物，當令其相親愛，不當令之相賊害也。或曰：『五行之氣，天生萬物，以萬物含五行之氣，五行之氣，更相賊害。』曰：天自當以一行之氣生萬物，令之相親愛，不當令五行之氣，反使相賊害也。或曰：『欲爲之用，故令相賊害；賊害相成也。故天用五行之氣生萬物，人用萬物作萬事。不能相制，不能相使，不相賊害，不成爲用。金不賊木，木不成用；火不鑠金，金不成器；故諸物相賊相利。含血之蟲，相勝服，相嚙噬，相啖食者，皆五行氣使之然也。』曰：天生萬物，欲令相爲用，不得不相賊害也；則生虎狼蝮蛇及蜂蟄之蟲，皆賊害人，天又欲使人爲之用邪？且一人之身，含五行之氣，故一人之行，有五常之操；五常，五行之道也；五藏在內，五行氣俱。如論者之言，含血之蟲，懷五行之氣，輒相賊害；一人之身，胸懷五藏，自相賊也；一人之操，行義之心，自相害也。

且五行之氣相賊害，含血之蟲相勝服，其驗何在？曰：實木也，其禽虎也；戌土也，其禽犬也；丑未亦土也，丑禽牛，未禽羊也。木勝土，故犬與牛羊爲虎所服也。亥水也，其禽豕也；巳火也，其禽蛇也；子亦水也，其禽鼠也；午亦火也，

其禽馬也。水勝火，故豕食蛇；火爲水所害，故馬食鼠屎而腹脹。曰：審如論者之言，含血之蟲，亦有不相勝之効。牛馬也，子鼠也，酉雞也，卯兔也。水勝火，鼠何不逐馬？金勝木，雞何不啄兔？亥豕也，未羊也，丑牛也，土勝水，牛羊何不相殺？豕已蛇也，申猴也，火勝金，蛇何不食獼猴？獼猴者，畏鼠也，嚙獼猴者，犬也。鼠水，獼猴金也，水不勝金，獼猴何故畏鼠也？戌土也，申猴也，土不勝金，猴何故畏犬？

東方木也，其星蒼龍也；西方金也，其星白虎也；南方火也，其星朱鳥也；北方水也，其星玄武也。天有四星之精，降生四獸之體。含血之蟲，以四獸爲長；四獸含五行之氣，最較着。案龍虎交不相賊，鳥龜會不相害。以四獸驗之，以十二辰之禽效之。五行之蟲，以氣性相刻，則尤不相應。凡萬物相刻賊，含血之蟲則相服，至於相啖食者，自以齒牙頓利，勦力優劣，動作巧便，氣勢勇桀。若人之在世，勢不與適，力不均等，自相勝服；以力相服，則以刃相賊矣。夫人以刃相賊，猶物以齒角不牙相觸刺也。力強角利，勢烈牙長，則能勝；氣微不短，誅膽小距頓，則服。畏也。人有勇怯，故戰有勝負。勝者，未必受金氣，負者，未必得木精也。孔子畏陽虎，卻行流汗；陽虎未必色白，孔子未必面青也。鷹之擊鳩雀，鵠之啄鵲雁，未必鷹鵠生於南方，而鳩雀鵲雁產於西方也；自是勦力勇怯，相勝服也。

一堂之上，必有論者；一鄉之中，必有訟者。訟必有曲直，論必有是非。非而曲者爲負，是而直者爲勝。亦或辯口利舌，辭喻橫出爲勝；或詘弱綏跽，踴蹙不比者爲負。以舌論訟，猶以劍戟鬪也。利劍長戟，手足健疾者勝；頓刀短矛，手足緩留者負。夫物之相勝，或以勦力，或以氣勢，或以巧便。小有氣勢，口足有便，則能以小而制大；無骨力，角翼不動，則以大而服小。鵲食蜩皮，搏勞食蛇，蜩蛇不便也。蚊虻之力，不如牛馬，牛馬困於蚊虻，蚊虻乃有勢也。鹿之角足以觸犬，獼猴之手足以搏鼠，然而鹿制於犬，獼猴服於鼠，角爪不利也。故十年之牛，爲牧豎所羈，長仞之象，爲越僮所鉤，無便故也。故夫得其便也，則以小能勝大；無其便也，則以強服於羸也。

儒者稱聖人之生不因人氣，更稟精於天。周母吞薏苡而生禹，故夏禮曰：『嫫母吞燕卵而生禹，故殷姓曰子。』后稷母履大人跡而生后稷，故周姓曰姬。詩曰：『不坼不副，是生后稷。』說者又曰：『禹、湯逆生，閭母背而出；后稷順生，不坼不副。』不感動母體，故曰不坼不副。逆生者，子孫逆死；順生者，子孫順亡。故桀紂誅死，殷王壽邑言之有頭足，故人信其說。明事以驗證，故人然其文。讖書又言：堯母慶都野出，赤龍感已，遂生堯。高祖本紀言：劉媪嘗息大澤之陂，夢與神遇。——是時雷電晦冥，太公往視，見蛟龍於上。——已而有生，遂生高祖。其言神驗，文又明著，世儒學者，莫謂不然。如實論之，虛妄言也。

彼詩言不坼不副，言其感動母體可也；言其閭母背而出，妄也。夫蟬之生復育也，閭背而出。天之生聖子，與復育同道乎？免吮毫而懷子，及其子生，從口而出。案禹母吞薏苡，商母嚙燕卵，與免吮毫同實也。禹、湯之母，生宜皆從口，不當閭背。夫如是，閭背之說，竟虛妄也。世間血刃死者多，未必其先祖初爲人者，生時逆也。秦失天下，閭樂斬蒺亥，項羽誅子嬰，秦之先祖伯翳，豈逆生乎？如是爲順逆之說，以驗三家之祖，謬矣。且夫薏苡，草也；燕卵，鳥也；大人跡，土也。三者皆形，非氣也，安能生人？說聖者以爲稟天精微之氣，故其爲有殊絕之知。今三家形生，以草以鳥以土，可謂精微乎？天地之性，唯人爲貴，則物賤矣。今貴人之氣，更稟賤物之精，安能精微乎？夫令鳩雀施武於雁鵠，終不成子者，何也？鳩雀之身小，雁鵠之形大也。今燕之身不過五寸，薏苡之身不過數尺，二女吞其卵食，安能成七尺之形乎？燔一鼎之銅，以灌一錢之形，不能成一鼎，明矣。今謂大人天神，故其跡巨。巨跡之人，一鼎之燔銅也；姜原之身，一錢之形也。使大人施氣於姜原，姜原之身小，安能盡得其精，不能盡得其精，則后稷不能成人。堯與高祖，審龍之子，子性類父，龍能乘雲，堯與高祖亦宜能駕萬物生於土，各似本種。不類土者，生不出於土，土徒養育之也。母之懷子，猶土之育物也。堯、高祖之母，受龍之施，猶土受物之播也。物生自類本種，夫二帝宜似龍也。且夫含血之類，相與爲牝牡。牝牡之會，皆見同類之物，精感欲動，乃能授施。若夫牡馬見雌牛，雄雀見牝雞，不相與合者，異類故也。今龍與人異類，何能感於人而施氣？或曰：『夏之衰，二龍鬪於庭，吐藂於地，龍亡藂在，積

而藏之。至周幽王，發出龍螭，化爲玄龜，入於後宮，與處女交，遂生褒姒。『玄龜與人異類，何以感於處女而施氣乎？夫玄龜所交非正，故褒姒爲禍，周國以亡。以非類妄交，則有非道妄亂之子。今堯高祖之母，不以道接會，何故二帝聖賢，與褒姒異乎？或曰：『趙簡子病，五日不知人，覺言：我之帝所，有熊來，帝命我射之，中熊死；有鼯來，我又射之，中鼯，鼯死。後問營道之鬼，鬼曰：『熊，簡子當昌之秋也。』簡子見之，若寢夢矣。空虛之氣，不必有實，假令有之，或時熊祖，夫簡子所射熊鼯，二卿祖當亡，簡子當昌之秋也。』簡子見之，若寢夢矣。空虛之氣，不必有實，假令有之，或時熊鼯先化爲人，乃生二卿，魯公牛哀病，化爲虎，人化爲獸，亦如獸爲人。玄龜入後宮，始先化爲人，天地之間，異類之物，相與交接，未之有也。』

天人同道，好惡均心。人不好異類，則天亦不與通。人雖生於天，猶蟻虱生於人也。人不好蟻虱，天無故欲生於人。何則？異類殊性，情欲不相得也。天地夫婦也，天施氣於地以生物，人轉相生，精微爲聖，皆因父氣，不更稟取。如更稟者爲聖，高后稷不聖，如聖人皆當更稟，十二聖不皆然也。黃帝帝馨，帝顓頊，帝舜之母，何所受氣？文王武王，周公孔子之母，何所感吞？此或時見三家之姓，曰姬氏，子氏，姬氏，則因依放，空生怪說，猶見鼎湖之地，而著黃帝升天之說矣。

失道之意，還反其字。蒼頡作書，與事相連。姜原履大人跡，跡者，基也，姓當爲其下土。乃其女旁臣，非基跡之字，不合本事，疑非實也。以周姬，况夏殷，亦知子之與姬，非燕子蕙攻也。或時禹契后稷之母，適欲懷妊，遭吞蕙攻，燕卵履大人跡也。世好奇怪，古今同情，不見奇怪，謂德不異，故因以爲姓。世間誠信，因以爲然，聖人重疑，因不復定。世士淺論，因不復辨，儒生是古，因生其說。彼詩言不圻不副者，言后稷之生，不感動母身也。儒生穿鑿，因造禹契逆生之說，感於龍，夢與神遇，猶此率也。堯高祖之母，適欲懷妊，遭逢雷龍，載雲雨而行。人見其形，遂謂之然。夢與神遇，得聖子之象也。夢見鬼合之，非夢與神遇乎？安得其實？野出感龍，及蛟龍居止，或堯高祖受富貴之命，龍爲吉物，道加其上，吉祥之瑞，受命之證也。然武王受命，鳳集於郊，嘉禾生於庭，聖人之生，奇異吉物之

爲瑞應。必以奇吉之物見而子生，謂之物之子，是則光武皇帝嘉禾之精，鳳凰之氣歟？案帝繫之篇，及三代世表，禹、鯀之子也，禹、稷皆帝嚳之子，其母皆帝嚳之妃也。及堯亦嚳之子，帝王之妃何爲適草野？古時雖質，禮已設制，帝王之妃何爲浴於水？夫如是言，聖人更稟氣於天，母有感吞者，虛妄之言也。實者，聖人自有種世族，仁如文武各有類，孔子吹律自知殷後，項羽重瞳，自知虞舜苗裔也。五帝三王，皆祖黃帝。黃帝聖人，本稟貴命，故其子孫皆爲帝王。帝王之生，必有怪奇，不見於物，則效於夢矣。

書虛篇

世信虛妄之書，以爲載於竹帛上者，皆賢聖所傳，無不然之事，故信而是之，輒而讀之，睹真是之傳，與虛妄之書相違，則并謂短書不可信用。夫幽冥之實，尙可知，沈隱之情，尙可定，顯文露書，是非易見，籠總并傳，非實事，用精不專，無思於事也。夫世間傳書，諸子之語，多欲立奇異，作驚目之論，以駭世俗之人，爲譎詭之書，以著殊異之名。傳言延陵季子出遊，見路有遺金，當夏五月，有披裘而薪者。季子呼薪者曰：「取彼地金來。」薪者投鏹於地，瞋目拂手而言曰：「何子居之高，視之下，儀貌之壯，語言之野也？吾當夏五月，披裘而薪，豈取金者哉？」季子謝之，請問姓字。薪者曰：「子皮相之士也，何足語姓字？」遂去不顧。世以爲然，殆虛言也。夫季子恥吳之亂，吳欲共立以爲主，終不肯受，去之延陵，終身不還，廉讓之行，終始如一，許由讓天下，不嫌貪封侯，伯夷委國餓死，不嫌貪刀鉤。廉讓之行，大可以況小，小難以況大。季子能讓吳位，何嫌貪地遺金？季子使於上國，道過徐，徐君好其寶劍，未之卽予，還而徐君死，解劍帶冢樹而去，廉讓之心，恥負其前志也。季子不負死者，棄其寶劍，何嫌一叱生人，取金於地？季子未去吳乎？公子也，已去吳乎？延陵君也。公子與君出，有前後車，有附從，不能空行於塗明矣。既不恥取金，何難使左右而煩披裘者？世稱柳下惠之行，言其能以幽冥自修潔也。賢者同操，故千歲交志。置季子於冥昧之中，尙不取金，况以白日，前後備具，取金於路，非季子之操也。或時季子實見遺金，憐披裘薪者，欲以益之，或

時言取彼地金，欲以予薪者，不自取也。世俗傳言，則言季子取還金也。

傳書或言「顏淵與孔子俱上魯太山。孔子東南望，吳闔門外有繫白馬，引顏淵指以示之，曰：『若見吳闔門乎？』」顏淵曰：「見之。」孔子曰：「門外何有？」曰：「有如繫練之狀。」孔子撫其目而正之，因與俱下。下而顏淵髮白齒落，遂以病死。蓋以精神不能若孔子，強力自極，精華竭盡，故早天死。」世俗聞之，皆以爲然。如實論之，殆虛言也。案論語之文，不見此言；考大經之傳，亦無此語。夫顏淵能見千里之外，與聖人同。孔子諸子，何諱不言？蓋人目之所見，不過十里；過此不見，非所明察，遠也。傳曰：「太山之高巖然，去之百里，不見蟬蟪。」遠也。案魯去吳千有餘里，使難一望之，終不能見，況使顏淵，何能審之？如才庶幾者，明目異於人，則世宜稱亞聖，不宜言離朱。人目之視也，物大者易察，小者難審。使顏淵處闔門之外，望太山之形，終不能見。況從太山之上，察白馬之色，色不能見，明矣。非顏淵不能見，孔子亦不能見也。何以驗之？耳目之用均也，目不能見百里，則耳亦不能聞也。陸賈曰：「離婁之明，不能察帷薄之內；師曠之聰，不能聞百里之外。」闔門之與太山，非直帷薄之內，百里之外也。秦武王與孟詵舉鼎不任，絕脈而死。舉鼎用力，力由筋脈，筋脈不堪，絕傷而死，道理宜也。今顏淵用目望遠，望遠目睛不任，宜盲眇，髮白齒落，非其致也。髮白齒落，用精於學，勤力不休，氣力竭盡，故至於死。伯奇放流，首髮早白。詩云：「惟憂用老。」伯奇用憂，而顏淵用精，寔望倉卒，安能致此。

儒書言「舜葬於蒼梧，禹葬於會稽者，巡狩年老，道死邊土。聖人以天下爲家，不別遠近，不殊內外，故遂止葬。」夫言舜禹，實也；言其巡狩，虛也。舜之與禹，俱帝者也，共五千里之境，同四海之內，二帝之道，相因不殊。堯典之篇，舜巡狩東至岱宗，南至霍山，西至太華，北至恆山，以爲四嶽者，四方之中，諸侯之來，並會嶽下，幽深遠近，無不見者。聖人舉事，求其宜適也。禹王如舜，事無所改，巡狩所至，以復如舜。舜至蒼梧，禹到會稽，非其實也。實禹舜之時，鴻水未治，堯傳於舜，舜受爲帝，與禹分部，行治鴻水。堯崩之後，舜老亦以傳於禹。舜南治水，死於蒼梧；禹東治水，死於會稽。賢聖家天下，故因葬焉。

吳郡高說：『會稽本山名。夏禹巡狩，會計於此山，因以名郡，故曰會稽。』夫言因山名郡，可也；言禹巡狩，會計於此山，虛也。巡狩本不至會稽，安得會計於此山？宜聽君高之說，誠會稽爲會計，禹到南方，何所會計？如禹始東死於會稽，舜亦巡狩至於蒼梧，安所會計？百王治定，則出巡，巡則輒會計，是則四方之山皆會計也。百王太平，升封太山，太山之上，封可見者七十有二，紛綸連城者，不可勝數。如睿帝王巡狩，則輒會計，會計之地，如太山封者，四方宜多。夫郡國成名，猶萬物之名，不可訛也。獨爲會稽立數，周時舊名吳越也。爲吳越立名，從何往哉？六國立名，狀當如何？天下郡國且百餘縣，邑出萬，鄉亭聚邑，皆有號名，賢聖之才莫能說。君高能說會稽，不能辯定方名，會計之說，未可從也。巡狩考正法度，禹時吳爲禪國，斷髮文身，考之無用，會計如何？

傳書言：『舜葬於蒼梧，象爲之耕，禹葬會稽，鳥爲之田。蓋以聖德所致，天使鳥獸報祐之也。』世莫不然，考實之，殆虛言也。夫舜禹之德，不能過堯，葬於冀州，或言葬於崇山，冀州鳥獸不耕，而鳥獸獨爲舜禹耕，何天恩之偏駁也？或曰：『舜禹治水，不得甯處，故舜死於蒼梧，禹死於會稽，勤苦有功，故天報之，遠離中國，故天痛之。』夫天報舜禹，使鳥田象耕，何益舜禹？天欲報舜禹，宜使蒼梧會稽，常祭祀之，使鳥獸田耕，不能使人祭。祭加舜禹之墓，田施人民之家。天之報祐聖人，何其拙也！且無益哉！由此言之，鳥田象耕，報祐舜禹，非其實也。實者，蒼梧多象之地，會稽衆鳥所居，禹貢曰：『彭蠡既豬，陽鳥攸居。』天地之情，鳥獸之行也。象自蹈土，鳥自食草，土驟草盡，若耕田狀，壤靡泥易，人隨種之。世俗則謂爲舜禹田，海陵農田，若象耕狀，何嘗帝王葬海陵者耶？

傳書言：『吳王夫差殺伍子胥，糞之於錢，乃以鷗夷棄投之於江。子胥悲恨，驅水爲濤，以溺殺人。今時會稽丹徒、大江、錢唐、浙江，皆立子胥之廟，蓋欲慰其恨心，止其猛濤也。』夫言吳王殺子胥，投之於江，實也；言其恨悲驅水爲濤者，虛也。屈原懷恨，自投湘江，湘江不爲濤，申徒狄蹈河而死，河水不爲濤。世人必曰：『屈原申徒狄不能勇猛，力怒不如子胥。』夫衛蘼子路，而漢烹彭越，子胥勇猛，不過子路彭越。然二士不能發怒於鼎鑊之中，以烹湯蘼汁，烹滌旁人，子胥亦自先入錢，乃入江。在錢中之時，其神安居，豈怯於錢湯，勇於江水哉？何其怒氣前後不

相副也。且投於江中，何江也？有丹徒大江，有錢唐浙江，有吳通陵江。或言投於丹徒大江，無濤，欲言投於錢唐浙江，浙江山陰江上，虞江皆有濤。三江有濤，豈分彙中之體，散置三江中乎？人若恨惡也，仇讎未死，子孫遺在可也。今吳國已滅，夫差無類，吳爲會稽立置太守，子胥之神復何怨苦，爲濤不止，欲何求索？吳越在時，分會稽郡越治山陰吳都。今吳餘暨以南屬越，錢唐以北屬吳，錢唐之江，兩國界也。山陰上虞在越界中，子胥入吳之江爲濤，當自上吳界中，何爲入越之地？怨惡吳王，發怒越江，違失道理，無神之驗也。且夫水難驅而人易從也。生任勛力，死用精魂，子胥之生，不能從生人營衛其身，自令身死，勛力消絕，精魂飛散，安能爲濤？使子胥之類數百千人，乘船渡江，不能越水。一子胥之身，衰湯鏤之中，骨肉糜爛，成爲糞瘞，何能有害也？周宣王殺其臣杜伯，趙簡子殺其臣莊子義，其後杜伯射宣王，莊子義害簡子，事理似然，猶爲虛言。今子胥不能完體，爲杜伯子義之事，以報吳王，而驅水往來，豈報讎之義，有知之驗哉？俗語不實，成爲丹青；丹青之文，賢聖惑焉。天地之有百川也，猶人之有血脈也。血脈流行汎揚，動靜自有節度，百川亦然。其朝夕往來，猶人之呼吸氣出入也。天地之性，上古有之。經曰：『江漢朝宗于海。』唐虞之前也。其發海中之時，濤馳而已。入三江之中，始小淺狹，水激沸起，故騰爲濤。廣陵曲江有濤，文人賦之。大江浩洋，曲江有濤，竟以隘狹也。吳殺其身，爲濤廣陵；子胥之神，竟無知也。溪谷之深，流者安洋，淺多沙石，激揚爲濤。夫濤，一也，謂子胥爲濤，誰居溪谷爲濤者乎？案濤入三江岸沸踊，中央無聲。必以子胥爲濤，子胥之身，聚岸灌也。濤之起也，隨月盛衰，小大滿損不齊同。如子胥爲濤，子胥之怒，以月爲節也。三江時風揚疾之波，亦溺殺人；子胥之神，復爲風也。秦始皇渡湘水遭風，問湘山何祠，左右對曰：『堯之女，舜之妻也。』始皇大怒，使刑徒三千人，斬湘山之樹而履之。夫謂子胥之神爲濤，猶謂二女之精爲風也。

傳書曰：『孔子嘗泗水之葬，泗水爲之卻流。』此言孔子之德，能使水卻，不滿其墓也。世人信之。故儒者稱論，皆言孔子之後當封，以泗水卻流爲證。如原省之，殆虛言也。夫孔子死，孰與其生，生能操行，慎道應天，死操行絕，天祐至德。故五帝三王，招致瑞應，皆以生，不以死。孔子生時，推排不容，故嘆曰：『鳳鳥不至，河不出圖，吾已

矣夫！『生時無祚，死反有報乎？』孔子之死，五帝三王之死也，五帝三王無祚，孔子之死，獨有天報，是孔子之魂聖，五帝之精不能神也。泗水無知，爲孔子卻流，天神使之；然則孔子生時，天神不使人尊敬，如泗水卻流。天欲封孔子之後，孔子生時，功德應天，天不封其身，乃欲封其後乎？是蓋水偶自卻流。江河之流，有回復之處，百川之行，或易道更路，與卻流無以異，則泗水卻流，不爲神怪也。

傳書稱『魏公子之德，仁惠下士，兼及鳥獸。方與客飲，有鸛擊鳩，鳩走巡於公子案下。鸛追擊，殺於公子之前。公子恥之，即使人多設羅，得鸛數十枚，責讓以擊鳩之罪。擊鳩之鸛，低頭不敢仰視，公子乃殺之。』世稱之曰：『魏公子爲鳩報仇。』此虛言也。夫鸛，物也，情心不同，言語不通。聖人不能使鳥獸爲義理之行，公子何人，能使鸛低頭自責，鳥爲鸛者以千萬數，向擊鳩盡去，安可復得，能低頭自責，是聖鳥也。曉公子之言，則知公子之行矣。知公子之行，則不擊鳩於其前。人猶不能改過，鳥與人異，謂之能悔，世俗之語，失物類之實也。或時公子實捕鸛，鸛得人持其頭，變折其頸，疾痛低垂，不能仰視，緣公子惠義之人，則因褒稱言鸛服過，蓋言語之次，空生虛妄之笑，功名之下，常有非實之加。

傳書言：『齊桓公妻姑姊妹七人。』此言虛也。夫亂骨肉，犯親戚，無上下之序者，禽獸之性，則亂不知倫理。案桓公九合諸侯，一正天下，道之以德，將之以威，以故諸侯服從，莫敢不率，非內亂懷鳥獸之性者所能爲也。夫率諸侯，朝事王室，恥上無勢而下無禮也。外恥禮之不存，內何犯禮而自壞？外內不相副，則功無成而威不立矣。世稱桀紂之惡，不言淫於親戚。實論者，謂夫桀紂惡，微於亡秦，亡秦過，泊於王莽，無淫亂之言。桓公妻姑姊妹七人，惡浮於桀紂，而過重於秦莽也。春秋采毫毛之笑，貶纖芥之惡。桓公惡大，不貶何哉？魯文姜，齊襄公之妹也，襄公通焉，春秋經曰：『莊二年冬，夫人姜氏會齊侯於郕。』春秋何尤於襄公，而書其奸？何宥於桓公，隱而不譏？如經失之，傳家左邱明公羊穀梁何諱不言？案桓公之過，多內寵，內嬖如夫人者大，有五公子爭立，齊亂，公薨，三月乃訃。世聞內嬖六人，嫡庶無別，則言亂於姑姊妹七人矣。傳書言：『齊桓公負婦人面朝諸侯。』此言桓公之淫亂無

禮甚也。夫桓公大朝之時，負婦人於背，其游宴之時，何以加此？方修土禮，崇厲肅敬，負婦人於背，何以能率諸侯，朝事王室？葵丘之會，桓公驕矜，當時諸侯畔者九國，睚眦不得，九國畔去，况負婦人淫亂之行，何以肯留？或曰：『管仲告諸侯，「吾君背有疽，創不得婦人，瘡不表愈。」諸侯信管仲，故無畔者。』夫十室之邑，必有忠信，若孔子當時諸侯，千人以上，必知方術，治疽不用婦人，管仲爲君諱也，諸侯知仲爲君諱而欺已，必恚怒而畔去，何以能久統會諸侯，成功於霸？或曰：『桓公實無道，任賢相管仲，故能霸天下。』夫無道之人，與狂無異，信讒遠賢，反害仁義，安能任管仲，能養人令之成事，桀殺關龍逢，紂殺王子比干，無道之君，莫能用賢，使管仲賢，桓公不能用，用管仲，故知桓公無亂行也。有賢明之君，故有貞良之臣，臣賢君明之驗，奈何謂之有亂？難曰：『衛靈公無道之君，時知賢臣，管仲爲輔，何明桓公不爲亂也？』夫靈公無道，任用三臣，僅以不喪，非有功行也。桓公尊九九之人，拔甯戚於車下，責包茅不貢，遣兵攻楚，九合諸侯，一匡天下，千世一出之主也，而云負婦人於背，虛矣！

說尙書者曰：『周公居攝，帶天子之綬，戴天子之冠，負展南面，而朝諸侯。』戶牖之間曰展，南面之坐位也。負展南面鄉坐，展在後也，桓公朝諸侯之時，或南面坐，婦人立於後也。世俗傳云，則曰負婦人於背矣。此則夔一足，宋丁公鑿井得一人之語也。唐虞時，夔爲大夫，性知音樂，調聲悲喜，當時人曰：『調樂如夔，一足矣！』世俗傳言夔一足，案秩宗官缺，帝舜博求，衆稱伯夷，伯夷稽首，讓于夔，龍秩宗卿官，漢之宗正也，斷足，足非其理也。且一足之人，何用行也？夏后孔甲，田于東（一作莫）山，天雨晦冥，入于民家，主人方乳，或曰：『後來之子必貴。』或曰：『不勝之子必賤。』孔甲曰：『爲余子，孰能賤之？』遂載以歸，析櫟斧斫其足，卒爲守者。孔甲之欲貴之，子有餘力矣，斷足無宜，故爲守者。今夔一足，無因趨步，坐調音樂可也。秩宗之官，不宜一足，猶守者斷足，不可貴也。孔甲不得貴之子，伯夷不得讓於夔也。宋丁公者，宋人也，未鑿井時，常有寄汲，計之曰：『去一人作。』自鑿井後，不復寄汲，計之曰：『得一人之作。』故曰：『宋丁公鑿井得一人。』俗傳言曰：『丁公鑿井，得一人於井中。』夫人生於人，非生於土也。穿土鑿井，無爲得人，推此以論，負婦人之語，猶此類也。負婦人而坐，則云婦人在背，知婦人在

背非違，則生管仲以婦人治痘之言矣。使桓公用婦人微服，婦人於背，女氣瘡可去，以婦人治痘，方朝諸侯，桓公重衣，婦人襲裳，女氣分隔，負之何益？桓公思土，作庭燎而夜坐，以思致士，反以白日負婦人見諸侯乎？

傳書言：『聶政爲嚴翁仲刺殺韓王。』此虛也。夫聶政之時，韓列侯也。列侯之三年，聶政刺韓相俠累，十二年列侯卒，與聶政殺俠累相去十七年，而言聶政刺殺韓王，短書小傳，竟虛不可信也。

傳書又言：『燕太子丹使刺客荊軻刺秦王，不得，誅死。後高漸麗復以擊筑見秦王。秦王說之，知燕太子之客，乃冒其眼，使之擊筑。漸麗乃置鉛於筑中，以爲重。當擊筑，秦王膝進，不能自禁。漸麗以筑擊秦王額。秦王病傷，三月而死。』夫言高漸麗以筑擊秦王，實也。言中秦王病傷三月而死，虛也。夫秦王者，秦始皇帝也。始皇二十年，燕太子丹使荊軻刺始皇，始皇殺軻，明矣。二十一年，使將軍王翳攻燕，得太子首；二十五年，遂伐燕而虜燕王嘉。後不審何年，高漸麗以筑擊始皇，不中，誅漸麗，當二十七年，遊天下，到會稽，至琅琊，北至勞盛山，並海，西至平原津而病，說沙丘平臺，始皇崩。夫識書言始皇還到沙丘而亡，傳書又言病筑瘡三月而死，於秦一始皇之身世，或言死於沙丘，或言死於秦，其死言迥病瘡。傳書之言，多失其實，世俗之人，不能定也。

變虛篇

傳書曰：『宋景公之時，熒惑守心。公懼，召子韋而問之曰：「熒惑在心，何也？」子韋曰：「熒惑，天罰也，心，宋分野也，禍當君。雖然，可移於宰相。」公曰：「宰相，所使治國家也，而移死焉，不祥。」子韋曰：「可移於民。」公曰：「民死，寡人將誰爲也？甯獨死耳！」子韋曰：「可移于歲。」公曰：「民饑必死，爲人君而欲殺其民以自活也，其誰以我爲君者乎？是寡人命國盡也，子毋復言！」子韋退走，北面再拜，曰：「臣敢賀君。天之處高而聽卑，君有君人之言，三，天必三賞君。今夕，星必徙三舍，君延命二十一年。」公曰：「奚知之？」對曰：「君有三善，故有三賞。星必三徙，三徙行七星，星當一年，三七二十一，故君命延二十一歲。臣請伏於殿下以伺之。星必不徙，臣請死耳。」是

夕也，火星果徙三舍，如子韋之言，則延年審得二十一歲矣。星徙審則延命，延命明則景公爲善，天祐之也，則夫世間人能爲景公之行，則必得景公祐矣。此言虛也。何則？皇天遷怒，使熒惑本景公身有惡而守心，則雖聽子韋言，猶無益也。使其不爲景公，則雖不聽子韋之言，亦無損也。

齊景公時有彗星，使人禳之。晏子曰：『無益也，祇取誣焉。天道不闇，不貳其命，若之何禳之也？且天之有彗，以除穢也。君無穢德，又何禳焉？若德之穢，禳之何益？』詩曰：『惟此文王，小心翼翼，昭事上帝，聿懷多福，厥德不同，以受方國。』君無回德，方國將至，何患於彗？詩曰：『我無所監，夏后及商，用亂之故，民卒流亡。』若德回亂，民將流亡，祝史之爲，無能補也。公說乃止。齊君欲禳彗星之凶，猶子韋欲移熒惑之禍也。宋君不聽，猶晏子不肯從也。則齊君爲子韋，晏子爲宋君也。同變共稱，一事二人，天猶賢宋君，使熒惑徙三舍，延二十一年，獨不多（一作爲）晏子使彗消而增其壽，何天佑善偏駁不齊一也？人君有善行，善行動於心，善言出於意，同由共本，一氣不異。宋景公出三善言，則其先三善言之前，必有善行也。有善行必有善政，政善則嘉瑞臻，福祥至，熒惑之星，無爲守心也。使景公有失誤之行，以致惡政，惡政發則妖異見，熒之守心，桑穀之生朝，高宗消桑穀之變，以政不以言，景公卻熒惑之異，亦宜以行。景公有惡行，故熒惑守心，不政政修行，坐出三善言，安能動天？天安肯應，何以效之？使景公出三惡言，而使熒惑守心乎？夫三惡言不能使熒惑守心，三善言安能使熒惑退徙三舍，以三善言獲二十一年，如有百善言，得千歲之壽乎？非天佑善之意，應誠爲福之實也。

子韋之言，天處高而聽卑，君有君人之言三，天必三賞君。夫天體也，與地無異。諸有體者，耳咸附於首，聽與耳殊，未之有也。天之去人，高數萬里，使耳附天，聽數萬里之語，弗能聞也。人坐樓臺之上，察地之蟻蟻，尙不見其體，安能聞其聲？何則？蟻蟻之體細，不若人形大；聲音孔氣，不能達也。今天之崇高，非直樓臺；人體比於天，非若蟻蟻於人也。謂天非若蟻蟻於人也，謂天聞人言，隨善惡爲吉凶，誤矣。四夷入諸夏，因譯而通，同形均氣，語不相曉，雖五帝三王，不能去譯，獨曉四夷，況天與人異體，音與人殊乎？人不曉天所爲，天安能知人所行，使天體乎？耳高不

能聞人言；使天氣平，氣若雲煙，安能聽人辭？詭災變之家曰：『人在天地之間，猶魚在水中矣。其能以行動天地，猶魚鼓而振水也。魚動而水蕩，氣變。』此非實事也。假使真然，不能至天。魚長一尺，動於水中，振旁側之水，不過數尺。大若不過與人同，所振蕩者，不過百步。而一里之外，儼然澄靜，離之遠也。今人操行變氣，遠近宜與魚等。氣應而變，宜與水均。以七尺之細形，形中之微氣，不過與一鼎之蒸火，同從下地，上變皇天，何其高也！

且景公，賢者也。賢者操行，上不及聖，下不過惡人。世間聖人莫不堯舜，惡人莫不桀紂。堯舜操行多善，無移熒惑之效。桀紂之政多惡，有反景公脫禍之驗。景公出三善言，延年二十一歲，是則堯舜宜獲千歲。桀紂宜爲殤子。今則不然，各隨年壽。堯舜桀紂，皆近百載，是竟子韋之言妄，延年之語虛也。且子韋之言曰：『熒惑，天使也；心，宋分野也；禍當君。』若是者，天使熒惑加禍于景公也。如何可移于將相若歲與國民乎？天之有熒惑也，猶王者之有方伯也。諸侯有當死之罪，使方伯圖守其國。國君問罪於臣，臣明罪在君，雖然可移于臣子與人民。設國君計其言，令其臣歸罪於國。方伯聞之，肯聽其言，釋國君之罪，更移以付國人乎？方伯不聽者，自國君之罪，非國人之事也。方伯不聽自國君之罪，熒惑安肯移禍於國人？若此，子韋之言妄矣。曰：景公聽平言，庸何能動天？使諸侯不聽其臣言，引過自予。方伯聞其言，釋其罪，委之去乎？方伯不釋諸侯之罪，熒惑安肯徙去三合？

夫聽與不聽，皆無福善。星徙之實，未可信用。天人同道，好惡不殊。人道不然，則知天無驗矣。宋衛陳鄭之俱災也，氣變見天，梓慎知之，請于子產，有以除之。子產不聽，天道當然，人事不能卻也。使子產聽梓慎，四國能無災乎？堯遭鴻水時，臣必有梓慎子韋之知矣。然而不卻除者，堯與子產同心也。按子韋之言曰：『熒惑，天使也；心，宋分野也；禍當君。』審如此言，禍不可除，星不可卻也。若夫寒溫失和，風雨不時，政事之家，謂之失誤所致。可以善政賢行變而復也。若熒惑守心，若必死猶亡，禍安可除？修政政行，安能卻之？善政賢行，尚不能卻。出虛華之三言，謂星卻而禍除，增壽延年，享長久之福，誤矣。觀子韋之言，景公言熒惑之禍，非寒暑風雨之類，身死命終之祥也。國且亡，身且死，妖氣見於天，容色見於面，面有容色，雖善操行，不能滅死，徵已見也。在體之色，不可以言行滅；在天

之妖，安可以治除乎？人病且死，色見於面，人或謂之曰：『此必死之徵也。』雖然，可移於五鄰，若移於奴役。『當死之人，正言不可，容色肯爲善言之故滅，而當死之命，肯爲之長乎？氣不可滅，命不可長。然則熒惑安可卻？』景公之年安可增乎？由此言之，熒惑守心，未知所爲，故景公不死也。

且言星徙三舍者，何謂也？星三徙於一舍乎？一徙歷于三舍也。案子韋之言曰：『君有君人之言三，天必三賞君。今夕星必徙三舍。』若此，星竟徙三舍也。夫景公一坐有三善言，星徙三舍；如有十善言，星徙十舍乎？熒惑守心，爲善言卻。如景公復出三惡言，熒惑食心乎？爲善言卻，爲惡言進；無惡無善，熒惑安居不行動乎？或時熒惑守心，爲旱災，不爲君憂。子韋不知，以爲死禍，信俗至誠之感。熒惑之處，星必偶自嘗去，景公自不死，世則謂子韋之言審。景公之誠感天矣。亦或時子韋知星行度適自去，自以著己之知，明君臣推讓之所致；見星之數七，因言星七舍，復得二十一年，因以星舍計年之數，是與齊太卜無以異也。齊景公問太卜曰：『子之道何能？』對曰：『能動地。』星子往見公，公曰：『寡人問太卜，曰：『子道何能？』對曰：『能動地。』地固可動乎？』晏子嘿然不對，出見太卜曰：『昔吾見鉤星在房心之間，地其動乎？』太卜曰：『然。』星子出，太卜走見公，曰：『臣非能動地，地固將自動。』夫子韋言星徙，猶太卜言地動也。地固且自動，太卜言已能動之，星固將自徙，子韋言君能徙之，使晏子不言鉤星在房心，則太卜之姦對不覺宋無星子之知，臣故子韋之一言遂爲其是。案子韋書錄序，秦亦言子韋曰：『君出三善言，熒惑宜有動。』於是候之，果徙舍，不言三。或時星嘗自去，子韋以爲驗，實動離舍，世增言三，既空增三舍之數，又虛生二十一年之壽也。

田共虛篇

殷高宗之時，桑穀俱生於朝，七日而大拱。高宗召其相而問之，相曰：『吾雖知之，弗能言也。』問祖己，祖己曰：『夫桑穀者，野草也，而生於朝，意朝亡乎？』高宗恐駭，側身而行，追思索先王之政，明養老之義，與國圖，繼絕世。

舉侯民桑穀亡。三年之後，諸侯以譚來朝者六國，遂享百年之福。高宗賢君也，而惑桑穀生而問祖己，行祖己之言，修政政行。桑穀之妖亡，諸侯朝而年長，久修善之義篤，故瑞應之福溥。此虛言也。祖己之言「朝當亡哉」，夫朝之當亡，猶人當死；人欲死，怪出，國欲亡，期盡。人死命終，死不復生，亡不復存。祖己之言，政何益於不亡？高宗之修行，何益於除禍？夫家人見凶修善，不能得吉；高宗見妖政政，安能除禍？除禍且不能，況能招致六國，延期至百年乎？故人之死生，在於命之天壽，不在行之善惡；國之存亡，在期之長短，不在於政之得失。案祖己之占，桑穀爲亡之妖，亡象已見，雖修孝行，其何益哉？何以效之？魯昭公之時，鸛鳴來巢，師已探文成之世，童謠之語，有鸛鳴之言，見今來有巢之驗，則占謂之凶。其後昭公爲季氏所逐，出於齊，國果空虛，都有虛驗，故野鳥來巢。師已處之，禍竟如占。使昭公聞師己之言，修行政政爲善，居高宗之操，終不能消。何則？鸛鳴之語已兆，出奔之禍已成也。

鸛鳴之兆，已出於文成之世矣。根生葉安得不茂，源發流安得不廣，此尙爲近，未足以言之。夏將衰也，二龍戰於庭，吐蜃而去。夏王禰而藏之，夏亡傳於殷，殷亡傳於周，皆莫之發。至幽王之時，發而視之，蜃流于庭，化爲玄龜，走入後宮，與婦人交，遂生褒姒。褒姒歸周，厲王惑亂，國遂滅亡。幽厲王之去夏世，以爲千數歲。二龍戰時，幽厲褒姒等未爲人也。周亡之妖，已出久矣。妖出，禍安得不就？瑞見，福安得不至？若二龍戰時，言曰：「余褒之二君也。」是則褒姒當生之驗也。龍稱褒姒，褒姒不得不生；生則厲王不得不惡，惡則國不得不亡。徵已見，雖五聖十賢相與卻之，終不能消。善惡同實，善祥出，國必興；惡祥見，朝必亡。謂惡異可以善行除，是謂善瑞可以惡政滅也。河源出於崑崙，其流播於九河，使禹卻以善政，終不能還者，水勢當然，人事不能禁也。河源不可禁，二龍不可除，則桑穀不可卻也。王命之當興也，猶春氣之當爲夏也；其當亡也，猶秋氣之當爲冬也。見春之微葉，知夏有莖葉；觀秋之零實，知冬之枯萃。桑穀之生，其猶春葉秋實也，必然猶驗之。今詳修政政行，何能除之？夫以周亡之祥見於夏時，又何以知桑穀之生，不爲紂亡出乎？或時祖己言之，信野草之占，失遠近之實。高宗問祖己之後，側身行道，六國諸侯，偪朝而至。高宗之命，自長未終，則謂起桑穀之問，政政修行，享百年之福矣。夫桑穀之生，殆爲紂出，亦或

時吉而不凶，故殷朝不亡，高宗壽長，祖已信野草之占，謂之當亡之徵。

漢孝武皇帝之時，獲白麟，戴兩角而共舐，使謁者終軍議之。軍曰：『夫野獸而共一角，象天下合同爲一也。』麒麟，野獸也；桑穀，野草也，俱爲野物。獸草何別？終軍謂獸爲吉，祖已謂野草爲凶。高宗祭成湯之廟，有蜚雉升鼎，而雉祖已以爲遠人將有來者，說尙書家謂雉凶，議駁不同；且從祖已之言，雉來吉也。雉伏於野草之中，草覆野鳥之形，若民人處草廬之中，可謂其入吉而廬凶乎？民人入都，不謂之凶；野草生朝，何故不吉？介葛盧來朝，是凶也，如以草木者爲凶，朱草蓂莢皆草也，宜生於野，而生於朝，是爲不吉，何故謂之瑞？一野之物來至，或出吉凶異識。朱草蓂莢善草，故爲吉，則是以善惡爲吉凶，不以都野爲好醜也。

周時天下太平，越嘗獻雉於周公。高宗得之而吉，雉亦草野之物，何以爲吉？如以雉所分有似於士，則存亦仍有似君子。公孫術得白鹿，占何以凶？然則雉之吉凶未可知，則夫桑穀之善惡未可驗也。桑穀或善物，象遠方之士，將皆立於高宗之廟，故高宗獲吉福享長久也。說災異之家，以爲天有災異者，所以譴告王者，信也。夫王者有過，異見於國，不致災見草木，不致災見於五穀，不致災至身。左氏春秋傳曰：『國之將亡，鮮不五穀。』災見於五穀，五穀安得熱，不熱將亡之徵？災亦有且亡五穀不熟之應。天不熟，或爲災，或爲福，禍福之實未可知。桑穀之言安可審？論說之家，著於書記者，皆云：『天雨穀者凶。』書傳曰：『蒼頡作書，天雨穀，鬼夜哭。』此方凶惡之應和者，天何用成穀之道？從天降而和，且猶謂之善，況所成之穀從雨下乎？極論訂之，何以爲凶？夫陰陽和則穀稼成，不則被災害，陰陽和者，穀之道也，何以謂之凶？絲纁成帛，纁成衣，賜人絲纁，猶爲重厚，況遣人以成帛與織布乎？夫絲纁猶陰陽，帛布猶成穀也，賜人帛不謂之惡，天與之穀，何故謂之凶？夫雨穀吉凶未可定，桑穀之言未可知也。使暢草生於周之時，天下太平，人來獻暢草，暢草亦草野之物也，與彼桑穀何異？如以夷狄獻之則爲吉，使暢草生於周家，肯謂之善乎？夫暢草可以燉，蘼芬香暢達者，將祭灌暢降神，設自生於周朝，與嘉禾朱草蓂莢之類不殊矣，然則桑亦食蠶蠶爲絲，絲爲帛，帛爲衣，衣以入宗廟爲朝服，與暢無異，何以謂之凶？衛獻公于太子至，蠶

臺，地處左輪，御者曰：『太子下拜。吾聞國君之子，地處車輪左者，速得國。』太子遂不下，反乎舍。御人見太子，太子曰：『吾聞爲人子者，盡和順於君，不行私欲，共嚴承令，不逆君安。今吾得國，是君失安也。見國之利而忘君安，非子道也。得國而拜，其非君欲。廢子道者不孝，逆君欲則不忠。而欲我行之，殆吾欲國之危明也。』投殿將死，其御止之，不能禁，遂伏劍而死。夫地處左輪，審爲太子速得國，太子宜不死，獻公宜疾薨。今獻公不死，太子伏劍，御者之占，俗之虛言也。或時地爲太子將死之妖，御者信俗之占，故失吉凶之實。夫桑穀之生，與地處左輪相似類也。地至實凶，御者以爲吉；桑穀實吉，租己以爲凶。

禹南濟於江，有黃龍負舟，舟中之人，五色無主。禹乃嘻笑而稱曰：『我受命於天，竭力以勞萬民，生，寄也；死，歸也。死歸也，何足以滑和，視龍猶螻蛄也。』龍去而亡。案古今龍至皆爲吉，而禹獨謂黃龍凶者，見其負舟，舟中之人恐也。夫以桑穀比於龍，吉凶雖反，蓋相似。野草生於朝，尙爲不吉，殆有若黃龍負舟之異，故爲吉而殷朝不亡。晉文公將與楚成王戰於城濮，彗星出楚，楚操其柄，以問咎犯。咎犯對曰：『以彗鬪，倒之者勝。』文公夢與成王搏，成王在上，墮其腦。問咎犯，咎犯曰：『君得天而成，王伏其罪，戰必大勝。』文公從之，大破楚師。嚮令文公問庸臣，必曰不勝。何則？彗星無吉，搏在上無凶也。夫桑穀之生，占爲凶，猶晉當彗，未搏在下爲不吉也。然而吉者，殆有若對彗見天之說，故高宗長久，殷朝不亡。使文公不問咎犯，咎犯不明其吉，戰以大勝，世人將曰：『文公以至賢之德，破楚之無道，天雖見妖，臥有凶夢，猶滅妖消凶以獲福，殷無咎犯之異知，而有租己信常之占，故桑穀之文，傳世不絕，轉禍爲福之言，到今不實。』

感虛篇

儒者傳書，言：『堯之時，十日並出，萬物焦枯。堯上射十日，九日去，一日常出。』此言虛也。夫人之射也，不過百步，矢力盡矣。日之行也，行天星度。天之去人，以萬里數。堯上射之，安能得日？使堯之時，天地相近，不過百步，則堯

射日。矢能及之。過百步。不能得也。假使堯時。天地相近。堯射得之。猶不能傷日。傷日何肯去。何則。日。火也。使在地之火。附一把炬。人從旁射之。雖中。安能滅之。地火不爲見射而滅。天火何爲見射而去。此欲言堯以精誠射之。精誠所加。金石爲虧。蓋誠無堅。則亦無遠矣。夫水與火。各一性也。能射火而滅之。則當射水而除之。洪水之時。氾濫中國。爲民大害。堯何不推精誠。射而除之。堯能射日。使火不爲害。不能射河。使水不爲害。夫射水不能卻水。則知射日之語。虛非實也。或曰。『日。氣也。射雖不及。精誠滅之。』夫天亦遠。使其爲氣。則與日月同。使其爲體。則與金石等。以堯之精誠。滅日。虧金石。上射日。則能穿天乎。世稱桀紂之惡。射天而殿地。睿高宗之德。政消桑穀。今堯不能以德滅十日。而必射之。是德不若高宗。惡與桀紂同也。安能以精誠獲天之應也。

傳書言。『武王伐紂。渡孟津。陽侯之波。逆流而擊。疾風晦冥。人馬不見。於是武王左操黃鉞。右執白旄。瞋目而麾之曰。『余在天下。誰敢害吾意者。』於是風霧波罷。』此言虛也。武王渡孟津時。士衆喜樂。前歌後舞。天人同應。人喜天怒。非實宜也。前歌後舞。未必其實。風雨而止之。迹近爲虛。夫風者。氣也。論者以爲天地之號令也。武王誅紂。是乎。天當安靜以祐之。如誅紂非乎。而天風者。怒也。武王不奉天命。求索已過。瞋目言曰。『余在天下。誰敢害吾者。』重天怒。增己之惡也。風何肯止。父母怒。子不改過。瞋目大言。父母肯賞之乎。如風。天所爲。禍氣自然是。亦無知。不爲瞋目麾之。故止。夫風。猶雨也。使武王瞋目。以旄麾雨而止之乎。武王不能止雨。則亦不能止風。或時武王適麾之。雨偶自止。世褒武王之德。則謂武王能止風矣。

傳書言。『魯襄公與韓戰。戰酣日暮。公援戈而麾之。日爲之反三舍。』此言虛也。凡人能以精誠感動天。專心一意。委務積神。精通于天。天爲變動。然尚未可謂然。襄公志在戰。爲日暮一麾。安能令日反。使聖人麾日。日終不反。襄公何人。而使日反乎。鴻範曰。『星有好風。星有好雨。日月之行。則有冬有夏。月之從星。則有風雨。』夫星與日月同精。日月不從星。星輒復變。明日月行有常度。不得從星之好惡也。安得從襄公之所欲。星之在天也。爲日月舍。猶地有郵亭。爲長吏廨也。二十八舍有分度。一舍十度。或增或減。言日反三舍。乃三十度也。日日行一度。

磨之間，反三十日，時所在度也。如謂舍爲度，三度亦三日行也。一磨之間，今日卻三日也。宋景公推說出三舍言，熒惑徙三舍，實輪者猶謂之虛。襄公爭鬪，惡日之暮，以此一戈磨，無誠心善言，日爲之反，殆非其意哉！且日，火也，聖人磨火，終不能卻。襄公磨日，安能使反，或時戰時日正卯，戰迷謂日之暮，磨之轉左曲道，日若卻，世好神怪，因謂之反，不道所謂也。

傳書言：『荆軻爲燕太子謀刺秦王，白虹貫日。衛先生爲秦畫長平之事，太白蝕昂。』此言精感天，天爲變動也。夫言白虹貫日，太白蝕昂，實也。言荆軻之謀，衛先生之畫，感動皇天，故白虹貫日，太白蝕昂者，虛也。夫以筋撞鐘，以筭擊鼓，不能鳴者，所用撞擊之者小也。今人之形，不過七尺，以七尺形中精神，欲有所爲，雖積銳意，猶筋撞鐘，筭擊鼓也，安能動天？精非不誠，所用動者小也。且所欲害者人也，人不動，天反動乎？問曰：『人之害氣能相動乎？』曰：『不能。』『豫讓欲害趙襄子，襄子心動；貫高欲篡高祖，高祖亦心動。二子懷精，故兩主振感。』曰：『禍變且至，身自有怪，非適人所能動也。何以驗之？』時或遭狂人於途，以刃加己，狂人未必念害己身也，然而己身先時已有妖怪矣。由此言之，妖怪之至，禍變自凶之象，非欲害己者之所爲也。且凶之人，卜得惡兆，筮得凶卦，出門見不吉，占危，睹禍氣，禍氣見於面，猶白虹太白見於天也。變見於天，妖出於人，上下適然自相應也。

傳書言：『燕太子丹朝於秦，不得去，從秦王求歸。秦王執留之，與之誓曰：「使日再中，天雨粟，今烏白頭，馬生角，廚門木象生肉，足乃得歸。」』當此之時，天地祐之，日爲再中，天雨粟，烏白頭，馬生角，廚門木象生肉，足。秦王以爲聖，乃歸之。』此言虛也。燕太子丹何人，而能動天？聖人之拘，不能動天；太子丹，賢者也，何能致此？夫天能祐太子，生諸瑞以免其身，則能和秦王之意以解其難。見拘一事而易，生瑞五事而難。舍一事之易，爲五事之難，何天之不憚勞也！湯困夏臺，文王拘羑里，孔子厄陳蔡，三聖之困，天不能祐，使拘之者睹祐知聖，出而尊厚之。或曰：『拘三聖者，不與三誓。三聖心不願，故祐聖之瑞，無因而至。天之祐人，猶借人以物器矣；人不求索，則弗與也。』曰：『太子願天下瑞之時，豈有言語乎？心願而已。然湯困生夏臺，文王拘於羑里時，心亦願出；孔子厄陳蔡，心願食天。』

何不令夏臺焚，里闔鑄毀敗，湯文涉出，雨粟陳蔡，孔子食飽乎？太史公曰：『世稱太子丹之令天雨粟，馬生角，太抵皆虛言也。』太史公書，漢世實事之人，而云虛言，近非實也。

傳書言：『杞梁氏之妻，嚮城而哭，城爲之崩。』此言杞梁從軍不還，其妻痛之，嚮城而哭，至誠悲痛，精氣動城，故城爲之崩也。夫言嚮城而哭者，實也；城爲之崩者，虛也。夫人哭悲，莫過雍門子。雍門子哭對孟嘗君，孟嘗君爲之於邑，蓋哭之精誠，故對嚮之者，悽愴感動也。夫雍門子能動孟嘗君之心，不能感孟嘗君衣者，衣不知悵惻，不以心相關通也。今城，土也，土猶衣也，無心腹之藏，安能爲悲哭感動而崩？使至誠之聲能動城土，則其對林木哭，能折草破木乎？嚮水而泣，能涌水滅火乎？夫草木水火，與土無異，然杞梁之妻，不能崩城明矣。或時城適自崩，杞梁之妻適哭，下世好虛，不原其實，故崩城之名，至今不滅。

傳書言：『鄒衍無罪，見拘於燕，當夏五月，仰天而歎，天爲隕霜。』此與杞梁之妻哭而崩城，無以異也。言其無罪見拘，當夏仰天而歎，實也；言天爲之雨霜，虛也。夫萬人舉口，並解吁嗟，猶未能感天；鄒衍一人，冤而壹歎，安能下霜？鄒衍之冤，不過曾子伯奇。曾子見疑而吟，伯奇被逐而歌，疑與拘同，吟歌與歎等。曾子伯奇，不能致寒，鄒衍何人，獨能雨霜？被逐之冤，尙未足言。申生伏劍，子胥刎頸，實孝而賜死，誠忠而被誅；且臨死時，皆有聲辭。聲辭出口，與仰天歎無異。天不爲二子感動，獨爲鄒衍動，豈天痛見拘，不悲流血哉？伯奇冤痛相似，而感動不同也。夫煥一炬火，燬一鑊水，終日不能熱也；倚一尺冰，置庖廚中，終夜不能寒也。何則？微小之感，不能動大巨也。今鄒衍之歎，不過如一炬火、一鑊水，而皇天巨大，不徒鑊水庖廚之醜類也。一仰天歎，天爲隕霜，何天之易感，霜之易降也？夫哀與樂同，喜與怒均，衍與怨痛，使天下霜，使衍蒙非望之賞，仰天而笑，能以冬時使天熱乎？變復之家曰：『人君秋賞則溫，夏罰則寒。寒不累時，則霜不降；溫不兼日，則冰不釋。』一夫冤而一歎，天輒下霜，何氣之易變，時之易轉也？寒溫自有時，不合變復之家。且從變復之說，或時燕王好用刑，寒氣應至，而衍囚拘而歎，歎時霜適自下，世見適歎而霜下，則謂鄒衍歎之致也。

傳書言：『師曠奏白雲之曲，而積物下降，風雨暴至，平公因之癘病。晉國赤地。』或言：『師曠清角之曲，一奏之，有雲從西北起，再奏之，大風至，大雨隨之，裂帷幕，破俎豆，墮廊瓦，坐者散走，平公恐懼，伏乎廊室。晉國大旱，赤地三年，平公癘病。』夫白雲與清角，或同曲而異名，其禍敗同一實也。傳書之家，載以爲是，世俗觀見，信以爲然，原省其實，殆虛言也。夫清角何音之聲而致此？清角，木音也，故致風而如木爲風，雨與風俱。三尺之木，數絃之聲，感動天地，何其神也！此復一哭崩城，一歎下霜之類也。師曠能鼓清角，必有所受，非能質性生出之也。其初受學之時，宿昔習弄，非直一再奏也。審如傳書之言，師曠學清角時，風雨當至。

傳書言：『瓠芭鼓瑟，淵魚出聽，師曠鼓琴，六馬仰秣。』或言：『師曠鼓清角，一奏之，有玄鶴二八，自南方來，集於門廊之危，再奏之而列，三奏之，延頸而鳴，舒翼而舞。音中宮商之聲，聲吁于天。平公大悅，坐者皆喜。』尙書曰：『擊石拊石，百獸率舞。』此雖奇怪，然尙可信。何則？鳥獸好悲聲耳，與人耳同也。禽獸見人欲食，亦欲食之。聞人之樂，何爲不樂？然而魚聽仰秣，玄鶴延頸，百獸率舞，蓋且其實。風音之至，晉國大旱，赤地三年，平公癘病，殆虛言也。或時奏清角時，天偶風雨，風雨之後，晉國適旱，平公好業，喜笑過度，偶發癘病。傳書之家，信以爲然，世人觀見，遂以爲實。實者樂聲不能致此，何以驗之？風雨暴至，是陰陽亂也。樂能亂陰陽，則亦能調陰陽也。王者何須修身正行，擴施善政，使鼓調陰陽之曲，和氣自至，太平自立矣。

傳書言：『湯遭七年旱，以身禱於桑林，自責以大過，天乃雨。』或言：『五年，禱辭曰：『余一人有罪，無及萬夫；萬夫有罪，在余一人。天以一人之不敏，使上帝鬼神傷民之命。』於是剪其髮，麗其手，自以爲牲，用祈福於上帝。上帝甚說，時雨乃至。』言湯以身禱於桑林，自責若言，剪髮麗手，自以爲牲，用祈福於帝者，實也；言雨至爲湯自責以身禱之故，殆虛言也。孔子疾病，子路請禱。孔子曰：『有諸？』子路曰：『有之，諫曰：『禱爾于上下神祇。』』孔子曰：『丘之禱久矣。』天人修身正行，素禱之日久，聖地鬼神知其無罪，故曰：『禱久矣。』易曰：『大人與天地合其德，與日月合其明，與四時合其敘，與鬼神合其吉凶。』此言聖人與天地鬼神同德行也。卽須禱以得福，

是不同也。湯與孔子俱聖人也，皆素禱日久。孔子不使子路禱以治病，湯何能以禱得雨？孔子素禱，身猶疾病；湯亦素禱，歲猶大旱。然則天地之有水旱，猶人之有疾病也。疾病不可以自責除，水旱不可以禱謝去，明矣。湯之致旱以過乎，是不與天地同德也。今不以過致旱乎？自責禱謝，亦無益也。人形長七尺，形中有五常，有痺（一作「痺」）之熱之病，深是剋責，猶不能愈，況以廣大之天，自有水旱之變，湯用七尺之形，形中之誠，自責禱謝，安能得雨邪？人在層臺之上，人從層臺下叩頭，求請臺上之物，臺上之人聞其言，則憐而與之；如不聞其言，雖至誠區區，終無得也。夫天去人，非徒層臺之高也，變雖自責，天安能聞知而與之雨乎？夫旱，火變也；雉，水異也。堯遭洪水，可謂雉矣；堯不自責，以身禱祈，必堯禹治之，知水變必須治也。除雉不以禱祈，除旱亦宜如之。由此言之，湯之禱祈，不能得雨，或時旱久，時當自雨；湯以旱久，亦適自責。世人見雨之下，隨湯自責而至，則謂湯以禱祈得雨矣。

傳書言：「倉頡作書，天雨粟，鬼夜哭。」此言文章興而亂漸見，故其妖變，致天雨粟，鬼夜哭也。夫言天雨粟，鬼夜哭，實也；言其應倉頡作書虛也。夫河出圖，洛出書，聖帝明王之瑞應也。圖書文章，與倉頡所作字畫何以異？天地爲圖書，倉頡作文字，業與天地同，指與鬼神合，何非何惡，而致雨粟神哭之怪？使天地鬼神惡人有書，則其出圖書非也。天不惡人有書，作書何非，而致此怪？或時倉頡適作書，天適雨粟，鬼偶夜哭，而雨粟，鬼神哭，自有所爲，世見應書而至，則謂作書生亂敗之象，應事而動也。天雨穀，論者謂之從天而下，變而生。如以雲雨論之，雨穀不變，不足怪也。何以驗之？夫雲雨出於丘山，降散則爲雨矣。人見其從上而降，則謂之天雨水也。夏日則雨水，冬日天寒，則雨凝而爲雪，皆由雲氣發於丘山，不從天上降，集於地明矣。夫穀之雨，猶復雲布之，亦從地起，因與疾風俱飄，參於天，集於地。人見其從天落也，則謂之天雨穀。建武三十一年中，陳留雨穀，穀下蔽地。案視穀形，若茨而黑，有似於稗實也。此或時夷狄之地，生出此穀，夷狄不粒食，此穀生於草野之中，成熟垂委於地，遭疾暴風起，吹揚與之俱飛，風衰穀集墜於中國。中國見之，謂之雨穀，何以效之？野火燔山澤，則澤之中，草木皆燭，其葉爲灰，疾風暴起，吹揚之，參天而飛，風衰葉下，集於道路。夫天雨穀者，草木葉燭飛而集之類也；而世以爲雨穀，作傳書者

以變怪。天主施氣，地主產物，有葉實可啄食者，皆地所生，非天所爲也。今穀非氣所生，須土以成，雖云怪變，怪變因類，生地之物，更從天集，生天之物，可從地出乎？地之有萬物，猶天之有列星也。星不更生於地，穀何獨生於天乎？

書傳又言：『伯益作井，龍發玄雲，神棲崑崙。』言龍井有害，故龍神爲變也。夫言龍登玄雲，實也，言神棲崑崙，又言爲作井之故，龍登神去，虛也。夫作井而飲，耕田而食，同一實也。伯益作井，致有變動，始爲耕耘者，何故無變？神農之採木爲耒，教民耕耨，民始食穀，穀始播種，耕土以爲田，鑿地以爲井，井出水以救渴，田出穀以拯饑，天地鬼神所欲爲也。龍何故登玄雲？神何故棲崑崙？夫龍之登玄雲，古今有之，非始益作井而乃登也。方今盛夏，雷雨時至，龍多登雲，雲龍相應，龍乘雲雨而行，物類相致，非有爲也。堯時五十之民，鑿壤於塗，觀者曰：『大哉！堯之德也！』鑿壤者曰：『吾日出而作，日入而息，鑿井而飲，耕田而食，堯何等力？』堯時已有井矣。唐虞之時，參龍御龍，龍常在朝，夏末政衰，龍乃隱伏，非益鑿井龍登雲也。所謂神者，何神也？百神皆是。百神何故惡人爲井？使神與人同，則亦宜有飲之欲。有飲之欲，憎井而去，非其實也。夫益殆不鑿井，龍不爲鑿井，登雲神不棲於崑崙，傳書意妄造生之也。

傳書言：『梁山崩，壅河三日不流，晉君憂之。晉伯宗以登者之言，令景公素縞而哭之，河水爲之流通。』此虛言也。夫山崩壅河，猶人之有癰腫，血脈不流也。治癰腫者，可復以素縞哭泣之聲治乎？堯之時，洪水滔天，懷山襄陵，帝堯吁嗟，博求賢者，水變甚於河壅，堯憂深於景公，不聞以素縞哭泣之聲，能厭勝之。堯無賢人若輩者之時，將洪水變大，不可以聲服除也；如素縞而哭，悔過自責也。堯禹之治水，以力役不自責。梁山，堯時山也，所壅之河，堯時河也。山崩河壅，天雨水踊，二者之禹，無以殊也。堯禹治洪水以力役，輩者治壅河用自責，變同而治異，人鈞而應殊，殆非賢聖變復之實也。凡變復之道，所以能相感動者，以物類也。有寒則復之以溫，溫復解之以寒，故以龍致雨，以刑逐暑，皆緣五行之氣，用相感勝之。山崩壅河，素縞哭之，於道何意乎？此或時河壅之時，山初崩，土

積聚，水未盛。三日之後，水盛土散，稍壞沮矣。壞沮水流，竟注東去，遭伯宗得輦者之言，因素縞而哭，哭之因流。流時謂之河變，起此而復，其實非也。何以驗之？使山恆自崩，素縞哭無益也；使其天變應之，宜改政治。素縞而哭，何政所改，而天變復乎？

傳書言：「曾子之孝，與母同氣。」曾子出薪於野，有客至而欲去。曾母曰：「願留，參方到。」蓋以右手搯其左臂。曾子左臂立痛，即馳至問母：「臂何故痛？」母曰：「今者客來欲去，吾搯臂以呼汝耳。」蓋以至孝與父母同氣，體有疾病，精神輒感。一曰：此虛也。夫孝悌之至，通於神明，乃謂德化至天地，俗人緣此而說，言孝悌之至，精氣相動，如曾母臂痛，曾子臂亦輒痛。曾母病，曾子亦病乎？曾母死，曾子輒死乎？致事，曾母先死，曾子不死矣。此精氣能小相動，不能大相感也。世稱申喜夜聞其母歌，心動開闔，問歌者爲誰，果其母。蓋聞母聲，聲音相感，心悲意動，開闔而問，蓋其實也。今曾母在家，曾子在野，不聞號呼之聲，母小搯臂，安能動子？疑世人頌成，聞曾子之孝，天下少雙，則爲空生母搯臂之說也。

世稱：「南陽卓公爲綠氏令，蝗不入界。」蓋以賢明至誠，災蟲不入其縣也。此又虛也。夫賢明至誠之化，通於同類，能相知心，然後慕服。蝗蟲，閭虺之類也，何知何見，而能知卓公之化？使賢者處深野之中，閭虺能不入其舍乎？閭虺不能避賢者之舍，蝗蟲何能不入卓公之縣？如謂蝗蟲變與閭虺異，夫寒溫亦災變也。使一郡皆寒，賢者長一縣，一縣之界能獨溫乎？夫寒溫不能避賢者之縣，蝗蟲何能不入卓公之界？夫如是，蝗蟲適不入界，卓公賢名稱於世，世間謂之能卻蝗蟲矣。何以驗之？夫蝗之集於野，非能普博盡蔽地也，往往積聚多少有處，非所積之地，則盜跖所居，所少之野，則伯夷所處也。集過有多少，不能盡蔽覆也。夫集地有多少，則其過縣有留去矣。多少不可以驗善惡，有無安可以明賢不肖也。蓋時蝗自過，不謂賢人界不入，明矣。

世論行善者稱至，爲惡者稱來。稱禍之應，皆天也。人爲之，天應之。陽恩，人君賞其行陰惠，天地報其德，無貴賤賢愚，莫謂不然。徒見行事有其文傳，又見善人時遇福，故遂信之，謂之實然。斯言或時賢聖欲勸人爲善，著必然之語，以明德報，或稱時通遇者以爲然。如實論之，安得稱福乎？楚惠王食寒菹而得蛭，因遂吞之，復有疾而不能食。令尹問：『王安得此疾也？』王曰：『我食寒菹而得蛭，念謹之而不行其罪乎？是廢法而威不立也，非所以使國人聞之也。』謹而行誅乎？則庖廚監食者，法皆當死，心又不忍也。吾恐左右見之也，因遂吞之。』令尹避席，再拜而賀曰：『臣聞天道無親，唯德是輔。王有仁德，天之所奉也，病不爲傷。』是夕也，惠王之後而蛭出，及久患心腹之積皆愈。故天之親德也，可謂不察乎？曰：此虛言也。案惠王之吞蛭，不肖之主也。有不肖之行，天不祐也，何則？惠王不忍謹蛭，恐庖廚監食法皆誅也。一國之君，專擅賞罰而赦人君所爲也。惠王通謹菹中何故有蛭，庖廚監食，皆當伏法。然能終不以飲食行誅於人，赦而不罪，惠莫大焉。庖廚罪覺而不誅，自新而改，後惠王赦細而活微，身安不病，今則不然，彊食害己之物，使監食之臣，不聞其過，失御下之威，無禦非之心，不肖一也。使庖廚監食失甘苦之和，若塵土落於菹中，大如蠅虱，非意所能覺，非目所能見，原心定罪，不明其過，可謂惠矣。今蛭廣有分數，長有寸度，在寒菹中，眇目之人，猶將見之；巨不畏敬，擇濯不謹，罪過至重。惠王不謹，不肖二也。菹中不當有蛭，不食投地，如恐左右之見，懷屏隱匿之處，足以使蛭不見，何必食之？如不可食之物，誤在菹中，可復隱匿而彊食之，不肖三也。有不肖之行而天祐之，是天報祐不肖人也。不忍謹蛭，世謂之賢，賢者操行，多若吞蛭之類；吞蛭天除其病，是則賢者常無病也。賢者德薄，未足以言；聖人純道，操行少非，爲推不忍之行，以容人之過，必衆多矣。然而武王不豫，孔子疾病，天之祐人，何不實也？或時惠王吞蛭，蛭偶自出，食生物者，無有不死，腹中熱也。初吞蛭時未死，而腹中熱，蛭動作，故腹中痛。須臾，蛭死腹中，痛亦止。蛭之性食血，惠王心腹之積，殆積血也，故食血之蟲死，而積血之病愈。猶狸之性食鼠，有鼠病，吞狸自愈。物類相勝，方藥相使也，食蛭蟲而病愈，安得怪乎？食生物無不死，死無不出之後，蛭出，安得祐乎？令尹見惠王有不忍之德，知蛭入腹中必嘗死出，臣因再拜賀病不爲傷，著己知來

之德，以喜惠王之心，是與子韋之言星徙，太卜之言地動，無以異也。

宋人有好善行者，三世不政，家無故黑牛生白犢，以聞孔子。孔子曰：『此吉祥也，以享鬼神，即以饋祭。』一年，其父無故而盲，牛又生白犢。其父又使其子問孔子。孔子曰：『吉祥也，以享鬼神，復以饋祭。』一年，其子無故而盲，其後楚攻宋，圍其城。當此之時，易子而食之，析骸而炊之。此獨以父子俱盲之故，得毋乘城，軍罷圖解，父子俱視，此修善積行，神報之效也。曰：此虛言也。夫宋人父子修善如此，神報之，何必使之先盲後視哉？不言常視，不能護乎？此神不能護不盲之人，則亦不能以盲護人矣。使宋之君，合戰頓兵，流血僵尸，戰夫禽獲，死亡不還，以盲之故，得脫不行，可謂神報之矣。今宋楚相攻，兩軍未合，華元子反結言而退，二軍之衆並全而歸，兵矢之刃無頓用者，雖有乘城之役，無死亡之患，爲善人報者，爲乘城之間乎？使時不盲，亦獨不死。盲與不盲，俱得脫免，神使之盲，何益於善？當宋國乏糧之時也，盲人之家，豈獨富哉？俱與乘城之家，易子析骸，反以窮厄，獨盲無見，則神報祐人，失善惡之實也。宋人父子，前偶自以風寒發盲，圖解之後，盲偶自愈。世見父子修善，又用二白犢祭，宋楚相攻，獨不乘城，圖解之後，父子皆視，則謂修善之報，獲鬼神之祐矣。

楚相孫叔敖爲兒之時，見兩頭蛇殺而埋之，歸對其母泣。母問其故。對曰：『我聞見兩頭蛇死，向者出見兩頭蛇，恐去母死，是以泣也。』其母曰：『今蛇何在？』對曰：『我恐後人見之，即殺而埋之。』其母曰：『吾聞有陰德者，天必報之，汝必不死，天必報汝。』叔敖竟不死，遂爲楚相。埋一蛇獲二祐，天報母明矣。曰：此虛言也。夫見兩頭蛇輒死者，俗言也，有陰陽天報之稱者，俗議也。叔敖信俗言而埋蛇，其母信俗議而必報，是謂死生無命。在一蛇之死，齊孟嘗君田文以五月五日生，其父田嬰讓其母曰：『何故舉之？』曰：『君所以不舉五月子，何也？』嬰曰：『五月子長與戶同，殺其父母。』曰：『人命在天乎？在戶乎？如在天，君何憂也？如在戶，則宜高其戶耳，誰而及之者？』後文長與一戶同而嬰不死，是則五月舉子之忌無效驗也。夫惡見兩頭蛇，猶五月舉子也。五月舉子，其父不死，則知見兩頭蛇者，無殃禍也。由此言之，見兩頭蛇自不死，非埋之故也。埋一蛇獲二祐，如望十地得幾祐乎？

埋地惡人復見叔敖賢也賢者之行豈徒埋地一事哉前埋地之時多所行矣。稟天善性動有賢行賢行之人宜見吉物無爲乃見殺人之地豈叔敖未見地之時有惡天欲殺之見其埋地除其惡天祐之哉石生而堅蘭生而香如謂叔敖之賢在埋地之時非生而稟之也。儒家之徒董無心墨家之徒繆子相見講道繆子稱墨家佑鬼神是引秦穆公有明德上帝賜之九十年繆子難以堯舜不賜年桀紂不天死堯舜桀紂猶爲尙遠且近難以秦穆公晉文公之證者行之迹也迹生時行以爲死證穆者誤亂之名文者德惠之表有誤亂之行天賜之年有德惠之操天奪其命乎秦穆公之霸不過晉文之證矣於穆公天不加晉文以命獨賜穆公以年是天報謀亂與穆公同也。天下善人寡惡人衆善人順道惡人違天然夫惡人之命不短善人之年不長天不命善人常享一白載之壽惡人爲殤子惡死何哉。

禍虛篇

世謂受福祐者既以爲行善所致又謂被禍害者爲惡所得以爲有沈惡伏過天地罰之鬼神報之天地所罰小大猶發鬼神所報遠近猶至傳曰子夏喪其子而喪其明曾子弔之哭子夏曰「天乎予之無罪也」曾子怒曰「商汝何無罪也吾與汝事夫子於洙泗之間退而老於西河之上使西河之民疑汝於夫子爾罪一也喪爾親使民無有異聞爾罪二也喪爾子喪爾明爾罪三也而曰汝何無罪歟」子夏投其杖而拜曰「吾過矣吾過矣吾離羣而索居亦以久矣」夫子夏喪其明曾子責以罪子夏投杖拜曾子之言蓋以天實罰過故目失其明已實有之故拜受其過始聞言見皆以爲然熟考論之虛妄言也夫失明猶失聽也失明則盲失聽則聾病聾不謂之有過失明謂之有罪惑也蓋耳目之病猶心腹之有病也耳目失明聽謂之有罪心腹有病可謂有過乎伯牛有疾孔子自牖執其手曰「亡之命矣夫斯人也而有斯疾也」原孔子言謂伯牛不幸故傷之也如伯牛以過致疾天報以惡與子夏同孔子宜陳其過若曾子謂子夏之狀今乃言命命非遇也且天之罰人猶人君

罪下也。所罰服罪人，君赦之。子夏服過，拜以自悔。天德至明，宜愈其責。如非天罪，子夏失明，亦無三罪，且喪明之病，孰與被厲之病？喪明有三罪，被厲有十過乎？顏淵早死，子路蒞醢，早死蒞醢，極禍也；以喪明言之，顏淵子路有百罪也。由此言之，曾子之言誤矣。然子夏之喪明，喪其子也。子者，人情所通，親者，人所力報也。喪親民無聞，喪子失其明，此恩損於親，而愛增於子也。增則哭泣無數，數哭中風，目失明矣。曾子因俗之議，以著子夏三罪，子夏亦緣俗議，因以失明，故拜受其過。曾子子夏未離於俗，故孔子門敘行，未在上第也。

秦襄王賜白起劍。白起伏劍將自刎，曰：『我有何罪於天乎？』良久曰：『我固當死。長平之戰，趙卒降者數十萬，我詐而盡坑之，是足以死。』遂自殺。白起知己前罪，服更後罰也。夫白起知己所以罪，不知趙卒所以坑。如天審罰有過之人，趙降卒何辜於天？如用兵妄傷殺，則四十萬衆必有不亡不亡之人，何故在其善行無罪而竟坑之，卒不得以善蒙天之祐？白起何故獨以其罪伏天之誅？由此言之，白起之言過矣。秦二世使使者詔殺蒙恬，蒙恬喟然嘆曰：『我何過於天？無罪而死。』良久徐曰：『恬罪故當死矣。夫起臨洮屬之遼東，城徑萬里，此其中不能毋絕地脈，此乃恬之罪也。』即吞藥自殺。太史公非之曰：『夫秦初滅諸侯，天下心未定，夷傷未瘳，而恬爲名將，不以此時彊諫，救百姓之急，養老矜孤，修衆庶之和，阿意興功，此其子弟過誅，不亦宜乎？何與乃罪地脈也？』夫蒙恬之言既非，而太史公非之亦未是。何則？蒙恬絕脈，罪至當死。地養萬物，何過於人？而蒙恬絕其脈，知已有絕地脈之罪，不知地脈所以絕之過，自非如此，與不自非何以異？太史公爲非恬之爲名將，不能以彊諫，故致此禍。夫當諫不諫，故致受死亡之戮，身任李陵，坐下蠶室，如太史公之言，所任非其人，故殘身之戮，天命而至也。非蒙恬以不彊諫，故致此禍，則已下蠶室，有非者矣。已無非，則其非蒙恬非也。作伯夷之傳，則善惡之行，云：『七十子之徒，仲尼獨薦顏淵好學，然回也屢空，糟糠不厭，卒天死。天之報施善人如何哉？盜跖日殺不辜，肝人之肉，暴戾恣睢，聚黨數千，橫行天下，竟以壽終，是獨遵何哉？』若此言之，顏淵不當早夭，盜跖不當全活，也不怪顏淵不當夭，而獨謂蒙恬當死，過矣。

漢將李廣，其望氣王朔語曰：『自漢擊匈奴，而廣未嘗不在其中，而諸校尉以下，才能不及中。然以副軍攻取侯者數十人，而廣不爲侯後人。然終無尺土之功，以得見封邑者，何也？豈吾相不當侯，且固命也？』朔曰：『將軍自念，豈常有恨者乎？』廣曰：『吾爲隴西太守，常反，吾誘而降之八百餘人，吾詐而同日殺之，至今恨之。獨此矣！』朔曰：『禍莫大於殺已降，此乃將軍所以不得侯者也。』李廣然之，聞者信之。夫不侯猶不王者，也不侯何恨？不王何負乎？孔子不王，論者不謂之不負；李廣不侯，王朔謂之有恨。然則王朔之言，失論之實矣。論者以爲人之封侯，自有天命。天命之符，見於骨體。大將軍衛青在建章宮時，鉗徒相之曰：『貴至封侯。』後竟以功封萬戶侯。衛青未有功，而鉗徒見其當封之證。由此言之，封侯有命，非人操行所能得也。鉗徒之言實而有效，王朔之言虛而無驗也。多橫恣而不罹禍，順道而建福，王朔之說，白起自非，蒙恬自咎之類也。倉卒之世，以財利相劫殺者衆，同車共船，千里爲商，至闕迴之地，殺其人而并取其財，尸捐不收，骨暴不葬，在水爲魚鼈之食，在土爲螻蟻之糧。情虛之人，不力農勉商，以積穀貨，遭歲饑饉，腹餓不飽，椎人若畜，割而食之，無君子小人，並爲魚肉。人十所不能知，吏所不能覺。千人以上，萬人以下，計一聚之中，生者百一，死而九，可謂無道至痛甚矣。皆得陽達，富厚安發。天不責其無仁義之心，道相并殺，非其無力作，而倉卒以人爲食，加以漚禍，使之天命，章其陰罪，明示世人，使知不可爲非之驗，何哉？王朔之言未必審。

然傳書李斯妬同才，幽殺韓非於秦，後被車裂之罪；商鞅欺舊交，擒魏公子卬，後受誅死之禍。彼欲言其賊賢欺交，故受患禍之報也。夫韓非何故而爲李斯所幽，公子卬何罪而爲商鞅所擒？車裂誅死，賊賢欺交，幽死見擒，何以致之？如韓非公子卬有惡，天使李斯商鞅報之，則李斯商鞅爲天奉誅，宜蒙其賞，不當受其禍。如韓非公子卬無惡，非天所罰，李斯商鞅不得幽擒。論者說曰：『韓非公子卬有陰惡伏罪，人不聞見，天獨知之，故受戮殃。』夫諸有罪之人，非賊賢則逆道。如賊賢，則被所賊者何負？如逆道，則被所逆之道何非？凡人窮達禍福之至，大之則命，小之則時。太公窮賤，遭周文而得封；甯戚隱陋，逢齊桓而見官。非窮賤隱陋有非，而得封見官有是也。窮達

有時，遭遇有命也。太公甯戚，賢者也，尚可謂有非。聖人，純道者也，虞舜爲父弟所害，幾死再三，有遇唐堯，堯釋而立爲帝，嘗見害未有非，立爲帝未有是。前時未到，後則命時至也。案古人君臣困窮，後得逢通，未必初有惡天禍其前，卒有善神祐其後也。一身之行，一行之操，結髮終死，前後無異。然一成一敗，一進一退，一窮一通，一全一壞，遭遇適然，命時嘗也。

龍虛篇

盛夏之時，雷電擊折破樹木，發壞室屋，俗謂天取龍，謂龍藏於樹木之中，匿於屋室之間也。雷電擊折樹木，發壞室屋，則龍見於外，龍見雷取以升天。世無愚智賢不肖，皆謂之然，如實考之，虛妄言也。夫天之取龍何意邪？如以龍神爲天使，猶賢巨爲君使也。反報有時，無爲取也。如以龍通逃不還，非神之行，天亦無用爲也。如龍之性嘗在天，在天上者固當生子，無爲復在地。如龍有升降，降龍生子於地，子長大，天取之，則世名雷電爲天怒，取龍之子，無爲怒也。且龍之所居，常在水澤之中，不在木中屋間。何以知之？叔向之母曰：『深山大澤，實生龍蛇。』傳曰：『山致其高，雲雨起焉；水致其深，蛟龍生焉。』傳又言：『禹被於江，黃龍負船。荊次非渡淮，兩龍鑿舟。東海之上，有菑邱，訴（菑或作魯）勇而有力，出過神淵，使御者飲馬，馬飲因沒，訴怒拔劍，入淵追馬，見兩蛟方食其馬，手劍擊殺兩蛟。』由是言之，蛟與龍常在淵水之中，不在木中屋間明矣。在淵水之中，則魚鼈之類，何爲上天？天之取龍，何用爲哉？如以天神乘龍而行，神恍惚無形，出入無間，無爲乘龍也。如仙人騎龍，天爲仙者取龍，則仙人含天精氣，形輕飛騰，若鴻鵠之狀，無爲騎龍也。世稱黃帝騎龍升天，此言蓋虛，猶今謂天取龍也。且世謂龍升天者，必謂神龍，不神不升天，升天，神之效也。天地之性，人爲貴，則龍幾矣。貴者不神，賤者反神乎？如龍之性，有神與不神，神者升天，不神者不能龜，地亦有神與不神，神龜神蛇，復升天乎？且龍稟何氣而獨神？天有蒼龍白虎朱雀玄武之象也，地亦有青龍黃龍之象，四星之精，皆生百獸，虎與龍爲不神，龍何故獨神也？人爲衆蟲之長，龍爲衆蟲

之長，俱爲物長，謂龍升天，人復升天乎？龍與人同，獨謂能升天者，謂龍神也。世或謂聖人神而先知，猶謂神龍能升天也，因謂聖人先知之明，輪龍之才，謂龍升天，故其宜也。

天地之間，恍惚無形，寒暑風雨之氣，乃爲神。今龍有形，有形則行，行則食，食則物之性也。天地之性，有形體之類，能行食之物，不得爲神。何以言之？龍有體也。傳言：『鱗蟲三百，龍爲之長。』龍爲鱗蟲之長，安得無體？何以言之？孔子曰：『龍食於清，游於清；龜食於清，游於濁；魚食於濁，游於清。』丘上不及龍，下不爲魚，中止其龜與？』山海經言：『四海之外，有乘龍蛇之人，世俗畫龍之象，馬首蛇尾。』由此言之，馬蛇之類也。慎子曰：『蜚龍乘雲，騰地游霧，雲龍雨霧，與蟬蟻同矣。』韓子曰：『龍之爲蟲也，鳴可狎而騎也。然喉下有逆鱗尺餘，人或嬰之，必殺人矣。』比之爲蟬蟻，又言蟲可狎而騎，蛇馬之類明矣。傳曰：『紂作象箸而箕子泣，泣之者，痛其極也。』夫有象箸，必有玉杯。玉杯所盈，象箸所拔，則必龍肝豹胎。夫龍肝可食，其龍難得，難得則愁下，愁下則禍生，故從而痛之。如神龍，其身不可得殺，其肝何可得食？禽獸肝胎非一，稱龍肝豹胎者，人得食而知其味美也。

春秋之時，龍見于絳郊。魏獻子問於蔡墨曰：『吾聞之，蟲莫智於龍，以其不生得也，謂之智，信乎？』對曰：『人實不知，非龍實智。古者畜龍，故國有豢龍氏，有御龍氏。』獻子曰：『是二者，吾亦聞之，而不知其故，是何謂也？』對曰：『昔者鬻叔宋有裔子曰董父，實甚好龍，能求其嗜欲以飲食之，龍多歸之。乃授裔龍以服事，舜而錫之姓，曰董氏。曰豢龍，封諸鬲川；饒夷氏是其後也。故帝舜氏世有畜龍。及有夏孔甲，擾於帝，帝賜之乘龍，河漢各二，各有雌雄。孔甲不能食也，而未獲豢龍氏。有陶唐氏既衰，其後有劉累，學擾龍于豢龍氏，以事孔甲，能飲食龍。夏后嘉之，賜氏曰御龍，以更豕韋之後。龍一雌死，潛醢以食夏后。夏后烹之，既而使求，懼而不得，遷于魯縣。范氏其後也。』獻子曰：『今何故無之？』對曰：『夫物有其官，官修其方，朝夕思之，一日失職，則死及之。失官不食，官宿其業，其物乃至。若泯棄之，物乃低伏，鬱湮不育。』由此言之，龍可畜又可食也。可食之物，不能神矣。世無其官，又無董父后劉之人，故潛藏伏匿，出見希疏，出又乘雲，與人殊路，人謂之神。如存其官而有其人，則龍牛之類也，何神

之有以山海經言之，以慎子韓子證之，以俗世之畫驗之，以箕子之泣訂之，以蔡墨之對輪之，知龍不能神，不能升天。天不以雷電取龍明矣，世俗言龍神而升天者，妄矣。

世俗之言，亦有緣也。短書言：『龍無尺木，無以升天。』又曰：『升天。』又言：『尺木。』謂龍從木中升天也。彼短書之家，世俗之人也，見雷電發時，龍隨而起，當雷電樹木擊之時，龍適與雷電俱在樹木之側，雷電去，龍隨而上，故謂從樹木之中升天也。實者，雷龍同類，感氣相致，故易曰：『雲從龍，風從虎。』又言：『虎嘯谷風至，龍興景雲起。』龍與雲相招，虎與風相致，故董仲舒等祭之法，設土龍以爲感也。夫盛夏太陽用事，雲雨干之，太陽火也，雲雨水也，火激薄則鳴而爲雷，龍聞雷聲則起，起而雲至，雲至而龍乘之，雲雨感龍，龍亦起雲而升天。天極雷高，雲消復降，人見其乘雲，則謂升天，見天爲雷電，則爲天取龍。世儒讀易，文見傳言，皆知龍者雲之類，拘俗人之議，不能通其說。又見短書爲證，故遂謂天取龍。天不取龍，龍不升天。當高邱訴之殺兩蛟也，手把其尾，拽而出之，至淵之外，雷電擊之，蛟則龍之類也。蛟龍見而雲雨至，雲雨至則雷電擊。如以天實取龍，龍爲天用，何以死蛟爲取之？且魚在水中，亦隨雲雨，蜚而乘雲雨，則升天也。龍，魚之類也。其乘雷電，猶魚之飛也。魚隨雲雨，不謂之神，龍乘雷電，獨謂之神，世俗之言，失其實也。物在世間，各有其乘。水蛇乘霧，龍乘雲，鳥乘風。見龍乘雲，獨謂之神，失龍之實，謬龍之能也。然則龍之所以爲神者，以能屈伸其體，存亡其形，屈伸其體，存亡其形，未足以爲神也。豫讓吞炭，漆身爲厲，人不識其形，子貢滅鬚爲婦人，人不知其狀，龍變體自匿，人亦不能覺，變化藏匿者，巧也；物性亦有自然，狴狴知往，乾鵲知來，鸚鵡能言，三怪比龍，性變化也。如以巧爲神，豫讓子貢，神也。孔子曰：『游者可爲網，飛者可爲矰。』至於龍也，吾不知其乘風雲上升，今日見老子，其猶龍乎？』夫龍乘雲而上，雲消而下，物類可察，上下可知，而云孔子不知，以孔子之聖，尙不知龍，況俗人智淺，好奇之性，無實可之心，謂之龍神而升天，不足怪也。

盛夏之時，雷電迅疾，擊折樹木，壞敗室屋，時犯殺人。世俗以爲擊折樹木，壞敗室屋者，天取龍，其犯殺人也，謂之陰過。飲食人以不潔淨，天怒擊而殺之。隆隆之聲，天怒之音，若人之咆哮矣。世無愚智，莫謂不然。推人道以喻之，虛妄之言也。夫雷之發動，一氣一聲也。折木壞屋，亦犯殺人。犯殺人時，亦折木壞屋。獨謂折木壞屋者，天取龍，犯殺人罰陰過，與取龍吉凶不同，並時共聲，非道也。論者以爲隆隆者，天怒咆哮之聲也。此便於罰過，不宜於取龍罰過。天怒可也；取龍，龍何過而怒之？如龍神，天取之，不宜怒；如龍有過，與人同罪，殺龍而已，何爲取也？殺人，怒可也；取龍，龍何過而怒之？殺人不取，殺龍取之，人龍之罪何別，而其殺之何異？然則取龍之說，既不可聽，罰過之言，復不可從。何以效之？案雷之聲，迅疾之時，人仆死於地，隆隆之聲，臨人首上，故得殺人。審隆隆者，天怒乎？怒用口之怒氣殺人也。口之怒氣，安能殺人？人爲雷所殺，詢其身體，若燔灼之狀也。如天用口怒，口怒生火乎？且口着乎體，口之動與體俱，當擊折之時，聲着于地，其衰也，聲着于天。夫如是，聲着地之時，口至地，體亦宜然。當雷迅疾之時，仰視天，不見天之下，不見天之下，則夫隆隆之聲者，非天怒也。天之怒，與人無異，人怒，身近人則聲疾，遠人則聲微。今天聲近，其體遠，非怒之實也。且雷聲迅疾之時，聲東西，或南北；如天怒體動，口東西南北，仰視天，亦宜東西南北。

或曰：『天已東西南北矣，雲雨冥晦，人不能見耳。』夫千里不同風，百里不共雷。易曰：『震驚百里。』雷電之地，雷雨冥晦，百里之外，無雨之處，宜見天之東西南北也。口着於天，天宜隨口；口一移，普天皆移，非獨雷雨之地，天隨口動也。且所謂怒者，誰也？天神邪？蒼蒼之天也。如謂天神，神怒無聲；如謂蒼蒼之天，天者體不怒，怒用口。且天地相與，夫婦也，其即民父母也。子有過，父怒笞之致死，而母不哭乎？今天怒殺人，地宜哭之；獨聞天之怒，不聞地之哭。如地不能哭，則天亦不能怒，且有怒則有喜，人有陰過，亦有陰善。有陰過，天怒殺之；如有陰善，天亦宜以善賞之。隆隆之聲，謂天之怒；如天之喜，亦哂然而笑。人有喜怒，故謂天喜怒。推人以知天，知天本於人，如人不怒，則亦無緣謂天怒也。緣人以知天，宜盡人之性。人性怒則咆哮，喜則歌笑，比聞天之怒，希聞天之喜，比見天之罰。

希見天之賞。豈天怒不喜，貪於罰，希於賞哉？何怒罰有效，喜賞無驗也？

且雷之擊也，折木壞屋，時犯殺人，以爲天怒。時或徒雷，無所折敗，亦不殺人，天空怒乎？人君不空喜怒，喜怒必有賞罰。無所罰而空怒，是天妄也。妄則失威，非天行也。政事之家，以暴溫之氣，爲喜怒之候。人君喜即天溫，怒則天寒。雷電之日，天必寒也。高祖之先，劉媪曾息大澤之陂，夢與神遇，此時雷電晦冥，天方施氣，宜喜之時也，何怒而雷？如用擊折者爲怒，不擊折者爲喜，則夫隆隆之聲，不宜同音。人怒喜異聲，天怒喜同音，與人乖異，則人何緣謂之天怒？且飲食人以不潔淨，小過也。以至辱之身，親罰小過，非辱者之宜也，辱不親罰過，故王不親誅罪。天尊於王，親罰小過，是天德劣於王也。且天之用心，猶人之用意。人君罪惡初聞之時，怒以非之，及其誅之，哀以憐之。故論語曰：『如得其情，則哀矜而勿喜。』紂至惡也，武王將誅，哀而憐之。故就書曰：『予惟率夷憐爾。』人君誅惡，憐而殺之，天之罰過，怒而擊之，是天少恩而人多惠也。

說兩者以爲天施氣。天施氣，氣溼爲雨，故雨潤萬物，名曰澍。人不喜不施恩，天不說不降雨，謂雷。天怒兩者，天喜也。雷起常與雨俱，如論之言，天怒且喜也。人君賞罰不同日，天之怒喜不殊時，天人相違，賞罰乖也。且怒喜具形，亂也。惡人爲亂，怒罰其過，罰之以亂，非天行也。冬雷，人謂之陽氣淺，春雷，謂之陽氣發，夏雷，不謂陽氣盛，謂之天怒，竟虛言也。人在天地之間，物也，物亦物也。物之飲食，天不能知；人之飲食，天獨知之。萬物於天，皆子也。父母於子，恩德一也，豈爲貴賢加意，賤愚不察乎？何其察人之明，省物之闇也！犬豕食人，腐臭食之，天不殺也。如以人貴而獨禁之，則鼠豕人飲食，人不知誤而食之，天不殺也。如天能原鼠，則亦能原人。人誤以不潔淨飲食，人不知而食之耳，豈故舉腐臭以予之哉？如故予之，人亦不肯食。

呂后斷戚夫人手，去其眼，置於廁中，以爲人豕。呼人示之，人皆傷心。惠帝見之，病臥不起。呂后故爲天不罰也。人誤不知，天輒殺之，不能原誤失而責故，天治淨也。夫人食不淨之物，口不知有其污也；如食已知之，名曰腸痔。戚夫人入廁，身體辱之，與痔何以別？痔之與體，何以異？爲痔不爲體，傳痔不病體，非天意也。且人聞人食不淨之

物心平如故。觀戚夫人者，莫不傷心；人傷，天意悲矣。夫悲戚夫人，則怨到屈。案呂后之崩，未必遇雷也。道士劉奉熒惑趙王，使食不清，秦死未必遇雷也。建初四年夏六月，雷擊殺會稽新亭，日食，令五頭皆死。夫幸何陰遇而雷殺之？舟人持溪下流，人飲上流，舟人不雷死，天神之虞天，猶王者之居也。王者居雷關之內，則天之神，宜在隱匿之中；王者居宮室之內，則天亦有太微紫宮軒轅王昌之坐。王者與人相遠，不知人之陰惡；天神在四宮之內，何能見人闇過？王者聞人過以人知，天知人惡，亦宜因鬼使。天闇過於鬼神，則其誅之，宜使鬼神；如使鬼神，則天怒鬼神也，非天也。且王斷刑以秋，天之殺用夏，此王者用刑違天時。奉天而行其誅殺也，宜法象上天。天殺用夏，王誅以秋，天人相違，非奉天之義也。

或論曰：『飲食不潔淨，天之大惡也；殺大惡，不須時。』王者大惡，謀反大逆，無道也；天之大惡，飲食人不潔淨，天之所惡，小大不均等也。如小大同，王者宜法天，制飲食人不潔淨之法，爲死刑也。聖王有天下，制刑不備此法，聖王闕略有遺失也。或論曰：『鬼神治陰，王者治陽。陰過闇昧，人不能覺，故使鬼神主之。』陰過非一也，何不盡殺？案一過，非治陰之義也。天怒不旋日，人怒不旋踵，人有陰過，或時有用冬，未必專用夏也。以冬過饒，不輒擊殺，遠至於夏，非不旋日之意也。

圖畫之工，圖雷之狀，轆轤如連鼓之形。又圖一人若力士之容，謂之雷公，使之左手引連鼓，右手推椎，若擊之狀。其意以爲雷聲隆隆者，連鼓相扣擊之意也；其魄然若敝裂者，椎所擊之聲也；其殺人也，引連鼓相椎并擊之矣。世又信之，莫謂不然。如復原之，虛妄之象也。夫雷，非聲則氣也。聲與氣，安可推引而爲連鼓之形乎？如審可推引，則是物也。相扣而音鳴者，非鼓即鐘也。夫隆隆之聲，鼓與鐘邪？如審是也，鐘鼓而不空懸，須有筭簴，然後能安，然後能鳴。今鐘鼓無所懸著，雷公之足，無所踏履，安得而爲雷？或曰：『如此固爲神。如必有所懸著，足有所履，然後而爲雷，是與人等也，何以爲神？』曰：神者，恍惚無形，出入無門，上下無根，故謂之神。今雷公有形，雷聲有器，安得爲神？如無形，不得爲之圖象；如有形，不得謂之神。謂之神龍升天，實事者謂之不然，以人時或見龍之形也。以

其形見，故圖畫升龍之形也；以其可畫，故有不神之實。難曰：『人亦見鬼之形，鬼復神乎？』曰：人時見鬼，有見雷公者乎？鬼名曰神，其行蹈地，與人相似；雷公頭不懸於天，足不蹈於地，安能爲雷公？飛者皆有翼，物無翼而飛，謂仙人。畫仙人之形，爲之作翼，如雷公與仙人同，宜復着翼，使雷公不飛。圖雷家言其飛，非也；使實飛，不爲着翼，又非也。夫如是，圖雷之家，畫雷之狀，皆虛妄也。且詭雷之家，謂雷天怒响吁也；圖雷之家，謂之雷公怒引連鼓也。審如詭雷之家，則圖雷之家，非審如圖雷之家，則詭雷之家誤。二家相違也。并而是之，無是非之分。無是非之分，故無是非之實，無以定疑論，故虛妄之論勝也。禮曰：『刻每爲雷之形。一出，一入，一屈，一伸，爲相校軫則鳴。』校軫之狀，（校軫或作校較）鬱律嶮嶮之類也，此象類之矣。氣相校軫分裂，則隆隆之聲，校軫之音也；魄然若鑿裂者，氣射之聲也。氣射中人，人則死矣。

實說雷者，太陽之激氣也。何以明之？正月陽動，故正月始雷；五月陽盛，故五月雷迅；秋冬陽衰，故秋冬雷潛。盛夏之時，太陽用事，陰氣乘之。陰陽分事，則相校軫，校軫則激射，激射爲毒。中人輒死，中木木折，中屋屋壞。人在木下屋間，偶中而死矣。何以驗之？試以一斗水灌冶鑄之火，氣激鑿裂，若雷之音矣。或近之，必灼人體。天地爲鑄，大矣；陽氣爲火，猛矣；雲雨爲水，多矣；分爭激射，安得不迅？中傷人身，安得不死？當冶工之消鐵也，以土爲形，燥則鐵下，不則躍溢而射。射中人身，則皮膚灼剝，陽氣之熱，非直消鐵之烈也；陰氣激之，非直泥土之溼也；陽氣中人，非直灼剝之痛也。

夫雷，火也。氣剝人，人不得無迹。如灸處狀似文字，人見之謂天記，書其過以示百姓，是復虛妄也。使人盡有過，天用雷殺人，殺人當彰其惡，以懲其後，明著其文字，不當闇昧。圖出於河，書出於洛，河圖洛書，天地所爲，人讀知之。今雷死之書，亦天所爲也，何故難知？如以一人皮不可書，魯惠公夫人仲子，宋武公女也，生而有文在掌，曰「爲魯夫人」，文明可知，故仲子歸寧，雷書不着，故難以懲後。夫如是，火剝之迹，非天所刻畫也；或頗有而增其語，或無有而空生其言。虛妄之俗，好造怪奇，何以驗之？雷者，火也，以人中冒而死，即詢其身，中頭則發髮焦，中身

則皮膚灼爛。其尸上聞火氣一驗也。遺術之家以爲雷燒石色赤投於井中石沸井暴激聲大鳴若雷之狀二驗也。人傷於寒寒氣入腹腹中素溫溫寒分爭激氣雷鳴三驗也。當雷之時電光時見大若火之耀四驗也。當雷之擊時或燔人室屋及地草木五驗也。

夫論雷之爲火有五驗言雷爲天怒無一效然則雷爲天怒虛妄之言。雖曰論語云『迅雷風烈必變』禮記曰『有疾風迅雷甚雨則必變雖夜必興衣服冠而坐』懼天怒畏罰及己也。如雷不爲天怒其擊不爲罰過則君子何爲爲雷變動朝服而正坐子曰『天之與人猶父子有父爲之變子安能怨故天變己亦宜變順天時示己不違也。人聞大聲於外莫不驚駭竦身側耳以審聽之。況聞天變異常之聲軒轅迅疾之音乎。論語所指禮記所謂皆君子也。君子重慎自知無過如日月之蝕無陰闇食人以不潔淨之事內省不懼何畏於雷審如不畏雷則其變動不足以效天怒何則不爲己也。如審畏雷亦不足以效罰陰過何則雷之所擊多無過之人。君子恐偶過之故恐懼變動夫如是君子變動不能明雷爲天怒而反著雷之妄擊也。妄擊不罰過故人畏之。如審罰有過小人乃當懼耳君子之人無爲恐也。宋王問唐鞅曰『寡人所殺戮者衆矣而羣臣愈不畏其故何也』唐鞅曰『王之所罪盡不善者也。罰不善善者胡爲畏王欲羣臣之畏也不若毋辯其善與不善而時罪之斯羣臣畏矣』宋王行其言羣臣畏懼宋王大怒夫宋王妄刑故宋國大恐懼雷電妄擊故君子變動宋國大恐之類也。

道虛篇

儒書言『黃帝採首山銅鑄鼎於荆山下鼎既成有龍垂胡髯下迎黃帝黃帝上騎龍羣臣後宮從上七十餘人龍乃上去餘小臣不得上乃悉持龍髯龍髯拔隨黃帝之弓百姓仰望黃帝既上天乃抱其弓與龍胡髯吁號故後世因其處曰鼎湖其弓曰烏號』太史公記諫五帝亦云『黃帝封禪已仙去羣臣朝其衣冠因葬埋之』

曰，此虛言也。實黃帝者，何等也！號乎，證也。如證，臣子所諫列也。諫生時所行爲之證。黃帝好道，遂以升天；臣子諫之，宜以仙升，不當以黃證。證法曰：靜民則法曰黃，黃者，安民之證，非得道之稱也。百王之證，文則曰文，武則曰武，文武不失實，所以勸操行也。如黃帝之時（實）未有證乎，名之爲黃帝，何世之人也？使黃帝之臣子知君，使後世之人跡其行，黃帝之世，號證有無，雖疑未定，黃非升仙之稱明矣。龍不升天，黃帝騎之，乃明黃帝不升天也。龍起雲雨，因乘而行，雲散雨止，降復入淵，如實黃帝騎龍，隨溺於淵也。案黃帝葬於橋山，猶曰羣臣葬其衣冠。審騎龍而升天，夜不離形，如封禪已仙去，衣冠亦不宜遺。黃帝實仙不死而升天，臣子百姓所親見也。見其升天，知其不死必也。葬不死之衣冠，與實死者無以異，非臣子實事之心，別生於死之意也。載太山之上者七十有二君，皆勞情苦思，憂念王事，然後功成事竟，致治太平。太平則天下和安，乃升太山而封禪焉。夫修道求仙，與憂職勤事不同。心思道則忘事，憂事則害性。世稱堯若脂，舜若膽，心愁憂苦，形體羸癯，使黃帝致太平乎，則其形體宜如堯舜。堯舜不得道，黃帝升天，非其實也。使黃帝廢事修道，則心意調和，形體肥勁，是與堯舜異也；異則功不同矣。功不同，天下未太平，而升封又非實也。五帝三王，皆有聖德之優者，黃帝不在上焉。如聖人皆仙，仙者非獨黃帝；如聖人不仙，黃帝何爲獨仙？世見黃帝好方術，方術，仙者之業，則謂帝仙矣。又見鼎湖之名，則言黃帝採首山銅鑄鼎，而龍垂胡髯迎黃帝矣。是與說會稽之山，無以異也。夫山名曰會稽，即云夏禹巡狩，會計於山上，故曰會稽。夫禹至會稽，治水不巡狩，猶黃帝好方伎，不升天也。無會計之事，猶無鑄鼎垂胡髯之實也。里名勝母，可謂實有子勝其母乎？邑名朝歌，可謂民朝起者歌乎？

儒書言：『淮南王學道，招會天下有道之人，傾一國之尊，下道術之士，是以道術之士，並會淮南，奇方異術，莫不爭出。王遂得道，舉家升天，畜產皆仙，犬吠於天上，雞鳴於雲中。』此言仙藥有餘，犬雞食之，皆隨王而升天也。好道學仙之人，皆謂之然。此虛言也。夫人，物也，雖貴爲王侯，性不異於物。物無不死，人安能仙？鳥有毛羽能飛，不能升天。人無毛羽，何用飛升？使有毛羽，不過與鳥同，況其無有，升天如何？案能飛升之物，生有羽之兆，能飛走之

物，生有蹄足之形，馳走不能飛升，飛升不能馳走；稟性受氣，形體殊別也。今人稟馳走之性，故生無毛羽之兆，長大至老，終無奇怪。好道學仙，中生毛羽，終以飛升，使物性可變，金木水火可革更也。蝦蟇化為鶉，雀入水爲蜃，始稟自然之性，非學道所能爲也。好道之人，恐其或若等之類，故謂人能生毛羽，毛羽備具，能升天也。且夫物之生長，無卒成暴起，皆有浸漸。爲道學仙之人，能先生數寸之毛羽，從地自奮，升樓臺之陛，乃可謂升天。今無小升之兆，卒有大飛之驗，何方術之學，成無浸漸也？毛羽大效，難以觀實。且以人髣髴物色少老驗之。物生也，色青，其熟也，色黃；人之少也，髮黑，其老也，髮白。黃爲物熟驗，白爲人老效。物黃，人雖灌漑墮養，終不能青；髮白，雖吞藥養性，終不能黑。黑青不可復還，老衰安可伏卻？黃之與白，猶肉脰炙之燠，魚鮮養之熟也。燠不可復令脰熟，熟不可復令鮮。鮮脰猶少壯，燠熟猶衰老也。天養物，能使物暢至秋，不得延之至春；吞藥養性，能令人無病，不能壽之爲仙。爲仙體輕氣彊，猶未能升天。令見輕彊之驗，亦無毛羽之效。何用升天？天之與地皆彊也。地無下則天無上矣。天無上升之路，何如穿天之體？人力不能入。如天之門在西北，升天之人，宜從崑崙上。淮南之國，在地東南，如審升天，宜舉家先從崑崙，乃得其階。如鼓翼耶飛，趨西北之隅，是則淮南王有羽翼也。今不言其從之崑崙，亦不言其身生羽翼，空言升天，竟虛非實也。案淮南王劉安，孝武皇帝之時也，父長以罪遷蜀，嚴道至雍，道死。安嗣爲王，恨父徙死，懷反逆之心，招會術人，欲爲大事。伍被之屬，充滿殿堂，作道術之書，發怪奇之文，合景亂首（一本作齊首）八公之傳，欲示神奇，若得道之狀。道終不成，效驗不立，乃與伍被謀爲反事，事覺自殺，或言誅死。誅死自殺，同一實也。世見其書，深異奇怪，又觀八公之傳，似若有效，則傳稱淮南王仙而升天，失其實也。

備書言：「盧敖游乎北海，經乎太陰，入乎玄關，至於蒙轂之上，見一士焉，深目玄準，鴈頸而戴肩，脣上而殺下，軒軒然方迎風而舞。願見盧敖，樊然下其臂，逡巡乎碑下。敖乃視之，方卷然龜背而食合梨。（一本作璽）盧敖仍與之語曰：「吾子唯以敖爲俗，去羣離黨，竊觀於六合之外者，非敖而已。敖幼而遊，至長不倫解，周行四極，唯北陰之未闕。今卒睹夫子於是，殆可與敖爲友乎？」若士者，憚然而笑曰：「嘻！子，中州之民也，不宜遠至此。此

猶光日月而戴列星，四時之所行，陰陽之所生也。此其比夫不名之地，猶嶮岬也。若我南游乎罔瀆之野，北息乎沈瀟之鄉，西窮乎杳冥之黨，而東黃須臾之先。此其下無地上無天，聽焉無聞，視焉則營。此其外猶有狀，有狀之餘，一舉而能千萬里，吾猶未能之在。今子游始至於此，乃語窮觀，豈不亦遠哉！然子處矣，吾與汗漫期於九垓之上，吾不可久。」若士者舉臂而縱身，遂入雲中。盧敖目仰而視之，不見乃止，喜心不怠，懷若有喪，曰：「吾比夫子也，猶黃鵠之與壤蟲也。終日而行，不離咫尺，而自以爲遠，豈不悲哉！」若盧敖者，唯龍無翼者，升則乘雲，盧敖言若士者有翼，言乃可信。今不言有翼，何以升雲？且凡能輕舉入雲中者，飲食與人殊之故也。龍食與蛇異，故其舉措與蛇不同。聞爲道者，服金玉之精，食紫芝之英，食精身輕，故能神仙。若士者食合羶之肉，與庸民同食，無精輕之驗，安能縱體而升天？聞食氣者不食物，食物者不食氣。若士者食物，如不食氣，則不能輕舉矣。或時盧敖學道求仙，游乎北海，離衆遠去，無得道之效，慚於鄉里，負於論議，自知以必然之事，見責於世，則作誇誕之語，云見一士，其意以爲有求仙之未得，期數未至也。淮南王劉安坐反而死，天下並聞，當時並見儒書，尙有言其得道仙去，離六升天者。况盧敖一人之身，獨行絕迹之地，空造幽冥之語乎？是與河東蒲坂項曼都之語，無以異也。曼都好道學仙，委家亡去，三年而返，家問其狀，曼都曰：「去時不能自知，忽見若臥形，有仙人數人，將我上天，離月數里而止。見月上下幽冥，幽冥不知東西，居月之旁，其寒淒淒，口饑欲食，仙人輒飲我以流霞一杯，每飯一杯，數月不餓。不知去幾何年月，不知以何爲過，忽然若臥，復下至此。」河東號之曰斥仙，實論者聞之，乃知不然。夫曼都能上天矣，何爲不仙？已三年矣，何故復還？夫人去民間，升皇天之上，精氣形體，有變於故者矣。萬物變化，無復還者；復育爲蟬，羽翼既成，不能復化爲復育，能升之物，皆有羽翼，升而復降，羽翼如故。見曼都之身有羽翼乎？言乃可信，身無羽翼，言虛妄也。虛則與盧敖同一實也。或時聞曼都好道，默委家去，周章遠方，終無所得，力勸整極，默復歸家，慚愧無言，則言上天，其意欲言道可學得，嘗有仙人，已殆有過，故成而復斥，升而復降。

儒書言：「齊王疾痛，使人之宋迎文舉。文舉至，想王之疾，謂太子曰：『王之疾必不可已也。雖然，王之疾已，則必

殺摯也。」太子曰：「何故？」文摯對曰：「非怒王疾不可治也。王怒則摯必死。」太子頓首強請曰：「苟已王之疾，臣與臣之母，以死爭之於王，必幸臣之母。願先生之勿患也。」文摯曰：「一諾請以死爲王。」與太子期，將往不至者三。齊王固已怒矣。文摯至，不解屣登牀，覆夜間王之疾。王怒而不與言。文摯因出辭以重王怒。王怒而起，疾乃遂已。王大怒不悅，將生烹文摯。太子與王后急爭之而不能得，果以鼎生烹文摯。暴之三日三夜，顏色不變。文摯曰：「誠欲殺我，則胡不覆之，以絕陰陽之氣。」王使覆之。文摯乃死。夫文摯，道人也，入水不濡，入火不焦，故在鼎三日三夜，顏色不變，此虛言也。夫文摯而烹三日三夜，顏色不變，爲一覆之故，絕氣而死，非得道之驗也。諸生息之物，氣絕則死。死之物，烹之輒爛，致生息之物，密器之中，覆蓋其口，漆塗其隙，中外氣隔，息不得洩，有頃死也。如置湯鑊之中，亦輒爛矣。何則？體同氣均，稟性於天，其一類也。文摯不息乎，與金石同，入湯不爛，是也。今文摯息乎，烹之不死，非也。今文摯言，言則以聲，聲以呼吸，呼吸之動，因血氣之發，血氣之發，附於骨肉，骨肉之物，烹之輒死。今言烹之不死，一虛也。既能烹煮不死，此真人也，與金石同。金石雖覆蓋，與不覆蓋者無以異也。今言文摯覆之則死，二虛也。置人寒水之中，無湯火之熱，鼻中口內，不通於外，斯須之頃，氣絕而死矣。寒水沉人，尙不得生，况在沸湯之中，有猛火之烈乎？言其入湯不死，三虛也。人沒水中，口不見於外，言音不揚。烹文摯之時，身必沒於鼎中，沒則口不見，口不見則言不揚。文摯之言，四虛也。烹輒死之人，三日三夜，顏色不變，凝息之人，尙知怪之，使齊王無知，太子羣臣，宜見其奇，奇怪文摯，則請出尊寵敬事，從之問道。今言三日三夜，無臣子請出之言，五虛也。此或時聞文摯實烹，烹而輒死。世見文摯爲道人也，則爲虛生不死之語矣。猶黃帝實死也，傳言升天，淮南坐反，書言度世。世好傳虛，故文摯之語，傳至於今。世無得道之效，而有有壽之人，世見長壽之人，學道爲仙，踰百不死，共謂之仙矣。何以明之？如武帝之時，有李少君，以祠竈辟穀，卻老方見上。上尊重之，少君匿其年及所生長，常自謂七十，而能使物卻老。其游以方，徧諸侯，無妻。人聞其能使物及不老，更饋遺之，常餘錢金衣食。人皆以爲不治產業饒給，又不知其何許人，愈爭事之。少君終好方，嘗爲巧發奇中，嘗從武安侯飲。座中有年九十餘者，少君乃言

其王父游射處。老人爲兒時，從父識其處，一座盡驚。少君見上，上有古銅器，問少君。少君曰：「此器齊桓公十五年陳於柏臺。已而案其刻，果齊桓公器，一宮盡驚，以爲少君數百歲人也。久之，少君病死。今世所謂得道之人，少君之類也。少君死于人中，人見其尸，故知少君性壽之人也。如少君處山林之中，入絕跡之野，獨病死於巖石之間，尸爲虎狼狐狸之食，則世復以爲真仙去矣。世學道之人，無少君之壽，年未至百，與衆俱死，愚夫無知之人，尙謂之尸解而去，其實不死。所謂尸解者，何等也？謂身死精神去乎？謂身不死得免去皮膚乎？如謂身死精神去乎，是與死無異，人亦仙人也。如謂不死免去皮膚乎，諸學道死者，骨肉具在，與怕死之尸，無以異也。夫蟬之去復育，龜之解甲，蛇之脫皮，鹿之墮角，穀皮之物，解穀皮持骨肉去，可謂尸解矣。今學道而死者，尸與復育相似，尙未可謂尸解。何則？案蟬之去復育，無以神於復育；況不相似復育，謂之尸解，蓋復虛妄失其實矣。太史公與李少君同世，並時少君之死，臨尸者雖非太史公，足以見其實矣。如實不死，尸解而去，太史公宜紀其狀，不宜言死。其處座中年九十，老父爲兒時者，少君老壽之效也。或少君年十四五，老父爲兒，隨其王父。少君年二百歲而死，何爲不識？武帝去桓公鑄銅器，且非少君所及見也。或時聞宮殿之內，有舊銅器，或案其刻以告之者，故見而知之。今時好事之人，見舊劍古鉤，多能名之，可復謂目見其鑄作之時乎？」

世或言：「東方朔亦道人也，姓金氏，字曼倩，變姓易名，游宦漢朝，外有仕宦之名，內乃度世之人。」此又虛也。夫朔與少君並在武帝之時，太史公所及見也。少君有教道祠竈卻老之方，又名齊桓公所鑄鼎，知九十老人王父是游射之驗，然尙無得道之實，而徒性壽還死之也。況朔無少君之方術效驗，世人何見謂之得道？案武帝之時，道人文成五利之輩，入海求仙人，索不死之藥，有道術之驗，故爲上所信。朔無入海之使，無奇怪之效也。如使有奇，不過少君之類，及文成五利之輩耳。況謂之有道，此或時偶復若少君矣。自匿所生之處，嘗時在朝之人，不知其故。朔盛稱其年長，人見其面狀少，性又恬淡，不好仕宦，嘗達占卜射覆，爲奇怪之戲，世人則謂之得道之人矣。

世或以老子之遺爲可以度世，恬淡無欲，養精愛氣。夫人以精神爲壽命，精神不傷，則壽命長而不死成事。老子行之踰百，度世爲真人矣。夫恬淡少欲，孰與鳥獸？鳥獸亦老而死。鳥獸含情欲，有與人相類者矣，未足以言草木之生何情欲，而春生秋死乎？夫草木無欲，壽不踰歲；人多情欲，壽至於百。此無情欲者反天，有情欲者反壽。夫如是，老子之術，以恬淡無欲，延壽度世者，復虛也。或時老子李少君之類也，行恬淡之道，偶其性命，亦自壽長。世見其命壽，又聞其恬淡，謂老子以術度世矣。世或以辟穀不食爲道術之人，謂王子喬之輩，以不食穀，與恆人殊食，故與恆人殊壽，踰百度世，遂爲仙人。此又虛也。夫人之生也，稟食飲之性，故形上有口齒，形下有孔竅。口齒以嚙食，孔竅以注瀉，順此性者，爲得天正道；逆此性者，爲違所稟受。失本氣於天，何能得久壽？使子喬生無齒口孔竅，是稟性與人殊，稟性與人殊，尙未可謂壽。元形體均同，而以所行者異，言其得度世，非性之實也。夫人之不食也，猶身之不衣也。衣以溫膚，食以充腹，膚溫腹飽，精神明盛，如鐵而不飽，寒而不溫，則有凍餒之害矣。凍餒之人，安能久壽？且人之生也，以食爲氣，猶草木生以土爲氣矣。拔草木之根，使之離土，則枯而蚤死；閉人之口，使之不食，則餓而不壽矣。

道家相誇曰：『真人食氣，以氣而爲食。』故傳曰：『食氣者壽而不死。雖不穀飽，亦以氣盈。』此又虛也。夫氣謂何氣也？如謂陰陽之氣，陰陽之氣，不能飽人。人或嘔氣，氣滿腹脹，不能餐飽。如謂自藥之氣，人或服藥，食一合屑，吞數十丸，藥力烈盛，胸爲潰毒，不能飽人。食氣者，必謂吹呬呼吸，吐故納新也；昔有彭祖嘗行之矣，不能久壽，病而死矣。

道家或以導氣養性，度世而不死，以爲血脈在形體之中，不動搖屈伸，則閉塞不通；不通積聚，則爲病而死；此又虛也。夫人之形，猶草木之體也。草木在高山之巔，當疾風之衝，晝夜動搖者，能復勝彼隱在山谷間，鄣於疾風者乎？案草木之生，動搖者傷而不暢；人之導引，動搖形體者，何故壽而不死？夫血脈之藏於身也，猶江河之流地，江河之流，濁而不清；血脈之動，亦擾不安。不安則猶人勤苦無聊也，安能得久生乎？道家或以服食藥物，輕身益

氣延年度世；此又虛也。夫服食藥物，輕身益氣，頗有其驗。若夫延年度世，世無其效。百藥愈病，病愈而氣復，而身輕矣。凡人稟性，身本自輕，氣本自長。中於風溼，百病傷之，故身重氣劣也。服食良藥，身氣復故，非本氣少身重，得藥而乃氣長身更輕也。稟受之時，本自有之矣。故夫服食藥物除百病，令身輕氣長，復其本性，安能延年。至於度世，有血脈之類，無有不生，生無不死；以其生，故知其死也。天地不生，故不死；陰陽不生，故不死。死者生之效，生者死之驗也。夫有始者必有終，有終者必有始。唯無終始者，乃長生不死。人之生，其猶水也。水凝而爲冰，氣積而爲人，冰恆一冬而釋，人竟百歲而死。人可令不死，冰可令不釋乎？諸學仙術，爲不死之方，其必不成，猶不能使冰終不釋也。

語增篇

傳語曰：『聖人憂世，深思事勤，愁擾精神，慙動形體，故稱壽。若腊，舜若脰，桀紂之君，垂脰尺餘。』夫言聖人憂世念人，身體羸惡，不能身體肥澤，可也；言堯舜若腊與脰，桀紂垂脰尺餘，增之也。齊桓公云：『寡人未得仲父，極難，既得仲父，甚易。』桓公不及堯舜，仲父不及禹契，桓公猶易，堯舜反難乎？以桓公得管仲易，知堯舜得禹稷不難。夫易則少憂，少憂則不愁，不愁則身體不羸。舜承堯太平，堯舜憂德，功假荒服，堯尚有憂，舜安能無事？故經曰：『上帝引逸。』謂虞舜也。舜承安繼治，任賢使能，恭己無爲而天下治，故孔子曰：『巍巍乎舜禹之有天下，而不與焉。』夫不與尚謂之脰若脰，如德劣承衰，若孔子栖栖，周流應聘，身不得容，道不得行，可骨立跛跽，僵仆道路乎？紂爲長夜之飲，糟邱酒池，沉湎於酒，不舍晝夜，是必以病，病則不甘飲食，不甘飲食，則肥脰不得至尺。經曰：『惟湛樂是從，時亦罔有克壽。』魏公子無忌，爲長夜之飲，困毒而死。紂雖未死，宜羸脰矣。然桀紂同行，則宜同病，言其脰垂過尺餘，非徒增之，又失其實矣。

傳語又稱：『紂力能索鐵伸鉤，撫梁易柱。』言其多力也。『蜚廉惡來之徒，並垂受寵。』言好仗力之主，致仗

力之士也。或言武王伐紂，兵不血刃。夫以索鐵伸鉤之力，輔以蜚廉惡來之徒，與周軍相當，武王德雖盛，不能奪紂素所厚之心。紂雖惡，亦不失所與同行之意。雖爲武王所擒時，亦宜殺傷十百人。今言不血刃，非紂多力之效。蜚廉惡來助紂之驗也。案武王之符瑞，不過高祖。武王有白魚赤鳥之祐，高祖有斷大蛇老嫗哭於道之瑞。武王有八百諸侯之助，高祖有天下義兵之佐。武王之相，望年而已；高祖之相，龍顏隆準，項紫美鬚，身有七十二黑子。高祖又逃呂后於澤中，呂后輒見上有雲氣之驗。武王不聞有此。夫相多於望年，瑞明於魚鳥，天下義兵，並來會漢，助疆於諸侯。武王承紂，高祖襲秦。二世之惡，隆盛於紂，天下畔秦，宜多於殷。案高祖伐秦，還破項羽，戰場流血，暴尸萬數，失軍亡衆，幾死一再，然後得天下。用兵苦，誅亂劇。獨云周兵不血刃，非其實也。言其易，可也。言不血刃，增之也。案周取殷之時，太公陰謀之書，食小兒丹，教云亡殷，兵到牧野，晨舉脂燭，察武成之篇，牧野之戰，血流浮杵，赤地千里。由此言之，周之取殷，與漢秦一實也；而云取殷易，兵不血刃，美武王之德，增益其實也。凡天下之事，不可增損，考察前後，效驗自列。自列，則是非之實，有所定矣。世稱紂力能索鐵伸鉤，又稱武王伐之，兵不血刃。夫以索鐵伸鉤之力當人，則是孟賁夏育之匹也。以不血刃之德取人，是則三皇五帝之屬也。以索鐵之力，不宜受服；以不血刃之德，不宜頓兵。今稱紂力則武王德貶，譽武王則紂力少，索鐵不血刃，不得兩立。殷周之稱，不得二全。不得二全，則必一非。孔子曰：『紂之不善，不若是之甚也。』是以君子惡居下流，天下之惡皆歸焉。『孟子曰：『吾於武成，取二三策耳。以至仁伐不仁，如何其血之流杵也？』若孔子言，殆沮浮杵；若孟子之言，近不血刃。浮杵過其實，不血刃亦失其正。一聖一賢，共論一紂，輕重殊稱，多少異實。紂之惡，不若王莽；紂殺比干，莽燒平帝；紂以銅立莽，盜漢位，殺主隆於誅臣，銅立順於盜位，士衆所畔，宜甚於紂。漢誅王莽，兵頓昆陽，死者萬數，軍至漸臺，血流沒趾；而獨謂周取天下，兵不血刃，非其實也。

傳語曰：『文王飲酒千鍾，孔子百觚。』欲言聖人德盛，能以德將酒也。如一坐千鍾百觚，此酒徒，非聖人也。飲酒有法，胸腹小大，與人均等。飲酒用千鍾，用着宜盡百牛，百觚則宜用十牛。夫以千鍾百牛，百觚十牛言之，文王

之身，如防風之君。孔子之體，如長狄之人，乃能堪之。案文王孔子之體，不能及防風長狄，以短小之身，飲食衆多，是缺文王之廣，貶孔子之崇也。案酒誥之篇，『朝夕曰祀茲酒，』此言文王戒慎酒也。朝夕戒慎，則民化之。外出戒慎之教，內飲酒盡千鍾，導民率下，何以致化？承紂疾惡，何以自別？且千鍾之效，百觚之驗，何時用哉？使文王孔子因祭用酒平，則受福靡不能厭飽，因饗射之用酒平，饗射飲酒，自有禮法，如私燕賞賜飲酒乎，則賞賜飲酒，宜與下齊，賜尊者之前，三觴而退，過於三觴，醉亂生亂。文王孔子率禮之人也，賞賚左右，至於醉亂，亂身自用酒千鍾百觚，大之則爲桀紂，小之則爲酒徒，用何以立德成化，表名垂譽乎？世聞德將毋醉之言，見聖人有多德之效，則虛增文王以爲千鍾，空益孔子以百觚矣！

傳語曰：『紂沈湎於酒，以糟爲邸，以酒爲池。牛飲者三千人，爲長夜之飲，亡其甲子。』夫紂雖嗜酒，亦欲以爲樂。令酒池在中庭乎，則不當言爲長夜之飲。坐在深室之中，閉窗舉燭，故曰長夜。令坐於室乎，每當飲者，起之中庭，乃復還坐，則是煩苦相踏，不能甚樂。令池在深室之中，則三千人宜臨池坐前，俛飲池酒，仰食肴膳，倡樂在前，乃爲樂耳。如審臨池而坐，則前飲害於肴膳，倡樂在前，乃爲樂耳。如審臨池而坐，則前飲害於肴膳，倡樂之作，不得在前。夫飲食旣不以禮，臨池牛飲，則其啖肴不復用杯，亦宜就魚肉虐食。則知夫酒池牛飲，非其實也。

傳又言：『紂懸肉以爲林，令男女倮而相逐其間。是爲醉藥，淫戲無節度也。』夫肉管內於口，口之所食，宜潔不辱。今言男女倮相逐其間，何等潔者？如以醉而不計潔辱，則當共浴於酒中，而倮相逐於肉間，何爲不肯浴於酒中，以不言浴於酒，知不倮相逐於肉間。傳者之說，或言：『車行酒，騎行炙，百二十日爲一夜。』夫言用酒爲池，則言其車行酒非也；言其懸肉爲林，即言騎行炙非也。或時紂沈酒覆酒，滂地於地，即言以酒爲池，釀酒糟積聚，則言糟爲池；懸肉以林，則言肉爲林；林中幽冥，人時走戲其中，則言倮相逐。或時載酒用鹿車，則言車行酒騎行炙；或時十數夜，則言其百二十；或時醉不知問日數，則言其亡甲子。周公封康叔，告以紂用酒，期於昏迷，欲以戒之也；而不言糟邱酒池，懸肉爲林，長夜之飲，亡其甲子。聖人不言，殆非實也。

傳言曰：『紂非時與三千人牛飲於酒池。』夫夏官百，殷二百，周三百，紂之所與相樂，非民必巨也，非小臣必大官，其數不能滿三千人。傳書家欲惡紂，故言三千人，增其實也。

傳語曰：『周公執費下白屋之士，謂候之也。』夫三公鼎足之臣，王者之楨幹也；白屋之士，閭巷之微賤者也。三公傾鼎足之尊，執費候白屋之士，非其實也。時或待士卑恭，不驕白屋，人則言其往候白屋，或時起白屋之士，以璧（一本作圭）迎禮之人，則言其執費以候其家也。

傳語曰：『堯舜之儉，茅茨不剪，采椽不斲。』夫言茅茨采椽，可也；言不斲不剪，增之也。經曰：『罔成五服。』五服五采，服也。服五采之服，又茅茨采椽，何宮室衣服之不相稱也。服五采，畫日月星辰，茅茨采椽，非其實也。

傳語曰：『秦始皇帝燔燒詩書，坑殺儒士。』言燔燒詩書，滅去五經文書也。坑殺儒士者，言其皆挾經傳文書之人也。燒其書，坑其人，詩書絕矣。言燔燒詩書，坑殺儒士，實也。言其欲滅詩書，故坑殺其人，非其誠，又增之也。秦始皇帝三十四年，置酒咸陽臺，儒士七十人前爲壽。僕射周青臣進頌始皇之德，齊淳于越進諫，始皇不封子弟功臣，自爲丞相，刻周青臣以爲面諛。始皇下其議於丞相李斯，李斯非淳于越曰：『諸生不師今而學古，以非當世，惑亂黔首。臣請勅史官，非秦記皆燒之，非博士官所職，天下有敢藏詩書百家語諸刑書者，悉詣守尉集燒之，有敢偶語詩書，棄市，以古非今者，族滅，吏見知弗舉與同罪。』始皇許之。明年三十五年，諸生在咸陽者，多爲妖言。始皇使御史案問諸生，諸生傳相告引者，自除犯禁者四百六十七人，皆坑之。燒詩書，起淳于越之諫，坑儒士，起自諸生爲妖言，見坑者四百六十七人。傳增言坑殺儒士，欲絕詩書，又言盡坑之，此非其實而又增之。

傳語曰：『叮叮若荆軻之閭。』言荆軻爲燕太子丹刺秦王，後誅軻九族，其後悲恨不已，復夷軻之一里，一里皆滅，故曰叮叮。此言增之也。夫秦雖無道，無爲盡誅荆軻之里。始皇幸梁山之宮，從山上望見丞相李斯，車騎甚盛，悲，出言非之。其後左右以告李斯，李斯立擗車騎。始皇知左右洩其言，莫知爲誰，盡捕諸在旁者皆殺之。其後墜星下東郡，至地爲石，民或刻其石曰：『始皇帝死地分。』皇帝聞之，令御史逐問莫服，盡取石旁人誅之。夫誅

從行於梁山宮，及誅石旁人，欲得演言刻石者，不能審知，故盡誅之。荆軻之闖，何罪於秦而盡誅之？如刺秦王在閭中，不知爲誰，盡誅之可也。荆軻已死，刺者有人，一里之民，何爲坐之？始皇二十年，燕使荆軻刺秦王，秦王覺之，體解軻以徇，不言盡誅其間。彼或時誅軻九族，九族衆多，同里而處，誅其九族，一里且盡。好增事者，則言叮叮也。

儒增篇

儒書稱：『堯舜之德，至優至大，天下太平，一人不刑。』又言：『文武之隆，遺在成康，刑錯不用四十餘年。』是欲稱堯舜褒文武也。夫爲言不益，則美不足稱；爲文不渥，則事不足褒。堯舜雖優，不能使一人不刑；文武雖盛，不能使刑不用。言其犯刑者少，用刑希疏可也；言其一人不刑，刑錯不用，增之也。夫能使一人不刑，則能使一國不伐；能使刑錯不用，則能使兵燹不施。案堯伐丹水，舜征有苗，四子服罪，刑兵設用。成王之時，四國篡畔，淮夷徐戎並爲患害。夫刑人用刀，伐人用兵，罪人用法，誅人用武。武法不殊，兵刀不異，巧論之人，不能別也。夫德劣故用兵，犯法故施刑。刑與兵，猶足與翼也。走用足，飛用翼，形體雖異，其行身同。刑之與兵，全衆禁邪，其實一也。稱兵之不用，言刑之不施，是猶人耳缺目完，以目完稱人體全，不可從也。人桀於刺虎，法於擊人，而以刺虎稱謂之勇，不可聽也。身無敗缺，勇無不進，乃爲全耳。今稱一人不刑，不言一兵不用；褒刑錯不用，不言一人不畔。未得爲優，未可謂盛也。

儒書稱：『楚養由基善射，射一楊葉，百發能百中之。』是稱其巧於射也。夫言其時射一楊葉中之，可也；言其百發而百中，增之也。夫一楊葉，射而中之，中之一，再行，敗穿不可復射矣。如就葉懸於樹而射之，誰不欲射葉，楊葉繁茂，自中之矣。是必使上取楊葉，一一更置地而射之也。射之數十行，足以見巧。觀其射之者，亦皆知射工，亦必不至於百明矣。言事者好增巧美，數十中之，則言其百中矣。百與千，數之大者也。實欲言十則言百，百則言千矣。是與書言『協和萬邦』，『謝曰：『子孫千德』』同一意也。

儒書言：『衛有忠臣弘演，爲衛哀公使未還，狄人攻哀公而殺之，盡食其肉，獨捨其肝，弘演使還，致命於肝，痛哀公之死，身肉盡，肝無所附，引刀自剗其腹，盡出其腹實，乃內哀公之肝而死。』言此者，欲稱其忠矣。言其自剗內哀公之肝而死，可也；言盡出其腹實，乃內哀公之肝，增之也。人以刃相刺，中五臟輒死。何則？五臟，氣之主也，猶頭脈之湊也。頭一斷，手不能取他人之頭，著之於頸，奈何獨能先出其腹實，乃內哀公之肝，腹實出輒死，則手不能復把矣。如先內哀公之肝，乃出其腹實，則文嘗言內哀公之肝，出其腹實，今先言盡出其腹實，內哀公之肝，又言盡，增其實也。

儒書言：『楚熊渠子出見寢石，以爲伏虎，將弓射之，矢沒其衛。』或言：『養由基見寢石，以爲兕也，射之矢飲羽。』或言李廣便是熊渠養由基，李廣主名不審，無實也。或以爲虎，或以爲兕，兕虎俱猛，一實也。或言沒衛，或言飲羽，羽則衛，言不同耳。要取以寢石似虎兕，畏懼加精，射之入深也。夫言以寢石爲虎，射之矢入，可也；言其沒衛，增之也。夫見似虎者，意以爲是，張弓射之，盛精加意，則其見真虎，與是無異。射似虎之石，矢入沒衛，若射真虎之身，矢同度乎？石之實難射，肉易射也。以射難沒衛言之，則其射易者，洞不疑矣。善射者，能射遠中微，不失毫釐，安能使弓弩更多力乎？養由基從軍，射晉侯，中其目。夫以匹夫射萬乘之主，其加精倍力，必與射寢石等。當晉侯之目也，可復洞達於項乎？如洞達於項，晉侯宜死。車張十石之弩，恐不能入一寸，矢摧爲三。况以一人之力，引微弱之弓，雖加精誠，安能沒衛？人之精乃氣也，氣乃力也。有水火之難，惶惑恐懼，舉徙器物，精誠至矣。素舉一石者，倍舉二石，然則見伏石射之，精誠倍故，不過入一寸，如何謂之沒衛乎？如有好用劍者，行寢石懼而斫之，可復謂能斷石乎？以勇夫空拳而暴虎者，卒然見寢石，以手椎之，能令石有跡乎？巧人之精，與拙人等；古人之誠，與今人同。使當今射工，射禽獸於野，其欲得之，不餘精力乎？及其中獸，不過數寸，跌誤中石，不能內鋒，箭摧折矣。夫如是，儒書之言，楚熊渠子養由基，李廣射寢石，矢沒衛，飲羽者，皆增之也。

儒書稱：『魯般墨子之巧，刻木爲鳶，飛之三日而不集。』夫言其以木爲鳶，飛之可也；言其三日不集，增之也。

夫刻木爲鳶，以象鳶形，安能飛而不集乎？既能飛翔，安能至於三日？如嘗有機關，一飛遂翔，不可復下，則嘗言遂飛，不當言三日。猶世傳言曰：『魯般巧，亡其母也。』言巧工爲母作木車馬，木人御者，機關備具，載母其上，一驅不還，遂失其母。如木鳶機關備具，與木車馬等，則遂飛不集，機關爲須臾間，不能遠過三日，則木車等亦宜三日止於道路，無爲徑去以失其母，二者必失實者矣。

書說：『孔子不能容於世，周流游說七十餘國，未嘗得安。』夫言周流不遇，可也。言于七十國，增之也。案論語之篇，諸子之書，孔子自衛反魯，在陳絕糧，創述於衛，忘味於齊，伐樹於宋，並贊與頓牟，至不能十國，傳言七十國，非其實也。或時于十數國也，七十之說，文書傳之，因言于七十國矣。論語曰：『孔子問公叔文子於公明賈曰：『信乎？夫子不言不笑不取乎？』公明賈對曰：『以告者過也。夫子時然後言，人不厭其言也；樂然後笑，人不厭其笑也；義然後取，人不厭其取也。』子曰：『豈其然乎？豈其然乎？』』夫公叔文子實時言樂笑義取，人傳說稱之，言其不言不笑不取也，俗言竟增之也。

書言：『秦繆公伐鄭，過晉，不假途。晉襄公率先我，要擊於峭塞之下，正馬隻輪，無反者。』時秦遣三大夫孟明視、西乞術、白乙，皆得復還。夫三大夫復還，車馬必有歸者。文言正馬隻輪，無反者，增其實也。

書稱：『齊之孟嘗，魏之信陵，趙之平原，楚之春申，皆待士下客，招會四方，各三千人。』欲言下士之至，趨之者衆也。夫言士多，可也。言其三千，增之也。四君雖好士，士至雖衆，不過各千餘人，書則言三千矣。夫言衆，必言千數，言少則言無一，世俗之情，言事之失也。

傳記言：『高子絰之喪親，泣血三年，未嘗見齒。君子以爲難，難爲故也。』夫不以爲非實而以爲難，君子之言謬矣。高子泣血，始必有之。何則？荆和獻寶於楚，楚則其足痛，寶不進，已情不達，泣涕，涕盡因續以血。今高子痛親哀極，涕竭，血隨而出，實也。而云三年未嘗見齒，是增之也。未嘗見齒，欲言其不言不笑也。孝子喪親，不笑可也，安得不言？言安得不見齒？孔子曰：『言不文，或時不言。』傳則言其不見齒，或時傳則言其不見齒，三年矣。高宗

諒陰，三年不言，尊爲天子，不言而其文言。不言猶疑於境，充高子位職，而曰未嘗見齒，是必損益之也。

儒書言：『禽息薦百里奚，繆公未聽。禽息出當門，仆頭碎首而死。繆公痛之，乃用百里奚。』此言賢者薦善，不愛其死，仆頭碎首而死，以達其友也。世士相激，文書傳稱之，草謂不然。夫仆頭以薦善，古今有之。禽息仆頭，蓋其實也。言碎首而死，是增之也。夫人之扣頭，痛者血流，雖忿恨惶恐，無碎首者，非首不可碎，人力不能自碎也。執刃刎頭，樹鋒刺胸，鋒刃之助，故手足得成勢也。言禽息舉椎自擊，首碎不足怪也。仆頭碎首，力不能自將也。有扣頭而死者，未有使頭破首碎者也。此時或扣頭薦百里奚，世空言其死，若或扣頭而死，世空言其首碎也。

儒書言：『荆軻爲燕太子刺秦王，操匕首之劍，刺之不得。秦王拔劍擊之，軻以匕首擲秦王，不中，中銅柱，入尺。』欲言匕首之利，荆軻勢盛，投銳利之刃，陷堅彊之柱，稱荆軻之勇，故增益其事也。夫言入銅柱，實也；言其入尺，增之也。夫銅雖不若匕首堅剛，入之不過數寸，殆不能入尺。以入尺言之，設中秦王，匕首洞過乎？車張十石之弩，射垣木之表，尙不能入尺。以荆軻之手，力投輕小之匕首，身被龍淵之劍刃，入堅剛之銅柱，是荆軻之力，勁於十石之弩，銅柱之堅，不若木表之剛也。世稱荆軻之勇，不言其多力，多力之人，莫若孟賁，使孟賁擲銅柱，能（一有擲字）淵出一尺乎？此亦或時匕首利，若干將莫邪，所刺無前，所擊無下，故有入尺之效。夫稱于將莫邪，亦過其實。刺擊無前下，亦入銅柱尺之類也。

儒書言：『董仲舒讀春秋，專精一思，志不在他，三年不窺園菜。』夫言不窺園菜，實也；言三年，增之也。仲舒雖精，亦時解休，解休之間，猶宜游於門庭之側，則能至門庭，何嫌不窺園菜？聞用精者，察物不見，存道以亡身，不聞不至門庭，坐思三年，不及窺園也。尙書毋佚曰：『君子所其毋逸，先知稼穡之艱難，乃佚。』者也。人之筋骨，非木非石，不能不解，故張而不弛，文王不爲；弛而不張，文王不行。一弛一張，文王以爲當。聖人材優，尙有弛張之時，仲舒力劣於聖，安能用精三年不休？

儒書言：『夏之方盛也，遠方圖物，貢金九牧，鑄鼎象物，而爲之備，故入山澤，不逢惡物，用辟神毒，故能叶於上。

下，以承天休。夫金之性，物也。用遠方貢之爲矣。鑄以爲鼎，用象百物之奇，安能入山澤不逢惡物，辟除神姦乎？周時天下太平，越裳獻白雉，倭人貢鬯草。食白雉，服鬯草，不能除凶，金鼎之器，安能辟姦？且九鼎之來，德盛之瑞也。服瑞應之物，不能致福。男子服玉，女子服珠，珠玉於人，無能辟除。寶奇之物，使爲蘭服作牙身，或言有益者，九鼎之語也。夫九鼎無能辟除，傳言能辟神姦，是則書增其文也。世俗傳言，周鼎不爨自沸，不投物，物自出，此則世俗增其言也。鼎書增其文也，是使九鼎以無怪空爲神也。且夫謂周之鼎神者，何用審之？周鼎之金，遠方所貢，得鑄以爲鼎也，其爲鼎也，有百物之象。如爲遠方貢之爲神乎？遠方之物，安能神？如以爲禹鑄之爲神乎？禹聖不能神，聖人身不能神，鑄器安能神？如以金之爲神乎？則夫金者，石之類也，石不能神，金安能神？以有百物之象爲神乎？夫百物之象，猶雷鐸也。雷鐸刻畫雲雷之形，雲雷在天，神於百物，雲雷之象不能神，百物之象安能神也。

傳言『秦滅周，周之九鼎入於秦。』案本事，周赧王之時，秦昭王使將軍繆攻王赧。王赧惶懼，頓首受罪，盡獻其邑三十六，口三萬。秦受其獻，遷王赧。王赧卒，秦王取九鼎寶器矣。若此者，九鼎在秦也。『始皇二十八年，北遊至瑯琊，還過彭城，齊戒禱祠，欲出周鼎，使千人沒泗水之中，求弗能得。』案時昭王之後，三世得始皇帝。秦無危亂之禍，鼎宜不亡，亡時殆在周。傳言王赧葬秦，秦取九鼎，或時誤也。傳又言宋太邱社亡，鼎沒水中。彭城下，其後二十九年，秦并天下。若此者，鼎未入秦也。其亡從周去矣，未爲神也。春秋之時，五石隕於宋。五石者，星也。星之去天，猶鼎之亡於地也。星去天不爲神，鼎亡於地，何能神？春秋之時，三山亡，猶太邱社之去宋。五星之去天，三山亡，五石隕，太邱社去，皆自有焉。然鼎亡，亡亦有應也，未可以亡之故，乃謂之神。如鼎與秦三山同乎？亡不能神。如有知欲辟危亂之禍乎，則更桀紂之時矣。袁亂無道，莫過桀紂。桀紂之時，鼎不亡去，周之袁亂，未若桀紂，曾無道之桀紂，去衰末之周，非止去之，宜神有知之驗也。或時周亡之時，將軍擣人衆見鼎盜取，葬人鑄燔，以爲他器。始皇求不得也。後因言有神名，則空生沒於泗水之語矣。孝文皇帝之時，趙人新垣平上言：『周鼎亡在泗水中，今河溢溢於泗水，臣望東北，河陰直有金氣，意周鼎出乎？兆見鼎迎則不至。』於是文帝使使治廟汾陰，南臨河。

欲言出周鼎人有上書告新垣平所言神器事皆詐也於是下平事於吏吏治諫新垣平夫言鼎在泗水中猶新垣平詐言鼎有神氣見也。

藝文增篇

世俗所患患言事增其實著文垂辭辭出溢其真稱笑過其善進惡沒其罪何則俗人好奇不奇言不用也故譽人不增其美則聞者不快其意毀人不益其惡則聽者不愜於心聞一增以爲十見百益以爲千使夫純樸之事十割百判審然之語千反萬畔墨子哭於練絲楊子哭於歧道蓋傷失本悲離其實也書疏之言百傳之語出小人之口馳聞巷之間其猶是也諸子之文筆墨之疏人賢所著妙思所集宜如其實猶或增之儻經藝之言如其實平言審莫過聖人經藝萬世不易猶或出溢增過其實增過其實皆有事爲不妄亂語以少爲多也然而必論之者方言經藝之增與傳語異也經增非一略舉較著令悅惑之人觀覽采擇得以開心通意曉解覺悟

尙書『協和萬國』是美堯德致太平之化化諸夏并及夷狄也言協和方外可也言萬國增之也夫唐之與周俱治五十里內周時諸侯千七百九十三國荒服戎服要服及四海之外不粒食之民若穿胸儻耳焦僂跛踵之輩並合其數不能三千天之所覆地之所載盡於三千之中矣而尙書云萬國襄增過實以美堯也欲言堯之德大所化者衆諸夏夷狄莫不雍和故曰萬國猶詩言『子孫千億』矣美周宣王之德能慎（一作順）天地祚之子孫衆多至於千億言子孫衆多可也言千億增之也夫子孫雖衆不能千億詩人頌美增益其實案后稷始受郃封訖於宣王宣王以至外族內屬血脈所連不能千億夫千與萬數之大名也萬言衆多故尙書言萬國詩言千億

詩云『鶴鳴于九臯聲聞于天』言鶴鳴九折之澤聲猶聞於天以喻君子修德窮僻名猶達朝廷也其聞高遠可矣言其聞於天增之也彼言聲聞於天見鶴鳴於雲中從地聽之度其聲鳴於地嘗復聞於天也夫鶴鳴雲中

人聞聲仰而視之，目見其形，耳目同力，耳聞其聲，則目見其形矣。然則耳目所聞見，不過十里，使參天之鳴，人不能聞也。何則？天之去人，以萬數遠，則目不能見，耳不能聞。今鸛鳴從下聞之，鸛鳴近也。以從下聞其聲，則謂其鳴於地，當復聞於天，失其實矣。其鸛鳴於雲中，人從下聞之，如鳴於九臯，人無在天上者，何以知其聞於天上也？無以知意，從雉亢之也。詩人或時不知，至誠以爲然。或時知而欲以喻事，故增而甚之。

詩曰：『維周黎民，靡有孑遺。』是謂周宣王之時，遭大旱之災也。詩人傷旱之甚，民被其害，言無有孑遺一人不愁痛者。夫旱甚則有之矣，言無孑遺一人，增之也。夫周之民，猶今之民也。使今之民也，遭大旱之災，貧羸無蓄積，扣心思雨。若其富人，穀食饒足者，廩園不空，口腹不飢，何愁之有？天之旱也，山林之間不枯，猶地之水，邱陵之上不涸也。山林之間，富貴之人，必有遺脫者矣。而言靡有孑遺，增益其文，欲言旱甚也。

易曰：『豐其屋，蔀其家，窺其戶，阒其無人也。』非其無人也，無賢人也。尚書曰：『毋曠庶官。』曠，空也。毋空，衆官，實非其人，與空無異，故言空也。夫不肖者，皆懷五常，才劣不遠，不成純賢，非狂妄頑騷，身中無一知也。德有大小，材有高下，居官治職，皆欲勉效在官。尚書之官，易之戶中，猶能有益，如何謂之空而無人？詩曰：『濟濟多士，文王以甯。』此言文王得賢者多，而不肖者少也。今易言闕其少人，尚書言無少衆官，以少言之，可也；言空而無人，亦尤甚焉。五穀之於人也，食之皆飽，稻粱之味，甘而多腴，豆麥雖糲，亦能愈飢。食豆麥者，皆謂糲而不甘，冀謂腹空無所食。竹木之杖，皆能扶病，竹杖之力，弱劣不及木。或操竹杖，皆謂不勁，冀謂手空無把持。夫不肖之臣，豆麥竹杖之類也。易持其具臣在戶，言無人者，惡之甚也。尚書衆官，亦容小材，而云無空者，則之甚也。

論語曰：『大哉，堯之爲君也，蕩蕩乎民無能名焉。』傳曰：『有年五十，舉壤於路者，觀者曰：『大哉，堯德乎！』舉壤者曰：『吾日出而作，日入而息，鑿井而飲，耕田而食，堯何等力？』此言蕩蕩無能名之效也。言蕩蕩，可也；乃欲言民無能名，增之也。四海之大，萬民之衆，無能名堯之德者，殆不實也。夫舉壤者曰：『堯何等力？』欲言民無能名也。觀者曰：『大哉，堯之德乎！』此何等民者，猶能知之，實有知之者，云無，竟增之。儒書又言：『堯舜之民，可

比屋而封。言其家有君子之行，可皆官也。夫言可封，可也；言比屋，增之也。人年五十爲人父，爲人父而不知君，何以示子？太平之世，家爲君子，人有禮義，父不失禮，子不廢行，夫有行者有知，知君莫如臣，臣賢能知君，能知其君，故能治其民。今不能知堯，何可封官？年五十舉壞於路，與壘子未成人者爲伍，何等賢者？子路使子羔爲郕宰，孔子以爲不可，未學無所知也。舉壞者無知，官之如何？稱堯之蕩蕩，不能述其可比屋而封，言賢者可比屋而封，不能議其愚而無知之。夫舉壞者難以言比屋，比屋難以言蕩蕩，二者皆增之所由起，笑堯之德也。

尚書曰：『祖伊諫紂曰：今我民罔不欲喪。』罔，無也。我天下民無不欲王亡者。夫言欲王之亡，可也；言無不增之也。紂雖惡，民臣蒙恩者非一，而祖伊增語，欲以懼紂也。故曰語不益，心不惕，行不易。增其語，欲以懼之，冀其警悟也。蘇秦說齊王曰：『臨菑之中，車鼓聲，人肩磨，舉袖成幕，連袂成帷，揮汗成雨。』齊雖熾盛，不能如此。蘇秦增語激齊王也。祖伊之諫，猶蘇秦之說齊王也。賢聖增文，外有所爲，內未必然，何以明之？夫武成之篇，言『武王伐紂，血流浮杵』。助戰者多，故至血流如此。皆欲紂之亡也。土崩瓦解，安肯戰乎？然祖伊之言『民無不欲』。如蘇秦增語武成，言『血流浮杵』，亦太過焉。死者血流，安能浮杵？案武王伐紂，於牧之野，河北地高，壤靡不乾燥，兵頓血流，輒燥入土，安得杵浮？且周殷士卒，皆賣盛糧，或作乾糧，無杵臼之事，安得杵而浮之？言血流杵，欲言誅紂，淮兵頓土傷，故至浮杵。

春秋莊公七年，夏四月辛卯，夜中恆星不見，星實如雨。公羊傳曰：『如雨者何？非雨也。非雨，則曷爲謂之如雨？不修春秋曰：『如雨星不及地尺而復。』君子修之，星實如雨。不修春秋時，魯史記曰：『雨星不及地尺如復。』君子者，謂孔子也。孔子修之，星實如雨。如雨者，如雨狀也。山氣爲雲，上不及天，下而爲雲雨，星隕不及地，上復在天，故曰如雨。孔子正言也。『夫星實或時至地，或時不能，尺丈之數難審也。』史記言尺，亦似太甚矣。夫地有樓臺山陵，安得言尺？孔子言如雨，得其實矣。孔子作春秋，故正言如雨。如孔子不作，不及地尺之文，遂傳至今。光武皇帝之時，郎中汝南黃光上書，言孝文皇帝時，居明光宮，天下斷獄三人，頌美文帝，陳其效實。光武皇

帝曰：『孝文時不居明光宮，斷獄不三人。』積善修德，美名流之，是以君子惡居下流。夫貢光上書於漢，漢爲今世，增益功美，猶過其實；况上古帝王久遠，賢人從後褒述，失實離本，獨已多矣。不遺光武論千世之後，孝文之時，載在經藝之上，人不知其增，居明光宮斷獄三人，而遂爲實事也。

問孔篇

世儒學者，好信師而是古，以爲賢聖所言，皆無非專精講習，不知難問。夫賢聖下筆造文，用意詳審，尙未可謂盡得實；况倉卒吐言，安能皆是。不能皆是，時人不知難，或是而意沈難見，時人不知問。案賢聖之言，上下多相違，其文前後多相伐者，世之學者不能知也。論者曾云：『孔門之徒，七十子之才，勝今之儒。』此言妄也。彼見孔子爲師，聖人傳道，必授異才，故謂之殊。夫古人之才，今人之才也。今謂之英傑，古以爲聖神，故謂七十子歷世希有，使當今有孔子之師，則斯世學者，皆顏閔之徒也。使無孔子，則七十子之徒，今之儒生也。何以驗之？以學於孔子，不能極問也。聖人之言，不能盡解，說道陳義，不能輒形，宜問以發之，不能盡解，宜難以極之。臯陶陳道，帝舜之前，淺略未極，禹問難之。游言復深，略指復分，蓋起問難此說，激而深切，觸而著明也。孔子笑子游之絃歌，子游引前言以距孔子，自今案論語之文，孔子之言，多若笑絃歌之聲，弟子寡若子游之難，故孔子之言，遂結不解。以七十子不能難，世之儒生，不能實道是非也。凡學問之法，不爲無才，難於距師核道實義，證定是非也。問難之道，非必對聖人及生時也；世之解說詭人者，非必須聖人教告，乃敢言也。苟有不曉解之問，造難孔子，何傷於義？誠有傳聖業之知，伐孔子之說，何逆於理？謂問孔子之言，難其不解之文，世間弘才大知，生能答問解難之人，必將賢吾世間難問之言是非。

孟懿子問孝，子曰：『毋違。』樊遲曰：『問曰：孔子之言毋違，毋違者，禮也。孝子亦當先意承志，不當違親之曰：『生，事之以禮；死，葬之以禮，祭之以禮。』問曰：孔子之言毋違，毋違者，禮也。孝子亦當先意承志，不當違親之

欲孔子言毋違，不言違禮。懿子聽孔子之言，獨不爲嫌於毋違志乎？樊遲問何謂，孔子乃言生事之以禮，死葬之以禮，祭之以禮，使樊遲不問，毋違之說遂不可知也。懿子之才，不過樊遲，故論語篇中，不見言行。樊遲不曉，懿子必能曉哉。孟武伯問孝，子曰：『父母唯其疾之憂。』武伯嘗憂父母，故曰唯其疾之憂。武伯憂親，懿子違禮，攻其短。答武伯云：『父母唯其疾之憂。』對懿子亦宜言：『唯水火之變乃違禮。』周公告小材略，大材略，子游之大材也，孔子告之勅，懿子小材也，告乃反略。違周公之志，攻懿子之短，失道理之宜，弟子不難，何哉？如以懿子權，不敢極言，則其對武伯亦宜，但言毋憂而已。俱孟氏子也，權尊鉤同，勅武伯而略懿子，未曉其故也。使孔子對懿子極言毋違禮，何害之有？專魯莫過季氏，譏八佾之舞庭，刺太山之旅祭，不懼季氏，增邑不隱諱之害，獨畏答懿子極言之罪，何哉？且問孝者非一，皆有御者。對懿子言，不但心服臆，故告樊遲。

孔子曰：『富與貴，是人之所欲也，不以其道得之，不處也；貧與賤，是人之所惡也，不以其道得之，不去也。』此言人嘗由道義得，不當苟取也；嘗守節安貧，不當妄去也。夫言不以其道得富貴，不居可也；不以其道得貧賤，如何？富貴願可去，去貧賤何之？去貧賤得富貴也。不得富貴，不去貧賤，如謂得富貴不以其道，則不去貧賤邪？則所得富貴，不得貧賤也。貧賤，何故嘗言得之？願富言貧與賤，是人之所惡也，不以其道去之，則不去也。嘗言去，不當言得者，施於得之也。今去之，安得言得？獨富貴嘗言得耳。何也？得富貴，乃去貧賤也。是則以道去貧賤，如何？修身行道，仕得爵祿富貴，得爵祿富貴，則去貧賤矣。不以其道去貧賤，如何？毒苦貧賤，起爲奸盜，積聚貨財，擅相官秩，是爲不以其道。七十子既不問，世之學者亦不知難，使此言意不解而文不分，是謂孔子不能吐辭也，使此言意結，文又不解，是孔子相示，未形悉也。弟子不問，世俗不難，何哉？孔子曰：『公冶長可妻也，雖在縲絏之中，非其罪也。以其子妻之。』問曰：孔子妻公冶長者，何據見哉？據年三十可妻耶？見其行賢可妻也。如據其年三十，不宜稱在縲絏，如見其行賢，亦不宜稱在縲絏。何則？諸入孔子門者，皆有誓行，故稱備徒役。徒役之中，無妻則妻之耳，不須稱也。如徒役之中多無妻，公冶長尤賢，故獨妻之，則其稱之，宜列其行，不宜言其在縲絏也。何則？世間疆受

非辜者多，未必盡賢人也。怕人見枉，衆多非一，必以非辜爲孔子所妻，則是孔子不妻賢，妻冤也。案孔子之稱公冶長，有非辜之言，無行能之文，實不賢，孔子妻之，非也；實賢，孔子稱之不具，亦非也。誠似臺南空云：『國有道不廢，國無道免於刑戮。』具稱之矣。

子貢曰：『汝與回也孰愈？』曰：『賜也何敢望回，回也聞一以知十，賜也聞一以知二。』子曰：『弗如也，吾與汝俱不如也。』是賢顏淵，試以問子貢也。問曰：『孔子所以教者，禮讓也。子路爲國以禮，其言不讓，孔子非之，使子貢實愈顏淵，孔子問之，猶曰不如，使實不及，亦曰不如，非失對欺師，禮讓之言，宜謙卑也。今孔子出言，欲何趣哉？使孔子知顏淵愈子貢，則不須問子貢，使孔子實不知以問子貢，子貢謙讓，亦不能知，使孔子徒欲表善顏淵，稱顏淵賢，門人莫及於名多矣，何須問於子貢？』子曰：『賢哉回也！』又曰：『吾與回言終日，不違如愚。』又曰：『回也，其心三月不違仁。』三章皆直稱，不以他人激，至是一章，獨以子貢激之，何哉？或曰：『欲抑子貢也。當此之時，子貢之名，凌顏淵之上，孔子恐子貢志驕意溢，故抑之也。』夫名在顏淵之上，當時所爲，非子貢求勝之也，實子貢之知何如哉？使顏淵才在己上，己自服之，不須抑也；使子貢不能自知，孔子雖言，將謂孔子徒欲抑己。由此言之，問與不問，無能抑揚。

宰我晝寢，子曰：『朽木不可彫也；糞土之牆，不可朽也。於予，予何誅？』是惡宰予之晝寢。問曰：晝寢之惡也，小惡也，朽木糞土，敗毀不可復成之物，大惡也，實小過以大過，安能服人，使宰我性不善，如朽木糞土，不宜得入孔子之門，序在四科之列，使性善，孔子惡之太甚，過也。人之不仁，疾之已甚，亂也。孔子疾宰予，可謂甚矣。使下愚之人，涉耐罪之獄吏，令以大辟之罪，必冤而怨，邪將服而自咎也。使宰我愚，則與涉耐罪之人同，使宰我賢，知孔子責人，幾微自改矣。明文以識之，流言以過之，以其言示端而已自改，自改不在言之輕重，在宰予能更與否。春秋之義，采毫毛之善，貶纖介之惡，褒毫毛以巨大，以巨大貶纖介，觀春秋之義，肯是之乎？不是，則宰我不受，不受，則孔子之言棄矣。聖人之言，與文相副，言出於口，文立於筆，俱發於心，其實一也。孔子作春秋，絕不貶小以大，其

非宰予也，以大惡細，文語相違，服人如何？子曰：『始吾於人也，聽其言而信其行；今吾於人也，聽其言而觀其行。予於政是。』蓋起宰予晝寢，更知人之術也。問曰：人之晝寢，安足以毀行？毀行之人，晝夜不臥，安足以成善？以晝寢而觀人善惡，能得其實乎？案宰予在孔子之門，序於四科，列在賜上，如性情意，不可彫琢，何以致此？使宰我以晝寢自致此才，復過人遠矣。如未成就，自謂已足，不其自知？知不明耳，非行惡也。曉勸而已，無爲政術也。如自知未足，倦極晝寢，是精神索也。精神索至於死亡，豈徒寢哉？且論人之法，取其行則棄其言，取其言則棄其行。今宰予雖無力行，有言語，用言令行缺，有一概矣。今孔子起宰予晝寢，聽其言，觀其行，言行相應，則謂之賢，是孔子備取人也，毋求備於一人之義何所施？

子張問：『令尹子文，三仕爲令尹，無喜色；三已之，無愠色。舊令尹之政，必以告新令尹。何如？』子曰：『忠矣。』曰：『仁矣乎？』曰：『未知，焉得仁。』子文曾舉楚子玉代己位而伐宋，以百乘敗而喪其衆，不知如此，安得爲仁？問曰：子文舉子玉，不知人也。智與仁，不相干也。有不知之性，何妨爲仁之行？五常之道，仁義禮智信也。五者各別，不相須而成。故有智人，有仁人者；有禮人，有義人者。人有信者，未必智；智者未必仁；仁者未必禮；禮者未必義。子文智蔽於子玉，其仁何毀？謂仁焉得不可？且忠者，厚也；厚人，仁矣。孔子曰：『觀過斯知仁矣。』子文有仁之實矣。孔子謂忠非仁，是謂父母非二親，配匹非夫婦也。

哀公問弟子孰爲好學，孔子對曰：『有顏回者，不遷怒，不貳過，不幸短命死矣！今也則亡，未聞好學者也。』夫顏淵所以死者，嘗何用哉？今自以短命，猶伯牛之有疾也。人生受命，皆全當潔，今有惡疾，故曰無命。人生皆當受天長命，今得短命，亦宜曰無命，如天有長短，則亦有善惡矣。言顏淵命短，則宜言伯牛惡命；言伯牛無命，則宜言顏淵無命。一死一病，皆痛云命，所稟不異，文語不同，未曉其故也。

哀公問孔子孰爲好學，孔子對曰：『有顏回者好學，今也則亡，不遷怒，不貳過。』何也？曰：『井攻哀公之性遷怒貳過故也。因其問則并以對之，兼以攻上之短，不犯其罰。』問曰：康子亦問好學，孔子亦對之以顏淵，康子亦

有短，何不并對以攻康子？康子非聖人也，操行猶有所失，成事，康子患盜，孔子對曰：『苟子之不欲，雖賞之不竊。』由此言之，康子以欲爲短也，不攻何哉！

孔子見南子，子路不悅。子路曰：『予所鄙（一作否）者，天厭之！天厭之！』南子，衛靈公夫人也，聘孔子。子路不說，謂孔子淫亂也。孔子解之曰：『我所爲鄙陋者，天厭殺我。』至誠自誓，不負子路也。問曰：孔子自解，安能解乎？使世人有鄙陋之行，天會厭殺之，可引以誓。子路聞之，可信以解。今未曾有爲天所厭者也，曰『天厭之』。子路肯信之乎？行事，雷擊殺人，水火燒溺人，壇屋壓填人，如曰『雷擊殺我，水火燒溺我，牆屋壓填我』。子路頗信之。今引未曾有之禍，以自誓於子路。子路安肯聽解而信之？行事適有臥厭不悟者，謂此爲天所厭邪？案諸臥厭不寤，未嘗爲鄙陋也。子路入道雖淺，猶知事之實。事非實，孔子以誓。子路必不解矣。孔子稱曰：『死生有命，富貴在天。』若此者，人之死生，自有長短，不在操行善惡也。成事，顏淵蚤死，孔子謂之短命。由此知短命天死之人，必有邪行也。子路入道雖淺，聞孔子之言，知生死之實。孔子誓以予所鄙者天厭之，獨不爲子路言。『夫子惟命未嘗死，天安得厭殺之乎？』若此誓，子路以天厭之終不見信，不見信，則孔子自解，終不解也。尙書曰：『毋若丹朱，敖慢游是好。』謂帝舜勅禹，毋子不肖子也。重天命，恐禹私其子，故引丹朱以勸戒之。禹曰：『予娶若時，辛壬癸甲，聞呱呱而泣，予弗子。』陳已行事，以往推來，以見卜隱效已，不敢私不肖子也。不曰天厭之者，知俗人善好引天也。孔子爲子路行所疑，不引行事效已不鄙，而云天厭之，是與俗人解嫌，引天祝詛，何以異乎？

孔子曰：『鳳鳥不至，河不出圖，吾已矣夫！』夫子自傷不王也已。王致太平，太平則鳳鳥至，河出圖矣。今不得王，故瑞應不至。悲心自傷，故曰：『吾已矣夫！』問曰：鳳鳥河圖，審何據始起，始起之時，鳥圖未至。如據太平，太平之帝，未必常至。鳳鳥與河圖也。五帝三王皆致太平，案其瑞應，不皆鳳凰爲必然之瑞於太平，鳳凰爲未必然之應。孔子，聖人也，思未必然以自傷，終不應矣。或曰：『孔子不自傷，不得王也；傷時無明王，故已不用也。鳳鳥河圖，明王之瑞也。瑞應不至，時無明王；明王不存，已遂不用矣。』夫致瑞應何以致之？任賢使能，治定功成，治足功成，

則瑞應至矣。瑞應至後，亦不須孔子。孔子所望，何其末也！不思其本而望其末也，不相其王而名其物，治有未定，物有不至，以至而效明王，必失之矣。孝文皇帝可謂明矣，案其本紀，不見鳳鳥與河圖。使孔子在孝文之世，猶曰：『吾已矣夫！』

子欲居九夷，或曰：『陋，如之何？』子曰：『君子居之，何陋之有？』孔子疾道不行於中國，志恨失意，故欲之九夷也。或人難之曰：『夷狄之鄙陋無禮義，如之何？』孔子曰：『君子居之，何陋之有？』言以君子之道，居而教之，何爲陋乎？問之曰：『孔子欲之九夷者，何起乎？』起道不行於中國，故欲之九夷。夫中國且不行，安能行於夷狄？夷狄之有君，不若諸夏之亡。』言夷狄之難，諸夏之易也。不能行於易，能行於難乎？且孔子云：『以君子居之者，何謂陋邪？』謂修君子之道自容乎？謂以君子之道教之也。如修君子之道有自容，中國亦可，何必之夷狄？如以君子之道教之，夷狄安可教乎？禹入裸國，裸入衣出，衣服之制，不通於夷狄也。禹不能教裸國衣服，孔子何能使九夷爲君子？或孔子實不欲往，患道不行，動發此言，或人難之。孔子知其陋，然而猶曰：『何陋之有？』者，欲遂己然，距或人之諒也。實不欲往，志動發言，是僞言也。君子於言，無所苟矣。如知其陋，苟欲自遂，此子路對孔子以子宗也。子路使子宗爲費宰。子曰：『賊夫人之子。』子路曰：『有社稷焉，有民人焉，何必讀書，然後爲學？』子曰：『是故惡夫佞者。』子路知其不可，苟欲自遂，孔子惡之。比夫佞者，孔子亦知其不可，苟應或人，孔子子路皆以佞也。

孔子曰：『賜，不受命而貨殖焉，億則屢中。』何謂不受命乎？說曰：『受當富之命，自以術知，數億中時也。』夫入富貴在天，命乎？在人知也。如在天，命知術求之，不能得；如在人，孔子何爲言『死生有命，富貴在天』？夫謂富不受命，而自知術得之，貴亦可不受命，而自以努力求之，世無不受貴命而自得貴，亦知無不受富命而自得富者。成事，孔子不得富貴矣。周流應聘，行說諸侯，智窮策困，還定詩書，望絕無冀，稱已矣夫。自知無貴命，周流無補益也。孔子知己不受貴命，周流求之，不能得，而謂賜不受富命，而以術知得富，言行相違，未曉其故。或曰：『欲改』

子貢之短也。子貢不好道德而徒好貨殖，故攻其短，欲令窮服而更其行節。『夫攻子貢之短，可言賜不好道德而貨殖焉，何必言不受命，與前言言貴在天相違反也。』

顏淵死，子曰：『噫！天喪予！』此言人將起，天與之輔，人將廢，天奪其祐。孔子有四友，欲因而起，顏淵早夭，故曰：『天喪予。』問曰：顏淵之死，孔子不王，天奪之邪？不幸短命，自爲死也，如短命不幸，不得不死，孔子雖王，猶不得生。輔之於人，猶杖之扶疾也。人有病，須杖而行，如斬杖本得短，可謂天使病人不得行乎？如能起行，杖短能使之長乎？夫顏淵之短命，猶杖之短度也。且孔子言天喪予者，以顏淵賢也。案賢者在世，未必爲輔也，夫賢者未必爲輔，猶聖人未必受命也。爲帝有不聖，爲輔有不賢，何則？祿命骨法，與才異也。由此言之，顏淵生未必爲輔，其死未必有喪。孔子云：『天喪予，何據見哉？』且天不使孔子王者，本意如何？本稟性命之時，不使之王邪？將使之王，復中悔之也，如本不使之王，顏淵死何喪？如本使之王，復中悔之，此王無骨法，便宜自在天也。且本何嘗所見，而使之王，後何惡所聞，中悔不命，天神論議，謬不諦也。

孔子之衛，過舊館人之喪，入而哭之，出，使子貢脫驂而賻之。子貢曰：『於門人之喪，未有所脫驂，脫驂於舊館，毋乃已重乎？』孔子曰：『予鄉者入而哭之，過於一哀而出涕，予惡夫涕之無從也。小子行之。』孔子脫驂以賻舊館者，惡情不副禮也。副情而行禮，情起而恩動，禮情相應，君子行之。顏淵死，子哭之，慟。門人曰：『子慟矣！』『吾非斯人之慟而誰爲？』夫慟，哀之至也。哭，顏淵慟者，殊之衆徒，哀痛之甚也。死有棺無槨，顏路請車以爲之槨，孔子不予，爲大夫不可以徒行也。弔舊館脫驂以賻，惡涕無從，哭，顏淵慟，請車不與，使慟無副。豈涕與慟殊，馬與車異邪？於彼則體情相副，於此則恩義不稱，夫曉孔子爲禮之意。孔子曰：『鯉也死，有棺無槨，吾不徒行以爲之槨。』鯉之恩深於顏淵，鯉死無槨，大夫之儀，不可徒行也。鯉子也，顏淵他姓也。子死且不禮，況其禮他姓之人乎？曰：是蓋孔子實恩之效也。副情於舊館，不稱恩於子，豈以前爲士，後爲大夫哉？如前爲士，士乘二馬，如爲大夫，大夫乘三馬。大夫不可去車使行，何不截賣兩馬以爲槨，乘其一乎？爲士時乘二馬，截一以賻舊館，今亦何不截其

二、以副恩，乘一以解不使行乎？不脫焉以贈舊館，未必亂制。葬子有棺無槨，廢禮傷法。孔子重贈舊人之恩，暨廢葬子之禮，此禮得於他人，制失親子也。然則孔子不齎車以爲經，柩何以解於貪官好仕，恐無車而自云：君子殺身以成仁，何難退位以成禮？

子貢問政，子曰：『足食足兵，民信之矣。』曰：『必不得已而去，於斯三者何先？』曰：『去食。自古皆有死，民無信不立。』信最重也。問使治國無食民餓，棄禮義，禮義棄，信安所立？傳曰：『倉廩實知禮節，衣食足知榮辱。』饗生於有餘，爭生於不足。今言去食，信安得成？春秋之時，戰國饑餓，易子而食，析骸而炊，口饑不食，不暇顧恩義也。夫父子之恩，信矣；饑餓棄信，以子爲食。孔子教子貢去食存信，如何？夫去信存食，雖不欲信，信自生矣。去食存信，雖欲爲信，信不立矣。子適衛，冉子僕，子曰：『庶矣哉！』曰：『既庶矣，又何加焉？』曰：『富之。』曰：『既富矣，又何加焉？』曰：『教之。』語冉子先富而後教之，教子貢去食而存信，食與富何別？信與教何異？二子殊教，所尚不同，孔子爲國，意何定哉？

蘧伯玉使人於孔子，孔子曰：『夫子何爲乎？』對曰：『夫子欲寡其過而未能也。』使者出，孔子曰：『使乎！使乎！非之也。』說論語者曰：非之者，非其代人謙也。夫孔子之問使者曰：『夫子何爲？』問所治爲，非問操行也。如孔子之問也，使者宜對曰：『夫子爲某事，治某政。』今反言『欲寡其過而未能也。』何以知其對不失指？孔子非之也，且實孔子何以非使者？非其代人謙之乎？其非其對失指也，所非猶有一實，不期其過，而徒云使乎，後世疑惑，不知使者所以爲過。韓子曰：『書約則弟子辯。』孔子之言使乎，何其約也？或曰：『春秋之義也，爲賢者諱，蘧伯玉賢，故諱其使者。』夫欲知其子視其友，欲知其君視其所使，伯玉不賢，故所使過也。春秋之義，爲賢者諱，使諱纖介之惡，今不非而諱，貶纖介安所施哉？使孔子爲伯玉諱，宜默而已，揚言曰：『使乎！使乎！』時人皆知孔子之非也，出言如此，何益於諱？

佛辟召子欲往，子路不說，曰：『昔者由也，聞諸夫子曰：「親於其身爲不善者，君子不入也。」佛辟以中牟畔，

子之往也。如之何？」子曰：「有是也。不曰『堅乎，磨而不磷』，不曰『白乎，涅而不淄』。『吾豈匏瓜也哉？焉能繫而不食也。』」子路引孔子往時所言，以非孔子也。往前孔子出此言，欲令弟子法而行之。子路引之以諒孔子。曉之，不曰前言戲，若非而不可行，而曰有是言者，審有當行之也。不曰堅乎磨而不磷，不曰白乎涅而不淄，孔子言此言者，能解子路難乎？親於其身，爲不善者，君子不入也，解之宜。佛肸未爲不善，尙猶可入，而曰堅磨而不磷，白涅而不淄，如孔子之言，有堅白之行，可以入之，君子之行，軟而易好，何以獨不入也？孔子不飲盜泉之水，曾子不入勝母之閭，避惡去汙，不以義恥辱名也。盜泉勝母有空名，而孔曾恥之，佛肸有惡實，而子欲往，不飲盜泉是，則欲對佛肸非矣。不義而當且貴，於我如浮雲。枉道食篡辟之祿，所謂浮雲者非也。或權時欲行道也，即權時行道，子路難之，當云「行道不言食，有權時以行道，無權時以求食，吾豈匏瓜也哉？焉能繫而不食」。自比以匏瓜者，言「人嘗仕而食祿，我非匏瓜繫而不食」。非子路也。孔子之言，不解子路之難。子路難孔子，豈孔子不當仕也哉？嘗擇魯國而入之也。孔子自比匏瓜，孔子欲安食也。且孔子之言，何其鄙也，何彼仕爲食哉？君子不宜言也。匏瓜繫而不食，亦繫而不仕等也。距子路可云「吾豈匏瓜也哉？繫而不仕也。今吾繫而不食」。孔子之仕，不爲行道，徒求食也。人之仕也，主貪祿也；禮義之言，爲行道也；猶人之娶也，主爲欲也；禮義之言，爲供親也。仕而直言食，娶可直言欲乎？孔子之言，解情而無依違之意，不假義理之名，是則俗人非君子也。儒者說孔子周流，應聘不濟，闕道不行，失孔子情矣。

公山弗擾以費畔，召子欲往。子路曰：「末之也已，何必公山氏之之也？」子曰：「夫召我者，而豈徒哉？如用我，吾其爲東周乎？」焉東周，欲行道也。公山佛肸俱畔者，行道於公山，求食於佛肸，孔子之言，無定趨也。言無定趨，則行無常務矣。周流不用，豈獨有以乎？陽貨欲見之，不見，呼之仕不仕，何其清也。公山佛肸召之，欲往，何其濁也。公山弗擾與陽虎俱畔，執季桓子。二人同惡，呼召禮等，獨對公山，不見陽虎，豈公山尙可，陽虎不可乎？子路難公山之召，孔子宜解以尙及佛肸，未甚惡之狀也。

非韓篇

韓子之術，明法尙功，賢無益於國，不加賞；不肖無害於治，不施罰。責功重賞，任刑用誅，故其論儒也，謂之不耕而食，比之於一蠹。論有益與無益也，比之於鹿馬。馬之似鹿者千金，天下有千金之馬，無千金之鹿，鹿無益，馬有用也。儒者猶鹿，有用之吏猶馬也。夫韓子知以鹿馬喻，不知以冠履譬。使韓子不冠徒履而朝，吾將聽其言也。加冠於首而立於朝，受無益之服，增無益之仕，言與服相違，行與術相反，吾是以非其言而不用其法也。煩勞人體，無益於人身，莫過跪拜。使韓子逢人不拜，見君父不謁，未必有賊於身體也。然須拜謁以尊親者，禮義至重，不可失也。故禮義在身，身未必肥，而禮義去身，身未必瘠而化衰。以謂有益，禮義不如飲食。使韓子賜食君父之前，不拜而用，肯薦之乎？夫拜謁禮義之效，非益身之實也。然而韓子終不失者，不廢禮義以苟益也。夫儒生，禮義也；耕戰，飲食也。貴耕戰而賤儒生，是棄禮義，求飲食也。使禮義廢，綱紀敗，上下亂，而陰陽繆，水旱失時，五穀不登，萬民饑死，農不得耕，士不得戰也。子貢去告朔之餼，孔子曰：「賜也，爾愛其羊，我愛其禮。」子貢惡費羊，孔子重廢禮也。故以舊防爲無益而去之，必有水災；以舊禮爲無補而去之，必有亂患。

儒者之在世，禮義之舊防也，有之無益，無之有損。庠序之設，自古有之。重本尊始，故立官置吏，官不可廢，道不可棄。儒生，道官之吏也，以爲無益而廢之，是棄道也。夫道無成效於人，成效者，須道而成。然足蹈路而行，所蹈之路，須不蹈者；身須手足而動，待不動者，故事或無益而益者須之，無效而效者待之。儒生，耕戰所須得也；棄而不存，如何也？韓子非儒，謂之無益有損，蓋謂俗儒無行操，舉措不重禮，以儒名而俗行，以實學而僞說，貪官尊榮，故不足貴。夫志潔行顯，不循爵祿，去卿相之位，若脫躡者，居位治職，功雖不立，此禮義爲業者也。國之所以存者，禮義也；民無禮義，傾國危主。今儒者之操，重禮愛義，率無禮之士，激無義之人，人民爲善，愛其主上，此亦有益也。聞伯夷風者，貪夫廉，懦夫有立志；聞柳下惠風者，薄夫敦，鄙夫寬。此上化也，非人所見。段干木闔門不出，魏文敬之。

表式其間，秦軍聞之，卒不攻魏，使魏無干木。秦兵入境，境土危亡。秦強國也，兵無不勝，兵加於魏，魏國必破。三軍兵頓，流血千里。今魏文式闔門之士，卻強秦之兵，全魏國之境，濟三軍之衆，功莫大焉，實莫先焉。齊有高節之士，曰狂譎華士二人，昆弟也，義不降志，不仕非其主。太公封於齊，以此二子解組齊衆，聞不爲上用之路，同時誅之。韓子善之，以爲二子無益而有損也。夫狂譎華士，毀干木之類也。太公誅之，無所卻到。魏文侯式之，卻彊秦而全魏，功孰大者？使韓子善干木闔門高節，魏文式之，是也。狂譎華士之操，干木之節也。善太公誅之，非也。使韓子非干木之行，下魏文之式，則干木以此行而有益，魏文用式之道爲有功，是韓子不賞功之有益也。

論者或曰：「魏文式毀干木之間，秦兵爲之不至，非法度之功；一功特然，不可常行，雖全國有益，非所貴也。」夫法度之功者，謂何等也？養三軍之士，明賞罰之命，嚴刑峻法，富國強兵，此法度也。秦秦之彊，肯爲此乎？六國之亡，皆滅於秦兵。六國之兵非不銳，士衆之力非不勁也，然而不勝，至於破亡者，強弱不敵，衆寡不同，雖明法度，其何益哉？使童子變孟賁之意，孟賁怒之，童子操刃，與孟賁戰，童子必不勝，力不如也。孟賁怒而童子修禮盡敬，孟賁不忍犯也。秦之與魏，孟賁之與童子也。魏有法度，秦必不長，猶童子操刃，孟賁不逞也。其尊士式賢者之間，非徒童子修禮盡敬也。夫力少則修德，兵強則奮威。秦以兵強，威無不勝；卻軍還衆，不犯魏境者，賢干木之操，高魏文之禮也。夫敬賢，弱國之法度，力少之強助也。助之非法度之功，如何？高帝極議欲廢太子，呂后患之，即召張敖房而畫策。子房教以敬迎四皓而厚禮之。高祖見之，心稍意沮，太子遂安。使韓子爲呂后議，進不過強諫，退不過勁力，以此自安，取誅之道也，豈徒易哉？夫太子敦厚四皓，以消高帝之讎，猶魏文式毀干木之間，卻強秦之兵也。治國之道，所養有二：一曰養德，二曰養力。養德者，養名高之人，以示能敬賢；養力者，養有力之士，以明能用兵。此所謂文武張設，德力且足者也。事或可以德懷，或可以力摧，外以德自立，內以力自備，慕德者不戰而服，犯德者畏兵而卻。徐偃王修行仁義，陸地朝者三十二國，強楚聞之，舉兵而滅之，此有知守，無力備者也。夫德不可獨任，以治國，力不可直任，以御敵也。韓子之術不爲德，偃王之操不任力，二者偏惡，各有不足。偃王有無力之病，知

韓子必有無德之患。凡人稟性也，清濁貪廉，各有操行，猶草木異質，不可復變易也。狂譎韓子共仕於魏，猶段干木之仕於魏矣。性行清廉，圖貪富貴，非時疾世，義不苟仕，雖不誅此人，此人行不可隨也。太公誅之，韓子是之，是謂人無性行，草木無質也。太公誅二子，使齊有二子之類，必知爲二子見誅之故，不漬其身，使無二子之類，雖養之終無其化。堯不誅許由，唐民不皆櫟處；武王不誅伯夷，周民不皆隱餓；魏文侯式段干木之闔，魏國不皆闔門。由此言之，太公不誅二子，齊國亦不皆不仕。何則？清廉之行，人所不能爲也。夫人所不能爲，養使爲之，不能使勸，人所不能爲，誅以禍之，不能使止。然則太公誅二子，無益於化。望殺無辜之民，費無功，殺無辜，韓子所非也。太公殺無辜，韓子是之，以韓子之術殺無辜也。夫執不仕者，未必有正罪也。太公誅之，如出仕未有功，太公肯賞之乎？賞須功而加，罰待罪而施。使太公不賞出仕未有功之人，則其誅不仕未有罪之民，非也；而韓子是之，失誤之言也。且不仕之民，性廉寡欲，好仕之民，性貪多利，利欲不存於心，則視爵祿猶糞土矣。廉則約省無極，貪則奢泰不止。奢泰不止，則其所欲不避其主。案古篡畔之臣，希清白廉潔之人。貪故能立功，懦故能輕生，積功以取大賞，奢泰以貪主位。太公遺此法而去，故齊有陳氏劫殺之患。太公之術，致劫殺之法也。韓子善之，是韓子之術亦危亡也。周公聞太公誅二子，非而不是，然而身執贊以下白屋之士，白屋之士，二子之類也。周公禮之，太公誅之。二子之操，孰爲是者？

宋人有御馬者，不進，拔劍剄而棄之於溝中；又駕一馬，馬又不進，又到而棄之於溝。若是者三，以此威馬至矣。然非王良之法也。王良登車，馬無罷驚，堯舜治世，民無狂悖。王良馴馬之心，堯舜順民之意，人同性，馬殊類也。王良能調殊類之馬，太公不能率同性之士。然則周公之所下白屋，王良之馴馬也；太公之誅二子，宋人之剄馬也。舉王良之法，與宋人之操，使韓子平之，韓子必是王良而非宋人矣。王良全馬，宋人賊馬也。馬之賊，則不若其全，然則民之死，不若其生。使韓子非王良，自同於宋人，賊善人矣。如非宋人，宋人之術，與太公同，非宋人是太公，韓子好惡無定矣。治國猶治身也；治一身，省恩德之行，多傷害之操，則交黨疎絕，恥辱至身。推治身以充治國，治國

之道，當任德也。韓子任刑，獨以治世，是則治身之人，任傷害也。韓子豈不知任德之爲善哉？以爲世衰事變，民心靡薄，故作法術，專意於刑也。夫世不乏於德，猶歲不絕於春也。謂世衰難以德治，可謂歲亂不可以春生乎？人君治一國，猶天地生萬物，天地不爲亂歲去春，人君不以衰世屏德。孔子曰：『斯民也，三代所以直道而行也。』

周穆王之世，可謂衰矣，任刑治政，亂而無功。甫侯諫之，穆王存德，享國久長，功傳於世。夫穆王之治，初亂終治，非知昏於前，才妙於後也；前任豈尤之刑，後用甫侯之言也。夫治人不能捨恩，治國不能廢德，治物不能去春。韓子欲獨任刑用誅，如何？

魯繆公問於子思曰：『吾聞龐，繆是子不孝，不孝其行奚如？』子思對曰：『君子尊賢以崇德，舉善以勸民，若天過行，是細人之所識也，臣不知也。』子思出，子服厲伯見君，問龐，繆是子，子服厲伯對以其過，皆君子所未曾聞。自是之後，君貴子思，而賤子服厲伯。韓子問之，以非繆公，以爲明君求姦而誅之。子思不以姦聞，而厲伯以姦對，厲伯宜貴，子思宜賤。今繆公貴子思，賤厲伯，失貴賤之宜，故非之也。夫韓子所尚者，法度也；人爲善法度，賞之，惡法度，罰之，雖不聞善惡於外，善惡有所制矣。夫聞惡不可以行罰，猶聞善不可以行賞也。非人不舉姦者，非韓子之術也。使韓子聞善，必將試之；試之有功，乃肯賞之。夫聞善不輒加賞，虛言未必可信也。若此，聞善與不聞，無以異也。夫聞善不輒賞，則聞惡不輒罰矣。聞善必試之，聞惡必考之。試有功乃加賞，考有驗乃加罰。虛聞空見，實惡未立，賞罰未加，賞罰未定，未定之事，須術乃立。則欲耳聞之，非也。

鄭子產晨出，過東匠之宮，聞婦人之哭也，撫其僕之手而聽之。有間，使吏執而問之，手殺其夫者也。翼日，其僕問曰：『夫子何以知之？』子產曰：『其聲不慟。凡人於其所親愛也，知病而憂，臨死而懼，已死而哀。今哭夫已死，不哀而懼，是以知其有姦也。』韓子聞而非之，曰：『子產不亦多事乎？』姦必待耳目之所及而後知之，則鄭國之得姦寡矣。不任典城之吏，察參伍之正，不明度量，待盡聰明，勞知慮，而以知姦，不亦無術乎？韓子之非子產，是也，其非繆公，非也。夫婦人之不哀，猶龐之不孝也。非子產待耳目以知姦，獨欲繆公須聞以定刑，子產不任典

城之吏而以耳定實。繆公亦不任吏而以口問立誠。夫耳聞口問，一實也，俱不任吏，皆不參伍，屬伯之對，不可以立實。猶婦人之哭，不可以定誠矣。不可定誠，使吏執而問之，不可以立實，不使吏考，獨信屬伯口，以罪不考之姦，如何？韓子曰：『子思不以過聞，繆公貴之；子服厲伯以姦聞，繆公賤之。人情皆喜貴而惡賤，故季氏之亂成而不上聞，此魯君之所以叔也。』夫魯君所以叔者，以不明法度邪？以不早聞姦也？夫法度明，雖不聞姦，姦無由生；法度不明，雖日求姦，決其源，鄭之以掌也。御者無術，見馬且犇，無以制也。使王良持轡，馬無欲犇之心，御之有數也。今不言魯君無術，而曰不聞姦，不言審法度，而曰不通下情，韓子之非繆公也，與術意而相違矣。

龐攔是子不孝，子思不言，繆公貴之，韓子非之，以爲明君求善而賞之，求姦而誅之。夫不孝之人，下愚之才也，下愚之禮，順情從欲，與鳥獸同，謂之惡可也，謂姦非也。姦人外善內惡，色厲內荏，作爲操止，像類賢行，以取升進，容媚於上，安肯作不孝，著身爲惡，以取棄殉之咎乎？龐攔是子可謂不孝，不可謂姦。韓子謂之姦，失姦之實矣。韓子曰：『布帛尋常，庸人不擇，燦金百鎰，盜跖不擇。』以此言之，法明，民不敢犯也。設明法於邦，有盜賊之心，不敢犯矣；不測之者，不敢發矣。姦心藏於胸中，不敢以犯罪法。罪法恐之也。明法恐之，則不須考姦求邪於下矣。使法峻，民無姦者；使法不峻，民多爲姦。而不明王之嚴刑峻法，而云求姦而誅之，言求姦，是法不峻，民或犯之也。世不專意於明法，而專心求姦，韓子之言，與法相違。人之釋溝渠也，知者必壅身，不塞溝渠而繕船楫者，知水之性不可闕，其勢必溺人也。臣子之性欲姦君父，猶水之性溺人也。不教所以防姦，而非其不聞知，是猶不備水之具，而徒欲早知水之溺人也。溺於水，不責水而咎己者，已失防備也。然則人君劫於臣，已失法也。備溺不闕水源，防劫不求臣姦，韓子所宜用教己也。水之性勝火，如裹之以釜，水輒而不得勝，必矣。夫君尊人也，臣猶水也，法度釜也。火不求水之姦，君亦不宜求臣之罪也。

刺子思篇

孟子見梁惠王。王曰：『叟不遠千里而來，將何以利吾國乎？』孟子曰：『仁義而已，何必曰利？』夫利有二：有貨財之利，有安吉之利。惠王曰：『何以利吾國？』何以知不欲安吉之利，而孟子徑難以貨財之利也。易曰：『利見大人，利涉大川，乾元亨利貞。』尚書曰：『黎民尚亦有利哉！』皆安吉之利也。行仁義得安吉之利。孟子不且語問惠王：『何謂利吾國？』惠王言貨財之利，乃可答。若設令惠王之問，未知何趣，孟子徑答以貨財之利，如惠王竇問貨財，孟子無以驗效也。如問安吉之利，而孟子答以貨財之利，失對上之指，違道理之實也。齊王問時子：『我欲中國而授孟子室，養弟子以萬鍾，使諸大夫國人皆有所矜式。子盍爲我言之。』時子因陳子而以告孟子。孟子曰：『夫時子惡知其不可也，如使予欲富，辭十萬而受萬，是爲欲富乎？』夫孟子辭十萬，失謙讓之理也。夫富貴者，人之所欲也，不以其道得之，不處也。故君子之於爵祿也，有所辭，有所不辭，豈以己不貪富貴之故，而以距道宜當受之賜乎？陳臻問曰：『於齊王，餽兼金一百鎰而不受；於宋，餽七十鎰而受；於薛，餽五十鎰而受。前日之不受是，則今日之受非也；今日之受是，則前日之不受非也。夫君子必居一於此矣。』孟子曰：『皆是也。當在宋也，予將有遠行，行者必以餽，辭曰餽，予何爲不受？當在薛也，予有戒心，辭曰聞戒，故爲兵戒餽之，予何爲不受？若於齊則未有處也，無處而餽之，是貨之也。焉有君子而可以貨取乎？』夫金餽或受或不受，皆有故，非受之時已貪，當不受之時已不貪也。金有受不受之義，而室亦宜有受不受之理。今不曰己無功，若已致仕，受室非理，而曰己不貪富，引前辭十萬以況後萬，前富受十萬之多，安得辭之？彭更問曰：『後車數十乘，從者數百人，以傳食於諸侯，不亦泰乎？』孟子曰：『非其道，則一簞食而不可受於人；如其道，則舜受堯之天下，不以爲泰。』受堯天下，孰與十萬，舜不辭天下者，是其道也。今不曰受十萬非其道，而曰己不貪富貴，失謙讓也，安可以爲戒乎？

沈同以其私問曰：『燕可伐與？』孟子曰：『可；子噲不得與人燕，子之不得受燕於子噲。有士於此而子悅之，不告於王而私與之子之爵祿，夫士也，亦無王命而私受之於子，則可乎？何以異於是？』齊人伐燕，或問曰：『勸

齊伐燕有諸？」曰：「未也。」沈同曰：「燕可伐與？」吾應之曰：「可。」彼然而伐之，彼如曰：「孰可以伐之？」則應之曰：「爲天吏，則可以伐之。」今有殺人者，或問之曰：「人可殺與？」則將應之曰：「可。」彼如曰：「孰可以殺之？」則應之曰：「爲士師，則可以殺之。」今以燕伐燕，何爲勸之哉？」夫或問孟子勸王伐燕，不誠是乎？沈同問燕可伐與，此私意欲自伐之也。知其意嫌於是，宜曰：「燕雖可伐，須爲天吏，乃可以伐之。」沈同意絕，則無伐燕之計矣。不知有此私意而徑應之，不省其語，是不知言也。公孫丑問曰：「敢問夫子惡乎長？」孟子曰：「我知言。」又問：「何謂知言？」曰：「鼓辭知其所蔽，淫辭知其所陷，邪辭知其所離，遁辭知其所窮。生於其心，害於其政，發於其政，害於其事。雖聖人復起，必從吾言矣。」孟子，知言者也。又知言之所起之禍，其極所致之禍，見彼之間，則知其措辭所欲之矣，知其所之，則知其極所當害矣。

孟子有云：「民舉安，王庶幾改諸，予日望之。」孟子所去之王，豈前所不朝之王哉？而是何其前輕之疾，而後重之甚也。如非是前王則不去，而於後去之，是後王不肯甚於前，而去三日宿於畫，不甚不朝而宿於景丑氏，何孟子之操，前後不同，所以爲王，終始不一也。且孟子在魯，魯平公欲見之，嬖人臧倉毀孟子，止平公。樂正子以告曰：「行或使之，止或尼之。」行止非人所能也，予之不遇魯侯，天也。」前不遇於魯，後不遇於齊，無以異也。前歸之天，今則歸之於王，孟子論稱，竟何定哉？夫不行於齊，王不用，則若臧倉之徒毀讒之也。此亦止或尼之也，皆天命，不過非人所能也，去何以不徑行而留三宿乎？天命不當遇於齊，王不用其言，天豈爲三日之間，易命使之遇乎？在魯則歸之於天，絕意無冀；在齊則歸之於王，庶幾有望。夫如是，不遇之讖，一在人也，或曰：「初去未可以定天命也。」冀三日之間，王復追之，天命或時在三日之間，故可也。」夫言如是，齊王初使之去者，非天命乎？如使天命在三日之間，魯平公比三日亦時棄臧倉之讖，更用樂正子之言，往見孟子，孟子歸之於天，何其早乎？如三日之間，公見孟子，孟子奈前言何乎？

孟子去齊，充虞路問曰：「夫子若有不豫色然。前日虞聞諸夫子曰：『君子不怨天，不尤人。』」曰：「彼一時也，

此一時也。五百年必有王者興，其間必有名世者矣。由周以來，七百有餘矣，以其數則過矣，以其時考之則可矣。夫天未欲平治天下也，如欲平治天下，當今之世，舍我其誰也？吾何爲不豫哉？」孟子言五百年有王者興，何以見乎？帝、嚳、王者，帝、嚳又王天下，堯備於舜，舜又王天下，舜傳於禹，禹王天下，四聖之王天下也，繼踵而興。禹至湯，且千歲，湯至周亦然，始於文、王而卒傳於武。武、王崩，成、王周公共治天下。由周至孟子之時，又七百歲而無王者。五百年必有王者之驗，在何時乎？云五百年必有王者，誰所言乎？論不實事考驗，信浮淫之語，不遇去齊，有不豫之色，非孟子之賢，效與俗儒無殊之驗也。五百年者，以爲天出聖期也。又言以天未欲平治天下也，其意以爲天欲平治天下，當以五百年之間生聖王也。如孟子之言，是謂天故生聖人也。然則五百歲者，天生聖人之期乎？如是其期，天何不生聖？聖王非其期故不生。孟子猶信之，孟子不知天也。自周以來，七百餘歲矣，以其數則過矣，以其時考之則可矣。何謂數過，何謂可乎？數則時，時則數矣。數過，過五百年也。從周到今七百餘歲，踰二百歲矣。設或王者生，失時矣。又言時可，何謂也？云五百年必有王者興，言又其間必有名世，與王者同乎異也？如同，爲再言之；如異，名世者謂何等也？謂孔子之徒。孟子之輩，教授後生，覺悟頑愚，已有孔子，已又以生矣。如謂生巨平，當與聖同時，聖王出，聖臣見矣。言五百年而已，何爲言其間，如不謂五百年時，謂其中間乎？是謂二三百年之時也。聖不與五百年時，聖王相得，夫如是，孟子言其間必有名世者，竟謂誰也？夫天未欲平治天下也。如欲治天下，舍予而誰也？言若此者，不自謂當爲王者；有王者，若爲王臣矣。爲王者臣，皆天也。已命不當平治天下，不浩然安之於齊，懷恨有不豫之色，失之矣。

彭更問曰：『士無事而食，可乎？』孟子曰：『不通功易事，以養補不足，則農有餘粟，女有餘布。子如通之，則梓匠輿與，皆得食於子。於此有人，入則孝，出則悌，守先王之道，以待後世之學者，而不得食於子。子何尊梓匠輿與，而輕爲仁義者哉？』曰：『梓匠輿與，其志將以求食也；君子之爲道也，其志亦將以求食與？』孟子曰：『子何以其志爲哉？其有功於子，可食而食之矣。且子食志乎？食功乎？』曰：『食志。』『有人於此，毀瓦墮墻，其志將以

求食也，則子食之乎？」曰：「否。」曰：「然則子非食志也，食功也。」夫孟子引毀瓦畫墁者，欲以詰彭更之言也。知毀瓦畫墁，無功而有志，彭更不必食也。雖然，引毀瓦畫墁，非所以詰彭更也。何則？諸志欲求食者，毀瓦畫墁者，不在其中；不在其中，則難以詰人矣。夫人無故毀瓦畫墁，此不癡狂則戲也；癡狂人之志不求食，戲之人亦不求食。求食者，皆多人所不得利之事，以作此鬻賣於市，得賈以歸，乃得食焉。今毀瓦畫墁，無利於人，何志之有？有知之人，知其無利，固不爲也；無知之人，與癡狂比，固無其志。夫毀瓦畫墁，猶比童子擊壤於塗，何以異哉？擊壤於塗者，其志亦欲求食乎？此尙童子，未有志也。巨人博戲，亦畫墁之類也；博戲之人，其志復求食乎？博戲者，尙有相奪錢財，錢財衆多，已亦得食，或時有志。夫投石超距，亦畫墁之類也；投石超距之人，其志有求食者乎？然則孟子之詰彭更也，未爲盡之也。如彭更以孟子之言，可謂禦人以口給也。

匡章子曰：「陳仲子豈不誠廉士乎？居於於陵，三日不食，耳無聞，目無見也；井上有李，蠶食實者過半，匍匐往將食之，三咽，然後耳有聞，目有見也。」孟子曰：「於齊國之士，吾必以仲子爲巨擘焉。雖然，仲子惡能廉？充仲子之操，則蜩而後可者也。夫蜩上食槁壤，下飲黃泉。仲子所居之室，伯夷之所築與，抑亦盜跖之所築與？所食之粟，伯夷之所樹與，抑亦盜跖之所樹與？是未可知也。」曰：「是何傷哉？彼身織屨，妻辟纴，以易之也。」曰：「仲子，齊之世家也，兄戴，蓋祿萬鍾。以兄之祿爲不義之祿，而不食也；以兄之室爲不義之室，而弗居也。辟兄離母，處於於陵。他日歸，則有饋其兄生鵝者，已頻蹙曰：『惡用是覩覩者爲哉？』他日，其母殺是鵝也，與之食之。其兄自外至，曰：『是覩覩之肉也。』出而哇之。以母則不食，以妻則食之；以兄之室則不居，以於陵則居之。是尙爲能充其類也乎？若仲子者，蜩而後充其操者也。」夫孟子之罪仲子也，不得仲子之短矣。仲子之怪鵝，如吐之者，豈爲在母不食乎？乃先譴鵝曰：「惡用覩覩者爲哉？」他日其母殺以食之，其兄曰：「是覩覩之肉。」仲子恥負前言，即吐而出之。而兄不告則不吐，不吐，則是食於母也，謂之在母則不食，失其意矣。使仲子執不食於母，鵝臠至，不啗食也。今既食之，食其爲鵝，怪而吐之。故仲子之吐鵝也，恥食不合己志之物也，非負親親之恩而欲勿母食也。」仲

子惡能廉？充仲子之操，則蚓而後可者也。夫蚓上食槁壤，下飲黃泉，』是謂蚓爲至廉也；仲子如蚓，乃爲廉潔耳。今所居之宅，伯夷之所築，所食之粟，伯夷之所樹，仲子居而食之，於潔廉可也；或時食盜跖之所樹粟，居盜跖之所築室，汙廉潔之行矣。用此非仲子，亦復失之。室因人故，粟以屢繚易之，正使盜之所樹築，已不聞知。今兄之不義，有其操矣。操見於衆，昭哲議論，故避於陵，不處其宅，織屨辟繚，不食其祿也。而欲使仲子處於陵之地，避若兄之宅，吐若兄之祿，耳聞目見，昭哲不疑，仲子不處不食，明矣。今於陵之宅，不見築者爲誰，粟不知樹者爲誰，何得成室而居之，得成粟而食之？孟子非之，是爲太備矣。仲子所居或時盜之所築，仲子不知而居之，謂之不充其操，唯蚓然後可者也。夫盜室之地中，亦有蚓焉。食盜宅中之槁壤，飲盜宅中之黃泉，蚓惡能爲可乎？在仲子之操，備孟子之議，然然後乃可。夫魚處江海之中，食江海之土，海非盜所鑿，土非盜所聚也。然仲子有大非，孟子非之，不能得也。夫仲子之去母辟兄，與妻獨處於陵，以兄之宅爲不義之宅，以兄之祿爲不義之祿，故不處不食，廉潔之至也。然則其徙於陵，歸候母也，宜自齋食而行。鵲膽之進也，必與飯俱；母之所爲飯者，兄之祿也，母不自有私粟以食仲子，明矣。仲子食兄祿也，伯夷不食周粟，餓死於首陽之下，豈一食周粟而以汙其潔行哉？仲子之操，近不若伯夷，而孟子謂之若蚓，乃可，失仲子之操所當比矣。

孟子曰：『莫非命也，順受其正，是故知命者，不立乎巖牆之下。盡其道而死者，爲正命也；桎梏而死者，非正命也。』夫孟子之言，是謂人無觸值之命也。順操行者得正命，妄行苟爲得非正，是天命於操行也。夫子不王，顏淵早夭，子夏失明，伯牛爲癘，四者行不順與？何以不受正命？比干剖子胥，烹子路，趙天下極戮，非徒桎梏也。必以桎梏效非正命，則比干子胥，行不順也。人稟性命，或當壓溺兵燒，雖或慎操修行，其何益哉？竇廣國與百人俱臥積炭之下，炭崩，百人皆死，廣國獨濟，命當封侯也。積炭與巖牆何以異？命不壓，雖巖崩，有廣國之命者，猶將脫免；行或使之，止或尼之，命當壓，猶或使之立於牆下。孔甲所入主人子之天，命當賤，雖載入宮，猶爲守者，不立巖牆之下，與孔甲載子入宮，同一實也。

談天篇

儒書言：『共工與顓頊爭爲天子，不勝，怒而觸不周之山，使天柱折，地維絕。女媧銷煉五色石以補蒼天，斷鼇足以立四極。天不足西北，故日月移焉；地不足東南，故百川注焉。』此久遠之文，世間是之言也。文雅之人，怪而無以非，若非而無以奪，又恐其實然，不敢正議。以天道人事論之，殆虛言也。與人爭爲天子，不勝，怒觸不周之山，使天柱折，地維絕，有力如此，天下無敵。以此之力，與三軍戰，則士卒蟻蟻也，兵革毫芒也，安得不勝之恨？怒觸不周之山乎？且堅重莫如山，以萬人之力，共推小山，不能動也。如不周之山，大山也。使是天柱乎，折之固難，使非柱乎，觸不周山而使天柱折，是亦復難信。顓頊與之爭，舉天下之兵，悉海內之衆，不能當也，何不勝之有？且夫天者，氣邪？體也？如氣乎，雲煙無異，安得柱而折之？女媧以石補之，是體也。如審然，天乃玉石之類也。石之質重，千里一柱，不能勝也。如五嶽之巔，不能上極，天乃爲柱。如觸不周，上極天平，不周爲共工所折，當此之時，天毀壞也。如審毀壞，何用舉之？斷鼇之足，以立四極，說者曰：『鼇，古之大獸也，四足長大，故斷其足，以立四極。』夫不周山也，鼇獸也。夫天本以山爲柱，共工折之，代以獸足，骨有腐朽，何能立之久？且鼇足可以柱天，體必長大，不容於天地。女媧雖聖，何能殺之？如能殺之，殺之何用？足可以柱天，則皮革如鐵石，刀劍矛戟，不能刺之；強弩利矢，不能射也。

察當今天去地甚高，古天與今無異。當共工缺天之時，天非墜於地也。女媧人也，人雖長，無及天者。夫其補天之時，何登緣階據而得治之？豈古之天若屋廡之形，去人不遠，故共工得敗之？女媧得補之乎？如審然者，女媧多前齒爲人者，人皇最先。人皇之時，天如蓋乎？說易者曰：『元氣未分，渾沌爲一。』儒書又言：『溟滓濊濊，氣未分之類也。及其分離，清者爲天，濁者爲地。』如說易之家，儒書之言，天地始分，形體尙小，相去近也。近則或枕於不周之山，共工得折之，女媧得補之也。含氣之類，無有不長。天地含氣之自然也，從始立以來，年歲甚多，則天地相去，廣狹遂近，不可復計。儒書之言，殆有所見。然其言觸不周山而折天柱，絕地維，銷煉五色石補蒼天，斷鼇之足以

立四極，猶爲虛也。何則？山雖動，共工之力不能折也。豈天地始分之時，山小而人反大乎？何以能觸而折之？以五色石補天，尚可謂五石，若藥石治病之狀。至其斷鼃之足以立四極，難論言也。從女媧以來久矣，四極之立自若，鼃之足乎？

鄒衍之書言『天下有九州。禹貢之土所謂九州也。禹貢九州，所謂一州也。若禹貢以上者九焉。禹貢九州，方今天下九州也。在東南隅，名曰赤縣神州。復更有八州，每一州者四海環之，名曰裨海。九州之外，更有瀛海。』此言詭異，聞者驚駭，然亦不能實然否？相隨讀輒述以談，故虛實之事，並傳世間，真僞不別也。世人惑焉，是以難論。案鄒子之知不過禹，禹之治洪水，以益爲佐。禹主治水，益之記物，極天之廣，窮地之長，辨四海之外，竟四山之表，三十國之地，鳥獸草木，金石水土，莫不畢載，不言復有九州。淮南王劉安召術士伍被、左吳之輩，充備宮殿，作道術之書，論天下之事，地形之篇，道異類之物，外國之怪，列三十五國之面，不言更有九州。鄒子行地不若禹，益聞見不過被、吳，才非聖人，事非天授，安得此言？案禹之山經，淮南之地形，以察鄒子之書，虛妄之言也。太史公曰：『禹本紀言河出崑崙，其高三千五百餘里，日月所以辟隱爲光明也，其上有玉泉華池。今自張騫使大夏之後，窮河源，惡睹本紀所謂崑崙者乎？故言九州山川，尙書近之矣。至禹本紀山經所有怪物，余不敢言也。』夫弗敢言，皆謂之虛也。崑崙之高，玉泉華池，世所共聞，張騫親行無其實。案禹貢九州山河，怪奇之物，金玉之琴，莫不悉載，不言崑崙山上有玉泉華池。案太史公之言山經，禹紀虛妄之言，凡事難知，是非難測。極爲天中，方今天下，在禹極之南，則天極北，必高多民。禹貢東漸於海，西被於流沙，此則天地之極際也。日刺徑千里，今從東海之上，會稽鄞鄞，則察日之初出徑二尺，尙遠之驗也。遠則東方之地尙多，東方之地尙多，則天極之北，天地廣長，不復訾矣。夫如是，鄒衍之言非也。禹紀山海，淮南地形，未可信也。

鄒衍曰：『方今天下，在地東南，名赤縣神州。』天極爲天中，如方今天下，在地東南，視極當在西北。今正在北方，今天下在極南也。以極言之，不在東南，鄒衍之言非也。如在東南，近日所出，日如出時，其光宜大。今從東海上

察日，及從流沙之地視日，小大同也。相去萬里，小大不變。方今天下，得地之廣少矣。錐闕九州之中也，從錐闕北顧，極正在北，東海之上，去錐闕三千里，視極亦在北。推此以度，從流沙之地視極，亦必復在北焉。東海流沙，九州東西之際也，相去萬里，視極猶在北者，地小居狹，未能辟離極也。日南之郡，去錐且萬里，徙民還者聞之，言日中之時，所居之地，未能在日南也。度之復南萬里，日在日之南，是則去錐闕二萬里，乃爲日南也。今從錐地察日之去遠近，非與極同也，極爲遠也。今欲北行三萬里，未能終極下也。假令之至，是則名爲距極下也。以至日南五萬里，極北亦五萬里也。極北亦五萬里，極東南亦皆五萬里焉。東西十萬，南北十萬，相承百萬里。鄒衍之言，『天地之間，有若天下者九。』案周時九州東西五千里，南北亦五千里，五五二十五，一州者二萬五千里。天下若此九之，乘二萬五千里，二十二萬五千里。如鄒衍之書，若謂之多計度，驗實反爲少焉。

儒者曰：『天氣也，故其去人不遠。人有是非，陰爲德害，天輒知之，又輒應之，近人之效也。』如實論之，天體非氣也。人生於天，何嫌天無氣？猶有體在上，與人相遠。祕傳或言，天之離天下，六萬餘里；數家計之，三百六十五度一周。天下有周度，高有里數。如天審氣，氣如雲煙，安得里度？又以二十八宿效之，二十八宿爲日月舍，猶地有郵亭爲長吏廨矣。郵亭著地，亦如星舍著天也。崇附書者，天有形體，所據不虛，由此考之，則無恍惚明矣。

說日篇

儒者曰：『日朝見，出陰中，暮不見，入陰中，陰氣晦冥，故沒不見。』如實論之，不出入陰中，何以效之？夫夜，陰也，氣亦晦冥；或夜舉火者，光不滅焉。夜之陰，北方之陰也。朝出，日入所舉之火也。火夜舉，光不滅，日暮入，獨不見，非氣驗也。夫觀冬日之出入，朝出東南，暮入西南，東南西南非陰，何故謂之出入陰中？且夫星小猶見，日大反滅，世儒之論，竟虛妄也。儒者曰：『冬日短，夏日長，亦復以陰陽。夏時陽氣多，陰氣少，陽氣光明，與日同耀，故日出輒無障蔽。冬陰氣晦冥，掩日之光，日雖出，猶隱不見，故冬日短。陰多陽少，與夏相反。』如實論之，日之長短，不以陰

陽。何以驗之。復以北方之星。北方之陰。日之陰也。北方之陰。不蔽星光。冬日之陰。何故猶滅日明。由此言之。以陰陽說者。失其實矣。實者。夏時日在東井。冬時日在牽牛。牽牛去極遠。故日道短。東井近極。故日道長。夏北至東井。冬南至牽牛。故冬夏節極。皆謂之至。春秋未至。故謂之分。或曰。『夏時陽氣盛。陽氣在南方。故天舉而高。冬時陽氣衰。天抑而下。高則日道多。故日長。下者日道少。故日短也。』日陽氣盛。天南方舉而日道長。月亦當復長。案夏日長之時。日出東北。而月出東南。冬日短之時。日出東南。月出東北。如夏時天舉南方。日月當俱出東北。冬時天復下。日月亦當俱出東南。由此言之。夏時天不舉南方。冬時天不抑下也。然則夏日之長也。其所出之星在北方也。冬日之短也。所出之星在南方也。閏曰。當夏五月日長之時。在東井。東井近極。故日道長。今案察五月之時。日出於寅。入於戌。日道長。去人遠。何以得見其出於寅。入於戌乎。日東井之時。去人極近。夫東井近極。若極旋轉。人常見之矣。使東井在極旁。則得無夜。常爲晝乎。日晝行十六分。人常見之。不復出入焉。儒者或曰。『日月有九道。故曰。『日行有近遠。晝夜有長短也。』』夫復五月之時。晝十一分。夜五分。六月。晝十分。夜六分。從六月往至十一月。月減一分。此則日行月從一分道也。歲日行天十六道也。豈徒九道。

或曰。『天高南方下北方。日出高故見。入下故不見。天之居若倚蓋矣。故極在人之北。是其效也。極其天下之中。今在人北。其若倚蓋明矣。日明既以倚蓋喻。當若蓋之形也。極星在上之北。若蓋之葆矣。其下之南。有若蓋之莖者。正何所乎。夫取蓋倚於地。不能運立。而樹之然後能轉。今天運轉。其北際不著地者。觸礙何以能行。由此言之。天不若倚蓋之狀。日之出入。不隨天高下明矣。或曰。『天北際下地中。日隨天而入地。地密郭隱。故人不見。』然天地夫婦也。合爲一體。天在地中。地與天合。天地并氣。故能生物。北方陰也。合體并氣。故居北方。天運行於地中乎。不則北方之地低下而不平也。如審運行地中。鑿地一丈。轉見水源。天行地中。出入水中乎。如北方低下不平。是則九川北注。不得盈滿也。實者天不在地中。日亦不隨天隱。天平正與地無異。然而日出上。日入下者。隨天轉。視天覆若盆之狀。故視日上下然。似若出入地中矣。然則日之出。近也。其入。遠不復見。故謂之入。寔見於東

方近，故謂之出，何以驗之？察明月之珠於臺蓋之檐，轉而旋之，明月之珠旋邪？人望不過十里，天地合矣；遠，非合也。今視日入，非入也，亦遠也。當日入西方之時，其下民亦將謂之日中；從日入之下，東望今之天下，或時亦天地合。如是方天下在南方也，故日出於東方，入於北方之地，日出北方，入於南方，各於近者爲出，遠者爲入，實者不入，遠矣。臨大澤之濱，望四邊之際，與天屬，其實不屬，遠若屬矣。日以遠爲入，澤以遠爲屬，其實一也。澤際有陸，人望而不見，陸在，察之若望，日亦在，視之若入，皆遠之故也。太山之高，參天入雲，去之百里，不見埤塊，夫去百里不見太山，况日去人以萬里數乎？太山之驗則既明矣，試使一人把大炬火，夜行於道，平易無險，去人不一里，火光滅矣，非滅也，遠也。今日西轉不復見者，非入也。

問曰：『天平正與地無異，今仰視天，觀日月之行，天高南方下北方，何也？』曰：方今天下，在東南之上，視天若高；日月道在人之南。今天下在日月道下，故觀日月之行，若高南下北也。何以驗之？即天高南方之星亦當高。今視南方之星低下，天復低南方乎？夫視天之居，近者則高，遠則下焉。極北方之民以爲高，南方爲下；極東極西，亦如此焉。皆以近者爲高，遠者爲下。從北塞下近仰視斗極，且在人以上，匈奴之北，地之邊陲，北上視天，天（一）有下字（一）復高北下南。日月之道，亦在其上。立太山之上，太山高，去下十里，太山下。夫天之高下，猶人之察太山也。平正四方，中央高下皆同。今望天之四邊若下者，非也，遠也，非徒下，若合矣。

儒者或以日暮日出入爲近，日中爲遠，或以日中爲近，日出入爲遠。其以日出入爲近，日中爲遠者，見日出入時大，日中時小也。察物，近則大，遠則小，故日出入爲近，日中爲遠也。其以日出入爲遠，日中時爲近者，見日中時溫，日出入時寒也。夫火光近人則溫，遠人則寒，故以日中爲近，日出入爲遠也。二論各有所見，故是非曲直，未有所定。如實論之，日中約而日出入遠，何以驗之？以植竿於屋上，夫屋高三丈，竿於屋棟之下，正而樹之，上扣棟，下抵地，是以屋棟去地三丈。如旁邪倚之，則竿未旁跌，不得扣棟，是爲去地過三丈也。日中時，日正在天上，猶竿之正樹，去地二丈也。日出入，邪在人旁，猶竿之旁跌，去地過三丈也。夫如是，日中爲近，出入爲遠，可知明矣。試復以

屋中堂而坐一人，一人行於屋上，其行中屋之時，正在坐人之上，是爲屋上之人，與屋下坐人，相去三大矣。如屋上人在東危，若西危上，其與屋上坐人，相去過三大矣。日中時，猶人正在屋上矣。其始出與入，猶人在東危與西危也。日中去人近故溫，日出入遠故寒。然則日中時日小，其出入時大者，日中光明故小，其出入時光暗故大。猶晝日察火光小，夜察之火光大也。既以火爲效，又以星爲驗。晝日星不見者，光耀滅之也；夜無光耀，星乃見。夫日月，星之類也，平旦日入光銷，故視大也。儒者論日，且出扶桑，暮入細柳，扶桑東方地，細柳西方野也。桑柳天地之際，日月常所出入之處。

問曰：『歲二月八月時，日出正東，日入正西，可謂日出於扶桑，入於細柳。今夏日長之時，日出於東北，入於西北；冬日短之時，日出東南，入於西南。冬與夏日之出入，在於四隅，扶桑細柳，正在何所乎？』所論之言，猶謂春秋不謂冬與夏也。如實論之，日不出於扶桑，入於細柳，何以驗之？隨天而轉，近則見，遠則不見。當在扶桑細柳之時，從扶桑細柳之民，謂之日中之時，從扶桑細柳察之，或時爲日出入。若以其上者爲中，旁則爲旦夕，安得出於扶桑入細柳？儒者論曰：『天左旋，日月之行，不繫於天，各自旋轉。』難之曰：使日月自行，不繫於天，日行一度，月行十三度，當日月出時，當進而東旋，何還始西轉？繫於天，隨天四時轉行也。其喻若蟻行於磴上，日月行遍，天行疾，天持日月轉，故日月實東行而反西旋也。

或問：『日月天皆行，行度不同，三者舒疾，驗之人物，爲以何喻？』曰：天日行一周，日行一度二千里，日晝行千里，夜行千里，麒麟晝日亦行千里。然則日行舒疾，與麒麟之步，相似類也。月行十三度，十度二萬里，三度六千里，月一旦夜行二萬六千里，與晨晝飛，相似類也。天行三百六十五度，積凡七十三萬里也，其行甚疾，無以爲驗，嘗與陶鈞之運，弩矢之流，相類似乎？天行已疾，去人高遠，視之若遲。蓋望遠物者，動若不動，行若不行。何以驗之？乘船江海之中，順風而飄，近岸則行疾，遠岸則行遲。船行一實也，或疾或遲，遠近之視，使之然也。仰視天之運，不若麒麟，負日而馳，皆暮而日在其前，何則？麒麟近而日遠也，遠則若遲，近則若疾。六萬里之程，難以得遲行之實也。

儒者說曰：『日行一度，天一日一夜行三百六十五度。天左行，日月右行，與天相迎。』問日月之行也，繫著於天也。日月附天而行，不直行也。何以言之？易曰：『日月星辰麗乎天，百穀草木麗於土。』麗者，附也。附天所行，若人附地而圓行，其取喻若蟻行於磴上焉。

問曰：『何知不離天直自行也？』如日能直自行，當自東行，無爲隨天而西轉也。月行與日同，行皆附天。何以驗之？驗之似雲，雲不附天，常止於所處，使不附天，亦當自止其處。由此言之，日行附天明矣。問曰：『日火也，火在地不行，日在天何以爲行？』曰：附天之氣行，附地之氣不行。火附地，地不行，故火不行。難曰：『附地之氣不行，水何以行？』曰：水之行也，東流入海也。西北方高，東南方下，水性歸下，猶火性趨高也。使地不高西方，則水亦不東流。難曰：『附地之氣不行，人附地何以行？』曰：人之行，求有爲也。人道有爲故行求。古者質朴，鄰國接壤，雞犬之聲相聞，終身不相往來焉。難曰：『附天之氣行，列星亦何以不行？』曰：列星著天，天已行也。隨天而轉，是亦行也。難曰：『人道有爲故行，天道無爲何行？』曰：天之行也，施氣自然也。施氣則物自生，非故施氣以生物也。不動氣不施，氣不施物不生，與人行異。日月五星之行，皆施氣焉。

儒者曰：『日中有三足鳥，月中有兔蟾蜍。』夫日者，天之火也，與地之火無以異也。地火之中無生物，天火之中，何故有鳥？火中無生物，生物入火中，燋爛而死焉。鳥安得立？夫月者，水也，水中有生物，非兔蟾蜍也。兔與蟾蜍，久在水中，無不死者。日月毀於天，螺蚌汨於淵，同氣審矣。所謂兔蟾蜍者，豈反螺與蚌耶？且問儒者，鳥兔蟾蜍，死乎生也？如死，久在日月，燋爛腐朽；如生，日蝕時既，月晦常盡，鳥兔蟾蜍皆何在？夫鳥兔蟾蜍，日月氣也。若人之腹臟，萬物之心膂也。月，尚可察也；人之察日，無不眩，不能知日審何氣，通而見其中有物，名曰鳥乎？審日不能見鳥之形，通而能見其足有三平，此已非實。且聽儒者之言，蟲物非一日中何爲有鳥？月中何爲有兔蟾蜍？儒者謂日蝕月蝕也。彼見日蝕常於晦朔，晦朔月與日合，故得蝕之。夫春秋之時，日蝕多矣。經曰：『某月朔，日有蝕之。』日有蝕之者，未必月也。知月蝕之，何諱不言月？說日蝕之變，陽弱陰強也。人物在世，氣力動強，乃能乘凌。案月晦光，

既朔則如盡，微弱甚矣，安得勝日？夫日之蝕，月蝕也；日蝕謂月蝕之，月蝕蝕之者，無蝕月也；月自損也。以月輪日，亦如日蝕，光自損也。大率四十一二月日一食，百八十日月一蝕。蝕之皆有時，非時爲變，及其爲變，氣自自然也。日時晦朔，月復爲之乎？夫日當實滿，以虧爲變，必謂有蝕之者。山崩地動，蝕者誰也？或說日食者，月掩之也。日在上，月在下，障於日之形也。日月合相襲，月在上，日在下者，不能掩日；日在上，月在下，障於日，月光掩日光，故謂之食也。障於月也，若陰雲蔽日月不見矣。其端合者，相食是也；其合相當如襲辟者，日既是也。日月合於晦朔，天之常也。日食月掩日光，非也。何以驗之？使日月合，月掩日光，其初食崖，當與旦復時易處。假令日在東，月在西，月之行疾，東及日掩日崖，須臾過日而東，西崖初掩之處，光當復，東崖未掩者當復食。今察日之食，西崖光缺，其復也，西崖光復，過掩東崖復，西崖謂之合襲相掩障，如何？儒者謂日月之體皆至圓，彼從下望見其形，若斗筲之狀，狀如正圓，不如望遠光氣，氣不圓矣。夫日月不圓，視若圓者，人遠也。何以驗之？夫日者，火之精也；月者，水之精也，在地水火不圓，在天水火何故獨圓？日月在天猶五星，五星猶列星，列星不圓，光耀若圓，去人遠也。何以明之？春秋之時，星實宋都，就而視之，石也不圓，以星不圓，知日月五星亦不圓也。

儒者說日及工倣之家，皆以日爲一焉。貢山、海經言日有十，在海外東方有湯谷，上有扶桑，十日浴沐水中，有大木，九日居下枝，一日居上枝。淮南書又言燭十日，堯時十日並出，萬物焦枯，堯上射十日，以故不並一日見也。世俗又名甲乙爲日，甲至癸凡十日，日之有十，猶星之有五也。通人談士，歸於難知，不肯辨明，是以文二傳而不定，世兩言而無主，誠實論之，且無十焉。何以驗之？夫日猶月也，日而有十，月有十二，乎？星有五，五行之精，金木水火土，各異光色。如日有十，其氣必異。今觀日光，無有異者，察其大小，前後若一。如審氣異，光色宜殊，如誠同氣，宜合爲一，無爲十也。驗日陽遂，火從天來。日者，大火也，察火在地，一氣也。地無十火，天安得十日？然則所謂十日者，殊更自有他物，光質如日之狀，居湯谷中，水時緣據扶桑。禹益見之，則紀十日。數家度日之光，數日之質，則徑千里，假令日出是扶桑木上之日，扶桑木宜覆萬里，乃能受之，何則？一日徑千里，十日宜萬里也。天之去人，萬里餘

也。仰察之，日光眩耀，火光盛明，不能堪也。使日出是扶桑木上之日，禹益見之，不能知其爲日也。何則？仰察一日，目猶眩耀，况察十日乎？當禹益見之，若斗筲之狀，故名之爲日。夫火如斗筲，望六萬之形，非就見之，卽察之體也。由此言之，禹益所見，意似日非日也。天地之間，物氣相類，其實非者多，海外西南有珠樹焉，察之是珠，然非魚中之珠也。夫十日之日，猶珠樹之珠也；珠樹似珠，非真珠，十日似日，非實日也。淮南見山海經，則虛言真人燭十日，妄紀堯時十日並出，且日，火也；湯谷，水也。水火相賊，則十日浴於湯谷，當滅敗焉。火燃木，扶桑木也；十日處其上，宜焦枯焉。今浴湯谷而光不滅，登扶桑而枝不焦，與今日出同，不驗於五行，故知十日非真日也。且禹益見十日之時，終不以夜，猶以晝也。則一日出，九日宜留，安得俱出十日？如平旦日未出，且天行有度數，日隨天轉行，安得留扶桑枝間，浴湯谷之水平？留則失行度，行度差跌，不相應矣。如行出之日與十日異，是意似日而非日也。

春秋：「莊公七年夏四月辛卯，夜中恆星不見，星實如雨。」者，公羊傳曰：「如雨者何？非雨也。非雨則曷爲謂之如雨？不修春秋曰：『雨星不及地尺而復。』君子修之曰：『星實如雨。』孔子之意，以爲地有山陵樓臺，云不及地尺，星實如雨，不及地尺而復。」君子者，孔子修之曰：「星實如雨。」孔子之意，以爲地有山陵樓臺，云不及地尺，恐失其實，更正之曰如雨。如雨者，爲從地上而下，星亦從天實而復與同，故曰如。」夫孔子雖云不及地尺，但言如雨，其謂實之者皆是星也。孔子雖定其位，著其文，謂實爲星，與史同焉。從平從望泰山之巔，鶴如鳥，鳥如爵者，泰山高遠，物之小大失其實。天之去地六萬餘里，高遠非直泰山之巔也。星著於天，人察之，失星之實，非直望鶴如鳥之類也。數等星之實百里，體大光盛，故能垂耀。人望見之，若鳳卵之狀（墜）遠失其實也。如星實密者，天之星實而至地，人不知其爲星也。何則？實時小大，不與在天同也。今見星實如在天時，是時星也，非星，則氣爲之也。人見鬼如死人之狀，其實氣象聚，非真死人。然則實星之形，其實非星。孔子云正實者非星，而徒正言如雨，非雨之文，蓋俱失星之實矣。

春秋左氏傳四月辛卯，夜中恆星不見，夜明也；星實如雨，與雨俱也。其言夜明故不見，與易之言「日中見斗」

相（依）類也。日中見斗，幽不明也。夜中星不見，夜光明也。事異義同，著其實也。其言與兩俱之集也。夫辛卯之夜明，故星不見；明則不雨之驗也。兩氣陰暗，安得明？明則無雨，安得與兩俱？夫如是，言與兩俱者，非實。且言夜明不見，安得見星與兩俱？

又傳公十六年正月戊申，實石于宋。左氏傳曰：「星也。」夫謂實石爲星，則謂實爲石矣。辛卯之夜星實，爲星則實爲石矣。辛卯之夜星實如是，石地有樓臺，樓臺崩壞。孔子雖不合言及地尺，雖地必有實數。魯史目見，不空言者也。云與兩俱，兩集於地，石亦宜然。至地而樓臺不壞，非星明矣。且左丘明謂石爲星，何以審之？當時石實輕，然何以其從天墜也？秦時三山亡，亡有不消散，有在其集下時，必有聲音。或時夷狄之山，從集於宋，宋聞石實，則謂之星也。左丘明省，則謂之星。夫星，萬物之精，與日月同。說五星者，謂五行之精之光也。五星衆星同光耀，獨謂列星爲石，恐失其實。實者辛卯之後，星實若雨而非星也，與彼湯谷之十日，若日而非日也。儒者又曰：「雨從天下，謂正從天墜也。」如當論之，雨從地上，不從天下。見雨從上集，則謂從天下矣。其實地上也。然其出地起於山，何以明之？春秋傳曰：「觸石而出，膚寸而合，不崇朝而徧天下，惟太山也。」太山雨天下，小山雨一國，各以小大爲近遠差。雨之出山，或謂雲載而行，雲散水墜，名爲雨矣。夫雲則雨，雨則雲矣。初出爲雲，雲繁爲雨，猶甚而泥露濡汚衣服。若雨之狀，非雲與俱，雲載行雨也。或曰：「尚書曰：『月之從星，則以風雨。』」詩曰：「月麗于畢，俾滂沱矣。」二經咸言，所謂爲之非天如何？夫雨從山發，月經星麗畢之時，麗畢之時當雨也。時不雨，月不麗，山不雲，天地上下自相應也。月麗於上，山蒸於下，氣體偶合，自然道也。雲霧，雨之徵也。夏則爲露，冬則爲霜，溫則爲雨，寒則爲雪。雨露凍凝者，皆由地發，不從天降也。

效谷低篇

或問曰：「賢者行道，得尊官厚祿矣；何必爲佞，以取富貴？」曰：佞人知行道可以得富貴，必以知取爵祿者，不

能禁欲也；知力耕可以得穀，勉買可以得貨，然而必盜竊，情欲不能禁者也。以禮進退也，人莫不貴，然而違禮者衆，尊義者希，心貪欲，志慮亂，禍也。夫佞與賢者同材，佞以情自欺，偷盜與田商同知，偷盜以欲自劫也。

問曰：『佞與賢者同材，材行宜鈞，而佞人曷爲獨以情自欺？』曰：富貴皆人所欲也，雖有君子之行，猶有飢渴之情。君子則以禮防情，以義制欲，故得循道，循道則無禍；小人縱貪利之欲，踰禮犯義，故進得苟佞，有佞則有罪。夫賢者，君子也，佞人，小人也。君子與小人，本殊操異行，取捨不同。

問曰：『佞與讒者同道乎？有以異乎？』曰：讒與佞，俱小人也，同道異材，俱以嫉妬爲性，而施行發動之異。讒以口害人，佞以事危人；讒人以直道不違，佞人依違匿端；讒人無詐處，佞人有術數。故人君皆能遠讒親仁，莫能知賢別佞。難曰：『人君皆能遠讒親仁，而莫能知賢別佞；然則佞人意不可知乎？』曰：佞可知，人君不能知。庸庸之君不能知賢，不能知佞，唯聖賢之人，以九德檢其行，以事效考其言。行不合於九德，言不驗於事效，人非賢則佞矣。夫知佞以知賢，知賢以知佞；知佞則賢智自覺，知賢則奸佞自得。賢佞異行，考之一驗，情性不同，觀之一寔。

問曰：『九德之法，張設久矣，觀讀之者，莫不曉見。斗斛之量多少，權衡之縣輕重也。然而居國有土之君，曷爲常有邪佞之臣，與常有欺惑之患？』無患斗斛過，所量非其穀；不患無銓衡，所銓非其物故也。在人君位者，皆知九德之可以檢行，事效可以知情，然而惑亂不能見者，則明不察之故也。人有不能行，行無不可檢；人有不能考，情無不可知。

問曰：『行不合於九德，效不驗於考功，進近非賢，非賢則佞。夫庸庸之材，無高之知，不能及賢；賢功不效，賢行不應，可謂佞乎？』曰：材有不相及，行有不相追，功有不相襲；若知無相襲，人材相什百；取舍宜同，賢佞殊行，是非非，賢名俱立，而效有成敗，是非之言俱當；功有正邪，言合行違，名盛行廢。

佞人問曰：『行合九德則賢，不合則佞；世人操行者，可盡謂佞乎？』曰：諸非皆惡，惡中之逆者，謂之無道；惡中

之巧者，謂之佞人。聖人刑憲，佞在惡中；聖王賞勸，賢在善中。純潔之賢，善中殊高；賢中之聖也，善中大佞，惡中之雄也。故曰：觀賢由義，察佞由惡；善惡定成，賢佞形矣。

問曰：『聰明有蔽塞，推行有謬誤。今以是者爲賢，非者爲佞，殆不得賢之實乎？』曰：聰明蔽塞，推行謬誤，人之所歎也。故曰：刑故無小，宥過無大。聖君原心省意，故誅故實誤，故賊加增，過誤滅損，一獄吏所能定也，賢者見之，不疑矣。

問曰：『言行無功效，可謂佞乎？』蘇秦約六國爲從，強秦不敢窺兵於關外；張儀爲橫，六國不敢同攻於關內。六國約從，則秦畏而六國強；三秦稱橫，則秦強而天下弱。功著效明，載記竹帛，雖賢何以加之？太史公敘言衆賢，儀秦有篇，無嫉惡之文。功鉤名敵，不異於賢。夫功之不可以效賢，猶名之不可以實也。儀秦，排難之人也，處擾攘之世，行揣摩之術，當此之時，稷契不能與之爭計，禹臯陶不能與之比效。若夫陰陽調和，風雨時適，五穀豐熟，盜賊衰息，人舉廉讓，家行道德之功，命祿貴美，術數所致，非道德之所成也。太史公記功，故高來稷，記錄成則著效明驗，攬載高卓，以儀秦功美，故列其狀。由此言之，佞人亦能以權說立功，爲效無效，未可爲佞也。難曰：『惡中立功者，謂之佞；能爲功者，材高知明，思慮遠者，必傍義依仁，亂於大賢。』故覺佞之篇曰：『人生好辯，佞人言利；人生好文，佞人辭麗；心合意同，偶當人主，說而不見其非，何以知其僞而伺其奸乎？』曰：是謂庸庸之君也，材下之昏，蔽惑不見后。又賢之君，察之審明，若視俎上之脯，指掌中之理，數局上之碁，摘轅中之馬，魚鼈匿淵，捕魚者知其源，禽獸藏山，收獵者見其脈。佞人異行於世，世不能見，庸庸之主，無高材之人也。難曰：『人君好辯，佞人言利；人生好文，佞人辭麗。言操合同，何以覺之？』曰：文王官人法曰：推其往行，以揆其來言；聽其來言，以省其往行；觀其陽以考其陰，察其內以揆其外。是故詐善設飾者可知，飾僞無情者可辨，質誠居善者可得，含忠守節者可見也。人之舊性不辯，人君好辯，佞人學求合於上也；人之故能不文，人君好文，佞人意欲稱上也。奢已麗服，上儉己不飾，今操與古殊，朝行與家別，考鄉里之迹，證朝廷之行，察共惡之節，明事君之操，外內不相需，名實不相副，際會發

見奸僞覺露也

問曰：『人操行無恆，權時制宜；信者欺人，直者曲撓；權變所設，前後異操；事有所應，左右異語。儒書所載，權變非一。今以素故考之，毋乃失實乎？』曰：『賢者有權，佞者有權；賢者之有權，後有應，佞人之有權，亦反經，後有惡故。賢人之權，爲事爲國；佞人之權，爲身爲家；觀其所權，賢佞可論；察其發動，邪正可名。』

問曰：『佞人好毀人，有諸？』曰：『佞人不毀人，如毀人，是讒人也。何則？佞人求利，故不毀人；苟利於己，易爲毀之；苟不利於己，毀之無益。以計求便，以數取利，利則便得，妬人共事，然後危人。其危人也，非毀之；而其害人也，非泊之。譽而危之，故人不知；厚而害之，故人不疑。是故佞人危而不怨，害人之數而不仇，隱情匿意，爲之功也。如毀人，人亦毀之；衆不親，士不附也，安能得容世取利於上？』

問曰：『佞人不毀人於世間，毀人於將前乎？』曰：『佞人以人欺將，不毀於將。』然則佞人奈何？曰：『佞人毀人譽之，危人安之，毀危奈何？假令甲有高行奇知，名聲顯聞，將恐人君召問，扶而勝已，欲故廢不言，常騰譽之。薦之者衆，將議欲用，問人人必不對。曰：『甲賢而宜召也。』何則？甲意不欲留縣，前聞其語矣。聲望欲入府，在郡則望欲入州，志高則操與人異，望遠則意不顧近，屈而用之，其心不滿，不則臥病，賤而命之，則傷賢，不則損威。故人君所以失名損譽者，好臣所常臣也。自耐下之，用之可也；自度不能下之，用之不便。夫用之不兩相益，舍之不兩相損，人君畏其志，信佞人之言，遂置不用。』

問曰：『佞人直以高才洪知，考上世人乎？將有師學檢也？』曰：『人自有知以詐人，及其說人主，須術以動上，猶上人自有勇威人，及其戰鬥，須兵法以進衆。術則從橫，師則鬼谷也。傳曰：蘇秦張儀從橫，習之鬼谷先生，掘地爲坑，曰：『下說令我泣出，則耐分人君之地。』蘇秦下說，鬼谷先生泣下沾襟。張儀不若蘇秦，相趙并相六國。張儀貧賤往歸，蘇秦座之堂下，食以僕妾之食，數讒激怒，欲令相秦。儀忿恨，遂西入秦，蘇秦使人厚送，其後覺知，曰：『此在其術中，吾不知也；此吾所不及。』蘇君者，知深有術，權變鋒出，故身尊榮榮顯，爲世雄傑。深謀明術，深淺不

能並行，明闇不能並知。

問曰：『佞人養名作高有諸？』曰：佞人食利專權，不養名作高；貪權據凡，則高名自立矣。稱於小人，不行於君子。何則？利義相伐，正邪相反。義動君子，利動小人。佞人貪利名之顯，君子不安，下則身危。舉世爲佞者，皆以禍衆不能養其身，安能養其名？上世列傳，棄宗養身，違利赴名，竹帛所載。伯成子高委國而耕，於陵子辭位墮園，近世蘭陵王仲子、東都昔廬君、陽陵位久病，不應上徵，可謂養名矣。夫不以道進，必不以道出身；不以義止，必不以義立名。佞人懷貪利之心，輕禍重身，傾死爲僞矣。何名之養？義廢德壞，操行隨辱，何云作高？

問曰：『大佞易知乎？小佞易知也。』曰：大佞易知，小佞難知。何則？大佞材高，其迹易察；小佞知下，其效難省。何以明之？成事，小盜難覺，大盜易知也。攻城襲邑，剽劫虜掠，發則事覺，道路皆知盜也；穿鑿垣牆，狸步風竊，莫知謂誰。曰：大佞森深惑亂，其人如大盜易知，人君何難？書曰：『知人則哲，惟帝難之。』虞舜大聖，驩兜大佞，大聖難知，大佞不憂大聖，何易之有？是謂下知之，上知之。上知之，大難小易；下知之，大易小難。何則？佞人材高，論說麗美，因麗美之說，人主之威人立心，並不能覺。知或不能覺，小佞材下，對鄉失漏，際會不密，人君警悟，得知其故，大難小易也。屋漏在上，知者在下；漏大，下見之著；漏小，下見之微。或曰：『雍也仁而不佞。』孔子曰：『焉用佞？禦人以口給，屢憎於人。』誤設計數，煩擾農商，損下益上，愁民說主，損上益下，忠臣之說也；損下益上，忠人之義也。『季氏嘗於周公，而求也爲之聚斂而附益之，小子鳴鼓而攻之可也。』聚斂，季氏不知其惡，不知百姓所共非也。

程材篇

論者多謂儒生不及彼文吏，見文吏利便而儒生墮落，則詆訾儒生以爲淺短，稱譽文吏謂之深長。是不知儒生，亦不知文吏也。儒生文吏皆有材智，非文吏材高而儒生智下也；文吏更事，儒生不習也。謂文吏更事，儒生不習，可也；謂文吏深長，儒生淺短，知妄矣。世俗共短儒生，儒生之徒亦自相少。何則？並好生學官，用吏爲短表也。儒

生有闕俗共短之文吏有過俗不敢讐歸非於儒生付是於文吏也。夫儒生材非下於文吏文非所習之業非所嘗爲也；然世俗共短之者見將不好用也。將之不好用之者事多已不能理須文吏以領之也。夫論籌謀材施用累能期於有益文吏理煩身役於職職判功立將奪其能。儒生粟粟不能當劇將有煩疑不能效力力無益於時則官不及其身也。將以官課材材以官爲驗是故世俗常高文吏賤下儒生。儒生之下文吏之高本由不能之將世俗之論緣將好惡。

今世之將材高知深通達衆凡則舉綱持領事無不定其置文吏也備數滿員足以輔己志志在修德務在立化則夫文吏瓦石儒生珠玉也。夫文吏能破堅理煩不能守身身則亦不能輔將。儒生不習於職長於匡救將相傾側諫難不懼。案世間能建蹇蹇之節成三諫之議令將檢身自勑不敢邪曲者率多儒生。阿意苟取容幸將欲放失低嘿不言者率多文吏。文吏以事勝以忠負儒生以節優以職劣二者長短各有所宜。世之將相各有所取取儒生者必軌德立化者也；取文吏者必優事理亂者也。材不自能則須助須助則待勑官之立佐爲力不足也吏之取能爲材不及也。

日之照幽不須燈燭賁育當敵不待輔佐使相將知力若日之照幽賁育之難敵則文吏之能無所用也。病作而醫用禍起而巫使如自能案方和藥入室求祟則醫不售而巫不進矣。橋梁之設也足不能越溝也車馬之用也走不能追遠也足能越溝走能追遠則橋梁不設車馬不用矣。天地事物人所重敬皆力劣知極須仰以給足者也。

今世之將相不責己之不能而賤儒生之不習不原文吏之所得得用而尊其材謂之善吏。非文吏憂不除非文吏患不救是以選舉取常故案吏取無害。儒生無閥閱所能不能任劇故陋於選舉佚於朝廷聰慧捷疾者隨時變化學知吏事則鍾文吏之後未得良善之名守古循志案禮修義輒爲將相所不任文吏所毗戲不見任則孰欲息退見毗戲則意不得臨職不勸察事不精遂爲不能斥落不習有俗材而無雅度者學知吏事亂於文吏

觀將所知，適時所急，轉志易務，晝夜學問，無以羞恥，期於成能名文而已。

其高志妙操之人，恥降意損崇，以稱媚取進，深疾才能之儒，消入文吏之科，堅守高志，不肯下學，亦時或精闇不及，意疏不密，臨事不識，對向謬誤，拜起不便，進退失度，奏記言事，蒙士解過，援引古義，割切將欲，直言一指，觸諱犯忌，封蒙約縛，簡繩檢署，事不如法，文辭卓詭，辟刺離實，曲不應義，故世俗輕之，文吏薄之，將相賤之。是以世俗學問者，不肯竟經明學，深知古今，急欲成一家章句，義理略具，同起學史，書讀律詁，令治作情，奏習對向，滑習跪拜，家成坐就，召署輒能，徇今不顧古，趨讎不存志，競進不崇禮，廢經不念學。是以古經廢而不修，舊學闕而不明，儒者寂於空室，文吏譁於朝堂，材能之士，隨世驅馳，節操之人，守隘屏竄。驅馳日以巧，屏竄日以拙，非材頓知不及也，希見闕焉，不狎習也。蓋足未嘗行，堯禹問曲折，目未嘗見，孔墨問形象。

齊都世刺繡，恆女無不能，襄邑俗織錦，鈍婦無不巧。日見之，日爲之，手狎也。使材士未嘗見，巧女未嘗爲，異事詭手，暫爲卒睹，顯露易爲者，猶憤憤焉。方今論事，不爲希更，而曰材不敏，不曰未嘗爲，而曰知不達，失其實也。儒生材無不能敏，業無不能達，志不有爲。今俗見不習謂之不能，睹不爲謂之不達，科用累能，故文吏在前，儒生在后，是從朝廷謂之也。如從儒堂訂之，則儒生在上，文吏在下矣。

從農論田田夫勝，從商講賈賈人賢。今從朝廷謂之，文吏朝廷之人也，幼爲幹吏，以朝廷爲田畝，以刀筆爲耒耜，以文書爲農業，猶家人子弟，生長宅中，其知曲折，愈於賓客也。賓客暫至，雖孔墨之材，不能分別。儒生猶賓客，文吏猶子弟也。以子弟論之，則文吏曉於儒生，儒生闇於文吏。今世之將相，知子弟以文吏爲慧，不能知文吏以狎爲能，知賓客以暫爲固，不知儒生以希爲拙，惑蔽闇昧，不知類也。一縣佐史之材，任郡掾史，一郡修行之能，堪州從事。然而郡不召佐史，州不取修行者，巧習無害，文少德高也。五曹自有條品，簿書自有故事，勤力玩弄，成爲巧吏，安足多矣。賢明之將，程吏取材，不求習諳高存，志不顧文也。

程吏更曰：忠，忠之所以爲效，非簿書也。夫事可學而知，禮可習而善，忠節公行，不可立也。文吏儒生，皆有所志。

然而儒生務忠良，文吏趨理事。苟有忠良之業，疏拙於事，無損於高。論者以儒生不曉簿書，置於下第。法比令例，吏斷決也。文吏治事，必問法家。縣官事務，莫大法令，必以吏職程高，是則法令之家，宜最爲上。

或曰：『固然。法令法家之經，吏議決焉。事定於法，誠爲明矣。』曰：夫五經亦漢家之所立，儒生善政，大義皆出其忠。董仲舒表春秋之義，稽合於律，無乖異者。然則春秋漢之經，孔子制作，垂遺於漢。論者徒尊法家，不高春秋，是闇蔽也。春秋五經，義相關穿。既是春秋，不大五經，是不通也。五經以道爲務，事不知道，道行事立，無道不成。然則儒生所學者道也，文吏所學者事也。假使材同，當以道學。如比於文吏，洗滌泥者以水，燂腥生者用火，火水道也，用之者事也。事未於道，儒生治本，文吏理末。道本與事末，比定尊卑之，高下可得程矣。

堯以俊德致黎民雍，孔子曰：『孝悌之至，通於神明。』張釋之曰：『秦任刀筆小吏，陵遲至於二世，天下土崩。』張湯趙禹，漢之惠吏，太史公序，累置於酷部，而土致崩，孰與通於神明，令人填膺也。將相知經學至道，而不尊經學之生，彼見經學之生，能不及治事之吏也。

牛刀可以割雞，雞刀難以屠牛。刺繡之師能縫帷裳，納縷之工不能織錦。儒生能爲文吏之事，文吏不能立儒生之學。文吏之能，誠劣不及。儒生之不習，實優而不爲。禹決江河，不秉鏹鎬；周公築館，不把築杖。夫筆墨簿書，鏹鎬築杖之類也；而欲合志大道者，躬親爲之，是使將軍戰而大匠斲也。說一經之生，治一曹之事，旬月能之；與一曹之吏，學一經之業，一歲不能立也。何則？吏事易知，而經學難見也。儒生揭經，窮竟聖意；文吏操筆，考跡民事。夫能知大聖之意，曉細民之情，孰者爲難？以立難之材，含懷章句，十萬以上，行有餘力，博學覽古，今計胸中之穎，出穎十萬；文吏所知，不過辨解簿書，富累千金，孰與賞直百十也？京廩如丘，孰與委聚如坻也？世名材爲名器，器大者盈物多。然則儒生所懷，可謂多矣。

蓬生麻間，不扶自直；白紗入緇，不染自黑。此言所習善惡，變易質性也。儒生之性，非能皆善也；被服聖教，日夜誦誦，得聖人之操矣。文吏幼則筆墨，手習而行，無篇章之誦，不謂仁義之語；長大成吏，舞文巧法，徇私爲己，勉赴

權利，考事則受賂，臨民則采漁，處右則弄權，幸上則賣將，一旦在位，鮮冠利劍，一歲典職，田宅并兼，性非皆惡，所習爲者，違聖教也。故習善儒路，歸化慕義，志操則勵，變從高明，將見之顯用儒生。東海相宗叔犀，犀廣召幽隱，春秋會饗，設置三科，以第補吏，一府員吏，儒生什九。陳留太守陳子瑞，開廣儒路，列曹掾吏，皆能教授，簿書之吏，什置一二。兩將知道事之理，曉多少之量，故世稱褒其名，書記紀累其行也。

量知篇

程材所論，論材能行操，未言學知之殊奇也。夫儒生之所以過文吏者，學問日多，簡練其性，彫琢其材也。故夫學者所以反情治性，盡材成德也。材盡德成，其比於文吏亦彫琢者，程量多矣。貧人與富人，俱賣錢百，並爲購禮，死哀之家，知之者，知貧人劣能共百，以爲富人饒，有奇餘也；不知之者，見錢俱百，以爲財貨，貧富皆若一也。文吏儒生，皆有似於此，皆爲掾吏，並典一曹。將知之者，知文吏儒生筆同，而儒生胸中之藏，尙多奇餘；不知之者，以爲皆吏，深淺多少同一量，失實甚矣。地性生草，山性生木，如地種葵韭，山樹棗栗，名曰美園茂林，不復與一恆地庸山比矣。文吏儒生，有似於此，俱有材能，並非筆墨，而儒生奇有先王之道，先王之道，非徒葵韭棗栗之謂也。恆女之手，紡績織經，如或奇能，織錦刺繡，名曰卓殊，不復與恆女科矣。夫儒生與文吏程材，而儒生後有經傳之學，猶女工織錦刺繡之奇也。

貧人好濫而富人守節者，貧人不足而富人饒後。儒生不爲非，而文吏有爲姦者，文吏少道德而儒生多仁義也。貧人富人，並爲賓客，受賜於主人，富人不慚，而貧人常媿者，富人有效，貧人無以復也。儒生文吏，俱以長吏爲主人者也。儒生受長吏之祿，報長吏之道，文吏空胸，無仁義之學，居住食祿，終無以效，所謂尸位素餐者也。素者，空也，空虛無德，餒人之祿，故曰素餐。無道藝之業，不曉政事，於默坐朝廷，不能言事，與尸無異，故曰尸位。然則文吏所謂尸位素餐者也。居政食祿，見將傾邪，豈能舉記陳言得失乎？一則不能見是非，二則畏罰不敢直言。

禮曰情欲巧其能力言者文醜不好者有骨無肉脂腴不足犯干將相指遂取閭閻爲地戰者不能立功名貪爵祿者不能謀於上文吏貪爵祿一日居位輒欲圖利以營資用侵漁徇身不爲將貪官顯義雖見太山之惡安肯揚舉毛髮之言事理如此何用自解於尸位素餐乎儒生學大義以道事將不可則止有大臣之志以經勉爲公正之操敢言者也位又疎遠遠而近諫禮謂之諂此則郡縣之府庭所以常廓無人者也

或曰『文吏筆札之能而治定簿書考理煩事雖無道學勸力材能盡於朝廷此亦報上之效驗也』曰此有似貧人負官重責貧無以償則身爲官作賣乃畢竟夫官之作非屋廡則牆壁也屋廡則用斧斤牆壁則用築插荷斤斧把築插與彼握刀持筆何以殊有謂治文書者報上之效驗此則治屋廡牆壁之人亦報上也俱爲官作刀筆斧斤築插鈎也抱布貿絲交易有亡各得所願儒生抱道貿祿文吏無所抱何用貿易農商殊業所畜之貨貨不可同計其精麁量其多少其出溢者名曰富人富人在世鄉里願之夫先王之道非徒農商之貨也其爲長吏立功致化非徒富多出溢之榮也且儒生之業豈徒出溢哉其身簡練知處光明見是非審尤可奇也

蔡所與衆山之材幹同也代以爲蒸爇以火煙熱究滅光色澤潤炳之於堂其耀浩廣火龍之效加也繡之未刺錦之未織恆絲庸帛何以異哉加五綵之巧施針縷之飭文章炫耀黼黻華蟲山龍日月學士有文章之學猶絲帛之有五色之巧也本質不能相過學業積聚超踰多矣物實中核者謂之郁無刀斧之斷者謂之樸文吏不學世之教無核也郁樸之人孰與程哉骨曰切象曰瑳玉曰琢石曰磨切瑳琢磨乃成寶器人之學問知能成就猶骨象玉石切瑳琢磨也雖欲勿用賢君其舍諸孫武闔廬世之善用兵者也知或學其法者戰必勝不勝什伯之陣不知擊之術者強使之軍軍覆師敗無其法也

穀之始熟曰粟春之於臼簸其糝糠蔡之於甑鑊之以火成熟爲飯乃甘可食可食而食之味生肌腴成也粟未爲米米未成飯氣腥未熟食之傷人夫人之不學猶穀未成粟米未爲飯也知心亂少猶食腥穀氣傷人也學士簡練於學成熟於師身之有益猶穀成飯食之生肌腴也銅錫未採在衆石之間工師鑿掘鑪槩鑄鑠乃成器

未更鑄，名曰積石。積石與彼路畔之瓦，山間之礫，一實也。故夫穀未舂，蔡曰粟；銅未鑄，鑠曰積石。人未學問曰矻矻者，竹木之類也。夫竹生於山，木長於林，未知所入，截竹爲筒，破以爲牒，加筆墨之跡，乃成文字。大者爲經，小者爲傳記；斷木爲槩，枘之爲板，力加刮削，乃成秦牘。夫竹木，羸直之物也，彫琢刻削，乃成爲器用。況人含天地之性，最爲貴者乎！

不入師門，無經傳之教，以郁樸之實，不曉禮義，立之朝廷，植竿樹表之類也。其何益哉！山野草茂，鉤鐮斬刈，乃成道路也。土未入道門，邪惡未除，猶山野草木未斬刈，不成路也。染練布帛，名之曰采，貴吉之服也；無染練之治，名穀羸，穀羸不吉，喪人服之。人無道學，仕宦朝廷，其不能招致也，猶喪人服羸，不能招吉也。能斲削柱梁，謂之木匠；能穿鑿穴堦，謂之土匠；能彫琢文書，謂之史匠。夫文吏之學，學治文書也，當與木土之匠同科，安得程於儒生哉？

御史之遇文書，不失分銖，有司之陳簋豆，不謬行伍。其巧習者，亦先學之，人不貴者也。小賤之能，非尊大之職也。無經藝之本，有筆墨之末，大道未足，而小伎過多，雖曰吾多學問，御史之知，有司之惠也。飯黍梁者饜，殮糟糠者飽，雖俱曰食，爲腴不同。儒生文吏，學俱稱習，其於朝廷，有益不鈞。鄭子皮使尹何爲政，子產比於未能操刀，使之割也。子路使子羔爲費宰，孔子曰：『賊夫人之子。』皆以未學，不見大道也。醫無方術，云：『吾能治病。』問之曰：『何用治病？』曰：『用心意。』病者必不信也。吏無經學，曰：『吾能治民。』問之曰：『何用治民？』曰：『以材能。』是醫無方術，以心意治病，曰百姓安肯信嚮，而人君任用使之乎？手中無錢之市，使貨主問曰：『錢何在？』對曰：『無錢。』貨主必不與也。夫胸中不學，猶手中無錢也，欲人君任使之，百姓信嚮之，奈何也？

謝短篇

程材量知，言儒生文吏之材，不能相過，以儒生爲大遠，以文吏曉簿書，道勝於事，故謂儒生頗愈文吏也。此疏

業外相程相量也。其內各有所以爲短，未嘗謝也。夫儒生能誦一經，自謂通大道，以駢文吏，文吏曉簿書，自謂文無害，以戲儒生。各持端而自藏，非彼而是我，不知所爲短，不悟於己未足。翰衡訓之，將使憤然各知所之。夫儒生所短，不徒以不曉簿書，文吏所劣，不徒以不通大道也。反以閉闇不覺古今，不能各自知其所業之事，未具足也。二家各短，不能自知也。世之論者而亦不能訓之，如何？夫儒生之業五經也，南面爲師，旦夕講授章句，滑習義理，究備於五經可也。五經之後，秦漢之事，無不能知者，短也。夫知古不知今，謂之陸沉；然則儒生所謂陸沉者也。五經之前，至於天地始開，帝王初立者，主名爲誰，儒生又不知也。夫知今不知古，謂之盲瞽。五經比於上古，猶爲今也。徒能說經，不曉上古，然則儒生所謂盲瞽者也。

儒生猶曰：『上古久遠，其事闇昧，故經不載而師不說也。』夫三王之事雖近矣，經雖不載，義所逮及，五經所嘗共知，儒生所嘗審說也。夏自禹禪國幾載而至於殷，殷自湯幾祀而至於周，周自文王幾年而至於秦，桀亡夏而紂棄殷，滅周者何王也？周檜爲遠，秦則漢之所伐也。夏始於禹，殷本於湯，周祖后稷，秦初爲人者誰？秦燔五經坑殺儒士，五經之家所共聞也。秦何起而燔五經？何惑而坑儒生？秦則前代也，漢國自儒生之家也，從高祖至今，朝幾世？歷年迄今幾載？初受何命？復獲何瑞？得天下難易，孰與殷周？家人子弟，學問歷幾歲？人問之曰：『居宅幾年？祖先何爲？』不能知者，愚子弟也。然則儒生不能知漢事，世之愚蔽人也。

溫故知新，可以爲師。古今不知，稱師如何？彼人問曰：『二尺四寸，聖人文語，朝夕講習，義類所及，故可務知。漢事未載於經，名爲尺籍短書，比於小道，其能知，非儒者之貴也。儒不能都曉古今，欲各別說其經，經義義類，乃以不知爲貴也。事不曉，不以爲短，請復別問儒生。各以其經旦夕之所講說，先問易家。易本何所起，造作之者爲誰？彼將應曰：『伏羲作八卦，文王演爲六十四，孔子作彖象繫辭。三聖重業，易乃具足。』問之曰：『易有三家，一曰連山，二曰歸藏，三曰周易。伏羲所作，文王所造，連山平，歸藏周易也。秦燔五經，易何以得脫？漢興幾年而復立？宣帝之時，河內女子墮老屋，得易一篇，名爲何易？此時易具足未？』問尚書家曰：『今旦夕所授，二十九篇奇，有百二

篇，又有百篇，二十九篇何所起，百二篇何所造，秦焚諸書之時，尙書諸篇皆何在，漢興始錄尙書者，何帝初受學者何人？問禮家曰：『前孔子時，周已制禮，殷禮夏禮，凡三王因時損益，篇有多少，文有增減，不知今禮周乎？殷夏也？』彼必以漢承周，將曰：『周禮。』夫周禮六典，又大轉，六六三十六，三百六十，是以周官三百六十也。案今禮不見六典，無三百六十官，又不見天子。天子禮廢何時，豈秦滅之哉？宣帝時，河內女子壞老屋，得佚禮一篇，六十篇中是何篇是者？高祖詔叔孫通，制作儀品六十篇何在，而復定儀禮，見在十六篇，秦火之餘也。更秦之時，篇凡有幾？

問詩家曰：『詩作何帝王時也？』彼將曰：『周衰而詩作。』蓋康王時也。康王德缺於房，大臣刺晏故詩作。夫文武之隆，貴在成康，康王未衰，詩安得作，周非一王，何知其康王也？二王之末皆衰，夏殷衰時，詩何不作，尙書曰：『詩言志，歌詠言。』此時已有詩也。斷取周以來，而謂興於周，古者采詩，詩有文也。今詩無書，何知非秦燬五經，詩獨無餘禮也？問春秋家曰：『孔子作春秋，周何王時也？』自衛反魯，然後樂正，春秋作矣。自衛反魯，哀公時也，自衛何君也？俟孔子以何禮，而孔子反魯作春秋乎？孔子錄史記以作春秋，史記本名春秋乎？制作以爲經，乃歸春秋也。

法律之家亦爲儒生問曰：『九章，誰所作也？』彼聞臯陶作獄，必將曰：『臯陶也。』詰曰：『臯陶，唐虞時，唐虞之刑五刑，案今律無五刑之文。』或曰：『蕭何也。』詰曰：『蕭何，高祖時也。文孝之時，齊太倉令淳于德有罪，徵詣長安，其女緹縈爲父上書，言肉刑一施，不得改悔，文帝痛其言，乃改肉刑，案今九章象刑，非肉刑也。文帝在蕭何後，知時肉刑也。蕭何所造，反具肉刑也。而云：『九章蕭何所造乎？』古禮三百，威儀三千，刑亦正刑三百，科條三千，出於禮，入於刑，禮之所去，刑之所取，故其多少，同一數也。今禮經十六，蕭何律有九章，不相應。又何五經題篇，皆以事義別之，至禮與律獨經也，題之禮言經禮，律言盜律何？

夫總問儒生以古今之義，儒生不能知，別名以其經事問之，又不能曉，斯則坐守，何言師法，不煩博覽之咎也。

文吏自謂知官事，鴻篇書問之曰：『曉知其事，當能究達其義，通見其意否？』文吏必將惘然，問之曰：『古者封侯，各專國土，今置太守令長，何義？』古人井田，民爲公家耕，今量租錫，何意？一業使民居更一月，何據？年二十三，儒十五賦七，歲頭錢二十三，何緣？有騰何帝王時？門戶井竈何立？社稷先農靈星何祠？歲終逐疫何驅？使立桃象人於門戶，何旨？挂盧索於戶上，畫虎於門闕，何故？除牆壁書畫厭火丈夫，何見？步之大尺，冠之六寸，何應？有尉史令史，無承長史，何制？兩郡移書曰敢告卒人，兩縣不言，何解？郡言事二府曰敢言之，司空曰上，何狀？賜民爵八級，何法？名曰簪褭上造，何謂？吏上功曰伐閭，名籍墨將，何指？七十賜玉杖，何起？著鳩於杖末，不著爵，何杖？苟以鳩爲簪，不賜鳩而讀鳩杖而不爵，何說？日分六十漏之盡，自鼓之致五，何故？吏衣黑衣，宮闕赤單，何懷？服革於腰，佩刀於右，舞劍於左，何人？備著鉤於履，冠在於首，何象？吏居城廓，出乘車馬，坐治文書，起城郭，何王？造車與何工？生馬何地？作書何人？王造城廓，及馬所生，難知也，遠也；造車作書，易曉也，必將應曰：『倉頡作書，奚仲作車。』詰曰：『倉頡何感而作書，奚仲何起而作車？』又不知也。文吏所當知，然而不知，亦不博覽之過也。夫儒生不覽古今，何知一永不過守信經文，滑習章句，解剝互錯，分明乖異，文吏不曉吏道，所能不過案獄考事，移書下記，對卿便給之准，无一闕備，皆淺略不及，偏駁不純，俱有關道，何以相言？

效力篇

程材量知之篇，徒言知學，未言才力也。人有知學，則有力矣。文吏以理事爲力，而儒生以學問爲力。或問揚子雲曰：『力能扛鼎揭華旗，知德亦有之乎？』答曰：『百人矣。』夫知德百事者，與彼扛鼎揭華旗者，爲料敵也。夫壯士力多者，扛鼎揭旗，儒生力多者，博達疎通。故博達疎通，儒生之力也；舉重拔堅，壯士之力也。梓材曰：『強人有王闔閭，厥率化民。』此言賢人亦壯強於禮義，故能開闔閭，其率化民。化民須禮義，禮義須文章，行有餘力，則以學文。能學文，有力之驗也。問曰：『說一經之儒，可謂有力者？』曰：『此有力者也。』陳留龐少都，每薦諸生

之吏常曰：『王甲某子，才能百人。』太守非其能，不答。少都更曰：『言之尙少。王甲某子，才能百萬人。』太守怒曰：『親吏妄言。』少都曰：『文吏不通一經一文，不調師一言，諸生能說百萬章句，非才知百萬人乎？』太守無以應。夫少都之言實也，然猶未也。何則？諸生能傳百萬言，不能覽古今，守信師法，雖辭說多，終不爲博。殷周以前，頗載大經，儒生所不能說也。秦漢之事，儒生不見，力劣不能覽也。周監二代，漢監周秦。周秦以來，儒生不知，漢欲觀載，儒生無力，使儒生博觀覽，則爲文儒。文儒者，力多於儒生，如少都之言，文儒才能千萬人矣。曾子曰：『士不可以不弘毅，任重而道遠。仁以爲己任，不亦重乎？死而後已，不亦遠乎？』由此言之，儒者所懷，獨已重矣。志所欲至，獨已遠矣。身載重任，至於終死，不倦不衰，力獨多矣。夫曾子載於仁，而儒生載於學，所載不同，輕重均也。

夫一石之重，一人舉之，十石以上，二人不能舉也。世多舉一石之任，算有十石之力。儒生所載，非徒十石之重也。地力盛者，草木暢茂，一畝之收，當中田五畝之分。苗田人知出穀多者，地力盛，不知出文多者，才知茂，失事理之實矣。夫文儒之力，過於儒生，况文吏乎？能舉賢薦士，世謂之多力也。然能舉賢薦士，上書日記也。能上書日記者，文儒也。文儒非必諸生也。賢達用文則是矣。谷子雲：『唐子高，章奏百上，筆有餘力，極言不諱，文不折乏，非夫才知之人，不能爲也。』孔子：『周世多力之人也。』作春秋，刪五經，秘書微文，無所不足。山大者雲多，泰山不崇朝，辦雨雨天下。夫然，則賢者有雲雨之知，故（一有「曰」字）其吐文萬牒以上，可謂多力矣。

世稱力者，常褒烏獲。然則董仲舒揚子雲，文之烏獲也。秦武王與孟說舉鼎，不任，絕脈而死。少文之人，與董仲舒等，滿胸中之思，必將不任，有絕脈之變。王莽之時，省五經章句，皆爲二十萬。博士弟子郭路，夜定舊說，死於燭下，精思不任，絕脈氣滅也。顏氏之子，已曾馳過孔子於塗矣，劣倦罷極，髮白齒落，夫以庶幾之材，猶有仆頓之禍。孔子力優，顏淵不任也。才力不相如，則其知思不相及也。勉自什伯，兩中嘔血，失魂狂亂，遂至氣絕，書五行之臚，書十奏之記，其才劣者，筆墨之力尤難。况乃連句結章，篇至十百載，力獨多矣。

江河之水，馳涌滑澗，席地長遠，無枯竭之流，本源盛矣。知江河之流遠，地中之源盛，不知萬牒之人，胸中之才

茂（一有「無」字）迷惑者也。故望見驢足，不異於衆馬之蹄；驢乎陸而馳騁，千里之速，斯須可見。夫馬足人手，同一實也；稱驢之足，不薦文人之手，不知類也。夫能論勛力以見比類者，則能取文力之人，立之朝廷，故夫文力之人，助有力之將，乃能以力爲功，有方無助，以力爲稱。何以驗之？長巨之物，強力之人，乃能舉之；重任之車，強力之牛，乃能載之。是任車上阪，強牛引前，力人推後，乃能升踰。如牛羸人罷，任車退卻，還墮坑谷，有破覆之敗矣。文儒懷先王之道，含百家之言，其難推引，非徒任車之重也。薦致之者，罷羸無力，遂卻退墮於巖穴矣。

河發崑崙，江起岷山，水力盛多，滂沛不流，浸下益盛，不得廣岸低地，不能通流入乎東海。如岸狹地仰，溝壑決決，散在丘墟矣。文儒之知，有似於此。文章滂沛，不遵有力之將，援引薦舉，亦將棄遺於衡門之下，固安得升涉聖主之庭，論說政事之務乎？火之光也，不舉不明。有人於斯，其知如京，其德如山，力重不能自稱，須人乃舉，而莫之助，抱其盛高之力，竄於閭巷之深，何時得達？夏育，古之多力者，身能負荷千鈞，手能決角伸鉤，使之自舉，不能離地。智能滿胸之人，宜在王闕，須三寸之舌，一尺之筆，然後自動，不能自進，進之又不能自安，須人能動，待人能安，道重知大，位地難適也。

小石附於山，山力能得持之。在沙丘之間，小石輕微，亦能自安。至於大石，沙土不覆，山不能持；處危峭之際，則必崩墜於坑谷之間矣。大智之重，遭小才之將，無左右沙土之助，雖在顯位，將不能持，則有大石崩墜之難也。或伐薪於山，輕小之木，合能束之。至於大木，十圍以上，引之不能動，推之不能移，則委之於山林，收所束之小木而歸。由斯以論，知能之大者，其猶十圍以上木也；人力不能舉薦，其猶薪者不能推引大木也。孔子周流，無所留止，非聖才不明，道大難行，人不能用也。故夫孔子，山中巨木之類也。

桓公九合諸侯，一匡天下，管仲之力。管仲有力，桓公能舉之，可謂壯強矣。吳不能用子胥，楚不能用屈原，二子力重，兩主不能舉也。舉物不勝，委地而去可也。時或恚怒，斧斲破敗，此則子胥屈原所取害也。鼎中之魚，遞相吞食，度口所能容，然後噉之，口不能受，哽咽不能下，故夫商鞅三諫，孝公後說者用，前二難用，後一易行也。觀管仲

之明，法察商鞅之耕戰，固非弱劣之主所能用也。

六國之時，賢才之臣，入楚，楚重，出齊，齊輕，爲趙，趙完，魏，魏傷。韓用申，申不害，行其三符，兵不侵境，蓋十五年，不能用之，又不察其書，兵挫革破，國并於秦。殷，周之世，亂跡相屬，亡禍比肩，豈其心不欲爲治乎？力弱智劣，不能納至言也。是故趙重，一人之跡，不能蹈也；魏大，一人之掌，不能推也。賢臣有勁強之優，愚主有不堪之劣，以此相求，禽魚相與遊也。干將之刃，人不推頓，荑，韞不能傷；篠，簞之箭，機不能動發，魯，縞不能穿，非無干將，篠，簞之才也。無推頓發動之主，荑，韞，篠，簞不穿傷，篠，簞之功乎？故引弓之力，不能引強弩，弩力五石，引以三石，勛絕骨折，不能舉也。故力不任強引，則有變惡折脊之禍；知不能用賢，則有傷德毀名之敗。論事者不曰才大，道重，上不能用，而曰不肯不能自達。自達者，帶絕不抗，自銜者，賈賤不辭。案諸爲人用之物，須人用之，功力乃立。

鑿所以入木者，槌叩之也；鋪所以能擻地者，跣蹈之也。諸有鋒刃之器，所以能斷斬割削者，手能把持之也；力能推引之也。韓，信去楚，入漢，項，羽不能安，高，祖能持之也。能用其善，能安其身，則能量其力，能別其功矣。樊，鄴有攻城野戰之功，高，祖行封，先及蕭，何，則比蕭，何於獵犬也。夫蕭，何安坐，樊，鄴馳走，封不及馳走而先安坐者，蕭，何以知爲功，而樊，鄴以力爲功也。蕭，何所以能使樊，鄴者，以入秦，收斂文書也。衆將拾金，何獨擐書，坐知秦之形勢，是以能圖其利害，衆將馳走者，何驅之也。故叔，孫通定儀，而高，祖以尊，蕭，何造律，而漢，室以甯。案儀律之功，重於野戰，斬首之力，不及尊主。故夫鑿草殖穀，農夫之力也；勇猛戰功，士卒之力也；構架斷削，工匠之力也；治書定簿，佐史之力也；論道議政，賢儒之力也。人生莫不有力，所以爲力者，或尊或卑。孔，子能舉北門之關，不以力自章，知夫勛骨之力，不如仁義之力榮也。

別通篇

富人之宅，以一丈之地爲內，內中所有押匱，所贏縻布絲帛也。貧人之宅，亦以一丈爲內，內中空虛，徒四壁立，

故名曰貧。通人猶富人，不通者猶貧人也。俱以七尺爲形，通人胸中懷百家之言，不通者空腹無一牒之誦，貧人之內，徒四所壁立也。慕料貧富不相如，則夫通與不通不相及也。世人慕富不榮通，羞貧不賤不賢，不推類以況之也。夫富人可慕者，貨財多則饒裕，故人慕之。夫富人不如儒生，儒生不如通人。通人積文，十篋以上，聖人之言，賢者之語，上自黃帝，下至秦漢，治國肥家之術，刺世譏俗之言，備矣。使人通明博見，其爲可榮，非徒繒布絲帛也。蕭何入秦，收拾文書，漢所以能制九州者，文書之力也。以文書御天下，天下之富，孰與家人之財。

人目不見青黃曰盲，耳不聞宮商曰聾，鼻不知香臭曰癡，癡聾與盲，不成人者也。人不博覽者，不聞古今，不見事類，不知然否，猶目盲耳聾鼻癡者也。儒生不覽，猶爲閉闇；況庸人無篇章之業，不知是非，其爲閉闇甚矣。此則土木之人，耳目俱足，無聞見也。涉淺水者見蝦，其頗深者察魚鼈，其尤甚者觀蛟龍，足行跡殊，故所見之物異也。入道淺深，其猶此也。淺者則見傳記譜文，深者入聖室觀祕書，故入道彌深，所見彌大。人之遊也，必欲入都，都多奇觀也；入都必欲見市，市多異貨也。百家之言，古今行事，其爲奇異，非徒都邑大市也。遊於都邑者，心厭觀於大市者，意飽，況遊於道藝之際哉。

大川旱不枯者，多所疏也。漢好兼日不雨，泥輒見者，無所通也。是故大川相間，小川相屬，東流歸海，故海大也。海不通於百川，安得巨大之名？夫人含百家之言，猶海懷百川之流也；不謂之大者，是謂海小於百川也。夫海大於百川也，人皆知之；通者明於不通，莫之能別也。潤下作鹹，水之滋味也；東海水鹹，流廣大也；西川鹹，井源泉深也。人或無井而食，或穿井不得泉，有鹽井之利乎？不與賢聖通業，望有高世之名，難哉！法令之家，不見行事，譏罪不可審；章句之生，不覽古今，論事不實，或以說一經爲是，何須博覽？夫孔子之門，講習五經，五經皆習，庶幾之才也。

顏淵曰：『博我以文。』才智高者，能爲博矣。顏淵之曰博者，豈徒一經哉？我不能博五經，又不能博衆事，守信一學，不好廣觀，無溫故知新之明，而有守愚不覺之闇，其謂一經是者，其寔也。開戶內日之光，日光不能照幽，鑿

牕啓牖，以助戶明也。夫一經之說，猶日明也；助以傳言，猶牕牖也。百家之言，令人曉明，非徒牕牖之開，日光之照也。是故日光照室內，道術明胸中，開戶內光，坐高堂之上，盼升樓臺，窺四鄰之廷，人之所願也。閉戶幽坐，向冥冥之內，穿墻穴臥，造黃泉之際，人之所惡也。夫閉戶塞意，不高瞻覽者，死人之徒也哉！

孝武皇帝時，燕王旦在明光宮，欲入所臥戶，三百蓋閉，使侍者二十人開戶，戶不開。其後旦坐謀反自殺。夫戶閉，燕王旦死之狀也。死者凶事也，故以閉塞爲占。齊廢封不通，六國大夫會而賦詩，廢封不曉，其後果有楚靈之禍也。夫不開通於學者，尸尙能行者也。亡國之社，屋其上柴其下者，示絕於天地。春秋，薄社，周以爲戒。夫經藝傳書，人當覽之，猶社當通氣於天地也。故人之不通覽者，薄社之類也。是故氣不通者，強壯之人死，榮華之物枯。

東海之中，可食之物，集糴非一，以其大也。夫水精氣滯盛，故其生物也，衆多奇異。故夫大人之胸懷非一，才高知大，故其於道術，無所不包；學士同門，高業之生，衆共宗之。何則？知經指深，曉師言多也。夫古今之事，百家之言，其爲深多也，豈徒師門高業之生哉？甘酒醴不酤，飴蜜未爲能知味也。耕夫多殖嘉穀，謂之上農夫，其少者謂之下農夫。學士之才，農夫之力，一也；能多種穀，謂之上農；能博學問，謂之上儒。是稱牛之服重，不譽馬速也。譽手毀足，孰謂之慧矣！

縣道不通於野，野路不達於邑，騎馬乘舟者，必不由也。故血脈不通，人以甚病。夫不通者，惡事也，故其禍變致不善。是故盜賊宿於穢草，邪心生於無道。無道者，無道術也。醫能治一病，謂之巧，能治百病，謂之良，是故良醫服百病之方，治百人之疾，大才懷百家之言，故能治百族之亂。扁鵲之衆方，孰若巧之一伎？子貢曰：『不得其門而入，不見宗廟之美，百官之富。』蓋以宗廟百官喻孔子道也。孔子道美，故譬以宗廟；衆多非一，故喻以百官。由此言之，道達廣博者，孔子之徒也。

殷周之地，極五千里，荒服要服，勤能牧之。漢氏廓土，牧萬里之外，要荒之地，晝夜博帶。夫德不優者，不能懷遠；才不大者，不能博見。故多言博識，無頂飾之譽，深於道術，無淺聞之毀也。人好觀圖畫者，圖上所畫，古之列人也。

見列人之面，孰與觀其言行？置之空壁，形容具存，人不激勸者，不見言行也。古賢之遺文，竹帛之所載，粲然，豈徒牆壁之畫哉？空氣在廚，金銀塗飾，其中無物，益於錢，人不顧也。肴膳甘醴，土釜之盛，入者鄉之，古賢文之美，豈可甘，非徒器中之物也？讀觀有益，非徒膳食有補也。故器空無寶，錢者不顧，胸虛無識，朝廷不御也。

劍伎之家，鬪戰必勝者，得曲城越女之學也。兩敵相遭，一巧一拙，其必勝者，有術之家也。孔墨之業，賢聖之書，非徒曲城越女之功也；成人之操，益人之知，非徒戰鬪必勝之策也。故劍伎之術，有必勝之名；賢聖之書，有必尊之聲。縣邑之吏，召諸治下，將相問以政化，曉慧之吏，陳所聞見，將相覺悟，得以政政右文。聖賢言行，竹帛所傳，練人之心，聽人之知，非徒縣邑之吏對向之語也。

禹益並治洪水，禹主治水，益主記異物，海外山表，無遠不至，以所聞見，作山海經，非禹益不能行遠，山海不造，然則山海之造，見物博也。董仲舒賸重常之鳥，劉子政曉貳負之尸，皆見山海經，故能立二事之說，使禹益行地不遠，不能作山海經。董劉不讀山海經，不能定二疑，實沉臺台，子產博物，故能言之；龍見絳郊，蔡墨曉占，故能禦之。父兄在千里之外，且死，遺教戒之書；子弟賢者，求索觀讀，服膺不舍，重先敬長，謹慎之（一有「力」字）也。不肖者，輕慢佚忽，無原察之意；古聖先賢，遺後人文字，其重，非徒父兄之書也；或觀讀采取，或棄捐不錄，二者之相高下也。行路之人，皆能論之，况辨照然否者，不能別之乎！

孔子病，商瞿卜期日中。孔子曰：「取書來，比至日中何事乎？」聖人之好學也，且死不休，念在經書，不以臨死之故，棄忘道藝。其爲百世之聖，師法祖修，蓋不虛矣。自孔子以下，至漢之際，有才能之稱者，非有飽食終日，無所用心也，不說五經，則讀書傳，書傳文大，難以備之。卜卦占射凶吉，皆文武之道，昔有商瞿，能占爻卦，未有東方朔、翼少君，能達占射覆，道雖小，亦聖人之術也。曾又不知人生稟五常之性，好道樂學，故辨於物。今則不然，飽食快飲，慮深求臥，腹爲飯坑，腸爲酒壘，是則物也。保蟲三百，人爲之長，天地之性，人爲貴，貴其識知也。今閉暗脂塞，無所好欲，與三百保蟲何以異，而謂之爲長而貴之乎！

諸夏之人，所以貴於夷狄者，以其通仁義之文，知古今之學也。如徒作其胸中之知，以取衣食，經歷年月，白首沒齒，終無曉知，夷狄之次也。觀夫蜘蛛之經絲，以罔飛蟲也；人之用作，安能過之？任胸中之知，舞權利之詐，以取富壽之樂，無古今之學，蜘蛛之類也。含血之蟲，無餓死之患，皆能以知求索飲食也；人不通者，亦能自供，仕宦爲吏，亦得高官。將相長吏，猶吾大夫高子也，安能別之？隨時積功，以命得官，不曉古今，以位爲賢，與文之異術，安得識別通人？俟以不次平，將相長吏不得，若有扶風、蔡伯喈、鬱林太守張孟嘗、東萊太守李季公之徒，心自通明，覽達古今，故其敬通人也，如見大賓。燕昭爲鄒衍擁簪，彼獨受何性哉？東成令董仲綬，知爲儒臬，海內稱通，故其接人，能別奇偉。是以鍾離產公，以編戶之民，受圭璧之敬，知之明也。故夫能知之也，凡石生光氣，不知之也，金玉無潤色。

自武帝以至今朝，數舉賢良，令人射策。甲乙之科，若董仲舒、唐子高、谷子雲、丁伯玉，策既中實，文說美善，博覽膏腴之所生也。使四者經徒，能摘筆徒能記疏，不見古今之書，安能建美善於聖王之庭乎？孝明之時，讀蘇武傳，見武名曰樓中監，以問百官，百官莫知。夫倉頡之章，小學之書，文字備具，至於無能對聖國之問者，是皆美命隨牒之人，多在官也。木旁多文，字且不能知，其欲及若董仲舒之知重常，劉子政之知貳負，難哉！

或曰：「通人之官，蘭臺令史，職校書定字，比夫太史太祝，職在文書，無典民之用，不可施設。是以蘭臺之史，班固賈逵楊終傳毅之徒，名香文美，委積不繼，大用於世。」曰：此不繼周世通覽之人。鄒衍之徒，孫卿之輩，受時王之寵，尊顯於世。董仲舒雖無鼎足之位，知在公卿之上。周監二代，漢監周秦，然則蘭臺之官，國所監得失也，以心知丸卵，爲體內藏，眸子如豆，爲身光明。令史雖微，典國道藏，通人所由進，滄博士之官，儒生所由興也。委積不繼，豈聖國微遇之哉？殆以書未定而職未畢也。

通書千篇以上，萬卷以下，弘揚雅言，審定文讀，而以教授爲人師者，通人也。稱其義者，損益其文句，而以上書、奏記，或與論立說，結連篇章者，文人鴻儒也。好學勤力，博聞強識，世間多有；著書表文，輪說古今，萬不耐一。然則著書表文，博通所能用之者也。入山見木，長短無所不知；入野見草，大小無所不識。然而不能伐木以作室屋，探草以和方藥，此知草木不能用也。夫通人覽見廣博，不能撥以論說，此爲醫生書主人。孔子所謂誦詩三百，授之以政不違者也；與彼草木不能伐採，一實也。孔子得史記以作春秋，及其立義創意，褒貶賞誅，不復因史記者，眇思自出於胸中也。凡貴通者，貴其能用之也，即徒誦讀，讀詩諷誦，雖千篇以上，鸚鵡能言之類也。衍傳書之意，出膏腴之辭，非做儻之才不能任也。夫通覽者世間比有，著文者歷世希然。近世劉子政、文子揚、子雲、桓、君山，其猶文武周公並出一時也，其餘宜有，往往而然。管、珠、玉不可多得，以其珍也。故夫能說一經者，儒生；博覽古今者，爲通人；采掇傳書以上書、奏記者，爲文人；能精思著文，連結篇章者，爲鴻儒。故儒生過俗人，通人勝儒生，文人踰通人，鴻儒超文人。故夫鴻儒，所爲超而又超者也。以超之奇，退與儒生相料，文軒之比於敝車，錦繡之方於縕袍也，其相過遠矣。如與俗人相料，太山之巔，墻長狄之項，不足以喻。故夫丘山，以土石爲體，其有銅鐵，山之奇也。銅鐵既奇，或出金玉，然鴻儒，世之金玉也，奇而又奇矣，奇而又奇，才相超乘，皆有品差。

儒生說名於儒門，過俗之遠也。或不能說一經，教誨後生，或帶徒聚衆，說論洞溢，稱爲經明；或不能成牘治一說，或不能陳得失，奏便宜，言應經傳，文如星月。其高第若谷子雲、唐子高者，說書於牘、奏之上，不能連結篇章，或抽列古今，紀著行事。若司馬子長、劉子政之徒，累牘篇第，文以萬數，其過子雲子高遠矣。然而因成紀前，無胸中之造。若夫陸賈、董仲舒，論說世事，由意而出，不假取於外，然而淺露易見，觀讀之者，猶曰傳記。陽成子長作樂經，揚子雲作太玄經，造於助思，極宵冥之深，非庶幾之才，不能成也。孔子作春秋，二子作兩經，所謂卓爾蹈孔子之跡，鴻茂參貳聖之才者也。

王公子問於桓君山，以揚子雲、君山對曰：『漢興以來，未有此人。』君山差才，可謂得高下之實矣。采玉者心

幾於玉，鑽龜者知神於龜。能參衆儒之才，累其高下，賢於所累；又作新論，論世間事，辨照然否，虛妄之言，僞飾之辭，莫不釐定。彼子長子雲，說論之徒，君山爲甲。自君山以來，皆爲鳩眇之才，故有嘉令之文。筆能著文，則心能謀論。文由胸中而出，心以文爲表。觀見其文，奇偉似儒，可謂得論也。由此言之，繁文之人，人之傑也。

有根株於下，有榮葉於上，有實核於內，有皮殼於外。文墨辭說，士之榮葉皮殼也。實誠在胸臆，文墨著竹帛，外內表裏，自相副稱，意奮而筆縱，故文見而實露也。人之有文也，猶禽之有毛也；毛有五色，皆生於體。苟有文無實，是則五色之禽，毛妄生也。選士以射，心平體正，執弓矢審固，然後射中。論說之出，猶弓矢之發也；論之應理，猶矢之中的。夫射以矢中效巧，論以文墨驗奇，奇巧俱發於心，其實一也。文有深指巨略，君臣治術，身不得行，口不能繼，表著情心，以明己之必能爲之也。孔子作春秋，以示王意。然則孔子之春秋，素王之業也；諸子之傳書，素相之事也。觀春秋以見王意，讀諸子以睹相指，故曰陳平割肉，丞相之端見；叔孫敖決期思，令尹之兆著。觀讀傳書之文，治道政務，非徒割肉決水之占也。足不強，則跡不遠；鋒不鉅，則割不深。連結篇章，必大才智，鳩駘之俊也。

或曰：『著書之人，博覽多聞，學問習熟，則能推類與文。文由外而興，未必實才，學文相副也。且淺意於華葉之言，無根核之深，不見大道體要，故立功者希，安危之際，文人不與。無能建功之驗，徒能筆論之效也。』曰：此不然。周世著書之人，皆權謀之臣，漢世直言之士，皆通覽之吏，豈謂文非華葉之生，根核推之也？心思爲謀，集札爲文，情見於辭，意驗於言。商鞅相秦，致功於霸，作耕戰之書，虞卿爲趙，決計定說，行退作春秋之思，起城中之議，耕戰之書，秦堂上之計也。陸賈消呂氏之謀，與新語同一意，桓君山易龜錯之策，與新論共一思。觀谷水之陳說，唐林之宣言，劉向之切議，以知爲本，筆墨之文，將而送之；豈徒雕文飾辭，有爲華葉之言哉？精誠由中，故其文語感動人深。是故魯連飛書，燕將自殺，鄒陽上疏，梁孝開牢，書疏文義，奪於肝心，非徒博覽者所能造，習熟者所能爲也。夫鳩儒希有，而文人比然，將相長吏，安可不貴，豈徒用其才力，游文於牒牘哉？州郡有憂，能治章上奏，解理結煩，使州郡通事，有如唐子高谷子雲之吏，出身盡思，竭筆牘之力，煩憂適有不懈者哉。

古昔之遠四方辟區，文墨之士，難得記錄，且近自以會稽言之。周長生者，文士之雄也，在州爲刺史，任安舉，素在郡爲太守，孟觀上書，事解憂除，州郡無事，二將以全，長生之身不辱，顯非其才知少功力薄也；二將懷俗人之節，不能貴也，使遭前世燕昭，則長生已蒙鄒衍之寵矣。長生死後，州郡遭憂，無舉奏之吏，以故事結不解，徵詣相屬，文軌不尋，筆疏不讀也。豈無愛上之吏哉？乃其中文筆不足類也。長生之才，非徒銳於牒牘也，作洞屋十篇，上自黃帝，下至漢朝，鋒芒毛髮之事，莫不記載，與太史公表紀相似類也。上通下達，故曰洞屋，然則長生非徒文人，所謂鴻儒者也。前世有嚴夫子，後有吳君商，未有周長生。

白雉貢於越，賜草獻於宛，雍州出玉，荆揚生金，珍物產於四遠，幽遠之地，未可言無奇人也。孔子曰：『文王既沒，文不在茲乎？』文王之文在孔子，孔子之文在仲舒，仲舒既死，豈在長生之徒與？何言之卓殊，文之美麗也。唐勒宋玉，亦楚文人也，竹帛不紀者，屈原在其上也。會稽文才，豈獨周長生哉？所以未論列者，長生尤踰出也。九州多山，而華岱爲嶽，四方多川，而江河爲瀆者，華岱高而江河大也。長生，州郡高大者也，同姓之伯賢，舍而譽他族之孟，未爲得也。長生說文辭之伯，文人之所共宗，獨紀錄之，春秋紀元於魯之義也。

俗好高古而稱所聞，前人之業，菓果甘甜，後人新造，蜜酪辛苦。長生家在會稽，生在今世，文意雖奇，論者猶謂釋於前人。天稟元氣，人受元精，豈爲古今者差殺哉？優者爲高，明者爲上，實事之人見然否之分者，睹非卻前，退置於後，見是推今，進置於古，心明知昭，不惑於俗也。班叔皮續太史公書，百篇以上，記事詳悉，義淺理備，觀讀之者以爲甲，而太史公乙。子男孟堅爲尚書郎，文比叔皮，非徒五百里也，乃夫周召魯衛之謂也。苟可高古，而班氏父子不足紀也。周有郁郁之文者，在百世之末也。漢在百世之後，文論辭說，安得不茂？喻大以小，推民家事，以睹王庭之義。虛宅始成，桑麻纔有，居之歷歲，子孫相續，桃李梅杏，菴丘蔽野，根莖菓多，則華葉繁茂，漢氏治定久矣，土廣民衆，義與事起，華葉之言，安得不繁？夫華與實俱成者也，無華生實，物希有之。

山之禿也，孰其茂也？地之瀉也，孰其滋也？文章之人，滋茂漢朝者，乃夫漢家熾盛之瑞也。天晏列宿煥炳，陰雨

日月蔽匿。方今文人並出見者，乃夫漢朝明之驗也。高祖讀陸賈之書，歎稱萬歲；徐樂主父偃上疏，徵拜郎中。方今未聞。膽無苦酸之肴，口所不甘味，手不舉以啖人。詔書每下，文義經傳四科，詔書斐然，郁郁好文之明驗也。上書不實核，著書無義指，萬歲之聲，徵拜之恩，何從發哉？飾面者皆欲爲好，而導目者希；文音者皆欲爲悲，而驚耳者寡。陸賈之書未奏，徐樂主父之策未聞。事諸瞽言之徒，言事羸醜，文不美潤，不指所謂，文辭怪滑，不被薄沙之謫，幸矣！焉蒙徵拜爲郎中之寵乎？

狀留篇

論賢儒之才，既超程矣。世人怪其仕宦不進，官爵卑細，以賢才退在俗吏之後，信不怪也。夫如是，而適足以見賢不肖之分，賄高下多少之實也。龜生三百歲，大如錢，游於蓮葉之上，三千歲青邊緣，巨尺二寸，蒼生七十歲生一莖，七百歲生十莖，神靈之物也。故生遲留，歷歲長久，故能明審實。賢儒之在世也，猶靈著神龜也。計學問之日，固已盡年之半矣，銳意於道，遂無貪進之心，及其仕也，純特方正，無員銳之操，故世人遲取，進難也。針錐所穿，無不暢達，使針錐末方，穿物無一分之深矣。賢儒方節而行，無針錐之銳，固安能自穿，取暢達之功乎？

且驥一日行千里者，無所服也。使服任車輿，騫馬同音，驥曾以引鹽車矣，垂頭落汗，行不能進。伯樂顧之，王良御之，空身輕馳，故有千里之名。今賢儒懷古今之學，負荷禮義之重，內累於胸中之知，外劬於禮義之操，不敢忘進苟取，故有稽留之難，無伯樂之友，不遭王良之將，安得馳於清明之帝，立千里之迹乎？

且夫含血氣物之生也，行則背在上而腹在下，其病若死，則背在下而腹在上。何則？背肉厚而重，腹肉薄而輕也。賢儒俗吏，並在當世，有似於此。將明遠行，則俗吏載賢儒，賢儒乘俗吏，將闢道廢，則俗吏乘賢儒，賢儒處下位，猶物遇害，腹在上而背在下也。且背法天而腹法地，生行得其正，故腹背得其位；病死失其宜，故腹反而在背上，非唯腹也，凡物仆僵者，足又在上。賢儒不退，仆廢於世，累足之吏，皆在其上。東方朔曰：「目不在面而在於足，

教昧不給，能何見乎？」汲黯謂武帝曰：「陛下用吏如積薪矣，後來者居上！」原汲黯之言，察東方朔之語，獨以非俗吏之得地，賢儒之失職哉？故夫仕宦，失地難以觀德，得地難以察不肖；名生於高官，而毀起於卑位。卑位，固常賢儒之所在也；邊禮蹈繩，修身守節，在下不汲汲，故有沈滯之留。沈滯在能自濟，故有不拔之扼。其積學於身也多，故用心也固；俗吏無以自修，身雖拔進，利心搖動，則有下道侵漁之操矣。

楓桐之樹，生而速長，故其皮肌不能堅剛。樹檀以五月生葉，後彼春榮之木，其材強勁，車以爲軸，殷之桑穀，七日大拱長，速大暴，故爲變怪。大器晚成，寶貨難售也。不崇一朝，輒成賈者，榮果之物也。是故湍瀨之流，沙石轉而大石不移，何者？大石重而沙石輕也。沙石轉積於大石之上，大石沒而不見。賢儒俗吏，並在世俗，有似於此。遇閹長吏，轉移俗吏，超在賢儒之上；賢儒處下，受馳走之使；至或巖后穴處，沒身不見，咎在長吏不知賢，而賢者道大力劣，不能拔舉之故也。

夫手指之物器也，度力不能舉，則不敢動。賢儒之道，非徒物器之重也，是故金鐵在地，焱風不能動；毛芥在其間，飛揚千里。夫賢儒所懷，其猶水中大石，在地金鐵也；其進不若俗吏速者，長吏力劣，不能用也。毛芥在鐵石間也，一口之氣，能吹毛芥，非必焱風。俗吏之易遷，猶毛芥之易吹也。故夫轉沙石者，湍瀨也；飛毛芥者，焱風也。活水洋風，毛芥不動。無道理之將，用心暴狠，察吏不詳，遭以好遷，妄授官爵，猛水之轉沙石，焱風之飛毛芥也。是故毛芥因異風而飛，沙石遭猛流而轉，俗吏遇悖將而遷。

且圓物投之於地，東西南北，無之不可；策杖叩動，纔輒輟。方物集地，壹投而止，及其移徙，須人動舉。賢儒，世之方物也，其難轉移者，其動須人也。鳥輕便於人，趨遠人不如鳥；然而天地之性，人爲貴。蝗蟲之飛，能至萬里；麒麟須獻，乃達闕下。然而蝗蟲爲災，麒麟爲瑞，麟有四足，尙不能自致；人有兩足，安能自達？故曰：鸞飛輕於鳳凰，兔走疾於麒麟，鼃蹠蹠於蟄蟲，地騰便於神龍。呂望之徒，白首乃顯；百里奚之成，明於黃髮；深爲國謀，因爲王輔，皆失沉重難進之人也。輕躁早成，禍害暴疾，故曰：其進銳者退速。陽溫陰寒，歷月乃至；災變之氣，一朝成怪。故夫河

冰結合，非一日之寒；積土成山，非斯須之作。千將之劍，久在鑠炭；銛鋒利刃，百熟煉厲，久銷乃見。作留成遲，故能割斷。肉暴長者曰腫，泉暴出者曰涌，酒暴熟者易酸，醴暴酸者易臭。由此言之，賢儒遲留，皆有狀故。狀故云，何事多道重，爲身累也。

草木之生者濕，濕者重，死者枯，枯而輕者易舉，濕而重者難移也。然（一有「能」字）元氣所在，在生不在枯。是故車行於陸，船行於溝，其備而重者行遲，空而輕者行疾。先王之道，載在胸腹之內，其重不徒船車之任也。任重，其取進疾速難矣。竊人之物，其得非不速疾也，然而非其有得之，非己之力也。世人早得高官，非不有光榮也，而尸祿素餐之謗，諠譁甚矣。且賢儒之不進，將相長吏不開通也；農夫載穀奔都，賈人齎貨赴遠，皆欲得其願也。如門郭閉而不通，津梁絕而不過，雖有勉力趨時之勢，奚由早至以得盈利哉？長吏妬賢，不能容管，不被鉗齧之刑，幸矣；焉敢望官位升舉，道理之早成也。

寒 溫篇

說寒溫者曰：『人君喜則溫，怒則寒。』何則？喜怒發於胸中，然後行出於外，外成賞罰。賞罰，喜怒之效，故寒溫渥盛，凋物傷人。夫寒溫之代至也，在數日之間，人君未必有喜怒之氣發胸中，然後渥盛於外；見外寒溫，則知胸中之氣也。嘗人君喜怒之時，胸中之氣，未必更寒溫也。胸中之氣，何以異於境內之氣？胸中之氣，不爲喜怒變；境內寒溫，何所生起？六國之時，秦漢之際，諸侯相伐，兵革滿道，國有相攻之怒，將有相勝之志，夫有相殺之氣，當時天下未必常寒也。太平之世，唐虞之時，政得民安，人君常喜，絃歌鼓舞，比屋而有，當時天下未必常溫也。豈喜怒之氣，爲小發不爲大動邪？何其不與行事相中得也？

夫近水則寒，近火則溫，遠之漸微。何則？氣之所加，遠近有差也。成事，火位在南，水位在北；北邊則寒，南極則熱。火之在鑪，水之在溝，氣之在樞，其實一也。嘗人君喜怒之時，寒溫之氣，閨門宜甚，境外宜微。今寒溫，外內均等。

殆非人君喜怒之所致；世儒說稱妄處之也。王者之變在天下，諸侯之變在境內，卿大夫之變在其它，庶人之變在其家。夫家人之能致變，則喜怒亦能致氣。父子相怒，夫妻相督，若當怒反喜，縱過飾非，一室之中宜有寒溫，由此言之，變非喜怒所生明矣。

或曰：『以類相招致也。喜者和溫，和溫賞賜，賜道施予，陽寒溫，故溫氣應之。怒者慍恚，慍恚誅殺，陰道肅殺，陰氣寒，故寒氣應之。虎嘯而谷風至，龍興而景雲起，同氣共類，動相招致，故曰以形逐影，以龍致雨，雨應龍而來，影應形而去。天地之性，自然之道也。秋冬斷刑，小獄微原，大辟盛寒，寒隨刑至，相招審矣。』夫比寒溫於風雲，齊喜怒於龍虎，同氣共類，動相招致，可矣。虎嘯之時，風從谷中起；龍興之時，雲起百里內。他谷異境，無有風雲。今寒溫之變，並時皆然，百里用刑，千里皆寒，殆非其驗。齊魯接壤，賞罰同時，設齊賞魯罰，所制宜殊，當時可齊國溫魯地寒乎？

案前世用刑者，豈尤亡秦甚矣。蚩尤之民，廼廼紛紛；亡秦之路，赤衣比肩。嘗時天下未必常寒也。帝都之市，屠殺牛羊，日以百數。刑人殺牲，皆有賊心；帝都之市，氣不能寒。或曰：『人貴於物，唯人動氣。』夫用刑者，動氣乎？用受刑者，爲變也。如用刑者，刑人殺禽，同一心也；如用受刑者，人禽皆物也。俱爲萬物，百賤不能當一貴乎？或曰：『唯人君動氣，衆庶不能。』夫氣感必須人君，世何稱於鄉衍？鄉衍匹夫，一人感氣，世又然之。刑一人而氣輒寒，生一人而氣輒溫乎？赦令四下，萬刑並除，當時歲月之氣不溫。往年萬戶失火，煙燄參天，河決千里，四望無垠。火與溫氣同，水與寒氣類，失火河決之時，不寒不溫。然則寒溫之至，殆非政治所致。然而寒溫之至，禮與賞罰同時，變復之家，因緣名之矣。

春溫夏暑，秋涼冬寒，人君無事，四時自然。夫四時非政所爲，而謂寒溫獨應政治，正月之始，正月之後，立春之際，百刑皆斷，囹圄空虛，然而一寒一溫。嘗其寒也，何刑所斷？嘗其溫也，何賞所施？由此言之，寒溫天地節氣，非人所爲明矣。

人有寒溫之病，非操行之所及也。適風逢氣，身生寒溫；變操易行，寒溫不除。夫身近而猶不能變除其疾，國邑遠矣，安能調和其氣？人中之於寒，飲藥行解，所苦稍衰，轉爲溫疾，吞發汗之丸而應愈。燕有寒谷，不生五穀，鄒衍吹律，寒谷可種。燕人種黍其中，號曰黍谷。如審有之，寒溫之災，復以吹律之事，調和其氣，變政易行，何能滅除？是故寒溫之疾，非藥不愈，黍谷之氣，非律不調。堯遭洪水，使禹治之，寒溫與堯之洪水，同一實也。堯不變政易行，知夫洪水非政行所致；洪水非政行所致，亦知寒溫非政治所招。

或難曰：「洪範庶徵曰：『急恆寒若，舒恆燠若。』」若順，燠溫；恆常也。人君急則常寒，順之，舒則常溫，順之。寒溫應急舒，謂之非政如何？夫豈謂急不寒，舒不溫哉？人君急舒而寒溫遽至，偶適自然。若故相應，猶卜之得兆，筮之得數也。人謂天地應令問，其實適然。夫寒溫之應急舒，猶兆數之應令問也。外若相應，其實偶然。何以驗之？夫天道自然，自然無爲，二令參偶，遭適逢會；人事始作，天氣已有，故曰道也。使應政事是有非自然也。

易京氏布六十四卦於一歲中，六日七分一卦用事。卦有陰陽，氣有升降，陽升則溫，陰升則寒。由此言之，寒溫隨卦而至，不應政治也。案易無妄之應，水旱之至，自有期節，百災萬變，殆同一曲。變復之家，疑且失實，何以爲疑？夫大人與天地合德，先天而天不違，後天而奉天時。洪範曰：「急恆寒若，舒恆燠若。」如洪範之言，天氣隨人易徙，當先天而天不違耳，何故復言後天而奉天時乎？後者，天已寒溫於前，而人賞罰於後也。由此言之，人言與尚書不合，一疑也。京氏占寒溫以陰陽升降，變復之家以刑罰喜怒，兩家乖迹，二疑也。民間寒若溫，今日寒而明日溫，朝有繁霜，夕有列光，且雨氣溫，且暘氣寒。夫兩者陰，暘者陽也，寒者陰而溫者陽也。兩旦暘反寒，暘旦雨反溫，不以類相應，三疑也。三疑不定，自然之說，亦未立也。

謹告篇

輪災異，謂古之人言爲政失道，天用災異譴告之也。災異非一，復以寒溫爲之救。人君用刑非時，則寒，施賞違

節則溫。天神譴告人君，猶人君責怒巨下也。故楚嚴王曰：『天不下災異，天其忘予乎！』災異爲譴告，故嚴王懼而思之也。曰：此疑也。夫國之有災異也，猶家人之有變怪也。有災異謂天譴人君，有變怪天復譴告家人乎？家人既明，人之身中，亦將可以喻。身中病，猶天有災異也。血脈不調，人生疾病，風寒不和，歲生災異。災異，謂天譴告國政；疾病，天復譴告人乎？釀酒於罌，烹肉於鼎，皆欲其氣味調得也。時或鹹苦酸淡不應口者，猶人勺藥，失其和也。夫政治之有災異者，猶烹釀之有惡味也。苟謂災異爲天譴告，是其烹釀之誤得見譴告也。占大以小，明物事之喻，足以審天。使嚴王知如孔子，則其言可信，袁世霸者之才，猶夫變復之家也，言未必信，故疑之。

夫天道自然也，無爲如譴告人，是有爲，非自然也。黃老之家，論說天道，得其實矣。且天審能譴告人君，宜變易其氣以覺悟之。用刑非時，刑氣寒而天宜爲溫；施賞違節，賞氣溫而天宜爲寒；變其政而易其氣，故君得以覺悟知是非。今乃隨寒從溫，爲寒爲溫以譴告之，意欲令變更之。且太王、宣父，以王季之可立，故易名爲履，履者，適也。太伯覺悟之，吳越探藥，以避王季，使太王不易季名，而復字之季。太伯豈覺悟以避之哉？今刑賞失法，天欲改易其政，宜爲異氣，若太王之易季名，今乃重爲同氣以譴告之，人君何時將能覺悟，以見刑賞之誤哉？

鼓琴者，誤於張弦設柱，宮商易聲。其師知之，易其弦而復移其柱。夫天之見刑賞之誤，猶瑟師之睹弦柱之非也；不更變氣以悟人君，反增其氣以溷其惡，則天無心意，苟隨人君爲誤，非也。紂爲長夜之飲，文王朝夕祀茲酒，齊奢於祀，晏子祭廟，豚不掩俎，何則？非疾之者，宜有以政易之也。子弟傲慢，父兄教以謹敬；吏民橫悖，長吏示以和順。是故康叔伯禽失子弟之道，見於周公，拜起屬悖，三見三咎。往見商子，商子令觀橋梓之樹；二子見橋梓，心感覺悟，以知父子之禮。周公可隨爲驕，商子可順爲慢，必須加之捶杖，教觀於物者，冀二人之見異，以各自覺悟也。夫人君之失政，猶二子失道也。天不告以政道，令其覺悟；若二子觀見橋梓，而顧譴刑賞之誤，爲寒溫之報，此則天與人君俱爲非也。無相覺悟之感，有相隨從之氣，非皇天之意，愛下譴告之宜也。

凡物能相割截者，必異性者也；能相奉成者，必同氣者也。是故離下兌上曰革，革更也。火金殊氣，故能相革；如

俱火而皆金，安能相成？屈原疾楚之羣矯，故稱香潔之辭。漁父議以不隨俗，故陳沐浴之言。凡相類者，或教之薰，或令之負豕。二言之於除羣矯也，孰是孰非？非有不易，少有以益。夫用寒溫非刑賞也，能易之乎？西門豹急，佩章以自寬，董安于緩，帶絃以自促。二賢知佩帶變色之物，而以攻身之短，夫至明矣。人君失政，不以他氣譴告變易，反隨其誤，就起其氣，此則皇天用意，不若二賢審也。

楚莊王好獵，樊姬爲之不食鳥獸之肉，秦穆公好淫樂，華陽后爲之不聽鄭衛之音。二姬非兩主，拂其欲而不順其行；皇天非賞罰，而順其操而溼其氣，此蓋皇天之德，不若婦人賢也。故諫之爲言間也，持善間惡，必謂之一亂。周繆王任刑，甫刑篇曰：『報虐用威，威虐皆惡也。用惡報惡，亂莫甚焉。今刑失當，寃惡也；天復爲惡以應之，此則皇天之操，與繆王同也。故以善駁惡，以惡懼善，告人之理，勸厲爲善之道也。』舜戒禹曰：『毋若丹朱傲。』周公勸成王曰：『毋若殷王紂。』毋者，禁之也。丹朱殷紂至惡，故曰『毋』以禁之。夫言毋若，孰與言必若哉？故毋必二辭，聖人審之。況青龍非爲非，順人之過，以增其惡哉？天人同道，大人與天合德，聖賢以善返惡，皇天以惡隨非，豈道同之效，合德之驗哉？

孝武皇帝好僂，司馬長卿獻大人賦，上乃僂僂（宜讀爲「飄飄」字）有凌雲之氣。孝成皇帝好廣宮室，揚子雲上甘泉頌，妙稱神怪，若曰非人力所能爲，鬼神之力乃可成。皇帝不覺，爲之不止。長卿之賦，如言仙無實效，子雲之頌，言奢有害。孝武豈有僂僂之氣者？孝成豈有不覺之惑哉？然則天之不爲他氣，以譴告人君，反順人心，以非應之，猶二子爲賦頌，令兩帝惑而不悟也。竇嬰灌夫疾時爲邪，相與目引繩以糾纏之，心疾之甚，安肯從其欲？太伯效吳冠帶，孰與隨從其俗，與之俱僂也？故吳之知禮義也，太伯改其俗也。蘇武入匈奴，終不左衽，趙他入南越，箕踞椎髻，漢朝稱蘇武而毀趙他之性，背越土氣，畔冠帶之制。陸賈說之，夏服雅禮，風告以義，趙他覺悟，還心嚮內。如陸賈復越服夷談，從其亂俗，安能令之覺悟，自變從漢制哉？

政教之相違，文質之相反，政失不相反，覆也。譴告人君，誤不變其失而變其非，欲行譴告之教，不從如何？管蔡

纂辟周公告教之，至於再三。其所以告教之者，豈云當纂辟哉！人道管管惡惡，施管以寬，加惡以罪，天道宜然。刑賞失實，惡也。爲惡氣以應之，惡惡之義，安所施哉！漢正首匿之罪，制亡從之法，惡其隨非而與人，人爲羣黨也。如東罪人以詣吏，離惡人與異居，首匿亡從之法除矣。狄牙之調味也，酸則沃之以水，淡則加之以鹹，水火相變易，故膽無鹹淡之失也。今刑罰失實，不爲異氣以變其過，而又爲寒於寒，爲溫於溫，此猶憎酸而沃之以鹹，惡淡而灌之以水也。由斯言之，謹告之言，疑乎必信也。

今燠薪燃釜，火猛則湯熱，火微則湯冷。夫政猶火，寒溫猶熱冷也。願可言人今爲政，賞罰失中也，逆亂陰陽，使氣不和，乃言天爲人君，爲寒爲溫，以謹告之乎？儒者之說，又言人君失政，天爲異不改，災其人，民不改，乃災其身也。先異後災，先教後誅之義也。曰：此復疑也。以夏樹物，物枯不生，以秋收穀，穀棄不藏。夫爲政教，猶樹物收穀也。願可言政治失時，氣物爲災，乃言天爲異以謹告之，不改爲災以誅伐之乎？儒者之說，俗人言也。盛夏陽氣熾烈，陰氣干之，激射鑿裂，中殺人物，謂天罰陰過。外一聞若是，內實不然。夫謂災異爲謹告誅伐，猶爲雷殺人罰陰過也。非謂之言，不然之說也。

或曰：『谷子雲上書，陳言變異，明天之謹告不改，後將復有，願責械待時。後竟復然，卽不爲謹告，何故復有子雲之言？故後有以示政也。』曰：夫變異自有占候，陰陽物氣，自有終始。履霜以知堅冰必至，天之道也。子雲識微知後復然，借變復之說，以效其言，故願責械以待時也。猶齊晏子見鉤星在房心之間，則知地且動也。使子雲見鉤星，則將復曰：『天以鉤星謹告，政治不改，將有地動之變矣。』然則子雲之願責械待時，猶子韋之願伏陛下以俟災惡徙處，必然之驗，故謹告之言信也。予之謹告，何傷於義？損皇天之德，使自然無爲，轉爲人事，故難聽之也。稱天之謹告，譽天之聰察也，反以聰察傷損於天德，何以知其聾也？以其聽之聰也；何以知其盲也？以其視之明也；何以知其狂也？以其言之當也。夫言當視聽聰明，而道家謂之狂而盲聾，今言天之謹告，是謂天狂而盲聾也。

易曰：『大人與天地合其德。』故太伯曰：『天不言，殫其道於賢者之心。』夫大人之德，則天德也；賢者之言，則天言也。大人刺而賢者諫，是則天譴告也，而反歸告於災異，故疑之也。六經之文，聖人之語，動言天者，欲化無道，懼愚者之言，非獨吾心，亦天意也。及其言天，猶以人心，非謂上天蒼蒼之體也。變復之家，見誣言天，災異時至，則生譴告之言矣。驗古以知今，天以人受終於文，不言受終於天。堯之心，知天之意也；堯授之，天亦授之。百官臣子皆鄉於舜，舜之授禹，禹之傳啓，皆以人心效天意。詩之眷顧洪範之震怒，皆無人身效天之意。文、武之卒，成王幼少，周道未成，周公居攝，當時豈有上天之教哉？周公推心合天志也。上天之心，在聖人之胸；及其譴告，在聖人之口。不信聖人之言，反然災異之氣，求索上天之意，何其遠哉！世無聖人，安能得聖人之言？賢人庶幾之才，亦聖人之次也。

變動篇

論災異者，已疑於天用災異譴告人矣。更說曰：『災異之至，始人君以政動天，天動氣以應之。譬之以物擊鼓，以椎扣鐘，鼓猶天，椎猶政，鐘鼓聲，猶天之應也。人主爲於下，則天氣隨人而至矣。』曰：此又疑也。夫天能動物，物焉能動天？何則？人物繫於天，天爲人物主也。故曰：王良策馬，車騎盈野，非車騎盈野，而乃王良策馬也。天氣變於上，人物應於下矣。故天且雨，商牟起舞，使天雨也。商牟者，知雨之物也；天且雨，其一足起舞矣。故天且雨，螻蟻徙，蚯蚓出，琴絃緩，固疾發，此物爲天所動之驗也。故天且風，巢居之蟲動；且雨，空虛之物擾。風雨之氣，感蟲物也。故人在天地之間，猶蚤蠶之在衣裳之內，螻蟻之在穴隙之中。蚤蠶螻蟻爲逆順橫從，能令衣裳穴隙之間氣變動乎？蚤蠶螻蟻不能，而獨謂人能，不達物氣之理也。

夫風至而樹枝動，樹枝不能致風。是故夏末蟬鳴，寒蟬啼，感陰氣也；雷動而雉驚，發蟄而蛇出，起氣也。夜及半而鶴鳴，晨將旦而雞鳴，此雖非變，天氣動物，物應天氣之驗也。願可言寒溫感動人君，人君起氣而以賞罰，乃

言以貴罰感動皇天，天爲寒溫以應政治乎？大情風家言風至，爲盜賊者，感應之而起，非盜賊之人，精氣感天，使風至也。風至，怪不軌之心，而盜賊之操發矣。何以驗之？盜賊之人，見物而取，暗敵而殺，皆在徒倚漏刻之間，未必宿日有其思也。而天風已以狼貪陰賊之日至矣。

以風占貴賤者，風從王相鄉來則貴，從囚死地來則賤。夫貴賤多少，斗斛故也。風至而糴穀之人，貴賤其價，天氣動怪人物者也。故穀價低昂，一貴一賤矣。天官之書，以正月朔占四方之風，風從南方來者旱，從北方來者雉，東方來者爲疫，西方來者爲兵。太史公實道言。以風占水旱兵疫者，人物吉凶統於天也。使物生者春也，物死者冬也；春生而冬殺也。天者如或欲春殺冬生，物終不死生。何也？物生統於陽，物死繫於陰也。故以口氣吹人，人不能寒；吁人，人不能溫。使見吹吁之人，涉冬觸夏，將有凍暍之患矣。寒溫之氣，繫於天地，而統於陰陽，人事國政安能動之？

且天本而人末也。登樹怪其枝，不能動其株；如伐株，葛莖枯矣。人事猶樹枝，能溫猶根株也。生於天，含天之氣，以天爲主，猶耳目手足繫於心矣。心有所爲，耳目視聽，手足動作，謂天應人，是謂心爲耳目手足使乎？旌旗垂旒，旒綴於杆（杆宜讀爲輶，杆之杠）杆東則旒隨而西。有謂寒溫隨刑罰而至，是以天氣爲綴旒也。鉤星在房心之間，地且動之占也。齊太卜知之，謂景公：『臣能動地。』景公信之。夫謂人君能致寒溫，猶齊景公信太卜之能動地。夫人不能動地，而亦不能動天。

夫寒溫，天氣也。天至高，大人至卑小。簫（或作筵）不能鳴鐘，而螢火不爨鼎者，何也？鐘長而簫短，鼎大而螢小也。以七尺之細形，感皇天之太氣，其無分銖之驗，必也。占大將且入國邑，氣寒則將且怒，溫則將喜。夫喜怒起事而發，未入界，未見吏民，是非未察，喜怒未發，而寒溫之氣已豫至矣。怒氣致寒溫，怒喜之後，氣乃當至；是竟寒溫之氣，使人君怒喜也。

或曰：『未至誠也，行事至誠，若鄒衍之呼天而降霜，杞梁妻哭而城崩，何天氣之不能動乎？』夫至誠，猶以心

意之好惡也。有果蒞之物，在人之前，去口一尺，心欲食之，口氣吸之，不能取也；手援送口，然後得之。夫以果蒞之細，真圖易轉，去口不遠，至誠欲之，不能得也；況天去人高遠，其氣莽蒼無端未平，盛夏之時，當風而立，隆冬之月，嚮日而坐。其夏欲得寒而冬欲得溫也，至誠極矣，欲之甚者，至或當風鼓簷，嚮日燃燼，而天終不爲冬夏易氣，寒暑有節，不爲人變政也。夫正欲得之而猶不能致，況自刑賞，意思不欲求寒溫乎！

萬人俱歎，未能動天，一鄒衍之口，安能降霜？鄒衍之狀，孰與屈原，見拘之冤，孰與沈江，離騷楚辭，懷愴，孰與一歎，屈原死時，楚國無霜，此懷襄之世也。厲武之時，卞和獻玉，則其足奉玉泣出，涕盡續之以血。夫鄒衍之誠，孰與卞和見拘之冤，孰與則足仰天而歎，孰與泣血，夫歎固不如泣，拘固不如則，料計冤情，衍不如和，當時楚地不見霜。李斯趙高，讒殺太子扶蘇，并及蒙恬蒙驩，其時皆吐痛苦之言，與歎聲同，又禍至死，非徒苟徙，而其死之地，寒氣不生。秦坑趙卒於長平之下，四十萬衆，同時俱陷，當時啼號，非徒歎也。誠雖不及鄒衍四十萬之冤，度當一賢臣之痛，入坑塹之啼，度過拘囚之呼，當時長平之下，不見隕霜。甫刑曰：『庶僇旁告，無辜于天帝。』此言豈尤之民被冤，旁告無罪於上天也。以衆民之叫，不能致霜，鄒衍之言，殆虛妄也。

南方至熱，煎沙爛石，父子同水而浴；北方至寒，凝冰塹土，父子同穴而處。燕在北邊，鄒衍時周之五月，正歲三月也。中州內正月二月，霜雪時降；北邊至寒，三月下霜，未爲變也。此殆北邊三月尙寒，霜適自降，而衍適呼，與霜逢會。傳曰：『燕有寒谷，不生五穀。』鄒衍吹律，寒谷復溫，則能使氣溫，亦能使氣復寒。何知衍不令時人知己之冤，以天氣表己之誠，竊吹律於燕谷獄，令氣寒而因呼天乎？即不然者，霜何故降？范雎爲須賈所讒，魏齊僇之，折幹擗脅，張儀遊於楚，楚相掠之，被捶流血，二子冤屈，太史公列記其狀。鄒衍見拘，雖儀之比也，且子長何諱不言案衍列傳，不言見拘而使霜降，僞書遊言，猶太子丹使日再中，天雨粟也。由此言之，衍呼而降霜，虛矣；則杞梁之妻哭而崩城，妄也。

顛卒叛，趙襄子帥師攻之。軍到城下，顛卒之城甬者十餘丈，襄子擊金而退之。夫以杞梁妻哭而城崩，襄子之

軍有哭者乎。秦之將滅，郿門內崩，霍光家且敗，第牆自壞，誰哭於秦宮，位於霍光家者，然而門崩牆壞，秦霍敗亡之徵也。或時杞國且圯，而杞梁之妻適哭城下，猶燕國適寒而鄒衍偃呼也。事以類而時相因，聞見之者，或而然之。又城老牆朽，猶有崩壞，一婦之哭，崩五丈之城，是城則一指摧三仞之楹也。春秋之時，山多變，山城一類也，哭能崩壞，復能壞山乎？女然素縞而哭，河流通，信哭城崩，固其宜也。崇杞梁從軍死，不歸，其婦迎之，魯君弔於途，妻不受弔，棺歸於家，魯君就弔，不言哭於城下。本從軍死，從軍死不在城中，妻向城哭，非其處也。然則杞梁之妻哭而崩城，復虛言也。

因類以及，荆軻刺秦王，白虹貫日，衛先生爲秦畫長平之計，太白食昂，復妄言也。夫豫子謀殺襄子，伏於橋下，襄子至橋心動，賁高欲殺高祖，藏於人壁中，高祖至，柏人亦動心。二子欲刺兩主，兩主心動，賁論之，尙謂非二子精神所能感也，而況荆軻欲刺秦王，秦王之心不動，而白虹貫日乎？然則白虹貫日，天變自成，非軻之精，爲虹而貫日也。鉤星在房心間，地且動之占也。地且動，鉤星應房心。夫太白食昂，猶鉤星在房心也。謂衛先生長平之議，令太白食昂，疑矣。歲星害鳥尾，周楚惡之。繼然之氣見，宋衛陳鄭災。案時周楚未有非，而宋衛陳鄭未有惡也。然而歲星先守尾，災氣暑垂於天，其後周楚有禍，宋衛陳鄭同時皆然。歲星之害周楚，天氣災四國也，何知白虹貫日，不致刺秦王？太白食昂，使長平計起也。

明零篇

變復之家，以久雨爲湛，久陽爲旱。旱應亢陽，湛應沈溺，或難曰：『夫一歲之中，十日者一雨，五日者一風，雨頗留，湛之兆也；陽頗久，旱之漸也；湛之時，人君未必沉溺也；旱之時，未必亢陽也。人君爲政，前後若一，然而一湛一旱，時氣也。』范蠡計然曰：『太歲在子，水毀金穰，木饑火旱。』夫如是，水旱饑穰，有歲運也。歲直其運，氣當其世，變復之家，指而名之，人君用其言，求過自改。陽久自雨，雨久自陽，變復之家，遂名其功。人君然之，遂信其術，試使

人君恬居安處，不求已過，天猶自雨，雨猶自暘，暘濟雨濟之時，人君無事，變復之家，猶名其術，是則陰陽之氣，以人爲主，不說於天也。夫人不能以行感天，天亦不隨行而應人。

春秋魯大雩，早求雨之祭也。旱久不雨，禱祭求福。若人之疾病，祭神解禍矣。此變復也。詩云：『月離于畢，比滂沱矣。』書曰：『月之從星，則以風雨。』然則風雨隨月所離從也。房星四表三道，日月之行，出入三道，出北則暘，出南則旱，或言出北則旱，南則暘。案月爲天下占，房爲九州候。月之南北，非獨爲魯也。孔子出，使子路齋雨具。有頃，天果大雨。子路問其故，孔子曰：『昨暮月離于畢，後日月復離畢。』孔子出，子路請齋雨具，孔子不聽，出果無雨。子路問其故，孔子曰：『昔日月離其陰，故雨；昨暮月離其陽，故不雨。』夫如是，魯雨自以月離，豈以政哉？如魯以政，令月離于畢爲雨占，天下共之，魯雨，天下亦宜皆雨。大國之時，政治不同，人君所行，賞罰異時，必以雨爲應政，令月離六七星，然後足也。

魯繆公之時，歲旱，繆公問縣子：『天旱不雨，寡人欲暴巫奚如？』縣子不聽。『欲徙市奚如？』對曰：『天子崩，巷市七日；諸公薨，巷市五日；爲之徙市，不亦可乎？』案縣子之言，徙市得雨也。案詩書之文，月離星得雨。日月之行，有常節度，肯爲徙市，故離畢之陰乎？夫月畢天下占，徙魯之市，安耐移月，月之行天，三十日而周。一月之中，一過畢星，離陽則陽，假令徙市之感，能令月離畢陽，其時徙市而得雨乎？夫如縣子言，未可用也。

董仲舒求雨，申春秋之義，設虛立祀，父不食於枝庶，天不食於下地，諸侯雩禮所祀，未知何神。如天神也，唯王者天乃歆，諸侯及今長吏，天不享也。神不歆享，安耐得神？如雲雨者，氣也；雲雨之氣，何用歆享？觸石而出，膚寸而合，不崇朝而辨雨天下，泰山也。泰山雨天下，小山雨國邑，然則大雩所祭，豈祭山乎？假令審然，而不得也，何以效之？水異川而居，相高分寸，不決不流，不鑿不合。誠令人君禱祭水旁，能令高分寸之水，流而合乎？夫見在之水，相差無幾，人君請之，終不耐行，況雨無形兆，深藏高山，人君雩祭，安耐得之？

夫雨水在天地之間也，猶夫婦並在人形中也。或賈酒食，請於惠人之前，求出其位，惠人終不之厭。夫並不

可請而出，兩安可求而得。雍門子悲哭，孟嘗君爲之流涕。蘇秦張儀悲說坑中，鬼谷先生泣下沾襟。或者僅可爲雍門之聲，出蘇張之說，以感天乎？天又耳目高遠，音氣不達，杞梁之妻，又已悲哭，天不雨而城反崩。夫如是，竟當何以致雨？雩祭之家，何用感天？案月出北道，離畢之陰，希有不雨。由此言之，北道畢星之所在也；北道星肯爲雩祭之故，下其雨乎？孔子出，使子路齋雨具之時，魯未必雩祭也。不祭，沛然自雨，不求，曠然自賜。夫如是，天之賜雨，自有時也。一歲之中，賜雨連屬，當其雨也，誰求之者？當其賜也，誰止之者？人君聽請，以安民施恩，必非賢也。

天至賢矣，時未當雨，僞請求之，故妄下其雨。人君聽請之類也。變復之家，不推類驗之，空張法術惑人君，或未當雨，而賢君求之而不得，或適當自雨，惡君求之遭遇其時，是使賢君受空責，而惡君蒙虛名也。世稱聖人純而賢者，駁純則行，操無非，無非則政治無失；然而世之聖君，莫有如堯湯。堯遭洪水，湯遭大旱，如謂政治所致，堯湯惡君也；如非政治，是運氣也。運氣有時，安可請求？世之論者，猶謂堯湯水旱，水旱者，時也；其小旱，堯皆政也。假令審然，何用致堯？審以政致之，不修所以失之，而從請求，安爾復之？世審稱堯湯水旱，天之運氣，非政所致；夫天之運氣，時當自然，雖雩祭請求，終無補益。而世又稱湯以五過禱於桑林，時立得雨。夫言運氣，則桑林之說，繇稱桑林，則運氣之論消。世之說稱者，竟當何由救水旱之術？審當何用？

夫災變大抵有二，有政治之災，有無妄之變。政治之災，須耐求之；求之雖不耐得，而惠愍惻隱之恩，不得已之意也。慈父之於子，孝子之於親，知病不祀神，疾病不和藥，又知病之必不可治，治之無益，然終不肯安坐待絕，猶卜筮求祟，召醫和藥者，惻痛慙慙，冀有驗也。旣死氣絕，不可如何，升屋之危，以衣招復，悲恨思慕，冀其悟也。雩祭者之用心，慈父孝子之用意也。無妄之災，百民不知，必歸於主，爲政治者，慰民之望，故亦必雩。

問政治之災，無妄之變，何以別之？曰：德鄣政得，災猶至者，無妄也；德衰政失，變應來者，政治也。夫政治則外雩而內政，以復其虧；無妄則內守舊政，外修雩禮，以慰民心。故夫無妄之氣，歷世時至，當固自一，不宜改政。何以驗之？周公爲成王陳立政之言曰：『時則物有間之。』自一語一言，我則末維成德之彥，以乂我受民。』周公立政，可

謂得矣。知非常之物，不轔不至，故刺成王，自一語一言，政事無非，毋敢變易。然則非常之變，無妄之氣，間而至也。水氣間，堯旱氣間，湯周宣以賢，遭遇久旱，建初孟季，北州連旱，牛死民乏，放流就賤，聖主寬明於上，百官共職於下，太平之明時也。政無細非，旱猶有，氣間之也。聖主知之，不致政行，轉穀賑贍，損鄽濟耗，斯見之審明，所以救赴之者得宜也。魯文公間歲大旱，臧文仲曰：『修城郭，貶食省用，務畜勸分。』文仲知非政，故徒修備，不致政治。變復之家，見變輒歸於政，不接政之無非，見異懼惑，變易操行，以不宜政而變，祇取災焉。

何以言必當雩也？曰：春秋大雩，傳家在宣，公牟穀梁無譏之文，當雩明矣。曾皙對孔子言其志曰：『暮春者，春服既成，冠者五六人，童子六七人，浴乎沂，風乎舞雩，詠而歸。』孔子曰：『吾與點也。』魯設雩祭於沂水之上。暮者晚也，春謂四月也；春服既成，謂四月之服成也；冠者童子，雩祭樂人也；浴乎沂，涉沂水也；象龍之從水中出也；風乎舞雩，風歌也；詠而饋，詠歌饋祭也；歌詠而祭也。說論之家，以爲浴者，浴沂水中也；風，乾身也。周之四月，正歲二月也，尙寒，安得浴而風乾身？由此言之，涉水不浴，雩祭審矣。

春秋左氏傳曰：『啓蟄而雩。』又曰：『龍見而雩。』啓蟄龍見，皆二月也。春二月雩，秋八月亦雩；春祈穀雨，秋祈穀實，當今靈星，秋之雩也。春雩廢，秋雩在，故靈星之祀，歲雩祭也。孔子曰：『吾與點也。』喜點之言，欲以雩祭調和陰陽，故與之也。使雩失正，點欲爲之，孔子宜非，不當與也。樊遲從遊，感雩而問，刺魯不能崇德，而徒雩也。

夫雩古而有之，故禮曰：『雩祭，祭水旱也。』故有雩禮，故孔子不譏，而仲舒申之。夫如是，雩祭祀禮也。雩祭得禮，則大水鼓用牲于社，亦古禮也。得禮無非，當雩一也。禮祭也，社報生萬物之功，土地廣遠，難得辨祭，故立社爲位，主心事之。爲水旱者，陰陽之氣也，滿六合難得盡祀，故修壇設位，敬恭祈求，效事社之義，復災變之道也。推生事死，推人事鬼，陰陽精氣，尙如生人能飲食乎？故共饗香，奉進旨嘉，區區滄港，冀見答享，推祭社言之，當雩二也。歲氣調和，災害不生，尙猶而雩。今有靈星，古昔之禮也。況歲氣有變，水旱不時，人君之懼，必痛甚矣。雖有靈星之祀，猶復尋，恐前不備，彤澤之義也。冀復災變之虞，獲豐稔之報，三也。禮之心，惻惻惻，樂之意，歡忻惻惻，以玉帛效心。

獻所以鐘鼓聲意，粦祭請祀人君精誠也。精誠在內，無以效外，故粦祀盡已，惶惶關納精心於粦祀之前，玉帛鐘鼓之義，四也。臣得罪於君，子獲過於父，比自改更，且當謝罪，惶惶於旱，如政治所致，臣子得罪獲過於旱，默政政治，潛易操行，不彰於外，天怒不釋，故必粦祭，惶惶之義，五也。漢立博士之官，師弟子相訶難，欲極道之深，形是非之理也。不出橫難，不得從說，不發苦詰，不聞甘對，導才低仰，欲求裨也，祇不廟厲，欲求鉅也。推春秋之義，求粦祭之說，實孔子之心，考仲舒之意，孔子既歿，仲舒已死，世之論者，孰當復問，唯若孔子之徒，仲舒之黨，爲能說之。

順鼓篇

春秋之義，大水，鼓用牲於社，說者曰：『鼓者，攻之也。』或曰：『荷之。』荷則攻矣，陽勝攻社以救之，或難曰：『攻社謂得勝負之義，未可得順義之節也。』人君父事天，母事地，母之黨類爲害，可攻母以救之乎？以政令失道，陰陽繆整者，人君也，不自攻以復之，反逆節以犯尊，天地安肯濟，使氾水害傷天，不以地害天，攻之可也。今氾水所傷，物也，萬物於地，卑也，害犯至尊之體，於道違逆，論春秋者，曾不知難。案雨出於山，流入於川，氾水之類，山川是矣，大水之災，不攻山川，社，土也，五行之性，水土不同，以水爲害而攻土，土勝水，攻社之義，毋乃如今世工匠之用椎鑿也。以椎鑿鑿，令鑿穿木，今儻攻土，令厭水平。

且夫攻社之義，以爲攻陰之類也。甲爲盜賊，傷害人民，甲在不亡，舍甲而攻乙之家，耐止甲乎？今雨者，水也，水在不亡，不自攻水而乃攻社。案天將雨，山先出雲，雲積爲雨，雨流爲水。然則山者父母，水者子弟也，重罪刑及族屬，罪父母子弟乎？罪其朋徒也。計山水與社俱爲雨類也，孰爲親者？社，土也，五行異氣，相去遠。

殷太戊，桑穀俱生，或曰：『高宗恐敵，側身行道，思索先王之政，與滅國，繼絕世，舉逸民，明養老之義，桑穀消亡，享國長久。』此說者，春秋所共聞也。水災與桑穀之變，何以異？殷王政政，春秋攻社，道相違反，行之何從？周成王之時，天下雷雨，偃禾拔木，爲害大矣。成王開金縢之書，求索行事，周公之功，執書以泣，遏雨止風，反禾，大木復起。

大雨久淫，其實一也。成王政過，春秋攻社，兩經二義，行之如何？

月令之家，蟲食穀稼，取蟲所類象之吏，皆擊僇辱以滅其變，實論者謂之未必真是；然而爲之，厭合人意。今致雨者，政也，吏也，不變其政，不罪其吏，而徒攻社，能何復塞？苟以爲當攻其類，衆陰之精月也，方諸鄉月，水自下來，月離于畢，出房北道，希有不雨。月中之獸，兔蟾蜍也，其類在地，蟻與蛭也。月毀於天，蟻蛭皆缺，同類明矣。雨久不霽，攻陰之類，宜捕斬兔蟾蜍，椎破蟻蛭，爲得其寶。蝗蟲時至，或飛或集，所集之地，穀草枯索，吏卒部民，塹道作塹，榜驅內於塹塹，把蝗積聚以千斛數，正攻蝗之身，蝗猶不止，況徒攻陰之類，雨安肯霽？

尚書大傳曰：『烟氛郊社不修，山川不祀，風雨不時，霜雪不降，責於天公。臣多弑主，孽多殺宗，五品不訓，責於人公。城郭不繕，溝池不修，水泉不流，水爲民害，責於地公。王者三公，各有所主，諸侯卿大夫，各有分職。』大水不責卿大夫，而擊鼓攻社，何知不然？魯國失禮，孔子作經，表以爲戒也。公羊高不能實，董仲舒不能定，故攻社之義，至今復行之。使高尙生，仲舒未死，將難之曰：『久雨泄水溢，誰致之者？使人君也，宜政政易行，以復塞之；如人臣也，宜罪其人，以過解天，如非君臣，陰陽之氣，偶時運也，擊鼓攻社，而何救止？』

春秋說曰：『人君亢陽致旱，沈溺致水。』夫如是，旱則爲沈溺之行，水則爲亢陽之操，何乃攻社？攻社不解，朱絲繫之，亦復未曉。說者以爲社陰，朱陽也，水陰也，以陽色繫之，助鼓爲救。夫大山失火，灌以壅水，衆知不能救之者，何也？火盛水少，熱不能勝也。今國泄水，猶大山失火也，以若繩之絲，繫社爲救，若以壅水灌大山也。

原夫心以人意，狀天治以人事。人相攻擊，氣不相兼，兵不相負，不能取勝。今一國水，使真欲攻陽以絕其氣，悉發國人，操刀把杖以擊之，若歲終逐疫，然後爲可。楚漢之際，六國之時，兵革戰攻，力殫則勝，弱勢則負，攻社一人擊鼓，無兵革之威，安能救雨？夫一場一雨，猶一晝一夜也，其遭若堯湯之水旱，猶一冬一夏也。如或欲以人事祭祀，復塞其變，冬求爲夏，夜求爲晝也，何以效之？久雨不霽，試使人君高枕安臥，雨猶自止。止久至於大旱，試使人君高枕安臥，旱猶自雨。何則？陽極反陰，陰極反陽，故夫天地之有德也，何以知不如人之有水病也？其有旱也，何

以知不如人有瘧疾也，禱請求福，終不能愈；變操身行，終不能救。使醫食藥，實可得愈；命盡期至，醫藥無效。

堯遭洪水，春秋之大水也。聖君知之，不禱於神，不致乎政，使禹治之，百川東流。夫堯之使禹治水，猶病水者之使醫也。然則堯之洪水，天地之水病也；禹之治水，洪水之良醫也。說者何以易之，攻社之義，於事不得，雨不霽，祭女媧於禮何見？伏犧女媧俱聖者也，舍伏犧而祭女媧，春秋不言，董仲舒不識，其故何哉？夫春秋經但言鼓，豈言攻哉？說者見有鼓文，則言攻矣。夫鼓未必爲攻，說者用意異也。

季氏嘗於周公而求也，爲之聚斂而附益之。孔子曰：「非吾徒也，小子鳴鼓攻之可也。」攻者，責之，責讓之也。六國兵革相攻，不得難此，此又非也，以卑而責尊，爲逆矣。或據天責之也。王者母事地，母有過，子可據父以責之乎？下之於上，宜言諫。若事，臣子之禮也；責讓，上之禮也。乖違疑意，行之如何？夫禮以鼓助號呼，鳴聲響也。古者人君將出，撞鐘擊之，故警戒下也。必以伐鼓爲攻此社，此則鐘聲鼓鳴攻擊上也。

大水用鼓，或時再告社陰之大盛。雨澤不霽，陰盛陽微，非道之宜。口祝不副，以鼓自助，與日食鼓用牲於社，同一義也，俱爲告急，彰陰盛也。事大而急者用鐘鼓，小而緩者用鈐敔，彰事告急，助口氣也。天道難知，大水久漚，假令政治所致，猶先告急，乃斯政行，盜賊之發，與此同操。盜賊亦政所致，比求闕失，猶先發告。鼓用牲于社，發覺之也。社者，衆陰之長，故伐鼓使社知之。說鼓者以爲攻之，故攻毋逆義之難，緣此而至。今言告以陰盛陽微，攻尊之難，奚從來哉？且告宜於用牲，用牲不宜於攻，告事用牲，禮也；攻之用牲，於禮何見？

朱絲如繩，示在場也。鳴氣實微，故用物微也。投一寸之鍼，布一丸之艾，於血脈之蹊，篤病有瘳。朱絲如一寸之鍼，一丸之艾也。吳攻破楚，昭王亡走。申包胥間走赴秦，哭泣求救，卒得助兵，卻吳而存楚。擊鼓之人，伐如何耳？使誠若申包胥，一人擊得，假令一人擊鼓，將耐令社與秦王同感，以土勝水之威，卻止雲雨。雲雨氣得與吳同，恐消散入山，百姓被害者，得蒙霽晏，有楚國之安矣。迅雷風烈，君子必變，雖夜必興，衣冠而坐，懼威變異也。

夫水旱，猶雷風也，雖運氣無妄，欲令人君高枕偃臥，（偃字一本作「据」）以俟其時，無惻怛憂民之心，堯

不用姓，或時上世質也。倉頡作書，奚仲作車，可以前代之時，無書車之事，非後世爲之乎？時同作殊，事乃可難；異世易俗，相非如何？俗圖畫女媧之象，爲婦人之形，又其號曰女。仲舒之意，始謂女媧古婦人帝王者也。男陽而女陰，陰氣爲害，故祭女媧求福祐也。傳又言共工與顓頊爭爲天子，不勝，怒而觸不周之山，使天柱折，地維絕。女媧銷煉五色石以補蒼天，斷鼃之足以立四極。仲舒之祭女媧，殆見此傳也。本有補蒼天立四極之神，天氣不和，陽道不勝，黨女媧以精神助聖王，止兩鼃乎。

亂龍篇

董仲舒申春秋之雩，設土龍以招雨，其意以雲龍相致。易曰：『雲從龍，風從虎。』以類求之，故設土龍。陰陽從類，雲雨自至。儒者或問曰：夫易言雲從龍者，謂真龍也，豈謂土哉？楚葉公好龍，牆壁槩孟皆畫龍，必以象類爲若，真是則葉公之國常有雨也。易又曰：『風從虎。』謂虎嘯而谷風至也。風之與虎，亦同氣類。設爲土虎，置之谷中，風能至乎？夫土虎不能而致風，土龍安能而致雨？古者畜龍，乘車駕龍，故有秦龍氏、御龍氏。夏后之庭，二龍常在，季年夏衰，二龍低伏。真龍在地，猶無雲雨，况爲象乎？禮畫雷樽，象雷之形。雷樽不聞能致雷，土龍安能有動雨。頓牟掇芥，磁石引針，皆以其真是，不假他類。他類尙似，不能掇取者，何也？氣性異殊，不能相感動也。

劉子駿掌雩祭，典土龍事。桓君山亦難以頓牟磁石不能真是，何能掇針取芥？子駿窮無以應。子駿漢朝智囊，筆墨淵海，窮無以應者，是事非議誤，不得道理實也。曰：夫以非真難，是也；不以象類說，非也。夫東風至，（一有「感」字）酒湛盜，鯨魚死，彗星出，天道自然，非人事也。事與彼雲龍相從，同一實也。

日，火也；月，水也。水火感動，常以真氣。今伎道之家，鑄陽燧取飛火於日，作方諸取水於月，非自然也，而天然之也。土龍亦非真，何爲不能感天，一也。

陽燧取火於天，五月丙午，日中之時，銷煉五色石，鑄以爲器，乃能得火。今妄取刀劍偃月之鉤，摩以向日，亦能感

天。夫土龍既不得比於陽燧，嘗與刀劍俱，月鉤爲比，二也。

齊孟嘗君夜出秦關，關未開，客爲鷄鳴，而真鷄鳴和之。夫鷄可以表聲感，則兩亦可以僞象致，三也。

李子長爲政，欲知囚情，以梧桐爲人象，囚之形，鑿地爲棺，以盧爲櫛，臥木囚其中。囚罪正則木囚不動，囚寃侵奪，木囚動出。不知囚之精神著木人乎？將精神之氣動木囚也？夫精神感動木囚，何爲獨不應從土龍？四也。

舜以聖德，入大麓之野，虎狼不犯，蟲蛇不害，禹鑄金鼎象百物，以入山林，亦辟凶殃。論者以爲非實然，而上古久遠，間鼎之神，不可無也。夫金與土，同五行也，使作土龍者如禹之德，則亦將有雲雨之驗，五也。

頓牟掇芥，磁石鉤象之石，非頓牟也，皆能掇芥。土龍亦非真，當與磁石鉤象爲類，六也。

楚葉公好龍，牆壁孟澤皆畫龍象，真龍聞而下之。夫龍與雲雨同氣，故能感動，以類相從。葉公以爲畫致真龍，今獨何以不能致雲雨？七也。

神靈示人以象，不以實，故寢臥夢悟，見事之象，將吉吉象來，將凶凶象至。神靈之氣，雲雨之類，八也。

神靈以象見實，土龍何獨不能，以僞致真也。上古之人，有神荼鬱壘者，昆弟二人，性能執鬼，居東海度朔山上，立桃樹下，簡閱百鬼。鬼無道理，妄爲人禍，荼與鬱壘，縛以盧索，執以食虎。故今縣官斬桃爲人，立之戶側，畫虎之形，著之門闌。夫桃人非荼鬱壘也，畫虎非食鬼之虎也，刻畫效象，冀以禦凶。今土龍亦非致雨之龍，獨信桃人畫虎，不知土龍，九也。

此尙因緣昔書，不見實驗。魯般墨子刻木爲鳶，蜚之三日而不集，爲之巧也。使作土龍者若魯般墨子，則亦將有木鳶蜚不集之類。夫蜚鳶之氣，雲雨之氣也。氣而蜚木鳶，何獨不能從土龍？十也。

夫雲雨之氣也。知於蜚鳶之氣，未可以言。釣者以木爲魚，丹漆其身，近之水流而擊之，赴水動作，魚以爲真，並來聚會。夫丹木非真魚也，魚含血而有知，猶鳶象至。雲雨之知，不能過魚，見土龍之象，何能疑之？十一也。

此尙魚也，知不如人。匈奴敬畏郅都之威，刻木象都之狀，交弓射之，莫能一中。不知都之精神，在形象邪？亡也。

將匈奴敬鬼精神在木也。如都之精神在形象，天龍之神，亦在土龍；如匈奴精在於木人，則粵祭者之精，亦在土龍，十二也。

金翁叔，休屠王之太子也，與父俱來降漢。父道死，與母俱來，拜爲騎都尉。母死，武帝圖其母於甘泉殿上，署曰休屠王焉。提翁叔從上上甘泉，拜謁起立，向之泣涕沾襟，久乃去。夫圖畫，非母之實身也，因見形象，泣涕輒下，思親氣感，不待實然也。夫土龍猶甘泉之圖畫也，雲雨見之，何爲不動？十三也。

此尙夷狄也。有若似孔子，孔子死，弟子思慕，共坐有若孔子之座。弟子知有若非孔子也，猶共坐而尊事之。雲雨之知，使若諸弟子之知，雖知土龍非真，然猶感動，思類而至，十四也。

有若孔子弟子，疑其體象，則謂相似。孝武皇帝幸李夫人，夫人死，思見其形，道士以術爲李夫人。夫人步入殿門，武帝望見，知其非也，然猶感動，喜樂近之。使雲雨之氣，如武帝之心，雖知土龍非真，然猶愛好，感起而來，十五也。

既效驗有十五，又亦有義四焉。立春東耕，爲土象人，男女各二人，秉耒把鋤，或立土牛，未必能耕也。順氣應時，示率下也。今設土龍，雖知不能致雨，亦當夏時，以類應變，與立土人土牛同一義也。禮，宗廟之主，以木爲之，長尺二寸，以象先祖。孝子入廟，主心事之，雖知木主非親，亦當盡敬有所主事。土龍與木主同，雖知非真，示當感動，立意於象，二也。塗靈芻車，聖人知其無用，示象生存，不敢無也。夫設土龍，知其不能動雨也，示若塗車芻靈而有致三也。天子射熊，諸侯射麋，卿大夫射虎豹，士射鹿豕，示服猛也。名布爲侯，示射無道諸侯也。夫畫布爲熊麋之象，名布爲侯，禮貴意象，示義取名也。土龍亦夫熊麋布侯之類，四也。

夫以象類有十五驗，以禮示意有四義，仲舒覽見深鴻，立事不妄。設土龍之象，果有狀也。龍霓出水，雲雨乃至。古者畜龍御龍，常存無雲雨，猶舊交相聞遠，卒然相見，歡欣歌笑，或至悲泣涕，僵伏少久，則示行各泯德矣。易曰：『雲從龍。』非言龍從雲也，雲得刻雲之象，龍安肯來？夫如是，傳之者何可解？則桓言山之難可說也，則劉子

變復之家，謂虎食人者，功曹爲姦所致也。其意以爲功曹衆吏之率，虎亦諸禽之雄也。功曹爲姦，深漁於吏，故虎食人，以象其意。夫虎食人，人亦有殺虎，謂虎食人，功曹受取於吏，如人食虎，吏受於功曹也乎？案世清廉之士，百不能一，居功曹之官，皆有姦心私舊，故可以倖。苞苴賂遺，小大皆有，必謂虎應功曹，是野中之虎常害人也。夫虎出有時，猶龍見有期也。陰物以冬見，陽物以夏出，出應其氣，氣動其類。參伐以冬出，心尾以夏見，參伐則虎星，心尾則龍象。象出而物見，氣至而類動，天地之性也。動於林澤之中，遭虎搏噬之時，稟性狂勃，食叨饑餓，觸自來之人，安能不食？人之筋力，羸弱不適，巧便不知，故遇輒死。使孟賁登山，馮婦入林，亦無此害也。

遭虎篇

孔子行魯林中，婦人哭甚哀，使子貢問之。『何以哭之哀也？』曰：『去年虎食吾夫，今年食吾子，是以哭哀也。』子貢曰：『若此，何不去也？』對曰：『吾善其政之不苛，吏之不暴也。』子貢還報孔子。孔子曰：『弟子識諸，苛政暴吏，甚於虎也。』夫虎害人，古有之矣。政不苛，吏不暴，德化之足以卻虎。然而二歲比食二人，林中獸不應害也，爲廉不應，姦吏亦不應矣。

或曰：『虎應功曹之姦，所謂不苛政者，非功曹也，婦人，廉吏之部也，雖有善政，安爾化虎？』夫魯無功曹之官，功曹之官，相國是也。魯相者，殆非孔墨必三家也，爲相必無賢操，以不賢居權位，其惡必不廉也，必以相國爲姦，令虎食人，是則魯野之虎常食人也。

水中之毒，不及陵上，陵上之氣，不入水中，各以所近，罹殃取禍。是故漁者不死於山，獵者不溺於淵，好入山林，窮幽測深，涉虎窟窟，虎搏噬之，何以爲變？魯公牛哀病化爲虎，搏食其兄，同變化者，不以爲怪。入山林草澤，見害於虎，怪之非也，蝮蛇悍猛，亦能害人。行止澤中，於蝮蛇應何官吏？蜂蠆害人，入毒氣害人，入水火害人，人爲蜂蠆

所蟄，爲毒氣所中，爲火所燔，爲水所溺，又誰致之者？有諸禽獸，乃應吏政；行山林中，麋鹿野豬，牛象熊羆，豺狼蝮蛇，皆復殺人。苟謂食人，乃應爲變，螽蟴閭虻皆食人，人身彊大，故不至死。倉卒之世，穀食之貴，百姓饑餓，自相啖食，厥變甚於虎。變復之家，不處苛政。

且虎所食，非獨人也；含血之禽，有形之獸，虎皆食之，人謂應功曹之姦，食他禽獸，應何官吏？夫虎毛蟲，人保蟲，毛蟲饑，食保蟲，何變之有？四夷之外，大人食小人，虎之與蠻夷，氣性一也。平陸廣都，虎所不由也；山林草澤，虎所生出也。必以虎食人，應功曹之姦，是則平陸廣都之縣，功曹常爲賢；山林草澤之邑，功曹常伏誅也。夫虎食人於野，應功曹之姦；虎時入邑，行於民間，功曹游於閭巷之中，平實說虎害人於野不應政，其行都邑乃爲怪。

夫虎，山林之獸，不狎之物也，常在草澤之中，不爲馴畜，猶人家之有鼠也。伏匿希出，非可常見也。命吉居安，鼠不擾亂；祿衰居危，鼠爲殃變。夫虎亦然也。邑縣吉安，長吏無慮，虎匿不見；長吏且危，則虎入邑，行於民間。何則？長吏光氣已消，都邑之地，與野均也。推此以論，虎所食人，亦命時也；命訖時衰，光氣去身，視肉猶尸也，故虎食之。天道偶會，虎適食人，長吏遭惡，故謂爲變，應上天矣。

古今凶驗，非唯虎也，野物皆然。楚王英宮樓未成，鹿走上墻，其後果薨。魯昭公旦出，鶴鳴來巢，其後季氏逐昭公，昭公奔齊，遂死不還。賈誼爲長沙王傳，鵲鳥集舍，發書占之，曰：『主人將去。』其後遷爲梁王傳，懷王好騎，墜馬而薨；賈誼傷之，亦病而死。昌邑王時，夷鴟鳥集宮殿下，王射殺之，以問郎中令龔遂，龔遂對曰：『夷鴟，野鳥，入宮，亡之應也。』其後昌邑王竟亡。盧奴令田光，與公孫宏等謀反，其且覺時，狐鳴光舍屋上，光心惡之。其後事覺，坐誅。會稽東部都尉禮文伯時，卒伏廳下，其後遷爲東萊太守。都尉王子鳳時，鴞入府中，其後遷丹陽太守。夫吉凶同占，遷免一驗，俱象空亡，精氣消去也。故人且亡也，野鳥入宅，域且空也。草蟲入邑，等類衆多，行事比肩，略舉較著，以定實驗也。

變復之家，謂蟲食穀者，部吏所致也。貪則侵漁，故蟲食穀。身黑頭赤，則謂武官；頭黑身赤，則謂文官。使加罰於蟲所象類之吏，則蟲滅息不復見矣。夫頭赤則謂武吏，頭黑則謂文吏所致也。時或頭赤身白，頭黑身黃，或頭身皆黃，或頭身皆青，或皆白，若魚肉之蟲，應何官吏？時謂白布。蒙民滑吏，被刑乞貸者，咸勝於官，取多於吏，其蟲形象何如狀哉？蟲之滅也，皆因風雨。案蟲滅之時，則吏未必伏罰也。陸田之中時有鼠，水田之中時有魚，蝦蟹之類，皆爲穀害，或時希出而寔爲害，或常有而爲災。等類衆多，應何官吏？

魯宣公履畝而稅，應時而有緣生者，或言若蝗。蝗時至蔽天如雨，集地食物，不擇穀草。察其頭身，象類何吏？變復之家，謂蝗何應？建武三十一年，蝗起太山郡，西南過陳留河南，遂入夷狄，所集鄉縣，以千百數。當時鄉縣之吏，未皆履畝。蝗食穀草，連日老極，或蜚徙去，或止枯死。當時鄉縣之吏，未必皆伏罪也。夫蟲食穀，自有止期，猶蠶食桑，自有足時也。生出有日，死極有月，期盡變化，不常爲蟲。使人君不罪其吏，蟲猶自亡。夫蟲風氣所生，蒼頡知之，故凡蟲爲風之字，取氣於風，故八日而化。生春夏之物，或食五穀，或食衆草。食五穀，吏受錢穀也；其食他草，受人何物？

保蟲三百，人爲之長。由此言之，人亦蟲也。人食蟲所食，蟲亦食人所食，俱爲蟲而相食，物何爲怪之？設蟲有知，亦將非人曰：『女食天之所生，吾亦食之。謂我爲變，不自謂爲災。』凡含氣之類，所甘嗜者，口腹不異。人甘五穀，惡蟲之食，自生天地之間，惡蟲之出，設蟲能言，以此非人，亦無以詰也。夫蟲之在物間也，知者不怪，其食萬物也，不謂之災。甘香澀味之物，蟲生常多，故穀之多蟲者，染也。稻時有蟲，麥與豆無蟲，必以有蟲責主者吏，是其染鄉部吏常伏罪也。

神農后稷藏種之方，養馬屎以汁漬種者，令禾不蟲。如或以馬屎漬種，其鄉部吏，鮑焦陳仲子也。是故后稷神農之術用，則其鄉吏可免爲蟲。何則？蟲無從生，上無以察也。蟲食他草，平事不怪。食五穀，乃謂之災。桂有蠶，桑有蠋，桂中藥而桑給蠶，其用亦急，與穀無異。蠶蠋不爲怪，獨謂蟲爲災，不通物類之實，闇於災變之情也。穀蟲曰

蠱，蠱若蛾矣。粟米鐘熟生蠱。夫蠱食粟米，不謂之災；蠱食苗葉，歸之於政。如說蠱之家，謂粟輕苗重也。

蠱之種類，衆多非一。魚肉腐臭有蠱，醴醬不閉有蠱，飯溫溼有蠱，書卷不舒有蠱，衣襪不懸有蠱，蝸疽蟻蟻蠱，蝦有蠱，或白或黑，或長或短，大小鴻殺，不相似類，皆風氣所生，并連以死，生不擇日。若生日短促，見而輒滅，變復之家，見其希出，出又食物，則謂之災。災出當有所罪，則依所似類之吏，順而說之。人腹中得三蠱，下地之澤，其蠱曰蛭，蛭食人足，三蠱食腸，順說之家，將謂三蠱何似類乎？

凡天地之間，陰陽所生，蛟螭之類，蜈蚣之屬，含氣而生，開口而食，食有甘不，同心等欲，疆大食細弱，知慧反頓愚。他物小大，連相齧噬，不謂之災，獨謂蠱食穀物爲應政事，失道理之實，不達物氣之性也。然夫蠱之生也，必依溫溼。溫溼之氣，常在春夏。秋冬之氣，寒而乾燥，蠱未曾生。若以蠱生罪鄉部吏，是則鄉部吏貪於春夏，廉於秋冬。雖盜蟻之吏，以秋冬暑，蒙伯夷之舉矣。夫春夏非一，而蠱時生者，溫溼甚也，甚則陰陽不和，陰陽不和，政也。徒當歸於政治，而指謂部吏爲姦，失事實矣。

何知蠱以溫溼生也？以蠱蟲知之。穀乾燥者蠱不生；溫溼鐘蝕，蠱生不禁。藏宿麥之種，烈日乾暴，投於燥器，則蠱不生；如不乾暴，開喋之蟲，生如雲烟。以蠱開喋，准况衆蠱，溫溼所生明矣。詩云：『營營青蠅，止於藩。愷悌君子，無信讒言。』讒言傷善，青蠅污白，同一禍敗。詩以爲興，昌邑王夢西階下有積蠅矢，明且召問郎中龔遂，遂對曰：『蠅者，讒人之象也。夫矢積於階下，王將用讒臣之言也。』由此言之，蠅之爲蠱，應人君用讒，何故不謂蠅爲災乎？如蠅可以爲災，夫蠅歲生，世間人君，常用讒乎？

案蠱害人者，莫如蚊虻。蚊虻歲生，如以蚊虻應災，世間常有害人之吏乎？必以食物乃爲災，人則物之最貴者也；蚊虻食人，尤當爲災。必以蠱生害物乃爲災，夫歲生而食人，與時出而害物，災孰爲甚？人之病疥，亦希非常，疥蟲何故不爲災？且天將雨，蟬出蚋蚋，爲與氣相應也。或時諸蟲之生，自與時氣相應，如何輒歸罪於部吏乎？天道自然，吉凶偶會，非常之蟲適生，貪吏適署，人察貪吏之操，又見蟲災之生，則謂部吏之所爲致也。

儒者之論，自說見鳳皇麒麟而知之。何則？案鳳皇麒麟之象，又春秋獲麟文曰：『有靈而角。』靈而角者，則是麒麟矣。見其鳥而象鳳皇者，則鳳皇矣。黃帝堯舜周之盛時，皆致鳳皇。孝宣帝之時，鳳皇集於上林，後又於長樂之宮東門樹上，高五尺，文章五色，周獲麟，麟似靈而角，武帝之麟，亦如靈而角。如有大鳥，文章五色，獸狀如靈，首戴一角，考以圖象，驗之古今，則麒麟可得審也。夫鳳皇，鳥之聖者也；麒麟，獸之聖者也；五帝三王，皐陶孔子，人之聖也。十二聖相各不同，而欲以靈戴角，則謂之麒麟，相與鳳皇象合者，謂之鳳皇，如何？夫聖鳥獸毛色不同，猶十二聖骨體不均也。

戴角之相，猶戴牛也。顓頊戴牛，堯舜必未然。今魯所獲麟戴角，即後所見麟未必戴角也。如用魯所獲麟，求知世間之麟，則必不能知也。何則？毛羽骨角不合同也。假令不同，或時似類，未必真是。虞舜重瞳，王莽亦重瞳，晉文駢脅，張儀亦駢脅。如以骨體毛色比，則王莽、虞舜而張儀、晉文也。有若在魯，最似孔子。孔子死，弟子共坐，有若問以道事，有若不能對者，何也？體狀似類，實性非也。今五色之鳥，一角之獸，或時似類鳳皇麒麟，其實非真，而說者欲以骨體毛色足鳳皇麒麟，誤矣。是故顏淵庶幾，不似孔子；有若、恆庸，反類聖人。由是言之，或時真鳳皇麒麟，骨體不似，恆庸鳥獸，毛色類真，知之如何？儒者自謂自見鳳皇麒麟，輒而知之，則是自謂見聖人，輒而知之也。皐陶馬口，孔子反字。設後輒有知而絕殊馬口反字，尙未可謂聖，何則？十二聖相不同，前聖之相，難以照後聖也。骨法不同，姓名不等，身形殊狀，生出異土，雖復有聖，何如知之？

桓君山謂揚子雲曰：『如後世復有聖人，徒知其才能之勝己，多不能知其聖與非聖人也。』子雲曰：『誠然。』夫聖人難知，知能之美。若桓揚者，尙復不能知；世儒懷庸庸之知，齋無異之識，見聖不能知，可保必也。夫不能知聖，則不能知鳳皇與麒麟。世人名鳳皇麒麟，何用自謂能之乎？夫上世之名鳳皇麒麟，聞其鳥獸之奇者耳。毛角

有奇，又不妄翔荷遊，與鳥獸爭飽，則謂之鳳皇麒麟矣。世人之知聖，亦猶此也。聞聖人人之奇者，身有奇骨，知能博達，則謂之聖矣；及其知之，非卒見覺聞，而輒名之爲聖也，與之偃伏，從文受學，然後知之。

何以明之？子貢事孔子，一年自謂過孔子，二年自謂與孔子同，三年自知不及孔子。嘗一年二年之時，未知孔子聖也；三年之後，然乃知之。以子貢知孔子，三年乃定，世儒無子貢之才，其見聖人，不從之學，任倉卒之視，無三年之接，自謂自知聖，謬矣。少正卯在魯，與孔子並，孔子之門，三盈三虛，唯顏淵不去，顏淵獨知孔子聖也。夫門人去孔子，歸少正卯，不徒不能知孔子之聖，又不能知少正卯。門人皆惑，子貢曰：「夫少正卯，魯之聞人也，子爲政，何以先知？」孔子曰：「賜退，非爾所及。」夫才能知侯，若子貢，尙不能知聖，世儒見聖，自謂能知之，妄也。

夫以不能知聖言之，則亦知其不能知鳳皇與麒麟也。使鳳皇羽翮長廣，麒麟體高大，則見之者以爲大鳥巨獸耳。何以別之？如必巨大別之，則其知聖人亦宜以巨大。春秋之時，鳥有爰居，不可以爲鳳皇；長狄來至，不可以爲聖人。然則鳳皇麒麟，與鳥獸等也。世人見之，何用知之？如以中國無有，從野外來而知之，則是鸛鵲同也。鸛鵲非中國之禽也；鳳皇麒麟，非中國之禽獸也。皆非中國之物，儒者何以謂鸛鵲惡，鳳皇麒麟善乎？

或曰：「孝宣之時，鳳皇集於上林，羣鳥從上以千萬數，以其衆鳥之長，聖神有異，故羣鳥附從。如見大鳥來集，羣鳥附之，則是鳳皇，鳳皇審則定矣。夫鳳皇與麒麟同性，鳳皇見，羣鳥從；麒麟見，衆獸亦宜隨。案春秋之麟，不言衆獸隨之，宣帝武帝皆得麒麟，無衆獸附從之文。如以麒麟爲人所獲，附從者散，鳳皇人不獲，自來羣翔，附從可見。」書曰：「簫韶九成，鳳皇來儀。」大傳曰：「鳳皇在列樹。」不言羣鳥從也；豈宣帝所致者異哉？」

或曰：「記事者失之，唐虞之君，鳳皇實有附從，上世久遠，記事遺失，經書之文，未足以實也。」夫實有而記事者失之，亦有實無而記事者生之。夫如是，儒書之文，難以實事案附從以知鳳皇，未得實也。且人有狡猾而聚者，鳥亦有狡猾而從羣者。當唐虞之時，鳳皇愿，宣帝之時，狡結乎？何其俱有聖人之德行，動作之操，不均同也？無鳥附從，或時是鳳皇，羣鳥附從，或時非也。

君子在世清節自守，不廣結從，出入動作，人不附從。豪猾之人，任使用氣，往來進退，士衆雲合。夫鳳皇，君子也，隨多者效鳳皇，是豪黠爲君子也。歌曲彌妙，和者彌寡，行操益清，交者益鮮。鳥獸亦然，必以附從效鳳皇，是用和多爲妙世也。龍與鳳皇爲比類，宣帝之時，黃龍出於新豐，羣蛇不隨，神雀鸛鳥，皆衆鳥之長也，其仁聖雖不及鳳皇，然其從羣鳥，亦宜數十。信陵孟嘗，食客三千，稱爲賢君。漢將軍衛青及將軍霍去病，門無一客，亦稱名將。太史公曰：『盜蹠橫行，聚黨數千人；伯夷叔齊，隱處首陽山。』鳥獸之操，與人相似，人之得衆，不足以別賢，以鳥附從睿鳳皇，如何？

或曰：『鳳皇麒麟，太平之瑞也。太平之際，見來至也；然亦有未太平而來至也。鳥獸奇骨異毛，卓絕非常，則是矣，何爲不可知？鳳皇麒麟，通常以太平之時來至者。春秋之時，麒麟嘗嫌於王孔子而至。光武皇帝生於濟陽，鳳皇來集。夫光武始生之時，成哀之際也，時未太平而鳳皇至，如以自爲光武有聖德而來，是則爲聖王始生之瑞，不爲太平應也。嘉瑞或應太平，或爲始生，其實難知，獨以太平之際驗之，如何？

或曰：『鳳皇麒麟，生有種類，若龜龍有種類矣。龜故生龜，龍故生龍，形色小大，不異於前者也。見之父，察其子孫，何爲不可知？』夫恆物有種類，瑞物無種適生，故曰德應，龜龍然也；人見神龜靈龍而別之乎？宋元王之時，漁者網得神龜焉，漁父不知其神也。方今世儒，漁父之類也。以漁父而不知神龜，則亦知夫世人而不知靈龍也。

龍或時似蛇，蛇或時似龍。韓子曰：『馬之似鹿者千金。』夏馬似鹿，神龍或時似蛇。如睿有類，形色不異。王莽時，有大鳥如馬，五色龍文，與衆鳥數十，集於沛國蕭縣。宣帝時，鳳皇集於地，高五尺，與言如馬，身高同矣。文章五色，與言五色龍文，物色均矣。衆鳥數十，與言俱集，附從等也。如以宣帝時，鳳皇體色，衆鳥附從，安知鳳皇，則王莽所致焉，鳳皇也。如睿是王莽致之，是非瑞也。如非鳳皇，體色附從，何爲均等？

且瑞物皆起和氣而生，生於常類之中，而有詭異之性，則爲瑞矣。故夫鳳皇之至也，猶赤鳥之集也。謂鳳皇有種，赤鳥復有類乎？嘉禾醴泉甘露，嘉禾生於禾中，與禾中異穗，謂之嘉禾；醴泉甘露出而甘美也，皆泉露生出，非

天上有甘露之種，地下有醴泉之類。聖治公平，而乃枯下產出也。蓂莢朱草，亦生在地，集於衆草，無常本根，暫時產出，旬月枯折，故謂之瑞。

夫鳳皇麒麟，亦瑞也，何以有種類？案周太平，越常獻白雉，白雉，生短而白色耳，非有白雉之種也。魯人得戴角之豸，謂之麒麟，亦或時生於豸，非有麒麟之類。由此言之，鳳皇亦或時生於鵠鵲，毛奇羽殊，出異衆鳥，則謂之鳳皇耳。安得與衆鳥殊種類也？有若曰：『麒麟之於走獸，鳳皇之於飛鳥，太山之於丘垤，河海之於行潦，類也。』然則鳳皇麒麟都與鳥獸同一類，體色詭耳，安得異種？

同類而有奇，奇焉不世，不世難審，識之如何？堯生丹朱，舜生商均，商均，丹朱，堯舜之類也；骨性詭耳。鯀生禹，瞽瞍生舜，鯀，鯀瞍之種也，知德殊矣。試種嘉禾之實，不能得嘉禾，恆見桑梁之粟，莖穗怪奇。人見叔梁紇，不知孔子父也；見伯魚，不知孔子之子也。張湯之父五尺，湯長八尺，湯孫長六尺。孝宣鳳皇高五尺，所從生鳥，或時高二尺，後所生之鳥，或時高一尺，安得常種？

種類無常，故曾哲生參，氣性不世，顏路出回，古今卓絕。鳥有千里，不必麒麟之駒；鳥有仁聖，不必鳳皇之鷦。山頂之樛，不通江湖，然而有魚，水精自爲之也。廢庭壞殿，基上草生，地氣自出之也。按溪水之魚，殿基上之草，無類而出，瑞應之自至，天地未必有稱類也。

夫瑞應，猶災變也。瑞以應善，災以應惡，善惡雖反，其應一也。災變無種，瑞應亦無類也。陰陽之氣，天地之氣也，遭善而爲和，遇惡而爲變，豈天地爲善惡之政，更生和變之氣乎？然則瑞應之出，殆無種類；因善而起，氣和而生。亦或時政平氣和，衆物變化，猶春則鷹變爲鳩，秋則鳩化爲鷹，蛇鼠之類，輒爲魚鼈，蝦蟇爲鵲，雀爲蜃蛤，物隨氣變，不可謂無。黃石爲老父，授張良書，去復爲石也。儒知之，或時太平氣和，豸爲麒麟，鵠爲鳳皇，是故氣性隨時變化，豈必有常類哉？褒姒玄龜之子，二龍驚也；晉之二卿，熊羆之裔也。吞燕于薏苡，履大跡之語，世之人然之，獨謂瑞有常類哉？以物無種計之，以人無類議之，以禮變化論之，鳳皇麒麟生無常類，則形色何爲常同？

案禮記瑞命篇云：『雄曰鳳，雌曰凰。雄鳴曰即即，雌鳴曰足足。』謝云：『梧桐生矣，於彼高岡；鳳凰鳴矣，於彼朝陽。』華華翼翼，雖離嗜嗜。『瑞命與詩俱言鳳皇之鳴。瑞命之言『即即足足』，詩云『雖離嗜嗜』，此聲異也。使聲審，則形不同也；使審同，詩與禮異。世傳鳳皇之鳴，故將疑焉。

案魯之獲麟，云有聲而角，言有聲者，色如聲也。聲色有常，若鳥色有常矣。武王之時，火流爲鳥，云其色赤，赤非鳥之色，故言其色赤。如似聲而色異，亦當言其色白若黑。今成事色同，故言有聲。聲無角，有異於故，故言有角也。夫如是，魯之所得麟者，若聲之狀也。武帝之時，西巡狩，得白麟，一角而五趾，角或時同，言五趾者，足不同矣。魯所得麟，云有聲不言色者，聲無異色也。武帝云得白麟，色白不類聲，故言有聲。正言曰麟，色不同也。孝宣之時，九真貢獻，麟狀如聲而兩角者，孝武言一角不同矣。春秋之麟如聲，宣帝之麟言如鹿，鹿與聲大小相倍，體不同也。

夫三王之時，麟毛色角趾，身體高大，不相似類。推此準後世，麟出不必與前同類矣。夫麒麟鳳皇之類，麒麟前後體色不同，而欲以宣帝之時，所見鳳皇，高五尺，文章五色，準前况後，當復出鳳皇，謂與之同，誤矣。後當復出見之鳳皇麒麟，必已不與前世見出者相似類，而世儒自謂見而輒知之，奈何？

案魯人得麟，不敢正名麟，曰「有聲而角者」，一時誠無以知也。武帝使謁者終軍議之，終軍曰：『野禽并角，明天下同本也。』不正名麟而言野禽者，終軍亦疑無以審也。當今世儒之知，不能過魯人與終軍，其見鳳皇麒麟，必從而疑之，非恆之鳥獸耳。何能審其鳳皇麒麟乎？以體色言之，未必等；以鳥獸隨從多者，未必靈；以希見言之，有鸛鶴來，以相奇言之，聖人有奇骨體，賢者亦有奇骨；聖賢俱奇，人無以別。由賢聖言之，聖鳥聖獸，亦與恆鳥庸獸，俱有奇怪。聖人賢者，亦有知而絕殊，骨無異者；聖賢鳥獸，亦有仁善廉清，體無奇者。世或有富貴不聖，身有骨爲富貴表，不爲聖賢驗。然則鳥亦有五采，獸有角，而無仁聖者。夫如是，上世所見鳳皇麒麟，何知其非恆鳥獸？今之所見鸛鶴之屬，安知非鳳皇麒麟也？

方今聖世，堯舜之主，流布道化，仁聖之物，何爲不生？或時以有鳳皇麒麟，亂於鸛鶴鸛鶴；世人不知，美玉隱在

石中，楚王令尹不能知，故有抱玉泣血之痛。今或時鳳皇麒麟以仁聖之性，隱於恆毛庸羽，無一角五色表之，世人不之知，猶玉在石中也。何用審之？為此論草於永平之初，時來有瑞，其孝明宣惠，衆瑞並至。至元和章和之際，孝章耀德，天下和洽，嘉瑞奇物，同時俱應，鳳皇麒麟，連出重見，盛於五帝之時。此篇已成，故不得載。

或問曰：『請瑞謂鳳皇麒麟難知，世瑞不能別。今孝章之所致鳳皇麒麟，不可得知乎？』曰：五鳥之記，四方中央，皆有大鳥，其出衆鳥皆從，小大毛色，類鳳皇，實難知也。故夫世瑞不能別，別之如何以政治？時王之德，不及唐虞之時，其鳳皇麒麟，目不親見。然而唐虞之瑞，必真是者，堯舜之德明也。孝宣比堯舜，天下太平，萬里慕化，仁道施行，鳥獸仁者，感動而來，瑞物大小，毛色足翼，必不同類。以政治之得失，主之明闇，雖充衆瑞，無非真者。事或難知而易曉，其此之謂也。又以甘露驗之，甘露和氣所生也，露無故而甘，和氣獨已至矣。和氣至，甘露降，德洽而衆瑞臻。案永平以來，訖於章和，甘露常降，故知衆瑞皆是，而鳳皇麒麟皆真也。

北指瑞篇

儒者說鳳皇麒麟爲聖王來，以爲鳳皇麒麟，仁聖禽也，思慮深，避害遠。中國有道則來，無道則隱，稱鳳皇麒麟之仁知者，欲以褒聖人也；非聖人之德，不能致鳳皇麒麟，此言妄也。夫鳳皇麒麟聖，聖人亦聖。聖人栖栖憂世，鳳皇麒麟亦宜率教，聖人遊於世間，鳳皇麒麟亦宜與鳥獸會。何故遠去中國，處於邊外？豈聖人獨，鳳皇麒麟清哉？何其聖德俱而操不同也？如以聖人者當隱乎？十二聖宜隱，如以聖者當見，鳳皇麒麟亦宜見，如以仁聖之禽，思慮深，避害遠，則文王拘於羑里，孔子厄於陳蔡，非也。文王孔子，仁聖之人，憂世憫民，不圖利害，故其有仁聖之知，遭拘厄之患。

凡人操行，能修身正節，不能禁人加非於己。案人操行，莫能過聖人。聖人不能自免於厄，而鳳皇獨能自全於世，是鳥獸之操，賢於聖人也。且鳥獸之知，不異人焉，何以能知國有道與無道也？人同性類，好惡均等，尚不相知，

鳥獸與人異性，何能知之？人不能知鳥獸，鳥獸亦不能知人，兩不能相知，鳥獸爲最於人，何以反能知之？儒者咸稱鳳皇之德，欲以表明王之治，反令人有不及鳥獸，論事過情，使實不著。且鳳麟豈獨爲聖王至哉？孝宣皇帝之時，鳳皇五至，麒麟一至，神雀黃龍，甘露醴泉，莫不畢見，故有五鳳、神雀、甘露、黃龍之記。使鳳麟審爲聖王見，則孝宣皇帝聖人也。如孝宣帝非聖，則鳳麟爲賢來也，爲賢來，則儒者稱鳳皇麒麟，失其實也。鳳皇麒麟爲鳥獸來，亦爲宣帝來矣。夫如是，爲聖且賢也。

儒者說聖太隆，則論鳳麟亦過其實。春秋曰：「西狩獲死麟，人以示孔子。」孔子曰：「孰爲來哉？孰爲來哉？」反袂拭面，泣涕沾襟。『儒者說之，以爲天以麟命孔子，孔子不王之聖也。夫麟爲聖王來，孔子自以不王，而時王魯君，無感麟之德，怪其來而不知所爲，故曰『孰爲來哉？孰爲來哉？』知其不爲治平而至，爲已道窮而來，望絕心感，故涕泣沾襟。』以孔子言『孰爲來哉？』知麟爲聖王來也。曰：『前孔子之時，世儒已傳此說。孔子聞此說，而希見其物也，見麟之至，怪所爲來。實者麟至無所爲來，常有之物也，行適魯澤之中，而魯國見其物，遭獲之也。孔子見麟之獲，獲而又死，則自比於麟，自謂道絕不復行，將爲小人所僂獲也，故孔子見麟而自泣者，據其見得而死也，非據其本所爲來也。然則麟之至也，自與獸會聚也。其死，人殺之也。使麟而知，爲聖王來；時無聖王，何爲來乎？思慮深，避害遠，何故爲魯所獲殺乎？夫以時無聖王而麟至，知不爲聖王來也；爲魯所獲殺，知其避害不能遠也。聖獸不能自免於難，聖人亦不能自免於禍。禍難之事，聖者所不能避，而云鳳麟思慮深避害遠，妄也。

且鳳麟非生外國也，中國有聖王乃來至也。生於中國，長於山林之間，性廉見希，人不得害也，則謂之思慮深避害遠矣。生與聖王同時，行與治平相遇，世間謂之聖王之瑞，爲聖來矣。刺巢破卵，鳳皇爲之不翔；焚林而敗，鴻池而漁，龜龍爲之不遊。鳳皇、龜龍之類也，皆生中國，與人相近，巢剝卵破，屏竄而不翔；林焚池漁，伏匿不遊，無遠去之文，何以知其在外國也？龜龍鳳皇，同一類也。希見不害，謂在外國；龜龍希見，亦在外國矣。

孝宣皇帝之時，鳳皇麒麟黃龍神雀皆至。其至同時，則其性行相似類，則其生出宜同處矣。龍不生於外國，外

國亦有龍，鳳麟不生外國，外國亦有鳳麟。然則中國亦有，未必外國之鳳麟也。人見鳳麟希見，則曰在外國；見過太平，則曰爲聖王來。夫鳳皇麒麟之至也，猶醴泉之出，朱草之生也。謂鳳皇在外國，聞有道而來，醴泉朱草何知而生於太平之時？醴泉朱草和氣所生，然則鳳皇麒麟亦和氣所生也。和氣生聖人，聖人生於衰世，物生爲瑞，人生爲聖，同時俱然，時其長大，相逢遇矣。衰世亦有和氣，和氣時生聖人。聖人生於衰世，衰世亦時有鳳麟也。孔子生於周之末世，麒麟見於魯之西澤，光武皇帝生於成哀之際，鳳皇集於濟陽之地。聖人聖物生於盛衰世，聖王遭（一有「出聖物遭」字）見聖物，猶吉命之人，逢吉祥之類也。其實相遇，非相爲出也。

夫鳳麟之來，與白魚赤鳥之至，無以異也。魚遭自躍，王舟逢之，火偶爲鳥，王仰見之。非魚聞武王之德而入其舟，鳥知周家當起集於王屋也。謂鳳麟爲聖王來，是謂魚鳥爲武王至也。王者受富貴之命，故其動出，見吉祥異物，見則謂之瑞。瑞有大小，各以所見，定德薄厚。若夫白魚赤鳥，小物，小安之兆也；鳳皇麒麟，大物，太平之象也。故孔子曰：『鳳鳥不至，河不出圖，吾已矣夫！』不見太平之象，自知不遇太平之時矣。且鳳皇麒麟何以爲太平之象？鳳皇麒麟，仁聖之禽也。仁聖之物至，天下將爲仁聖之行矣。尚書大傳曰：『高宗祭成湯之廟，有雉升鼎耳而鳴。高宗問祖乙，祖乙曰：「遠方君子殆有至者。」』祖乙見雉，有似君子之行，今從外來，則曰遠方君子，將有至者矣！

夫鳳皇麒麟猶雉也，其來之象，亦與雉同。孝武皇帝西巡狩，得白麟一角而五趾，又有木枝出，復合於本。武帝議問羣臣，謁者終軍曰：『野禽并角，明同本也；棠枝內附，示無外也。如此瑞者，外國宜有降者。是若應，殆且有解編髮削左衽，襲冠帶而蒙化焉。』其後數月，越地有降者，匈奴名王，亦將數千人來降，竟如終軍之言。終軍之言，得瑞應之實矣。推此以況白魚赤鳥，猶此類也。魚木精，白者殷之色也；鳥者孝鳥，赤者周之應氣也。先得白魚，後得赤鳥，殷之統絕，色稜在周矣。據魚鳥之見以占武王，則知周之必得天下也。

世見武王誅紂，出遇魚鳥，則謂天用魚鳥，命使武王誅紂，事相似類，其實非也。春秋之時，鷩鷩來巢，占者以爲

以夫鷦鷯來巢魯國之都且爲丘嫂昭公之身且出奔也昭公爲季氏所攻出奔於齊死不歸魯賈誼爲長沙太傅鷽鳥集舍發書占之云「鷽鳥入室主人當去」其後賈誼竟去野鳥雖殊其占不異夫鳳皇之來與野鳥之巢鷽鳥之集無以異也是鷽鳥之巢鷽鳥之集偶巢適集占者因其野澤之物巢集城宮之內則見魯國且凶傳舍人不吉之瑞矣非鷽鳥鷽鳥知二國禍將至而故爲之巢集也王者以天下爲家家人將有吉凶之事而吉凶之兆豫見於人知者占之則知吉凶將至非吉凶之物有知故爲吉凶之人來也猶著龜之有兆數矣龜兆著數常有吉凶吉人卜筮與吉相遇凶人與凶相逢非著龜神靈知人吉凶出兆見數以告之也虛居卜筮前無過客猶得吉凶然則天地之間常有吉凶吉凶之物來至自當與吉凶之人相逢遇矣或言天使之所爲也夫巨大之天使細小之物音語不通情指不達何能使物物亦不爲天使其來神怪若天使之則謂天使矣

夏后孔甲敗于首山天雨晦冥入於民家主人方乳或曰后來之子必大貴或曰不勝之子必有殃夫孔甲之入民室也遇遭雨而應庇也非知民家將生子而其子必凶爲之至也既至人占則有吉凶矣夫吉凶之物見於王廟若入民家猶孔甲遭雨入民室也孔甲不知其將生子爲之故到謂鳳皇諸瑞有知應吉而至誤矣

是應篇

儒者論太平瑞應皆言氣物卓異朱草醴泉翔鳳甘露景星嘉禾簞脯蓂莢屈軼之屬又言山出車澤出舟男女異路市無二價耕者讓畔行者讓路頌白不提挈關梁不閉道無虜掠風不鳴條雨不破塊五日一風十日一雨其盛茂者致黃龍麒麟鳳皇夫儒者之言有溢矣過實瑞應之物或有或無夫言鳳皇麒麟之屬大瑞較然不得增飾其小瑞微應恐多非是夫風氣雨露本當和適言其風翔甘露風不鳴條雨不破塊可也言其五日一風十日一雨褒之也風雨雖過不能五日十日正如其數言男女不相干市價不相欺可也言其異路無二價褒之也太平之時豈更爲男女各作道哉不更作道一路而行安得異乎太平之時無商人則可有必求便利以爲

業，買物安肯不求賤？賣貨安肯不求貴？有求貴賤之心，必有二價之語，此皆有其事，而褒增過其實也。若夫簞脯羹菜，屈軼之屬，殆無其物，何以驗之？說以實者，太平無有此物。

儒者言簞脯生於庖廚者，言廚中自生肉脯，薄如簞形，播鼓生風，寒涼食物，使之不蟲。夫太平之氣雖和，不能使廚生肉簞，以爲寒涼。若能如此，則能使五穀自生，不須人爲之也。能使廚自生肉簞，何不使飯自蒸於甑？火自燃於竈乎？凡生簞者，欲以風吹食物也。何不使食物自不蟲？何必生簞以風之乎？廚中能自生簞，則冰室何事，而復伐冰以塞物乎？人夏月操簞，須手搯之，然後生風，從手握持，以當疾風，簞不鼓動，言簞脯自鼓，可也。須風乃鼓，不風不動。從手風來，自足以塞廚中之物，何須簞脯？世言燕太子丹，使日再中，天雨粟，烏白頭，馬生角，廚門象生肉足，論之既虛，則簞脯之語，五應之類，恐無其實。

儒者又言，古者羹菜夾階而生，月朔日一菜生，至十五日而十五菜，於十六日日一菜落，至月晦菜盡，來月朔一菜復生。王者南面視菜生落，則知日數多少，不須煩擾案日曆以知之也。夫天既能生菜，以爲日數，何不使菜有日名？王者視之菜字，則知今日名乎？徒知日數，不知日名，猶復案曆，然後知之，是則王者視日，則更煩擾，不省羹菜之生，安能爲福？夫羹草之實也，猶豆之有莢也；春夏未生，其生必於秋末，冬月隆寒，霜雪霽零，萬物皆枯，儒者敢謂羹菜遶冬，獨不死乎？如與萬物俱生俱死，菜成而以秋末，是則秋季得察菜，春夏冬三時不得案也。且月十五日生十五菜，於十六日菜落，二十一日六菜落，落菜棄殞，不可得數，猶當計未來菜以知日數，是勞心苦意，非簞祗也。使菜生於堂上，人君坐戶牖間，望察菜生，以知日數，匪謂善矣。今云菜階而生，生於堂下也。王者之堂，墨子稱堯舜高三尺，儒家以爲卑下。假使之然，高三尺之堂，羹菜生於階下，王者欲視其菜，不能從戶牖之間見也，須臨堂察之，乃知菜數。夫起視堂下之菜，孰與懸曆日於晨坐旁，顧輒見之也。天之生瑞，欲以娛王者，須起察乃知日數，是生煩物以累之也。且菜草也，王者之堂，且夕所坐，古者雖實宮室之中，草生輒起，安得生菜，而人得經月數之乎？且凡數日一二者，欲以紀識事也，古有史官，典曆主日，王者何事而自數菜？謂候四時之中，令瑞和

察四星，以占時氣；四星至重，猶不躬視，而自察筮以數日也。

儒者又言太平之時，屈軼生於庭之末，若草之狀，主指佞人。佞人入朝，屈軼庭末以指之；聖王則知佞人所在。夫天能故生此物以指佞人，不使聖王性自知之；或佞人本不生，出必復更生一物以指明，何天之不憚煩也？聖王莫過堯、舜、禹、湯之治，最爲平矣。即屈軼已自生於庭之末，佞人來朝，指知之，則舜何難於知佞人，而使臯陶陳知人之術？經曰：『知人則哲，惟帝難之。』人含五常，音氣交通，且猶不能相知，屈軼草也，安能知佞？如儒者之言，是則太平之時，草木踰賢聖也。獄訟有是非，人情有曲直，何不并令屈軼指其非而不直者？必若心聽（一有「獄」字）訟，三人斷獄乎？故夫屈軼之草，或時無有而空言生，或時實有而虛言能指。假令能指，或時草性見人而動，古者質朴，見草之動，則言能指；能指則言指佞人。司南之杓，投之於地，其柢指南；魚肉之蟲，集地北行，夫蟲之性然也。今草能指，亦天性也。聖人因草能指，宣言曰：『庭末有屈軼，能指佞人。』百官臣子懷姦心者，則各變性易操，爲忠正之行矣。猶今府廷畫臯陶、鮪也。

儒者說云，鮪者，一角之牛也。性知有罪，臯陶治獄，其罪疑者，令牛觸之；有罪則觸，無罪則不觸。蓋斯天生一角聖獸，助獄爲驗，故臯陶敬傘，起坐事之，此則神奇瑞應之類也。曰，夫鮪，則復屈軼之語也。牛本二角，鮪則一角，體損於羣，不及衆類，何以爲奇？鮪三足曰能，龜三足曰責，能案與責，不能神於四足之龜；一角之牛，何能聖於兩角之獸？性知往，乾鵠知來，鵠鵠能言，天性能一，不能爲二。或時鮪之性，徒能觸人，未必能知罪人。臯陶欲神事助政，惡受罪者之不厭服，因鮪觸人則罪之，欲人畏之不犯，受罪之家，沒齒無怨言也。夫物性各自有所知，如以鮪能觸謂之爲神，則性之徒皆爲神也。巫知吉凶，占人禍福，無不然者；如以鮪觸謂之巫類，則巫何奇而以爲善？斯皆人欲神事立化也。師尙父爲周司馬，將師伐紂，到孟津之上，杖鉞把旄，號其衆曰：倉光。倉光者，水中之獸也。善覆人船，因神以化，欲令急渡，不急渡倉光害汝，則復鮪之類也。河中有此異物，時出浮揚，一身九頭，人畏惡之，未必覆人之舟也。尙父緣河有此異物，因以威衆。夫鮪之觸罪人，猶倉光之覆舟也，蓋有虛

名無其實效也。人畏怪奇，故空褒增。

又言太平之時有景星。尙書中候曰：『堯時景星見於軫。』夫景星或時五星也；大者，歲星太白也。彼或時歲星太白行於軫度，古實不能推步五星，不知歲星太白何如狀。見大星則謂景星矣。詩又言『東有啓明，西有長庚。』亦或時復歲星太白也；或時昏見於西，或時晨見於東，詩人不知，則名曰啓明長庚矣。然則長庚與景星同，皆五星也。太平之時日月精明，五星日月之類也。太平更有景星，可復更有日月乎？詩人，俗人也，中候之時，質世也，俱不知星。王莽之時，太白經天，精如半月，使不知星者見之，則亦復名之曰景星。爾雅釋四時章曰：『春爲發生，夏爲長，秋爲收成，冬爲安甯，四氣和爲景星。』夫如爾雅之言，景星乃四時和氣之名也，恐非著天之大星。爾雅之書，五經之訓故，儒者所共觀察也，而不信從，更謂大星爲景星。豈爾雅所言景星與儒者之所說異哉？

爾雅又言『甘露時降，萬物以嘉，謂之醴泉。』醴泉，乃謂甘露也。今儒者說之，謂泉從地中出，其味甘若醴，故曰醴泉。二說相遠，實未可知。案爾雅釋水章，一見一否曰醴，醴泉正出，正出，涌出也。沃泉懸出，懸出，下出也。是泉出之異，輒有異名。使太平之時，更有醴泉從地中出，當於此章中言之；何故反居釋四時章中，言甘露爲醴泉乎？若此，儒者之言，醴泉從地中出，又言甘露，其味甚甜，未可然也。儒曰：『道至大者，日月精明，星辰不失其行，翔風起，甘露降，雨濟而陰一者，謂之甘雨。』非謂雨水之味甘也。推此以論，甘露必謂其降下時，適潤養萬物，未必露味甘也。亦有露甘味如飴蜜者，俱太平之應，非養萬物之甘露也。何以明之？案甘露如飴蜜者，著於樹木，不著五穀。彼露味不甘者，其下時，土地滋潤，流經萬物，洽沾濡澤。由此言之，爾雅且近得實。緣爾雅之言，驗之於物，案味甘之露，下著樹木，察所著之樹，不能茂於所不著之木。然今之甘露，始異於爾雅之所謂甘露。欲驗爾雅之甘露，以萬物豐熟，災害不生，此則甘露降下之驗也。甘露下，是則醴泉矣。

世謂古人君賢則道德施行，施行則功成治安；人君不肖則道德損廢，損廢則功敗治亂。古今論者，莫謂不然。何則？見堯舜聖賢致太平，桀紂無道致亂得誅，如實論之，命期自然，非德化也。吏百石以上，若升食以下，居位治民，爲政布教，教行與止，民治與亂，皆有命焉。或才高行潔，居位職廢，或智淺操持，治民而立。上古之黜陟幽明，考功，據有功而加賞，案無功而施罰，是考命而長祿，非實才而厚能也。論者因考功之法，據效而定賢，則謂民治國安者，賢君之所致；民亂國危者，無道之所爲也。故危亂之變至，論者以責人君，歸罪於爲政不得其道。人君受以自責，愁神苦思，撼動形體，而危亂之變，終不滅除，空憤人君之心，使明知之主，虛受之責，世論傳稱使之然也。

夫賢君能治當安之民，不能化當亂之世。良醫能行其針藥，使方術驗者，遇未死之人，得未死之病也。如命窮病困，則雖扁鵲末如之何。夫命窮病困之不可治，猶夫亂民之不可安也。藥氣之愈病，猶教導之安民也。皆有命時，不可令勉力也。公伯寮過子路於季孫，子服景伯以告孔子，孔子曰：『道之將行也與，命也；道之將廢也與，命也。』由此言之，教之行廢，國之安危，皆在命時，非人力也。夫世亂民逆，國之危殆，災害繫於上天，賢君之德，不能消卻。詩道周宣王遭大旱矣。詩曰：『周餘黎民，靡有孑遺。』言無有可遺一人不被害者。宣王賢者，嫌於德微，仁惠盛者，莫過堯湯。堯遭洪水，湯遭大旱，水旱災害之甚者也，而二聖逢之，豈二聖政之所致哉？天地歷數當然也。以堯湯之水旱，準百王之災害，非德所致，則其福祐，非德所爲也。

賢君之治國也，猶慈父之治家。慈父耐乎教明令，耐使子孫皆爲孝善；子孫孝善，是家興也。百姓平安，是國昌也。昌必有衰，興必有廢。興昌非德所能成，然則衰廢非德所能敗也。昌衰興廢，皆天時也。此善惡之實，未言苦樂之效也。家安人樂，富饒財用足也。案富饒者，命厚所致，非賢惠所獲也。人皆知富饒居安樂者，命祿厚，而不知國安治化行者，歷數吉也。故世治非賢聖之功，衰亂非無道之致。國當衰亂，賢聖不能盛；時當治，惡人不能亂。世之治亂，在時不在政；國之安危，在數不在教。賢不賢之君，明不明之政，無能損益。

世稱五帝之時，天下太平，家有十年之蓄，人有君子之行。或時不然，世增其美，亦或時政致，何以審之？夫世之

所以爲亂者，不以賊盜衆多，兵革並起，民棄禮義，負畔其上乎？若此者，由穀食乏絕，不能忍饑寒。夫饑寒並至，而能無爲非者寡；然則溫飽並至，而能不爲善者希。傳曰：『倉廩實，民知禮節；衣食足，民知榮辱。』饑生於有餘，爭起於不足。穀足，食多，禮義之心生；禮義義重，平安之基立矣。故饑歲之春，不食親戚；饑歲之秋，召及四隣，不食親戚，惡行也；召及四隣，善義也。爲善惡之行，不在人質性，在於歲之饑穰。由此言之，禮義之行，在穀足也。案穀成敗，自有年歲：年歲水旱，五穀不成，非政所致，時數然也。必謂水旱政治所致，不能爲政者，莫過桀。桀之時，宜常水旱。案桀之時，無饑耗之災，災至自有數，或時返在聖君之世。實事者，說堯之供水，湯之大旱，皆有遭遇，非政惡之所致。說百王之害，獨謂爲惡之應，此見堯湯德優，百王劣也。審一足以見百，明惡足以照善。堯湯證百王至百王遭變，非政所致，以變見而明禍福。五帝致太平，非德所就明矣。

人之瘟病而死也，先有凶色，見於面部；其病，逼邪氣也；其病不愈，至於身死，命壽訖也。國之亂亡，與此同驗。有變見於天地，猶人瘟病而死，色見於面部也。有水旱之災，猶人逼氣而病也。災禍不除，至於國亡，猶病不愈，至於身死也。論者謂變徵政治，賢人瘟病色凶，可謂操行所生乎？謂水旱者，無道所致；賢者遭病，可謂無狀所得乎？謂亡者爲惡極，賢者身死，可謂罪重乎？夫賢人有殺病而早死，惡人有完疆而老壽，人之病死，不在操行爲惡也。然則國之亂亡，不在政之是非；惡人完疆而老壽，非政平安而常存。由此言之，禍變不足以明惡，福瑞不足以表善，明矣。

在天之變，日月薄蝕，四十二月日一食，五十六月月亦一食。食得常數，不在政治，百變千災，皆同一狀，未必人君政教所致。歲害烏帑，周楚有禍，糾然之氣見。宋衛陳鄭皆災，當此之時，六國政教未必失誤也。歷陽之鄰，一夕沈而爲湖，當時歷陽長吏未必誑妄也。成敗繫於天，吉凶制於時，人事未爲，天氣已見，非時而何？五穀生地，一豐一耗，穀糴在市，一貴一賤；豐者未必賤，耗者未必貴。豐耗有歲貴賤有時，時當貴豐穀價增，時當賤耗穀價減。夫穀之貴賤，不在豐耗，猶國之治亂，不在善惡。賢君之立，偶在當治之世，德自明於上，民自管於下，世平民安，瑞祐

並至。世則謂之賢君所致。無道之君。偶生於當亂之時。世擾俗亂。災害不絕。遂以破國亡身滅嗣。世皆謂之爲惡所致。若此。明於善惡之外形。不見禍福之內實也。禍福不在善惡。善惡之證不在禍福。長吏到官。未有旰行。政教因前。無所改更。然而盜賊或多或寡。災害或無或有。夫何故哉。長吏秩貴。常階平安以升遷。或命賤不任。當由危亂以貶黜也。以今之長吏。況古之國君。安危存亡。可得論也。

自然篇

天地合氣。萬物自生。猶夫婦合氣。子自生矣。萬物之生。含血之類。知饑知寒。見五穀可食。取而食之。見絲麻可衣。取而衣之。或說以爲天生五穀以食人。生絲麻以衣人。此謂天爲人作農夫桑女之徒也。不合自然。故其義疑未可從也。試依道家論之。天者普施氣萬物之中。穀愈饑而絲麻救寒。故人食穀衣絲麻也。夫天之不故生五穀絲麻以衣食人。由其有災變。不欲以譴告人也。物自生而人衣食之。氣自變而人畏懼之。以若說論之。厭於人心矣。如天瑞焉。故自然焉。在無爲何居。何以天之自然也。以天無口目也。案有爲者。口目之類也。口欲食而目欲視。有嗜欲於內。發之於外。口目求之。得以爲利欲之爲也。今無口目之欲。於物無所求索。夫何爲乎。何以知天無口目也。以地知之。地以土爲體。土本無口目。天地夫婦也。地體無口目。亦知天無口目也。使天體平。宜與地同。使天氣平。氣若雲烟。雲烟之屬。安得口目。

或曰。『凡動行之類。皆本無有爲。有欲故動。動則有爲。今天動行與人相似。安得無爲。』曰。天之動行也。施氣也。體動氣乃出。物乃生矣。由人動氣也。體動氣乃出。子亦生也。夫人之施氣也。非欲以生子。氣施而子自生矣。天動不欲以生物而物自生。此則自然也。施氣不欲爲物而物自爲。此則無爲也。謂天自然無爲者何。氣也。恬澹無欲。無爲無事者也。老聃得以壽矣。老聃稟之於天。使天無此氣。老聃安所稟受此性。師無其說而弟子獨言者。未之有也。或復於桓公。公曰。『以告仲父。』左右曰。『一則仲父。二則仲父。爲君乃易乎。』桓公曰。『吾未得仲父。』

故難已得仲父何爲不易？夫桓公得仲父任之以事委之以政不復與知。皇天以至優之德與王政而讒告人則天德不若桓公而霸君之操過上帝也。

或曰：「桓公知管仲賢故委任之如非管仲亦將讒告之矣。使天遭堯舜必無讒告之變。」曰：天能讒告人君則亦能故命聖君擇才若堯舜受以王命委以王事勿復與知。今則不然生庸庸之君失道廢德隨讒告之何天不憚勞也？曹參爲漢相縱酒歌樂不聽政治其子諫之笞之二百。當時天下無擾亂之變。淮陽鑄偽錢吏不能禁汲黯爲太守不壞一鎰不刑一人高枕安臥而淮陽政清。夫曹參爲相若不爲相汲黯爲太守若郡無人然而漢朝無事淮陽刑錯者參德優而黯威重也。計天之威德孰與曹參汲黯而謂天與王政隨而讒告之是謂天德不若曹參厚而威不若汲黯重也。趙伯玉治衛子貢使人問之：「何以治衛？」對曰：「以不治治之。」夫不治之治無爲之道也。

或曰：「太平之應河出圖洛出書不畫不就不爲不成天地出之有爲之驗也。張良遊泗水之上遇黃石公授太公書蓋天佐漢誅秦故命令神石爲鬼書授人復爲有爲之效也。」曰：此皆自然也。夫天安得以筆墨而爲圖書乎？天道自然故圖書自成。晉唐叔虞魯成季友生文在其手故叔曰虞季曰友。宋仲子生有文在其手曰「爲魯夫人」。三者在母之時文字成矣而謂天爲文字在母之時天使神持錐筆墨刻其身乎？自然之化固疑難知外若有爲內實自然是以太史公記黃石事疑而不能實也。趙簡子夢上天見一男子在帝之側後出見人嘗道則前所夢見在帝側者也。論之以爲趙國且昌之狀也。黃石授書亦漢且興之象也。妖氣爲鬼鬼象人形自然之道非或爲之也。

草木之生華葉青蔥皆有曲折象類文章謂天爲文字復爲華葉乎？宋人或刻木爲楮葉者三年乃成。孔子曰：「使地三年乃成一葉則萬物之有葉者寡矣。」如孔子之言萬物之葉自爲生也。自爲生也故能並成如天爲之其過當若宋人刻楮葉矣。觀鳥獸之毛羽毛羽之采色通可爲乎？鳥獸未能盡實。春觀萬物之生秋觀其成。天

地爲之乎。物自然也。如謂天地爲之，爲之宜用手。天地安得萬萬千手，並爲萬萬千手物乎。諸物在天地之間也，猶子在母腹中也。母懷子氣，十月而生，鼻口耳目，髮膚毛理，血脈脂膜，骨節爪齒，自然成腹中乎。母爲之也。偶人千萬，不名爲人者，何也。鼻口耳目非性自然也。

武帝幸王夫人，王夫人死，思見其形，道士以方術作夫人形，形成，出入宮門。武帝大驚，立而迎之，忽不復見。蓋非自然之真，方士巧妄之偽，故一見恍惚，消散滅亡。有爲之化，其不可久行，猶王夫人形，不可久見也。道家論自然，不知引物事以驗其言行，故自然之說，未見信也。然雖自然，亦須有爲輔助，耒耜耕耘，因春播種者，人爲之也。及穀入地，日夜長大，人不能爲也。或爲之者，敗之道也。宋人有閔其苗之不長者，就而握之，明日枯死。夫欲爲自然者，宋人之徒也。

問曰：『人生於天地，天地無爲。人稟天性者，亦當無爲，而有爲，何也。』曰：『至德純樞之人，稟天氣多，故能則天，自然無爲。稟氣薄少，不遵道德，不似天地，故曰不肖。不肖者，不似也。不似天地，不類聖賢，故有爲也。天地爲鑪，造化爲工，稟氣不一，安能皆賢。賢之純者，黃老是也。黃者，黃帝也。老者，老子也。黃老之操，身中恬澹，其治無爲，正身共己而陰陽自和，無心於爲而物自化，無意於生而物自成。』

易曰：『黃帝堯舜垂衣裳而天下治。』垂衣裳者，垂拱無爲也。孔子曰：『大哉堯之爲君也！惟天爲大，惟堯則之。』又曰：『巍巍乎舜禹之有天下也，而不與焉。』周公曰：『上帝引佚。』上帝謂舜禹也。舜禹承安繼治，任賢使能，恭己無爲而天下治。舜禹承堯之安，堯則天而行，不作功邀名，無爲之化自成，故曰：『蕩蕩乎民無能名焉。』年五十者，擊壤於塗，不能知堯之德，蓋自然之化也。易曰：『大人與天地合其德。』黃帝堯舜，大人也，其德與天地合，故知無爲也。天道無爲，故春不爲生，而夏不爲長，秋不爲成，冬不爲藏，陽氣自出，物自生長，陰氣自起，物自成藏。汲井決城，灌漑園田，物亦生長，霈然而雨，物之莖葉根核，莫不洽濡。程量澍澤，孰與汲井決城哉。故無爲之爲大矣。本不求功，故其功立；本不求名，故其名成。沛然之雨，功名大矣，而天地不爲也，氣和而雨自集。

儒家說夫婦之道，取法於天地；知夫婦法天地，不知推夫婦之道，以論天地之性，可謂惑矣。夫天覆於上，地偃於下，下氣蒸上，上氣降下，萬物自生其中間矣。當其生也，天不須復與也。由子在母懷中，父不能知也。物自生，子自成，天地父母，何與知哉？及其生也，人道有教訓之義，天道無爲，聽恣其性，故放魚於川，縱獸於山，從其性命之欲也。不驅魚令上陵，不逐獸令入淵者，何哉？拂詭其性，失其所宜也。夫百姓，魚獸之類也，上德治之，若烹小鮮，與天地同操也。商鞅變秦法，欲爲殊異之功，不聽趙良之議，以取車裂之患；德薄多欲，君臣相憎怨也。道家德厚，下當其上，上安其下，純蒙無爲，何復讒告？故曰：政之適也，君臣相忘於治，魚相忘於水，獸相忘於林，人相忘於世，故曰天也。

孔子謂顏淵曰：『吾服汝忘也；汝之服於我，亦忘也。』以孔子爲君，顏淵爲臣，尙不能讒告，况以老子爲君，文子爲臣乎？老子文子，似天地者也。淳酒味甘，飲之者醉，不相知；薄酒酸苦，賓主頓覺。夫相讒告，道薄之驗也。謂天讒告，曾謂天德不若淳酒乎？禮者，忠信之薄，亂之首也。相讒以禮，故相讒告。三皇之時，坐者于于，行者居居，乍自以爲馬，乍自以爲牛，繩德行而民瞳矐，曉惠之心未形生也，當時亦無災異。如有災異，不名曰讒告。何則？時人愚惑，不知相繩責也。末世衰微，上下相非，災疑時至，則造讒告之言矣。夫今之天，古之天也；非古之天厚，而今之天薄也；讒告之言，生於今者，人以心准况之也。誥誓不及五帝，要盟不及三王，交質子不及五伯；德彌薄者，信彌衰，心險而行詖，則犯約而負教；教約不行，則相讒告；讒告不改，舉兵相滅，由此言之，讒告之言，衰亂之語也；而謂之上天爲之，斯蓋所以疑也。

且凡言讒告者，以人道驗之也。人道，君讒告臣，上天讒告君也。謂災異爲讒告，夫人道臣亦有諫君；以災異爲讒告，而王者亦當時有諫上天之義。其效何在？有謂天德優，人不能諫；優德亦宜玄默，不當讒告。萬石君子，有過不言，對案不食，至優之驗也。夫人之優者，猶能不言，皇天德大，而乃謂之讒告乎？夫天無爲，故不言；災變時至，氣自爲之。夫天地不能爲，亦不能知也。腹中有蟲，腹中疾痛，人不使也，氣自爲之。夫天地之間，猶人背腹之中也。謂

天爲災變，凡諸怪異之類，無小大，薄厚皆天所爲乎？牛生馬，桃生李，如論者之言，天神入牛腹中爲馬，把李實提桃間乎。

牢曰：『子云，吾不試故藝。』又曰：『吾少也賤，故多能鄙事。』人之賤，不用於大者，類多伎能。天尊貴高大，安能撰爲災變以譴告人，且吉凶蜚色見於面，人不能爲色自發也。天地猶人身，氣變猶蜚色，人不能爲蜚色，天地安能爲氣變，然則氣變之見，殆自然也。變自見，色自發，占候之家，因以言也。夫寒溫，譴告變動，招致四疑，皆已論矣。譴告於天道尤詭，故重論之，論之所以難別也。說合於人事，不入於道意，從道不隨事，雖違儒家之說，合黃老之義也。

感類篇

陰陽不和，災變發起；或時先世遺咎，或時氣自然。賢聖感類，慊懼自思，災變惡徵，何爲至乎？引過自責，恐有罪，畏慎恐懼之意，未必有其實事也。何以明之？以湯遭旱，自責以五過也。聖人純完，行無缺失矣，何自責有五過？然如書曰：『湯自責，天應以雨。』湯本無過，以五過自責，天何故雨？以無過致旱，亦知自責不能得雨也。由此言之，旱不爲湯至，雨不應自責。然而前旱後雨者，自然之氣也。此言書之語也。難之曰：『春秋大雩。』董仲舒設土龍，皆爲一時間也。一時不雨，恐懼雩祭，求陰請福，憂念百姓也。湯遭旱七年，以五過自責，謂何時也？夫遭旱一時，輒自責乎？旱至七年，乃自責也。謂一時輒自責，七年乃雨，天應之誠，何其留也。有謂七年乃自責，憂念百姓，何其遲也。不合雩祭之法，不厭憂民之義，書之言未可信也。

由此論之，周成王之雷風發，亦此類也。金縢曰：『秋大熟未穫，天大雷電以風，禾盡偃，大木斯拔，邦人大恐。』嘗此之時，周公死，儒者說之，以爲成王狐疑於周公，欲以天子禮葬公。公人臣也，欲以人臣禮葬公。公有王功，狐疑於葬周公之間，天大雷雨，動怒示變，以彰聖功。古文家以武王崩，周公居攝，管蔡流言，王意狐疑，周公、周公奔

楚故天雷雨以悟成王。夫一雷一雨之變，或以爲莽疑，或以爲信讒，二家未可審。且訂莽疑之說。秋夏之際，陽氣尙盛，未嘗無雷雨也。顧其拔木偃禾，頗爲狀耳。當雷雨時，成王感懼，開金縢之書，見周公之功，執書泣過，自責之深。自責適已，天偶反風。書家則謂天爲周公怒也。千秋萬夏，不絕雷雨，苟謂雷雨爲天怒乎？是則皇天歲歲怒也。正月陽氣發泄，雷聲始動，秋夏陽至極而電折，苟謂秋夏之雷爲天大怒，正月之雷，天小怒乎？雷爲天怒，雨爲恩施。使天爲周公怒，徒嘗雷不當雨，今雨俱至，天怒且喜乎？「子於是日也，哭則不歌。」周禮：「子卯稷食菜羹，哀樂不並行。」哀樂不並行，喜怒反並至乎？

秦始皇帝東封岱嶽，雷雨暴至。劉嫗息大澤，雷雨晦冥。始皇無道，自同前聖，治亂自謂太平，天怒可也。劉嫗息大澤，夢與神遇，是生高祖，何怒於生聖人而爲雷雨乎？堯時大風爲害，堯繳大風於青丘之野。舜入大麓，烈風雷雨，堯舜世之隆主，何過於天，天爲風雨也。大旱春秋雩祭。又董仲舒設土龍，以類招氣。如天應雩龍，必爲雷雨。何則？秋夏之雨，與雷俱也。必從春秋仲舒之術，則大雩龍求怒天乎？師曠奏白雲之曲，雷電下擊，鼓清角之音，風雨暴至。苟謂雷雨爲天怒，天何憎於白雲清角，而怒師曠爲之乎？此雷雨之難也。

又問之曰：「成王不以天子禮葬周公，天爲雷風，偃禾拔木。成王覺悟，執書泣過，天乃反風，偃禾復起。何不爲疾反風以立大木，必須國人起築之乎？」應曰：「天不能。」曰：「然則天有所不能乎？」應曰：「然。」難曰：「孟實推人入仆，接人而起，接人立。天能拔木，不能復起，是則天力不如孟實也。秦時三山亡，猶謂天所徙也。夫木之輕重，孰與三山？能徙三山，不能起大木，非天用力宜也。如謂三山非天所亡，然則雷雨獨天所爲乎？」問曰：「天之欲令成王以天子之禮葬周公，以公有聖德，以公有王功，經曰：「王乃得周公死，自以爲功代武王之說。」今天動應以彰周公之德也。」

難之曰：「伊尹相湯伐夏，爲民與剷除害，致天下太平，湯死復相大甲，大甲佚豫，放之桐宮，攝政三年，乃退復位。周公曰：「伊尹格于皇天。」天所宜彰也。伊尹死時，天何以不爲雷雨？」應曰：「伊尹死，大雩。」

三日。」大霧三日，亂氣矣。非天怒之變也。東漢張翊造百兩篇，其言雖未可信。且假以問天爲雷雨以悟成王。成王未開金匱，雷止乎？已開金匱，雷乃止也。應曰：「未開金匱，雷止也。開匱得書，見公之功，覺悟泣過，決以天子禮葬公，出郊觀變，天止兩反風，禾盡起。」由此言之，成王未覺悟，雷雨止矣。難曰：「伊尹霧三日，天何不三日雷雨，須成王覺悟乃止乎？」太戊之時，桑穀生朝，七日大拱，太戊思政，桑穀消亡。宋景公時，熒守心，出三善言，熒惑徙舍，使太戊不忌政，景公無三善言，桑穀不消，熒惑不徙。何則？災變所以譴告也。所譴告未覺，災變不除，天之至意也。今天怒爲雷雨以責成王，成王未覺，雷雨之息，何其早也？」

又問曰：「禮，諸侯之子稱公子，諸侯之孫稱公孫，皆食采地，殊之庶衆。何則？公子公孫親而又尊，得體公稱，又食采地，名實相副，猶文質相稱也。天彰周公之功，令成王以天子禮葬。何不令成王號周公以周王，副天子之禮乎？」應曰：「王者，名之尊號也，人臣不得名也。」難曰：「人臣猶得名王，禮乎？武王伐紂，下車追王太王、王季、文王。三人者，諸侯，亦人臣也。以王號加之，何爲獨可於三王，不可於周公？天意欲彰周公，豈能明乎？豈以王迹起於三人哉？然而王功亦成於周公。江起岷山，流爲滄海，相滄海之流，孰與初起之源。桓鬯之所爲到，白雉之所爲來，三王乎？周公也？周公功德盛於三王，不加王號，豈天惡人妄稱之哉？周衰六國稱王，齊秦更爲帝，當時天無禁怒之變，周公不以天子禮葬，天爲雷雨以責成王，何天之好惡不純一乎？」

又問曰：「魯季孫賜曾子簣，曾子病而寢之。童子曰：『華爲跪者，大夫之簣。』而有曾子感慚，命元易簣。蓋禮大夫之簣，士不得寢也。今周公，人臣也，以天子禮葬，魂而靈，將安之不已？」應曰：「成王所爲，天之所予，何爲不安？」難曰：「季孫所賜大夫之簣，豈曾子之所自制乎？何獨不安乎？子疾病，子路遣門人爲臣，病間曰：『久矣哉，由之行詐也！無巨而爲有臣，吾誰欺？欺天乎！』孔子罪子路者也，已非人君，子路使門人爲臣，非天之心而妄爲之，是欺天也。周公亦非天子也，以孔子之心況周公，周公必不安也。季氏旅於泰山，孔子曰：『曾謂泰山不如林放乎！』以曾子之細，猶卻非禮，周公至聖，豈安天子之葬？曾謂周公不如曾子乎？由此原之，周公不安也。大人與

天地合德，周公不安，天亦不安，何故爲雷雨以責成王乎？」

又問曰：「死生有命，富貴在天，武王之命，何可代乎？」應曰：「九齡之夢，天奪文王年以益武王，克殷二年之時，九齡之年未盡，武王不豫則請之矣，人命不可請，獨武王可，非世常法，故藏於金縢，不可復爲，故掩而不見。」難曰：「九齡之夢，武王已得文王之年未？」應曰：「已得之矣。」難曰：「已得文王之年，命當自延，克殷二年，雖病猶將不死，周公何爲請而代之？」應曰：「人君爵人以官，議定未之即與，曹下案自然後可諾。」天雖奪文王年以益武王，猶須周公請，乃能得之。命數精微，非一臥之夢所能得也。應曰：「九齡之夢能得也。」難曰：「九齡之夢，文王夢與武王九齡，武王夢帝予其九齡，其天已予之矣。武王已得之矣，何須復請？人且得官，先夢得爵，其後莫舉，猶自得官，何則？兆象先見，其驗必至也。古者謂年爲齡，已得九齡，猶人夢得爵也。周公因必效之夢，請之於天，功安能大乎？」

又問曰：「功無大小，德無多少，人須仰恃賴之者，則爲美矣。使周公不代武王，武王病死，周公與成王而與天下太平乎？」應曰：「成事，周公輔成王而天下不亂，使武王不見代，遂病至死，周公致太平何疑乎？」難曰：「若是，武王之生無益，其死無損，須周公功乃成也。周衰，諸侯背叛，管仲九合諸侯，一匡天下。孔子曰：『微管仲，吾其被髮左衽矣。』假使無管仲，不合諸侯，夷狄交侵，中國絕滅，此無管仲有所傷也。程量有益，管仲之功，偶於周公管仲死，桓公不以諸侯禮葬，以周公況之，天亦宜怒，微雷雨不至，何哉？豈以周公聖而管仲不賢乎？夫管仲爲反坵，有三歸，孔子譏之，以爲不賢。反坵三歸，諸侯之禮，天子禮葬，王者之制，皆以人臣，俱不得爲。大人與天地合德，孔子大人也，譏管仲之僭禮，皇天欲周公之侵制，非合德之驗，書家之說，未可然也。」

以見鳥跡而知爲書，見蜚蓬而知爲車，天非以鳥跡命倉頡，以蜚蓬使奚仲也。奚仲感蜚蓬而倉頡起鳥跡也。晉文反國，命微襲墨，舅犯心感，辭位歸家。夫文公之微襲墨，非欲去舅犯，舅犯感衛，自同於襲墨也。宋華巨弱其宗，使家賊六人，以緞殺華，吳於宋，命令左師之後，左師懼曰：『老夫無罪。』其後，左師怨各華，巨華巨備之，國人

逐瘦狗，瘦狗入華臣之門。華臣以爲左師來攻己也，踰牆而走。夫華臣自殺華吳而左師懼，國人自逐瘦狗而華臣自走，成王之畏懼猶此類也。心疑於不以天子禮葬公，卒遭雷雨之至，則懼而畏過矣。夫雷雨之至，天未必責成王也；雷雨至，成王懼以自責也。夫感則倉頡奚仲之心，懼則左師華臣之意也。懷嫌疑之計，遭暴至之氣，以類之驗見，則天怒之效成矣。見類驗於寂寞，猶感動而畏懼，況雷雨揚軒轅之聲，成王庶幾能不怵惕乎？

迅雷風烈，孔子必變禮，君子聞雷，雖夜衣冠而坐，所以敬雷懼激氣也。聖人君子，於道無嫌，然猶順天變動；況成王有周公之疑，聞雷雨之變，安能不振懼乎？然則雷雨之至也，殆且自天氣，成王畏懼，殆且感物類也。夫天道無爲，如天以雷雨責怒人，則亦能以雷雨殺無道。古無道者多，可以雷雨誅殺其身，必命聖人與師動軍，頓兵傷士，難以一雷行誅，輕以三軍寇敵，何天之不憚煩也？

或曰：『紂父帝乙，射天毆地，游涇渭之間，雷電擊而殺之。斯天以雷電誅無道也。』帝乙之惡，孰與桀紂？鄒伯奇論桀紂惡不如亡秦，亡秦不如王莽。然而桀紂秦莽之地，不以雷電。孔子作春秋，采毫毛之善，貶纖介之惡，采善不論其美，貶惡不溢其過，責小以大，夫人無之。成王小疑，天大雷雨，如定以臣葬公，其變何以過此？洪範稽疑，不悞災變者，人之才不能盡曉，天不以疑責備於人也。成王心疑未決，天以大雷雨責之，殆非皇天之意，書家之說，恐失其實也。

齊世篇

語稱上世之人，侗長佼好，堅彊老壽，百歲左右；下世之人，短小陋醜，夭折早死。何則？上世和氣純渥，婚姻以時，人民稟靈氣而生，生又不傷，骨節堅定，故長大老壽，狀貌美好。下世反此，故短小天折，形面醜惡，此言妄也。夫上世治者聖人也，下世治者亦聖人也。聖人之德，前後不殊，則其治世，古今不異。上世之天下，下世之天下也。天不變易，氣不改更。上世之民，下世之民也，俱稟元氣，元氣純和，古今不異，則稟以爲形體者，何故不同？夫稟氣等則懷性

均懷性均則形體同，形體同則醜好齊，醜好齊則夭壽適。一天一地，並生萬物。萬物之生，俱得一氣。氣之薄渥，萬世若一。帝王治世，百代同道。人民嫁娶，同時共禮。雖言男三十而娶，女二十而嫁，法制張設，未必奉行，何以效之。以今不奉行也。禮樂之制，存見於今。今之人民，肯行之乎？今人不肯行，古人亦不肯舉。以今之人民，知古之人民也。

物，亦物也。人生一世，壽至一百歲。生爲十歲兒時，所見地上之物，生死改易者多。至於百歲，臨且死時，所見諸物，與年十歲時所見，無以異也。使上世下世，民人無有異，則百歲之間，足以卜筮。六畜長短，五穀大小，昆蟲草木，金石珠玉，蛭蜚蠅動，跂行喙息，無有異者，此形不異也。古之水火，今之水火也。今氣爲水火也。使氣有異，則古之水清火熱，而今水濁火寒乎？人生長六七尺，大三四圍，面有五色，壽至於百，萬世不異。如以上世人民，侗長佼好，堅彊老壽，下世反此，則天地初立，始爲人時，長可如防風之君，色如宋朝，壽如彭祖乎？從當今至千世之後，人可長如莢英，色如嫫母，壽如朝生乎？王莽之時，長人生長一丈，名曰霸出；建武年中，潁川張仲師，長一丈二寸；張湯八尺有餘，其父不滿五尺。俱在今世，或長或短，儒者之言，竟非謬也。

語稱上世使民，以宜偃者抱關，侏儒俳優，如皆侗長佼好，安得偃侏之人乎？語稱上世之人，質朴易化，下世之人，文薄難治，故易曰：『上古之世，結繩以治；後世易之以書契。』先結繩易化之故，後書契難治之驗也。故夫宓犧之前，人民至質朴，臥者居居，坐者于于，羣居聚處，知其母不識其父。至宓犧時，人民頗文，知欲詐愚，勇欲恐怯，彊欲凌弱，衆欲暴寡，故宓犧作八卦以治之。至周之時，人民文薄，八卦難復因襲，故文王衍爲六十四首，極其變，使民不倦。至周之時，人民文薄，故孔子作春秋，采毫毛之善，貶纖介之惡，稱曰：『周監於二代，郁郁乎文哉！吾從周。』孔子知世浸弊，文薄難治，故加密致之罔，設纖微之禁，檢狎守持，備具悉極。此言妄也。上世之人，所懷五常也；下世之人，亦所懷五常也。俱懷五常之道，共稟一氣而生，上世何以文薄，彼見上世之民，飲血茹毛，無五穀之食，前世穿地爲井，耕土種穀，飲井食粟，有水火之誥；又見上古農居穴處，衣禽獸之皮；後世易以

宮室，有布帛之飾，則謂上世質朴，下世文薄矣。

夫器業變易，性行不異，然而有質朴文薄之語者，世有盛衰，衰極久有弊也。譬猶衣食之於人也，初成鮮完，始熟香潔，少久穿敗，連日臭茹矣。文質之法，古今所共，一質一文，一衰一盛，古而有之，非獨今也。何以效之？傳曰：『夏后氏之王教以忠，上教以忠，君子忠；其失也，小人野。救野莫如敬，殷王之教以敬，上教用敬，君子敬；其失也，小人鬼。救鬼莫如文，故周之王教以文，上教以文，君子文；其失也，小人薄。救薄莫如忠，』承周而王者，當教以忠。夏所承，唐虞之教薄，故教以忠；唐虞以文教，則其所承有鬼失矣。世人見當今之文薄也，狎侮非之，則謂上世朴質，下世文薄，猶家人子弟不謹，則謂他家子弟謹良矣。

語稱上世之人，重義輕身，遺忠義之事，得已所當，赴死之分明也，則必赴湯趨鋒，死不顧恨。故弘演之節，陳不占之義，行事比類，書籍所載，亡命捐身，衆多非一。今世趨利苟生，棄義妄得，不相勉以義，不相激以行，義廢身不以爲累，行隱事不以相畏，此言妄也。夫上世之士，今世之士也，俱含仁義之性，則其遺事，並有奮身之節。古有無義之人，今有建節之士。管惡難廁，何世無有？述事者好高古而下今，貴所聞而賤所見。辨士則談其久者，文人則著其遠者。近有奇而辨不稱，今有異而筆不記。若夫琅邪兄子明，歲敗之時，兄爲饑人所食，自縛叩頭，代兄爲食，餓人笑其義，兩舍不食。兄死，收養其孤，愛不異於己之子。歲敗穀盡，不能兩活，餓殺其子，活兄之子。臨淮許君叔亦養兄孤子，歲倉卒之時，餓其親子，活兄之子，與子明同義。會稽孟章父英，爲郡決曹掾，郡將搃殺非辜，事至覆考，英引罪自予，卒代將死。事後復爲郡功曹，從役攻賊，兵卒北敗，爲賊所射，以身代將，卒死不去。此弘演之節，陳不占之義，何以異？當今著文書者，肯引以爲比喻乎？比喻之證，上則求虞夏，下則索殷周，秦漢之際，功奇行殊，猶以爲後，又況當今在百代下，言事者目覩見之乎？

畫工好畫上代之人，秦漢之士，功行譎奇，不肯圖。今世之士者，尊古卑今也。貴鵠賤鷄，鵠遠而鷄近也。使當今說道深於孔墨，名不得與之同，立行崇於曾顏，聲不得與之鈞，何則？世俗之性，賤所見，貴所聞也。有人於此，立義

建飾，實核其操，古無以過。爲文書者，肯載於篇籍，表以爲行事乎。作奇論，造新文，不損於前人，好事者肯舍久遠之書，而垂意觀讀之乎。揚子雲作太玄，造法言，張伯松不肯一觀，與之併肩，故賤其言。使子雲在伯松前，伯松以爲金匱矣。

語稱上世之時，聖人德優，而功治有奇，故孔子曰：『大哉堯之爲君也，唯天爲大，唯堯則之。蕩蕩乎民無能名焉！巍巍乎其有成功也！煥乎其有文章也！』舜承堯，不墮洪業，禹襲舜，不虧大功。其後至湯舉兵伐桀，武王把鉞討紂，無巍巍蕩蕩之文，而有動兵討伐之言。蓋其德劣而兵試，武用而化醇，化醇不能相遠之明驗也。及至秦漢，兵革雲擾，戰力角勢，秦以得天下，既得天下，無嘉瑞之美，若『協和萬國，鳳凰來儀』之類，非德劣不及，功薄不若之徵乎。此言妄也。夫天地氣和，即生聖人，聖人之治，即立大功，和氣不獨在古先，則聖人何故獨優。世俗之性好襲古而毀今，少所見而多所聞，又見經傳增賢聖之美，孔子尤大堯舜之功，又堯舜禪而相讓，湯武伐而相奪，則謂古聖優於今，功化渥於後矣。夫經有襲增之文，世有空加之言，讀經覽書者所共見也。孔子曰：『紂之不善，不如是之甚也。』是以君子惡居下流，天下之惡皆歸焉。『世常以桀紂與堯舜相反，稱美則說堯，言惡則舉紂，桀孔子曰：『紂之不善，不如是之甚也。』則知堯舜之德，不若是其盛也。

堯舜之禪湯武之誅，皆有天命，非優劣所能爲，人事所能成也。使湯武在唐虞，亦禪而不伐；堯舜在殷周，亦誅而不讓。蓋有天命之實，而世空生優劣之語。經言協和萬國，時亦有丹朱，鳳凰來儀，時亦有有苗，兵皆動而並用，則知德亦何優劣而大小也。世論桀紂之惡，甚於亡秦，實事者謂亡秦惡甚於桀紂。秦漢善惡相反，猶堯舜桀紂相遠也。亡秦與漢皆在後世，亡秦惡甚於桀紂，則亦知大漢之德不劣於唐虞也。唐之萬國，回增而非實也。有虞之鳳皇，宣帝以五致之矣，孝明帝符瑞並至。夫德優故有可瑞，瑞鉤則功不相下。宣帝孝明如劣，不及堯舜，何以能致堯舜之瑞。光武皇帝龍興與鳳舉，取天下若拾遺，何以不及殷湯。周武，世稱周之成康，不劣文王之隆，堯巍巍不虧堯之盛功也。方今聖明，承光武襲孝明，有夏即盜美之化，無細小毫髮之虧，上何以不遠堯禹，下何以不若

咸感世見五帝三王，事在經傳之上，而漢之記載，尙爲文書，則謂古聖優而功大，後世劣而化薄矣。

宣漢篇

儒者稱五帝三王，致天下太平，漢興以來，未有太平。彼謂五帝三王致太平，漢未有太平者，見五帝三王，聖人也，聖人之德，能致太平，謂漢不太平者，漢無聖帝也，賢者之化，不能太平。又見孔子言：『鳳鳥不至，河不出圖，吾已矣夫。』方今無鳳鳥河圖，瑞頗未至，悉具，故謂未太平。此言妄也。夫太平以治定爲效，百姓以安樂爲符。孔子曰：『修己以安百姓，堯舜其猶病諸！』百姓安者，太平之驗也。夫治人以人爲主，百姓安而陰陽和，陰陽和則萬物育，萬物育則奇瑞出。視今天下，安平危乎？安則平矣，瑞則未具，無害於平。故夫王道，定事以驗，立實以效，效驗不彰，實誠不見，時哉實然，證驗不具，是故王道，立事以實，不必具驗。聖主治世，期於平安，不須符瑞。

且夫太平之瑞，猶聖主之相也。聖主骨法未必同，太平之瑞何爲當等？彼聞堯舜之時，鳳凰景星皆見，河圖洛書皆出，以爲後王治天下，當復若等之物，乃爲太平。用心若此，猶謂堯當復比齒，舜當復八眉也。夫帝王聖相，前後不同，則得瑞古今不等。而今王無鳳鳥河圖，爲未太平，妄矣。孔子言鳳鳥河圖者，假前瑞以爲語也，未必謂世當復有鳳鳥與河圖也。夫帝王之瑞，衆多非一，或以鳳鳥麒麟，或以河圖洛書，或以甘露醴泉，或以陰陽和調，或以百姓入安。今瑞未必同於古，古應未必合於今。遭以所得，未必相襲，何以明之？以帝王興起，命祐不同也。周則烏魚，漢斬大蛇，推論唐虞，猶周漢也。初興始起，事效物氣，無相襲者。太平瑞應，何故當鈞？以已至之瑞，效方來之應，猶守株待兔之蹊，藏身破置之路也。天下太平，瑞應各異，猶家人畜殖，物不同也。或積米穀，或藏布帛，或畜牛馬，或長田宅。夫樂米穀不愛布帛，歡牛馬不美田宅，則謂米穀愈布帛，牛馬勝田宅矣。今百姓安矣，符瑞至矣，終謂古瑞河圖鳳凰不至，謂之未安，是猶食稻之人，入飯糗之鄉，不見稻米，謂糗爲非穀也。實者天下已太平矣，未有聖人，何以致之？未見鳳凰，何以效實？問世儒不知聖，何以知今無聖人也？世人見鳳凰，何以知之？既無以知之，

何以知今無鳳凰也。委不能知有聖與無，又不能別鳳凰是鳳與非，則必不能定今太平與未平也。

孔子曰：『如有王者，必世然後仁，三十年而天下平。』漢興至文帝時，二十餘年。賈誼創議，以爲天下洽和，當改正朔服色制度，定官名，興禮樂。文帝初即位，謙讓未遑。夫如賈生之議，文帝時已太平矣。漢興二十餘年，應孔子之言，必世然後仁也。漢一代之年數已滿，太平立矣。賈生知之，況至今且三百年，謂未太平，謬也。且孔子所謂一世，三十年也。漢家三百歲，十帝耀德，未平如何？夫文帝之時，固已平矣。歷世持平矣。至平帝時，前漢已滅，光武中興，復致太平。

問曰：『文帝有瑞，可名太平，光武無瑞，謂之太平，如何？』曰：夫帝王瑞應，前後不同，雖無物瑞，百姓甯集，風氣調和，是亦瑞也。何以明之？帝王治平，升封泰山，告安也。秦始皇升封泰山，遭雷雨之變，治未平，氣未和。光武皇帝升封，天晏然無雲，太平之應也。治平氣應，光武之時，氣和人安，物瑞等至，人氣已驗，論者猶疑。孝宣皇帝元康二年，鳳凰集於泰山，後又集於新平。四年，神雀集於長樂宮，或集於上林，九真獻麟。神雀二年，鳳凰甘露，降集京師。四年，鳳凰下杜陵及上林。五鳳三年，帝祭南郊，神光並見，或與子谷，燭耀齋宮，十有餘日。明年祭后土，靈光復至，至如南郊之時。甘露神雀，降集延壽萬歲宮。其年三月，鸞鳳集長樂宮東門中樹上。甘露元年，黃龍至，見于新豐，醴泉滂流，彼鳳凰雖五六至，或時一鳥而數來，或時異鳥而各至。麒麟神雀，黃龍鸞鳥，甘露醴泉，祭后土天地之時，神光靈耀，可謂繁盛累積矣。孝明時雖無鳳凰，亦致麒麟，甘露醴泉，神雀白雉，紫芝嘉禾，金出鼎見，離本復合。五帝三王，經傳所載，瑞應莫盛孝明。如以瑞應效太平，宣明之年，倍五帝三王也。夫如是，孝宣孝明，可謂太平矣。能致太平者，聖人也。世儒何以謂世未有聖人。天之稟氣，豈爲前世者渥，後世者伯哉？周有三聖，文王武王周公，並時猥出。漢亦一代也，何以當少於周？周之聖王，何以當多於漢？漢之高祖光武，周之文武也。文帝武帝宣帝孝明今上，過周之成康宣王，非以身生漢世，可褒增頌歎，以求媚稱也。核事理之情，定說者之實也。俗好褒遠稱古，謙瑞上世爲美，論治則古王爲貴，隨奇於今，慙不信。然使壽祿更生，恐無聖名，稱者獲免，觀者榮德，不見論者。

之心不願也。是故魏於齊不虞魯，遊於趙不懷宋，唐虞夏殷同載在二尺四寸；儒者推讀，朝夕講習，不見漢書，謂漢劣不若，亦觀獵不見漁，游齊楚不願宋魯也。使漢有宏文之人，經傳漢事，則尙書春秋也。儒者宗之，學而習之，將襲舊六爲七，今上上王至高祖，皆爲聖帝矣。觀杜撫班固等所上漢頌，頌功德符瑞，汪濊深廣，滂沛無量，踰唐虞入皇城，三代隘辟，厥深濤沮也。殷監不遠，在夏后之世，且舍唐虞夏殷，近與周家斷量功德，實商優劣，周不如漢。

何以驗之？周之受命者，文武也；漢則高祖光武也。文武受命之降怪，不及高祖光武初起之祚。孝宣明之瑞，笑於周之成康宣王。孝宣孝明符瑞，唐虞以來，可謂盛矣。今上卽命，奉成持滿，四海混一，天下定甯，物瑞已極，人應訂隆。唐世黎民雍熙，今亦天下修仁，歲遠運氣，穀頗不登，迥路無絕道之憂，深幽無屯聚之姦。周家越常獻白雉，方今匈奴鄧等哀牢貢獻牛馬。周時僅治五千里內，漢氏廓土，收荒服之外，牛馬珍於白雉，近屬不若遠物，古之戎狄，今爲中國；古之裸人，今被朝服；古之露首，今冠章甫；古之跣附，今履商屨。以盤石爲沃田，以桀暴爲良民；夷埴埴爲平均，化不賓爲齊民；非太平而何？夫實德化則周不能過漢，論符瑞則漢盛於周，度土境則周狹於漢，漢何以不如周？獨謂周多聖人，治致太平，儒者稱聖泰隆，使聖卓而無跡，稱治亦泰盛，使太平絕而無續也。

恢國篇

顏淵喟然歎曰：『仰之彌高，鑽之彌堅。』此言顏淵學於孔子，積累歲月，見道彌深也。宣漢之篇，高漢於周，擬漢過周，論者未極也。恢而極之，彌見漢奇。夫經熟講者，要妙乃見。國極論者，恢奇彌出。恢論漢國，在百代之上，審矣。何以驗之？黃帝有涿鹿之戰，堯有丹水之師，舜時有苗不服，夏啓有扈叛逆，高宗伐鬼方，三年剋之；周成王管蔡悖亂，周公東征，前代皆然，漢不聞此。高祖之時，陳繡反，彭越叛，治始安也；孝景之時，吳楚興兵，怨亂錯也；匈奴時擾，正朔不及；天荒之地，王功不加兵，今皆內附，貢獻牛馬，此則漢之威盛，莫敢犯也。

紂爲至惡，天下叛之。武王舉兵，皆願就戰，八百諸侯，不期俱至。項惡微號而用兵，與高祖俱起，威力輕重，未有所定，則項羽力勁，折鐵難於摧木。高祖誅項羽，折鐵，武王伐紂，摧木，然則漢力勝周多矣。凡克敵一則易，二則難。湯武伐桀紂，一敵也；高祖誅秦殺項，秦勝二家，力倍湯武。武王爲殷西伯，臣事於紂，以臣伐君，夷齊恥之，扣馬而諫。武王不聽，不食周粟，餓死首陽。高祖不爲秦臣，光武不仕王莽，誅惡伐無道，無伯夷之譏，可謂順於周矣。丘山易以起高，淵濤易以爲深。起於微賤，無所因階者難；襲爵乘位，尊祖統業者易。堯以唐侯入嗣帝位，舜以司徒因堯授禪，禹以司空緣功代舜，湯由七十里，文王百里，武王爲西伯襲文王位，三郊五代之起，皆有因緣，力易爲也。高祖從亭長，提三尺劍取天下；光武由白水，奮威武海內，無尺土所因，一位所乘，直奉天命，推自自然。此則起高於淵濤，爲深於丘山也。比方五代，孰者無優？

傳書或稱武王伐紂，太公陰謀，食小兒以丹，令身純赤長大，教言殷亡。殷民見兒身赤，以爲天神，及言殷亡，皆謂商滅。兵至牧野，晨舉脂燭，姦謀惑民，權掩不備，周之所諱也。世謂之虛。漢取天下，無此虛言。武成之篇，言周伐紂，血流浮杵，以武成言之，食兒以丹，晨舉脂燭，殆且然矣。漢伐亡新，光武將五千人，王莽遣二公將三萬人，戰于昆陽，雷雨晦冥，前後不相見。漢兵出昆陽城，擊二公軍，一而當十。二公兵敗，天下以雷雨助漢威敵，孰與舉脂燭以人事譎取殷哉？

或云：『武王伐紂，紂赴火死，武王就斬以劍，懸其首於大白之旌。』齊宣王憐覺鐘之牛，睹其色之殷，鮓也。楚莊王赦卬伯之罪，見其肉袒而形暴也。君子惡不惡其身，紂屍赴於火中，所見懷愴，非徒色之殷，鮓之暴形也；就斬以劍，懸乎其首，何其忍哉？高祖入咸陽，閭樂誅二世，項羽殺子嬰，高祖雍容入秦，不戮二屍。光武入長安，劉聖公已誅王莽，乘兵卽害，不刃王莽之死。夫斬赴火之首，與貫被刃者之身，德虐孰大也？豈以髮里之恨哉？以人君拘人臣，其逆孰與秦奪周國，莽耽平帝也？鄒伯奇論桀紂之惡，不若亡秦亡秦，不若王莽。然則紂惡微而周誅之痛，秦罪重而漢伐之輕，寬狹誰也？

高祖母姪之時，蛟龍在上，夢與神遇，好酒，貴飲，酒舍負簾，及醉留臥，其上常有神怪，夜行，斯蛇，蛇，延悲哭，與呂后俱之田廬，時自隱匿，光氣暢見，呂后輒知，始望見東南有天子氣，及起，五星聚於東井，楚望漢軍，雲氣五色，光武旦生，鳳凰集於城，嘉禾滋於屋，皇妣之身，夜半無燭，空中光明，初者蘇伯阿望春陵，氣鬱鬱葱葱，光武起過舊感，見氣，憤憤上屬於天，五帝三王，初王始起，不聞此怪，堯母感於赤龍，及起，不聞奇祐，禹母吞薏苡，將生得玄圭，契母咽鵲子，湯起白狼銜鉤，后稷母履大人之跡，文王起得赤雀，武王得魚鳥，皆不及漢，太平之瑞，黃帝堯，鳳凰一至，凡諸衆瑞，重至者希，漢文帝黃龍玉棓，武帝黃龍麒麟連木，宣帝鳳凰五至，麒麟神雀，甘露醴泉，黃龍神光，平帝白雉黑雉，孝明麒麟神雀，甘露醴泉，白雉黑雉，芝草連木嘉禾，與宣帝同，奇有神鼎，黃金之怪，一代之瑞，累仍不絕，此則漢德豐茂，故瑞祐多也，孝明天崩，今上嗣位，元二之間，嘉德布流，三年零陵生芝草五本，四年甘露降五縣，五年芝復生，六年黃龍見，大小凡八，前世龍見不雙，芝生無二，甘露一降，而今八龍並出，十一芝累生，甘露流五縣，德惠盛熾，故瑞繁夥也，自古帝王，孰能致斯。

儒者論曰：『王者推行道德，受命於天。』論衡初集，以爲王者生稟天命，性命難審，且兩論之，酒食之賜，一則爲薄，再則爲厚，如儒者之言，五代皆一受命，唯漢獨再，此則天命於漢厚也，如審論衡之言，生稟自然，此亦漢家所稟厚也，絕而復屬，死而復生，世有死而復生之人，人必謂之神，漢統絕而復屬，光武存亡，可謂優矣，武王伐紂，庸蜀之夷，佐戰牧野，成王之時，越常獻雉，倭人貢黿，幽厲衰微，戎狄攻周，平王東走，以避其難，至漢四夷朝貢，孝平元始元年，越裳重譯，獻白雉一黑雉二，夫以成王之賢，輔以周公，越常獻一，平帝得三，後至四年，金城塞外，完夏橋橋種良願等，獻其魚鹽之地，願內屬漢，遂得西王母石室，因爲西海郡，周時戎狄攻王，至漢內屬，獻其寶地，西王母國在絕極之外，而漢屬之，德孰大，壤孰廣。

方今哀牢，鄯善，諾降附歸德，匈奴時擾，遣將攘討，獲虜生口千萬數，夏禹保入吳國，太伯探藥，斷髮文身，唐虞國界，吳爲荒服，越在九夷，屬衣關頭，今皆夏服，褒衣履舄，巴蜀越徭，鬱林日南，遼東樂浪，周時被髮椎髻，今戴皮

弁周時重譯。今吟詩書春秋之義。君親無將。將而必誅。廣陵王荆迷於嬖巫。楚王英惑於俠客。事情列見。孝明三
宥。二王吞藥。周誅管蔡。違斯遠矣。楚外家許氏。與楚王謀議。孝明曰。『許氏有屬於王。』欲王尊貴。人情也。聖心
原之。不繩於法。隱疆侯傳懸書市里。誹謗聖政。令上悔思。犯奪爵土。惡其人者。情其有餘。立二王之子。安楚廣陵
疆弟員嗣。祀陰氏。二王帝族也。位爲王侯。與管蔡同。管蔡滅嗣。二王立後。恩已衰矣。隱疆異姓也。尊重父祖。復存
其祀。立武庚之義。繼祿父之恩。方斯羸矣。何則。並爲帝王。舉兵相征。貪天下之大。絕成湯之統。非聖王之義。失承
天之意也。隱疆臣子也。漢統自在。絕滅陰氏。無損於義。而猶存之。惠滂沛也。故夫雨露之施。內則注於骨肉。外則
布於他族。唐之晏晏。舜之蒸蒸。豈能踰此。

驪兜之行。靖言庸回。共工私之。稱薦於堯。三苗巧佞之人。或言有罪之國。鯀不能治水。知力極盡。罪皆在身。不
加於上。唐虞放流。流於不毛。怨惡謀上。懷挾叛逆。考事失實。誤國殺將。罪惡重於四子。孝明加恩。則論徙邊。今上
寬惠。還歸州里。開闢以來。恩莫斯大。晏子曰。『鉤星在房心之間。地其動乎。』夫地動天時。非政所致。皇帝振畏。
猶歸於治。廣徵賢良。訪求過闕。高祖之側身。周成之開匱。勵能遠此。穀登歲平。庸主因緣。以建德政。顛沛危殆。聖
哲優者。乃立功化。是故微病。恆醫皆巧。篤劇扁鵲乃夏。建初孟年。無妄氣。至歲之疾疫也。比旱不雨。牛死民流。可
謂劇矣。皇帝敦德。俊乂在官。第五司空。股肱國維。轉穀振贍。民不乏餓。天下慕德。雖危不亂。民饑於穀。飽於道德。
身流在道。心回鄉內。以故道路無盜賊之跡。深幽迢絕。無劫奪之姦。以危爲寧。以困爲通。五帝三王。孰能堪斯哉。

驗符篇

永平十一年。廬江皖侯國。民際有湖。皖民小男。曰陳簪。陳挺。年皆十歲以上。相與釣與湖涯。挺先釣。簪後往。簪
問挺曰。『釣寧得乎。』挺曰。『得。』簪即歸取竿綸。去挺四十步所。見湖涯有酒罈。色正黃。浸水中。簪以爲銅也。
涉水取之。滑重不能舉。挺望見號曰。『何取。』簪曰。『是有銅。不能舉也。』挺往助之。涉水未持。樽頓衍更爲盟。

聲動見行入深淵中，復不見。掘留，見如錢等，正黃，數百千枚，即共撿，各得滿手，走歸示其家，爵父固，故免吏。字君賢，驚曰：『安所得此？』爵言其狀。君賢曰：『此黃金也！』即馳與爵往，到金處，水中尙多。賢自涉水撿取，爵挺鄰伍並闖，俱競探之，合得十餘斤。賢自言於相，相言太守，太守遣吏收取，遣門下掾程躬奉獻，具言得金狀，詔書曰：『如章則可，不如章，有正法。』躬奉詔書，歸示太守，太守以下，思省詔書，以爲疑隱，言之不實，苟飾美也，即復因卻上得黃金實狀，如前章，事寢十二年。賢等上書曰：『賢等得金湖水，中郡牧獻訖，今不得直。』詔書下廬江，上不昇賢等金直狀，郡上賢等所探金自官湖中，非賢等私瀆，故不與直。十二年，詔書曰：『視時金價昇賢等金直。』漢瑞非一金，出奇怪，故獨紀之。

金玉神寶，故出詭異。金物色先爲酒罇，後爲盃盤，動行入淵，豈不怪哉！夏之方盛，遠方圖物，貢金九牧，禹謂之瑞，鑄以爲鼎。周之九鼎，遠方之金也，人來貢之，自出於淵者，其實一也，皆起盛德，爲聖王瑞。金玉之世，故有金玉之應。文帝之時，玉楮見，金之與玉，瑞之最也。金聲玉色，人之奇也。永昌郡中亦有金焉，纖靡大如黍粟，在水涯沙中，民探得，日重五銖之金，一色正黃。土生金，土色黃，漢土德也，故金化出。金有三品，黃比見者，黃爲瑞也。圯橋老父，遺張良書，化爲黃石，黃石之精，出爲符也。夫石，金之類也，質異色鈞，皆土瑞也。

建初三年，零陵泉陵女子傅寧宅，土中忽生芝草五本，長者尺四五寸，短者七八寸，莖葉紫也，蓋紫芝也。太守沈鄴遣門下掾衍盛奉獻。皇帝悅，賜錢衣食，詔會公卿郡國上計吏民皆在，以芝告示天下。天下並聞，吏民歡喜，咸知漢德豐雅，瑞應出也。四年，甘露下泉陵，零陵洮陽始安冷道五縣榆栢梅李，葉皆洽薄，威委流瀝，民嗽吮之，甘如飴蜜。五年，芝草復生泉陵男子周服宅上六本，色狀如三年。——芝并前凡十一本。湘水去泉陵七里，水上聚石曰燕室丘。臨水有俠山，其下巖陰，水深不測。二黃龍見，長出十六丈，身大於馬，舉頭顧望，狀如圖中畫龍，燕室丘民皆觀見之。去龍可數十步，又見狀如駒馬，小大凡六，出水遨戲陵上——蓋二龍之子也，并二龍爲八，出移一時乃入。

宣帝時，鳳凰下彭城，彭城以聞。宣帝詔侍中宋翁一翁一曰：『鳳凰當下京師，集於天子之郊，乃遽下彭城，不可收，與無下等。』宣帝曰：『方今天下合爲一家，下彭城與京師等耳，何令可與無下等乎？』令左右通經者，語難翁一翁一窮，免冠叩頭謝。宣帝之時，與今無異。鳳凰之集，黃龍之出，鉤也，彭城、零陵，遠近同也。帝宅長遠，四表爲界，零陵在內，猶爲近矣。魯人公孫臣，孝文時言漢土德，其符黃龍，當見，其後黃龍見於成紀。成紀之遠，猶零陵也。孝武、孝宣時，黃龍皆出。黃龍比出，於茲爲四，漢竟土德也。

賈誼創議於文帝之朝，云：『漢色當尙黃，數以五爲名。』賈誼，智靈之臣，云色黃數五，土德審矣。芝生於土，土氣和，故芝生。土爰稼穡，稼穡作甘，故甘露集。龍見往世不雙，維夏盛時，二龍在庭。今龍雙出，應夏之數，治諧偶也。龍出往世，其子希出，今小龍六頭並出，邀戲象乾坤六子，嗣後多也。唐虞之時，百獸率舞，今亦八龍邀戲，夏久芝草延年，仙者所食，往世生出，不過一二，今并前後凡十一本，多獲壽考之徵，生育松喬之糧也。甘露之降，往世一所，今流五縣，應土之數，德布獲也。皇瑞比見，其出不空，必有象焉，隨德是樂。孔子曰：『知者樂，仁者壽。』皇帝聖人，故芝草壽徵生。黃爲土色，位在中央，故軒轅德優，以黃爲號。皇帝寬惠，德侔黃帝，故龍色黃，示德不異。東方曰仁，龍，東方之獸也。皇帝聖人，故仁瑞見。仁者養育之味也。皇帝仁惠愛黎民，故甘露降。龍，潛藏之物也。陽見於外，皇帝聖明，招拔巖穴也。瑞出必由嘉士，祐至必依吉人也。天道自然，厥應偶合。聖主獲瑞，亦出羣賢。君明臣良，庶事以康。文武受命，力亦周邵也。

須頌篇

古之帝王建鴻德者，須鴻筆之臣。褒頌紀載，鴻德乃彰，萬世乃聞。問說書者：『欽明文思以下，誰所言也？』曰：『篇家也。』篇家誰也？『孔子也。』然則孔子，鴻筆之人也。自衛反魯，然後樂正，雅頌各得其所也。鴻筆之裔，蓋斯時也。或問尚書曰：『尚者上也，上所爲，下所書也。』『下者誰也？』曰：『巨子也。』然則巨子，書上所爲矣。

問儒者，「禮言制，樂言作，何也？」曰：「禮者上所制，故曰制；樂者下所作，故曰作。天下太平，頌聲作。」方今天下太平矣，頌詩樂聲可以作，未傳者不知也，故曰拘儒。衛孔悝之鼎銘，周臣勸行，孝宣皇帝稱頌川太守黃霸有治狀，賜金百斤。漢臣勉政，夫以人王頌稱臣子，臣子當褒君父，於義較矣。虞氏天下太平，變歌辭德，宣王惠周，詩頌其行，召伯述職，周歌棠樹，是故周頌三十一，殷頌五，魯頌四，凡頌四十篇，詩人所以嘉上也。由此言之，臣子當頌明矣。

儒者謂漢無聖帝，治化未太平。宣漢之篇，論漢已有聖帝，治已太平，恢國之篇，極論漢德非常，實然，乃在百代之上。表德頌功，宣褒主上。詩之頌言，右臣之曲也。舍其家而觀他人之室，忽其父而稱異人之翁，未薦德也。漢今天下之家也，先帝，今上，民臣之翁也。夫曉主德而頌其美，識國奇而恢其功，孰與疑暗不能也。

孔子稱「大哉堯之爲君也，唯天爲大，唯堯則之，蕩蕩乎民無能名焉！」或年五十，擊壤於塗，或曰：「大哉堯之德也。」擊壤者曰：「吾日出而作，日入而息，鑿井而飲，耕田而食，堯何等力？」孔子乃言大哉堯之德者，乃知堯者也。涉聖世不知聖主，是則盲者不能別青黃也；如聖主不能頌，是則暗者不能言是非也。然則方今盲暗之儒，與唐擊壤之民，同一才矣。夫孔子及唐人言大哉者，知堯德，蓋堯盛也。擊壤之民，云「堯何等力」，是不知堯德也。

夜舉燈燭，光曜所及，可得度也；日照天下，遠近廣狹，難得量也。浮於淮濟，皆知曲折；入東海者，不曉南北。故夫廣大從橫難數，極深揭厲難測。漢德鄼廣，日光海外也。知者知之，不知者不知。漢盛也，漢家著書，多上及殷周諸子並作，皆論他事，無褒頌之言，論衡有之。又詩頌國名，周頌與杜撫固所上漢頌相依頌也。

宣帝之時，畫圖漢列士，或不在於畫上者，子孫恥之。何則？父祖不賢，故不畫圖也。夫頌言非徒畫文也，如千世之後，讀經書不見漢美，後世怪之。故夫古之通經之臣，紀主令功，記於竹帛，頌上令德，刻於鼎銘。文人涉世，以此自勉，漢德不及六代，論者不德之故也。地有丘垤，故有高平，或以鐃錡，平而夷之，爲平地矣。世見五帝三王爲經

書，漢事不載，則謂五三優於漢矣。或以論爲鏗錘損三五，少豐滿漢家之下，豈徒並爲平哉。漢將爲丘，五三轉爲垮矣。湖池非一，廣狹同也。樹竿測之，深淺可度。漢與百代，俱爲主也。實而論之，優劣可見。故不樹長竿，不知深淺之度。無論衡之衡，不知優劣之實。漢在百代之末，上與百代料德，湖池相與比也。無鴻筆之論，不免庸庸之名。論好稱古而毀今，恐漢將在百代之下，豈徒同哉。

證者，行之跡也。證之笑者，成宣也。惡者，靈厲也。成湯遭旱，周宣亦然。然而成湯加戒，宣王言宣，無妄之災，不能虧政。臣子累證，不失實也。由斯以論堯，堯亦笑證也。時亦有洪水，百姓不安，猶言堯者，得實考也。夫一字之證，尙猶明主。况千言之論，萬文之頌哉。

船車載人，孰與其徒多也。素車朴船，孰與加漆采畫也。然則鴻筆之人，國之船車采畫也。農無疆夫，穀粟不登，國無疆文，德闇不彰。漢德不休，亂在百代之間，彊筆之儒不著載也。高祖以來，著書非不講論。漢司馬長卿爲封禪書，文約不具。司馬子長紀黃帝以至孝武，揚子雲錄宣帝以至哀平，陳平仲紀光武，班孟堅頌孝明，漢家功德，頗可觀見。今上卽命，未有褒載。論衡之人，爲此畢精，故有齊世宣漢，恢國驗符。

龍無雲雨，不能參天；鴻筆之人，國之雲雨也。載國德於傳書之上，宣昭名於萬世之後，厥高，非徒參天也。城牆之士，平地之壤也。人加築蹈之力，樹立臨池，國之功德，崇於城牆；文人之筆，動於築蹈。聖主德盛功立，莫不褒頌紀載，奚得傳馳流去無疆乎。人有高行，或譽得其實，或欲稱之不能言，或謂不善，不肯陳一辭。此三者，孰者爲賢？五三之際，於斯爲盛。孝明之時，衆瑞並至，百官臣子，不爲少矣。唯班固之徒，稱頌國德，可謂譽得其實矣。頌文詞以奇，彰漢德於百代，使帝明如日月，孰與不能言，言之不美善哉。

秦始皇東南遊，升會稽山，李斯刻石，紀頌帝德。至瑯琊亦然。秦無道之國，刻石文世，觀讀之者，見堯舜之美，由此言之，須頌明矣。當今非無李斯之才也，無從升會稽，歷瑯琊之階也。絃歌爲妙異之曲，坐者不曰善，弦歌之人，必怠不精。何則？妙異難爲，觀者不知善也。聖國揚妙異之政，衆臣不頌，將頌其美，安得所施哉。今方叔之書，在竹

帛無主名，所從生出，見者忽然不卸服也。如題曰甲甲某子之方，若言已陰，嘗試人爭刻焉，以爲珍秘，上書於國，記奏於郡，譽薦士吏，稱術行能，章下記出，士吏賢妙，何則？章表其行，記明其才也。國德溢藏，莫有宣褒，使聖國大漢，有庸庸之名，咎在俗儒不實論也。

古今聖王不絕，則其符瑞亦宜累屬。符瑞之出，不同於前，或時已有，世無以知，故有講論。俗儒好長古而短今，言瑞則渥前而薄後，是應變而定之，漢不爲少。漢有實事，儒者不稱。古有虛美，誠心然之。信久遠之僞，忽近今之實，斯蓋三增九虛，所以成也。能聖實聖，所以興也。儒者稱聖過實，稽合於漢，漢不能及，非不能及，儒者之說，使難及也。實而論之，漢更難及。穀熟歲平，聖王因緣，以立功化，故治期之篇，爲漢激發。治有期，亂有時，能以亂爲治者，優；優者有之。建初，孟年無妄氣，至聖世之期也。皇帝執德，救備其災，故順鼓明零，爲漢應變。是故災變之至，或在聖世，時旱禍，堪爲漢論災，是故春秋爲漢制法，論衡爲漢平說。從門應庭，聽堂堂之言，什而失九，如升堂闔室，百不失一。論衡之人，在古荒流之地，其遠非徒門庭也。

日刻徑重千里，人不謂之廣者，遠也。望夜甚兩，月光不暗，人不覩曜者，隱也。聖者垂日月之明，處在中州，隱於百里，遙聞傳授，不實形耀，不實難論，得詔書到，計吏至，乃聞聖政。是以褒功失邱山之積，頌德遺膏腴之美，使至臺閣之下，蹈班賈之跡，論功德之實，不失毫釐之微。武王封比干之墓，孔子顯三累之行，大漢之德，非直比干三累也。道立國表，路出其下。望國表者，昭然知路。漢德明著，莫立邦表之言。故浩廣之德，未光於世也。

佚文篇

孝武皇帝封弟爲魯恭王。恭王壞孔子宅以爲宮，得佚尙書百篇，禮三百，春秋三百篇，論語二十一篇，圖絃歌之聲，懼復封塗，上言武帝。武帝遣吏發取，古經論語，此時皆出，經傳也，而有絃歌之聲，文當興於漢。喜樂得闔之祥也，當傳於漢。寢藏牆壁之中，恭王闔之，聖王感動，絃歌之象。此則古文不當掩，漢侯以爲符也。孝成皇帝讀百

篇尚書博士郎吏莫能曉知，徵天下能爲尚書者，東海張霸通左氏春秋，案百篇序，以左氏訓詁，造作百二篇，具成奏上。成帝出秘書，以校考之，無一字相應者。成帝下霸於吏，吏當器辜大不謹敬。成帝奇霸之才，赦其辜，亦不減其經，故百二篇書傳在民間。孔子曰：「才難。」能推精思，作經百篇，才高卓過，希有之人也。成帝赦之，多其文也，雖森非實。次序篇句，依倚事類，有似真是，故不燒滅之。疏一積相違以書，書數十札，奏記長吏，文成可觀，讀之滿意，百不能一。張霸推精思至於百篇，漢世實類，成帝赦之，不亦宜乎？楊子山爲郡上計吏，見三府爲哀，牢傳不能成，歸郡作上，孝明奇之，徵在蘭臺。夫以三府掾吏，養積成才，不能成一篇，子山成之，上覽其文。子山之傳，豈必審是？傳聞依爲之有狀，會三府之士，終不能爲子山爲之，斯須不難。成帝赦張霸，豈不有以哉？

孝武之時，召百官對策，董仲舒策文最善。王莽時，使郎吏上奏，劉子駿章尤美。美善不空，才高知深之驗也。易曰：「聖人之情見於辭。」文辭美惡，足以觀才。永平中，神雀羣集，孝明詔上爵頌，百官頌上，文皆比瓦石。唯班固賈逵傳毅楊終侯調五頌金玉，孝明覽焉。夫以百官之衆，郎吏非一，唯五人文善，非奇而何？孝武善子虛之賦，徵司馬長卿，孝成玩弄衆書之多，善揚子雲，出入遊獵，子雲乘從，使長卿桓桓，君子雲作吏，書所不能盈牘，文所不能成句，則武帝何貪，成帝何欲？故曰：玩揚子雲之篇，樂於居千石之官，挾桓君山之書，富於積猶頤之財。

韓非之書，傳在秦庭。始皇歎曰：「獨不得與人同時。」陸賈新語，每奏一篇，高祖左右，稱曰：「萬歲。」夫嘆思其人，與喜稱萬歲，豈可空爲哉？誠見其美，懼氣發於內也。候氣變者，於天不於地，天文明也。衣裳在身，文著於衣，不在於裳，衣法天也。察掌理者，左不觀右，左文明也。占在右不觀左，右文明也。易曰：「大人虎變，其文炳；君子豹變，其文蔚。」又曰：「觀乎天文，觀乎人文。」此言天人以文爲觀，大臣君子，以文爲操也。高祖在母身之時，息於澤陂，蛟龍在上，龍鱗炫耀，及起，楚望漢軍，氣成五采，將入咸陽，五星聚東井，星有五色，天或者憎秦，滅其文章，欲漢興之，故先受命，以文爲瑞也。

惡人操意，前後乖違，始皇前讀韓非之書，後惑李斯之讒，播五經之文，設採書之律。五經之書，猶經書也，伏生

之徒竄藏土中，矜聖賢之文，厥深厚重，嗣不及孫。李斯創議，身伏五刑。漢興易亡，秦之軌創李斯之跡，高祖始令陸賈造書，未與五經。惠景以至元成，經書並修，漢朝都鄙，厥語所聞，孰與亡秦？王莽無道，漢軍雲起，臺閣廢壞，文書棄散。光武中興，修存未詳。孝明世好文人，並徵蘭臺之官，文雄會聚。今上卽令詔求亡失，購募以金，安得不有好文之聲？唐虞既遠，所在書散。殷周頗近，諸子存焉。漢興以來，傳文未遠，以所聞見，伍唐虞而什殷周，煥炳都郁，莫盛於斯。天曇曠者，星辰曉爛，人注奇者，掌文藻炳。漢今爲盛，故文繁湊也。

孔子曰：『文王既歿，文不在茲乎？』文王之文，傳在孔子；孔子爲漢制文，傳在漢也。受天之文，文人宜遵五經大藝爲文，諸子傳書爲文，造論著說爲文，上書奏記爲文，文德之操爲文。立五文在世，皆當賢也。造論著說之文，尤宜勞焉。何則？發胸中之思，論世俗之事，非徒輒古，經續故文也。論發胸臆，文成乎中，非說經藝之人所能爲也。周秦之際，諸子並作，皆論他事，不頌主上，無益於國，無補於化。造論之人，頌上恢國，國業傳在千載，主德參貳日月，非適諸子傳書所能並也。上書陳便宜，奏記薦吏士，一則爲身，二則爲人，繁文麗辭，無上書文德之操，治身完行，徇利爲私，無爲主者。夫如是，五文之中，論者之文多矣，則可尊明矣。

孔子稱周曰：『唐虞之際，於斯爲盛。』周之德，其可謂至德已矣。『孔子，周之文人也。』殷生漢世，亦稱漢之至德矣。趙佗王南越，倍主滅使，不從漢制，箕踞椎髻，沈溺夷俗。陸賈說以漢德，懼以帝威，心覺醒悟，蹶然起坐。世儒之愚，有趙佗之惑，鴻文之人，陳陸賈之說，觀見之者，將有蹶然起坐。趙佗之悟，漢氏浩爛，不有殊卓之聲，文人之休國之符也。

望豐屋知名家，睹喬木知舊都。鴻文在國，聖世之驗也。孟子相人以眸子焉，心清則眸子瞭，瞭者，目文瞭也。夫候國占人，同一實也。國君聖而文人聚，人心惠而目多采。蹀躞文錦於泥塗之中，聞見之者，莫不痛心；知文錦之可惜，不知文人之當尊，不通類也。天文人文，文豈徒調墨弄筆，爲美麗之觀哉？載人之行，傳人之名也。每人願載，思勉爲善，邪人惡載，力自禁裁。然則文人之筆，勸善懲惡也。證法所以章善，卽以著惡也。加一字之證，人猶勸懲。

惡知之者，莫不自勉。况極筆墨之力，定善惡之實，言行畢載，文以千數，流傳於世，成爲丹青，故可尋也。

揚子雲作法言，蜀富人賣錢千萬，願載於書，子雲不聽。夫實無仁義之行，園中之虺，欄中之牛也，安得妄載？班叔皮續太史公書，載鄉里人以爲惡戒。邪人枉道，繩墨所彈，安得避諱？是故子雲不爲財勸，叔皮不爲恩撓，文人之筆，獨已公矣。賢聖定意於筆，筆集成文，文具情顯，後人觀之，見以正僞，安宜妄記，足蹈於地，跡有好醜。文集於禮，志有善惡，故夫占跡以睹足，觀文以知情。詩三百，一言以蔽之，曰『思無邪。』論衡篇以十數，亦一言也，曰『疾虛妄。』

論死篇

世謂死人爲鬼，有知能害人；試以物類驗之，死人不爲鬼，無知不能害人。何以驗之？驗之以物。人物也，物亦物也。物死不爲鬼，人死何故獨能爲鬼？世能別人物不能爲鬼，則爲鬼不爲鬼，尙難分明。如不能別，則亦無以知其能爲鬼也。人之所以生者，精氣也；死而精氣滅，能爲精氣者，血脈也；人死血脈竭，竭而精氣滅，滅而形體朽，朽而成灰土，何用爲鬼？人無耳目則無所知，故聾盲之人，比於草木。夫精氣去人，豈徒與無耳目同哉？朽則消亡，荒忽不見，故謂之鬼神。人見鬼神之形，故非死人之精也。何則？鬼神荒忽不見之名也。人死精神升天，骸骨歸土，故謂之鬼。鬼者，歸也。神者，荒忽無形者也。或說鬼神，陰陽之名也。陰氣逆物而歸，故謂之歸；陽氣導物而生，故謂之神。神者伸也，申復無已，終而復始。人用神氣生，其死復歸神氣。陰陽稱鬼神，人死亦稱鬼神。氣之生人，猶水之爲冰也。水凝爲冰，氣凝爲人。冰釋爲水，人死復神。其名爲神也，猶冰釋更名水也。人見名異，則謂有知，能爲形而害人，無據以論之也。

人見鬼若生人之形，以其見若生人之形，故知非死人之精也。何以效之？以靈囊盛粟米；米在囊中，若粟在囊中，諸靈堅穩，立樹可見。人瞻望之，則知其爲粟米靈囊。何則？靈囊之形，若其容可察也。如靈囊米出，囊敗粟棄，則

靈臺委辟，人瞻望之，弗復見矣。人之精神，藏於形體之內，猶粟米在靈臺之中也。死而形體朽，精氣散，猶靈臺穿敗，粟米棄出也。粟米棄出，靈臺無復有形，精氣散亡，何能復有體，而人得見之乎？禽獸之死也，其肉盡索，皮毛尚在，制以爲裘。人望見之，似禽獸之形，故世有衣狗裘爲狗盜者，人不覺知假狗之皮毛，故人不意疑也。今人死皮毛朽敗，雖精氣尚在，神安能復假此形而以行見乎？夫死人不能假生人之形以見，猶生人不能假死人之魂以亡矣。六畜能變化象人之形者，其形尙生，精氣尙在也。如死，其形腐朽，雖虎兇勇悍，不能復化。魯公牛哀病化爲虎，亦以未死也。世有以生形轉爲生類者矣，未有以死身化爲生象者也。

天地開闢，人皇以來，隨壽而死。若中年夭亡，以億萬數計。今人之數，不若死者多；如人死輒爲鬼，則道路之上，一步一鬼也。人且死見鬼，宜見數百千萬，滿堂盈庭，填塞巷路，不宜徒見一兩人也。人之兵死也，世言其血爲燐血者，生時之精氣也。人夜行見燐，不象人形，渾沌積聚，若火光之狀。燐，死人之血也，其形不類生人之形也。其形不類生人之形，精氣去人，何故象人之體？人見鬼也，皆象死人之形，則可疑死人爲鬼，或反象生人之形，病者見鬼云甲來，甲時不死，氣象甲形。如死人爲鬼，病者何故見生人之體乎？

天地之性，能更生火，不能使滅火復燃；能更生人，不能令死人復見。能使滅灰更爲燐火，吾乃頗疑死人能復爲形。案火滅不能復燃以充之，死人不能復爲鬼明矣。夫爲鬼者，人謂死人之精神；如審鬼者，死人之精神，則人見之，宜徒見裸袒之形，無爲見衣帶被服也。何則？衣服無精神，人死與形體俱朽，何以得貫穿之乎？精神本以血氣爲主，血氣常附形體，形體雖朽，精神尙在，能爲鬼可也。今衣服，絲絮布帛也，生時血氣不附著，而亦自無血氣，敗朽遂已，與形體等，安能自若爲衣服之形？由此言之，見鬼衣服象之，則形體亦象之矣。象之，則知非死人之精神也。

夫死人不能爲鬼，則亦無所知矣。何以驗之？以未生之時無所知也。人未生在元氣之中，既死復歸元氣。元氣荒忽，人氣在其中。人未生無所知，其死歸無知之本，何能有知乎？人之所以聰明智慧者，以含五常之氣也。五常

之氣，所以人在者，以五藏有形中也。五藏不傷，則人智慧；五藏有病，則人荒忽；荒忽則愚癡矣！人死，五藏腐朽，則五藏無所託矣！所用藏智者已敗矣！所用爲智者已去矣！形須氣而成，氣須形而知。天下無獨燃之火，世間安得有無體獨知之精？人之死也，其猶夢也。夢者，殄之次也；殄者，死之比也。人殄不悟則死矣。案人殄復悟，死從來者，與夢相似。然則夢殄死，一實也。人夢不能知覺時所作，猶死不能識生時所爲矣。人言談有所作於臥人之旁，臥人不能知，猶對死人之棺，爲善惡之事，死不能復知也。夫臥，精氣尚在，形體尚在，猶無所知；況死人精神消亡，形體朽敗乎？

人爲人所毆傷，詣吏告苦以語人，有知之故也。或爲人所殺，則不知何人殺也，或家不知其尸所在，使死人有知，必憑人之殺已也，嘗能言於吏旁，告以賊主名；若能歸語其家，告以尸之所在。今則不能，無知之效也。世間死者，今生人殄而用之，言及巫叩元絃，下死人魂，因巫口談，皆誇誕之言也。如不誇誕，物之精神，爲之象也。或曰：不能言也。夫不能言，則亦不能知矣。知用氣，言亦用氣焉。人之未死也，智慧精神定矣。病則惛亂，精神擾也。夫死，病之甚者也。病死之微，猶惛亂，況其甚乎？精神擾，自無所知，況其散也？人之死，猶火之滅也。火滅而燭不照，人死而不知不慧，二者宜同一實。論者猶謂死有知，惑也。人病且死，與火之且滅何以異？火滅光消而燭在，人死精亡而形存。謂人死有知，是謂火滅復有光也。隆冬之月，寒氣用事，水凝爲冰，踰春氣溫，冰釋爲水。人生於天地之間，其猶冰也。陰陽之氣，凝而爲人；年終壽盡，死還爲氣。夫春水不能爲冰，死魂安能復爲形？妒夫媚妻，同室而處，姪亂失行，忿怒鬪訟。夫死妻更嫁，妻死夫更娶，以有知驗之，宜大忿怒。今夫妻死者，寂寞無聲；更嫁娶者，平忽無禍。無知之驗也。

孔子葬母於防，旣而雨甚至，防墓崩。孔子聞之，泫然流涕曰：『古者不脩墓。』遂不復脩。使死有知，必憑人不脩也。孔子知之，宜輒脩墓，以喜魂神。然而不脩，聖人明審，曉其無知也。枯骨在野，時鳴呼有聲，若夜聞哭聲，謂之死人之音，非也。何以驗之？生人之以言語吁呼者，氣括口喉之中，動搖其舌，張歛其口，故能成言。譬猶吹簫笛，簫

篲折破氣越不括，手無所弄，則不成音。夫篲篲之管，猶人之口喉也；手弄其孔，猶人之動舌也。人死口喉腐敗，舌不復動，何能成言？然而枯骨時時呻鳴者，人骨自有能呻鳴者焉；或以爲秋也，是與夜鬼哭無以異也。秋氣爲呻鳴之變，自有所爲，依倚死骨之側，人則謂之骨尙有知，呻鳴於野，草澤暴體，以千萬數，呻鳴之聲，宜步屬焉。

夫有能使不言者言，未有言者死，能復使之言。言者亦不能復使之言，猶物生以青爲氣，或予之也。物死青者去，或奪之也。予之物青，奪之青去，去後不能復予之青，物亦不能復自青。聲色俱通，並稟於天，青青之色，猶鼻鼻之聲也。死物之色，不能復青；獨爲死人之聲，能復自言，惑也。人之所以能言語者，以有氣力也。氣力之盛，以能飲食也。飲食損減，則氣力衰，衰則聲音嘶啞，不能食，則口不能復言。夫死困之甚，何能復言？或曰：『死人敢着食氣，故能言。』夫死人之精，生人之精也。使生人不飲食，而徒以口飲着食之氣，不過三日，則餓死矣，或曰：『死人之精，神於生人之精，故能散氣爲音。』夫生人之精，在於身中，死則在於身外。死之與生，何以殊？身中身外，何以異？取水實於大盎中，盎破水流地，地水能異於盎中之水平；地水不異於盎中之水，身外之精，何故殊於身中之精？人死不爲鬼，無知不能語言，則不能害人矣。何以駁之？夫人之怒也用氣，其害人用力。用力須筋骨而彊，彊則能害人；忿怒之人，咆哮於人之旁，口氣喘射人之面，雖勇如黃青，氣不害人。使舒手而舉，舉足而蹶，則所擊蹶，無不破折。夫死，骨朽筋力絕，手足不舉，雖精氣尙在，猶咆哮之時無調助也；何以能害人也？凡人與物所以能害人者，手臂把刃，爪牙堅利之故也。今人死，手臂朽敗，不能復持刃；爪牙墮落，不能復嚙噬，安能害人？兒之始生也，手足具成，手不能擲，足不能蹶者，氣適凝成，未能堅彊也；由此言之，精氣不能堅彊，審矣。氣爲形體，形體微弱，猶未能害人；况死氣去，精神絕微，弱猶未能害人。舉骨謂能害人者邪？死人之氣不去邪？何能害人？

雞卵之未字也，傾溶於殼中，潰而視之，若水之形，長雌偃伏，體方就成，就成之後，能啄啄之。夫人之死，猶傾溶之時。傾溶之氣，安能害人？人之所以勇猛能害人者，以飲食也。飲食飽足，則彊壯勇猛；彊壯勇猛，則能害人矣。人病不能飲食，則身羸弱，羸弱困甚，故至於死。病困之時，仇在其旁，不能咄叱，人盜其物，不能禁奪，羸弱困劣之故

也。夫死，羸弱困劣之甚者也，何能害人？有雞犬之音，爲人所盜竊，雖怯無勢之人，莫不忿怒；忿怒之極，至相賊滅，敗亂之時，人相啖食者，使其神有知，宜能害人。身貴於雞犬，已死重於見盜，忿怒於雞犬，無怨於食己，不能害人之驗也。蟬之未蛻也，爲復育；已蛻也，去復育之體，更爲蟬之形。使死人精神去形體，若蟬之去復育乎？則夫爲蟬者，不能害爲復育者。夫蟬不能害復育，死人之精神，何能害生人之身？

夢者之義疑惑，言夢者精神自止身中，爲吉凶之象。或言精神行與人物相更。今其審止身中，死之精神，亦將復然。今其審行，人夢殺傷人，夢殺傷人，若爲人所復殺。明日視彼之身，察己之體，無兵刃創傷之驗。夫夢用精神，精神，死之精神也。夢之精神不能害人，死之精神安能爲害？火熾而釜沸，沸止而氣歇，以火爲主也。精神之怒也，乃能害人；不怒，不能害人。火猛竈中，釜湧氣蒸，精怒胸中，力盛身熱；今人之將死，身體清涼，涼益清甚，遂以死亡。當死之時，精神不怒，身亡之後，猶湯之離釜也，安能害人？

物與人通。人有癡狂之病，如知其物，然而理之，病則愈矣。夫物未死，精神依倚形體，故能變化，與人交通。已死，形體壞爛，精神散亡，無所復依，不能變化。夫人之精神，猶物之精神也。物生精神爲病，其死精神消亡。人與物同死，而精神亦滅，安能爲害禍？設謂人貴，精神有異，成事，物能變化，人則不能。是反人精神不若物，物精奇於人也。水火燒燭，凡能害人者，皆五行之物。金傷人，木毆人，土壓人，水溺人，火燒人，使人死，精神爲五行之物乎？害人不爲乎？不能害人，不爲物則爲氣矣。氣之害人者，太陽之氣爲毒者也。使人死，其氣爲毒乎？害人不爲乎？不能害人，夫論死不爲鬼，無知不能害人，則夫所見鬼者，非死人之精，其害人者，非其精所爲明矣。

死僞篇

傳曰：『周宣王殺其臣杜伯而不辜。宣王將田於囿，杜伯起於道左，執彤弓而射宣王。宣王伏轡而死。趙簡公殺其臣莊子綏而不辜。簡公將入於桓門，莊子綏起於道左，執彤杖而撻之，斃於車下。二者死，人爲鬼之驗。鬼之

有知，能害人之效也。無之奈何？」曰：「人生萬物之中，物死不能爲鬼，人死何故獨能爲鬼？如以人貴能爲鬼，則死者皆當爲鬼。杜伯、莊子義何獨爲鬼也？如以殺非辜者能爲鬼，世間臣子被非辜者多矣，比干、胥之輩不爲鬼。夫杜伯、莊子義無道忿恨，報殺其君，罪莫大於弑君。則夫死爲鬼之尊者，當復誅之，非杜伯、莊子義所敢爲也。凡人相傷，憎其生，惡見其身，故殺而亡之。見殺之家，詣吏訟其仇，仇人亦惡見之。生死異路，人鬼殊處。如杜伯、莊子義怨宣王、簡公，不宜殺也。當復爲鬼，與己合會。人君之威固嚴，人臣營衛卒使固多衆。兩臣殺二君，二君之死亦當報之。非有知之深計，憎惡之所爲也。如兩臣神，宜知二君死當報己，如不知也，則亦不神。不神胡能害人？世多似是而非，虛僞類真，故杜伯、莊子義之語，往往而存。」

晉惠公攻葬太子申生。秋，其僕狐突適下國，遇太子。太子趨登僕車而告之曰：「夷吾無禮，余得請於帝矣，將以晉畀秦，秦將祀余。」狐突對曰：「臣聞之，神不歆非類，民不祀非族。君祀無乃殄乎？且民何罪，失刑之祀？君其圖之。」太子曰：「諾。」吾將復請。七日，新城西偏，將有巫者而見我焉。」許之，遂不見。及期，狐突之新城西偏巫者之舍，復與申生相見。申生告之曰：「帝許罰有罪矣，箴之於韓。」其後四年，惠公與秦穆公戰於韓地，爲穆公所獲，竟如其言。非神而何？曰：此亦杜伯、莊子義之類。何以明之？夫攻葬，私怨也；上帝，公神也。以私怨爭於公神，何肯聽之？帝許以晉畀秦，狐突以爲不可。申生從狐突之言，是則上帝許申生非也。神爲上帝，不若狐突，必非上帝明矣。且臣不敢求私於君者，君尊臣卑，不敢以非干也。申生比於上帝，豈徒臣之與君哉？恨惠公之攻葬，干上帝之尊命，非所得爲也。驪姬譖殺其身，惠公攻葬其尸，攻葬之惡，徵於殺人；惠公之罪，輕於驪姬。請罰惠公，不請殺驪姬，是則申生憎攻葬，不怨見殺也。秦始皇用李斯之議，燔燒詩書，後又坑儒。博士之怨，不下申生；坑儒之惡，痛於攻葬。然則秦之死儒，不請於帝，見形爲鬼，諸生會告以始皇無道，李斯無狀。

周武王有疾不豫，周公請命，設三壇同一壇，植璧秉圭，乃告於太王、王季、文王。史乃筮祝辭曰：「予仁若考，多才多藝，能事鬼神。乃元孫某，不若且多才多藝，不能事鬼神。」鬼神者，謂三王也。卽死人無知，不能爲鬼神。周公

聖人也。聖人之言審，則得幽冥之實。則三王爲鬼神明矣。曰：實人能神乎？不能神也。如神宜知三王之心，不宜徒審其爲鬼也。周公請命，史策告祝，祝畢辭已，不知三王所以與否，乃卜三龜，三龜皆吉，然後乃喜。能知三王有知爲鬼，不能知三王許己與否，須卜三龜，乃知其實，定其爲鬼，須有所問，然後知之。死人有知無知，與其許人不許人，一實也。能知三王之不許己，則其謂三王爲鬼可信也。如不能知，謂三王爲鬼，猶世俗之人也。與世俗同知，則死人之實，未可定也。且周公之請命，用何得之，以至誠得之乎？以辭正得之也。如以至誠，則其請之說，精誠致鬼，不願辭之是非也。董仲舒請雨之法，設土龍以感氣，夫土龍非實，不能致雨。仲舒用之，致精誠不願物之僞真也。然則周公之請命，猶仲舒之請雨也。三王之非鬼，猶聚土之非龍也。

晉荀偃伐齊，不卒事而還，瘧疽生瘡於頸，及著雍之地，病目出卒，而視不可陰。范宣子浣而撫之曰：『事吳敢不如事主。』猶視宣子，睹其不瞑，以爲恨其子吳也。人清所恨，莫不恨子，故言吳以撫之。猶視者，不得所恨也。樂懷子曰：『其爲未卒事於齊，故也乎？』乃復撫之曰：『主苟死，所不嗣事於齊者，有如河！』乃瞑受陰。伐齊不卒，荀偃所恨也。懷子得之，故目瞑受陰。宣子失之，目張口噤，曰：『荀偃之病卒，苦目出，目出則口噤，口噤則不可陰。新死氣盛，本病苦目出。宣子撫之早，故目不瞑，口不闔。少久氣衰，懷子撫之，故目瞑口受陰。此自荀偃之病，非死精神見恨於口目也。凡人之死，皆有所恨，志士則恨義事未立，學士則恨問多不及，農夫則恨耕未耨穀，商人則恨貨財未殖，仕者則恨官位未極，勇者則恨材未優。天下各有所欲乎？然而各有所恨，必有目不瞑者，爲有所恨。夫天下之人，死皆不瞑也。且死者精魂消索，不復聞人之言，不能聞人之言，是謂死也。離形更自爲鬼，立於人旁，雖人之言，已與形絕，安能復入身中，瞑目聞口乎？能入身中，以尸示恨，則不免與形相守。案世人論死，謂其精神有若能更，以精魂立形見面，使尸若生人者，誤矣。楚成王廢太子商臣，欲立王子職，商臣聞之，以官甲圍王。王請食熊蹯而死，弗聽。王盥而死，諡之曰靈，不瞑，曰成，乃瞑。夫爲靈不瞑，爲成乃瞑，成王有知之效也。諡之曰靈，心恨故目不瞑，更諡曰成，心喜乃瞑。精神隨人之說，見人變易其說，故喜目瞑。本不病目，人不撫慰，目自翕張，非神而

何曰：此復苟僊類也。雖不病目，亦不空張。成王於時益死，氣尙盛，新絕目命，因益曰：『靈，少久氣衰，目通欲闕，連更曰成，目之不瞑，與益之爲靈，偶應也。』時人見其應成，乃誤謂成王之魂有所知，則宜終不瞑也。何則？太子殺己，大惡也；加益爲靈，小過也。不爲大惡懷忿，反爲小過有忿，非有神之效，見示告人之驗也。夫惡益非靈則厲也，紀於竹帛，爲靈厲者多矣。其尸未斂之時，未嘗不瞑也。豈世之死君不惡，而獨成王憎之哉？何其爲靈者衆，不瞑者寡也。

鄭伯有貪懷而多欲，子皙好在上。二子不相得，子皙攻伯有，伯有出奔。驪帶率國人以伐之，伯有死。其後九年，鄭人相讎以伯有曰：『伯有至矣！』則皆走不知所往。後歲人或夢見伯有介而行，曰：『王子，余將殺帶也。明年壬寅，余又將殺段也。』及壬子之日，驪帶卒，國人益懼。後至壬寅日，公孫段又卒，國人愈懼。子產爲之立後以撫之，乃止矣。伯有見夢曰：『王子，余將殺帶；王寅又將殺段；及至壬子日，驪帶卒，至壬寅公孫段死。其後子產適晉，趙景子問曰：『伯有猶能爲鬼乎？』子產曰：『能！人生始化曰魄，既生魄，陽曰魂。用物精多則魂魄強，是以有精爽至於神明。匹夫匹婦強死，其魂魄猶能憑依人以爲淫厲。况伯有，我先君穆公之胄，子夏之孫，子耳之子，弊邑之卿，從政三世矣。鄭雖無祿，抑諺曰：『衰爾小國。』而三世執其政柄，其用物弘矣，取精多矣。其族又大，所憑厚矣。而疆死，能爲鬼，不亦宜乎？』伯有殺驪帶，公孫段不失日期，神審之驗也。子產立其後而止，知鬼神之操也。知其操則知其實矣。實有不空，故對問不疑。子產智人也，知物審矣。如死者無知，何以能殺帶與段？如不能爲鬼，子產何以不疑？曰：『與伯有爲怨者子皙，子皙攻之，伯有奔。驪帶率國人遂伐伯有，公孫段隨驪帶，不造不辯，其惡微小，殺驪帶不報子皙，公孫段惡微，與帶俱死，是則伯有之魂無知，爲鬼報仇，輕重失宜也。且子產言曰：『疆死者能爲鬼。』何謂疆死？謂伯有命未當死而人殺之邪？將謂伯有無罪而人冤之也？如謂命未當死而人殺之，未當死而死者多，如謂無罪人冤之，被冤者亦非一。伯有疆死能爲鬼，比于子胥不爲鬼。春秋之時，弑君三十六，君爲所弑，可謂疆死矣。典長一國，用物之精可謂多矣，繼體有土，非直三世也；貴爲人君，非與卿位同也；始封之祖，

必有穆公子良之類也。以至尊之國君，受亂臣之弑禍，其魂魄爲鬼，必明於伯有。報仇殺讎，禍繁於帶段。三十六君無爲鬼者，三十六臣無見報者。如以伯有無道，其神有知。世間無道莫如桀、紂，桀誅死，魄不能爲鬼。然則子產之說，因成事者也。見伯有疆死，則謂疆死之人能爲鬼。如有不疆死爲鬼者，則將云不疆死之人能爲鬼。子皙在鄭，與伯有何異？死與伯有何殊？俱以無道爲國所殺，伯有能爲鬼，子皙不能。疆死之說，通於伯有，塞於子皙，則伯有之說，杜伯之語也。杜伯之語未可然，伯有亦未可是也。

秦桓公伐晉，次於輔氏。晉侯治兵於殽，以略翟。土立黎侯而還，及魏、顓敗秦師於輔氏，獲杜、同。秦之力人也。初，魏武子有嬖妾無子。武子疾，命顓曰：『必嫁是妾。』病困則更曰：『必以是爲殉。』及武子卒，顓不殉妾，人或難之。顓曰：『疾病則亂，吾從其治也。』及輔氏之役，魏、顓見老人結草以亢杜、同。杜、同躡而顛，故獲之。夜夢見老父曰：『余是所嫁婦人之父也。爾用先人之治命，是以報汝。』夫嬖妾之父知魏、顓之德，故見體爲鬼，結草助戰，神曉有知之效驗也。曰：夫婦人之父，能知魏、顓之德，能鬼見形以助其戰，必能報其生時所善，殺其生時所惡矣。凡人交遊必有厚薄，厚薄當報，猶婦人之嘗謝也。今不能報其生時所厚，獨能報其死後所善，非有知之驗，能爲鬼之效也。張良行泗水上，老父授書。光武困厄，河北老人教誨，命貴時吉，嘗遇福喜之應驗也。魏、顓當獲杜、同，戰當有功，故老人妖象結草於路人者也。

王季葬於滑山之尾。樂水擊其墓，見棺之前。文王曰：『嘻！先君必欲一見羣臣百姓也。』夫故使樂水見之於是也，而爲之張朝，而百姓皆見之。三日而後更葬。文王聖人也，知道事之實，見王季棺見，知其精神欲見百姓，故出而見之。曰：古今帝王死，葬諸地中，有以千萬數，無欲復出見百姓者。王季何爲獨然？河泗之墳，立冢非一；水湍崩壞，棺槨露見，不可勝數，皆欲復見百姓者乎？樂水擊滑山之尾，猶河泗之流湍濱圯也。文王見棺和聲，惻然悲恨。『當先君欲復出乎？』慈孝者之心，幸冀之意，賢聖惻怛，不暇思論，推生況死，故復改葬。世俗信賢聖之言，則謂王季欲見百姓者也。

齊景公將伐宋師過太山，公夢二丈人立而怒甚盛，公告晏子。晏子曰：『是宋之先湯與伊尹也。』公疑以爲太山神。晏子曰：『公疑之，則嬰請言湯伊尹之狀。湯誓以長，頤以髯，銳上而豐下，據身而揚聲。』公曰：『然是已。』『伊尹黑而短，蓬而髯，豐上而銳下，僂身而下聲。』公曰：『然是已。』今奈何？晏子曰：『夫湯太甲武丁祖乙天下之盛君也，不宜無後，今唯宋耳，而公伐之，故湯伊尹怒，請散師和於宋。』公不用，終伐宋，軍果敗。夫湯伊尹有知，惡景公之伐宋，故見夢盛怒以禁止之。景公不止，軍果不吉。曰：夫景公亦曾夢見彗星，其時彗星不出，果不吉。曰：夫然而夢見之者，見彗星其實非夢見。湯伊尹實亦非也。或時景公軍敗不吉之象也。晏子信夢，明言湯伊尹之形。景公順晏子之言，然而而是之。秦并天下，絕伊尹之後，遂至於今。湯伊尹不祀，何以不怒乎？

鄭子產聘於晉，晉侯有疾，韓宣子逆客，私焉，曰：『寡君寢疾，於今三月矣，並走羣望，有加而無瘳。今夢黃熊入於寢門，其何厲鬼也？』對曰：『以君之明，子爲大政，其何厲之有？』昔堯殛鯀于羽山，其神爲黃熊，以入于羽淵，實爲夏郊，三代祀之。晉爲盟主，其或者未之祀乎？韓子祀夏郊，晉侯有間，黃熊，鯀之精神，晉侯不祀，故入寢門。晉知而祀之，故疾有間，非死人有知之驗乎？夫鯀殛于羽山，人知也。神爲黃熊，入于羽淵，人何以得知之？使若魯公牛哀病，化爲虎在，故可實也。今鯀遠殛於羽山，人不與之處，何能知之？且文曰：其神爲熊，是死也。死而魂神爲黃熊，非人所得知也。人死世謂鬼，鬼象生人之形，見之與人無異，然猶非死人之神。況熊非人之形，不與人相似乎？審鯀死，其神爲黃熊，則熊之死，其神亦或時爲人。人夢見之，何以知非死禽獸之神也？信黃熊謂之鯀神，又信所見之鬼以爲死人精也。此人物之精未可定，黃熊爲鯀之神，未可審也。且夢象也，吉凶且至，神明示象，熊羆之占，自有所爲。使鯀死，其神審爲黃熊，夢見黃熊，必鯀之神乎？諸侯祭山川，設晉侯夢見山川，何復不以祀山川。山川自見乎？人病，夢或夢見先祖，死人來立其側，可復謂先祖死人求食，故來見形乎？人夢所見，更爲他占，未必以所見爲實也。何以驗之？夢見生人，明日所夢見之人不與己相見。夫所夢見之人不與己相見，則知鯀之黃熊不入寢門，不入則鯀不求食，不求食則晉侯之疾非廢夏郊之禍，非廢夏郊之禍，則晉侯有間，非祀夏郊之禍，無福。

之實，則無有知之驗矣。亦猶淮南王劉安坐謀反而死，世傳以爲仙而升天。本傳之虛，子產聞之，亦不能實。偶晉侯之疾，適當自衰，子產遽言黃熊之占，則信黃熊，繇之神矣。

高皇帝以趙王如意爲似我而欲立之，呂后患恨，後酈殺趙王。其後呂后出見蒼犬，噬其左腋，怪而卜之。趙王如意爲祟，遂病腋傷，不愈而死。蓋以如意精神爲蒼犬，見變以報其仇也。曰：勇士忿怒，交刃而戰，負者被創，仆地而死。目見彼之中己，死後其神尙不能報。呂后既如意時，身不自往，使人飲之，不知其爲酈毒，憤不知殺己者爲誰，安能爲祟以報呂后，使死人有知，恨者莫過高祖。高祖愛如意而呂后殺之，高祖魂怒，宜如雷霆。呂后之死，宜不旋日，豈高祖之精，不若如意之神，將死後憎如意，等呂后之殺也。

丞相武安侯田蚡與故大將軍灌夫杯酒之恨，事至上聞。灌夫繫獄，竇嬰救之，勢不能免。灌夫坐法，竇嬰亦死。其後田蚡病甚，號曰：『諾諾！』使人視之，見灌夫竇嬰俱坐其側。蚡病不衰，遂至死。曰：相殺不一人也。殺者後病，不見所殺，田蚡見所殺，田蚡獨然者，心負憤恨，病亂妄見也。或時見他鬼，而占鬼之人，聞其往時與夫嬰爭，欲見神審之名，見其狂諾諾，則言夫嬰坐其側矣。

淮陽都尉尹齊爲吏酷虐，及死，怨家欲燒其尸，亡去歸葬。夫有知，故人且燒之也；神，故能亡去。曰：尹齊亡，神也，有所應。秦時三山亡，周九鼎淪，必以亡者爲神，三山九鼎有知也。或時吏知怨家之謀，竊舉持亡，懼怨家怨己云自去。凡人能亡，足能步行也。今死血脈斷絕，足不能復動，何用亡去？吳烹伍子胥，漢趙彭越燒趙一僂也。胥越一勇也。子胥彭越不能避烹亡趙，獨謂尹齊能歸葬，失實之言，不驗之語也。

亡新政葬元帝傳后，廢其棺，取玉押印靈送定陶，以民禮葬之。發棺時，臭薰於天，洛陽丞臨棺聞臭而死。又政葬定陶共王丁后，火從藏中出，燒殺吏士數百人。夫政葬禮卑，又損奪珍物，二恨怨，故爲臭出火以中傷人。曰：臭聞於天，多藏食物，腐朽猥發，人不能堪，奉償而未爲怪也。火出於藏中者怪也，非丁后之神也。何以驗之？政葬之恨，孰與掘墓盜財物也？歲凶之時，掘丘墓取衣物者，以千萬數，死人必有知。人奪其衣物，傷其尸骸，時不能然，後

亦不能報。此尙微幾。未足以言。秦始皇葬於驪山。二世末。天下盜賊掘其墓。不能出鼎爲火。以殺一人。貴爲天子。不能爲神。丁傳婦人。安能爲怪。變神非一。發起殊處。見火聞臭。則謂丁傳之神。誤矣。

紀妖篇

衛靈公將之晉。至濮水之上。夜聞鼓新聲者。詭之。使人問之。左右皆報弗聞。召師涓而告之曰。『有鼓新聲者。使人問左右。盡報弗聞。其狀似鬼。子爲我聽而寫之。』師涓曰。『諾。』因靜坐撫琴而寫之。明日報曰。『臣得之矣。然而未習。請更宿而習之。』靈公曰。『諾。』因復宿。明日已習。遂去之。晉平公觴之。施夷之臺。酒酣。靈公起曰。『有新聲。願請奏以示公。』公曰。『善。』乃召師涓。令坐師曠之旁。援琴鼓之。未終。曠撫而止之曰。『此亡國之聲。不可遂也。』平公曰。『此何道出。』師曠曰。『此師延所作淫聲。與紂爲靡靡之樂也。武王誅紂。懸之白旄。師延東走。至濮水而自殺。故聞此聲者。必於濮水之上。先聞聲者。其國創。不可遂也。』平公曰。『寡人好者音也。子其使遂之。』師涓鼓究之。平公曰。『此所謂何聲也。』師曠曰。『此所謂清商。』公曰。『清商固最悲乎。』師曠曰。『不如清徵。』公曰。『清徵可得聞乎。』師曠曰。『不可。古之得聽清徵者。皆有德義之君也。今吾君德薄。不足以聽之。』公曰。『寡人所好者音也。願試聽之。』師曠不得已。援琴鼓之。一奏。有玄黿二八。從南方來。集於郭門之上。危。再奏而列。三奏。延頸而鳴。舒翼而舞。音中宮商之聲。聲徹于天。平公大悅。坐者皆喜。平公提觴而起。爲師曠壽。反坐而問曰。『樂莫悲于清徵乎。』師曠曰。『不如清角。』平公曰。『清角可得聞乎。』師曠曰。『不可。昔者黃帝合鬼神於西大山之上。駕象輿。承玄龍。畢方並轡。蚩尤居前。風伯進掃。雨師灑道。虎狼在前。鬼神在後。蟲蛇伏地。白雲覆上。大合鬼神。乃作爲清角。今主君德薄。不足以聽之。聽之將恐有敗。』平公曰。『寡人老矣。所好者音也。願遂聽之。』師曠不得已而鼓之。一奏之。有雲從西北起。再奏之。風至大雨隨之。裂帷幕。破俎豆。墮廊瓦。坐者散走。平公恐懼。伏於廊室。晉國大旱。赤地三年。平公之身遂癰病。何謂也。曰。是非衛靈公國且創。則晉

平公且病，若國且旱，亡妖也。師曠曰：『先聞此聲者國創。』二國先聞之矣，何知新聲非師延所鼓也？曰：師延自投濮水，形體腐於水中，精氣消於泥塗，安能復鼓琴？屈原自沉於江，屈原善著文，師延善鼓琴，如師延能鼓琴，則屈原能復書矣。揚子雲弔屈原，屈原何不報？屈原生時，文無不作，不能報子雲者，死爲泥塗，手既朽無用書也。屈原手朽無用書，則師延指敗，無用鼓琴矣。孔子嘗泗水而葬泗水，卻流，世謂孔子神而能卻泗水，孔子好教授，猶師延之好鼓琴也。師延能鼓琴於濮水之中，孔子何爲不能教授於泗水之側乎？

趙簡子病，五日不知人，大夫皆懼，於是召進扁鵲。扁鵲入視病，出董安于問扁鵲，扁鵲曰：『血脈治也，而怪，昔秦繆公嘗如此矣，七日悟，悟之日，告公孫支與子輿曰：『我之帝所甚樂，吾所以久者，適有學也。』帝告我晉國且大亂，五世不安，其復將霸，未老而死，霸者之子，且令而國，男女無別。』公孫支書而藏之於篋，於是晉獻公之亂，文公之霸，襄公敗秦師於殽，而歸縱淫，此之所謂，今主君之病與之同，不出三日病必間，間必有言也。』居二日半，簡子悟，告大夫曰：『我之帝所甚樂，與百神遊於鈞天，靡樂九奏萬舞，不類三代之樂，其聲動人心，有一熊欲援我，帝命我射之，中熊，熊死，有羆來，我又射之，中羆，羆死，帝甚喜，賜我一笥，皆有副。吾見兒在帝側，帝屬我一翟犬，『及而子之長也，以賜之。』』帝告我晉國且衰，十世亡，嬴姓將大敗周人於涇，魁之西，而亦不能有也。今余將思虞舜之勳，適余將以其育女孟姚配而十世之孫。』董安于受言而書藏之，以扁鵲書告簡子。簡子賜扁鵲田四萬畝。他日簡子出，有人當道，辟之不去，從者將拘之，當道者曰：『吾欲有謁於主君。』從者以聞。簡子召之曰：『嘻！吾有所見子遊也。』當道者曰：『屏左右，願有謁。』簡子屏人，當道者曰：『日者主君之病，臣在帝側，』簡子曰：『然有之，子見我何爲？』當道者曰：『帝令主君射熊與羆皆死。』簡子曰：『是何也？』當道者曰：『晉國且有難，主君首之，帝令主君滅二卿，夫熊羆皆其祖也。』簡子曰：『帝賜我一笥，皆有副，何也？』當道者曰：『主君之子，將剋二國於翟，皆子姓也。』簡子曰：『吾見兒在帝側，帝屬我一翟犬，曰：『及而子之長，以賜之。』』夫兒可說以賜翟犬，『當道者曰：『見君之子也，翟犬代之先也。』主君之子，且必有代，及主君之後嗣，且有事故。

而胡服并二國翟。簡子問其姓而延之以官。嘗道者曰：『臣野人致帝命。』遂不見。是何謂也？曰：是皆妖也。其占皆如嘗道者言，所見於帝前之事，所見嘗道之人，妖人也。其後晉二卿范氏中行氏作亂，簡子攻之，中行昭子范文子敗，出奔齊。

始簡子使姑布子卿相諸子莫吉，至翟婦之子無恤，以爲貴。簡子與語賢之。簡子募諸子曰：『吾藏寶符於常山之上，先得者賞。』諸子皆上山無所得。無恤還曰：『已得符矣。』簡子問之，無恤曰：『從常上山上臨代，代可取也。』簡子以爲賢，乃廢太子而立之。簡子死，無恤代，是爲襄子。襄子既立，誘殺代王而并其地，又并知氏之地，後取空同戎。自簡子後十世至武靈王，吳慶入，其母姓嬴，子孟姚。其後武靈王遂取中山并胡地。武靈王之十九年，更爲胡服，國人化之，皆如其言，無不然者。蓋妖祥見於兆審矣，皆非實事。吉凶之漸，若天告之，何以知天不實告之也？以嘗道之人在帝側也。

夫在天帝之側，皆貴神也。致帝之命，是天使者也。人君之使，車馬備具，天帝之使，單身嘗道，非其狀也。天官百二十，與地之王者，無以異也。地之王者，官屬備具，法象天官，稟取制度，天地之官同，則其使者亦宜鈞，官同人異者，未可然也。何以知簡子所見帝，非實帝也？以夢占知之。樓臺山陵，官位之象也。人夢上樓臺，升山陵，輒得官位，實樓臺山陵，非官位也。則知簡子所夢見帝者，非天帝也。人臣夢見人君，人君必不見，又必不賜。以人臣夢占之，知帝賜二簪翟大者，非天帝也。非天帝，則其言與百鬼游於鈞天，非天也。魯叔孫穆子夢天壓己者，審然是天下至地也。至地則有樓臺之抗，不得及己。及己，則樓臺宜壞，樓臺不壞，是天不至地；不至地，則不得壓己；不得壓己，則壓己者，非天也，則天之象也。叔孫穆子所夢壓己之天，非天，則知趙簡子所游之天，非天也。

或曰：『人亦有直夢見甲，明日則見甲矣。』夢見君，明日則見君矣。曰：然！人有直夢，直夢皆象也；其象直耳。何以明之？直夢者，夢見甲，夢見君，明日見甲與君，此直也。如問甲與君，甲與君則不見也。甲與君不見，所夢見甲與君者，象類之也。乃甲與君象類之，則知簡子所見帝者，象類帝也。且人之夢也，占者謂之魂行。夢見帝，是魂之上

天也。上天猶上山也。夢上山，足登山，手引木，然後能升。升天無所緣，何能得上？天之去人，以萬里數。人之行，日百里，魂與體形俱，尙不能疾；况魂獨行，安能速乎？使魂行與形體等，則簡子之上下天，宜數歲乃悟，七日輒覺，期何疾也？夫魂者，精氣也。精氣之行，與雲煙等。雲煙之行不能疾，使魂行若蜚鳥乎？行不能疾，人或夢蜚者，用魂蜚也；其蜚不能疾於鳥。天地之氣，尤疾速者，飄風也；飄風之發，不能終一日。使魂行若飄風乎？則其速不過一日之行，亦不能至天。人夢上天，一臥之頃也。其覺，或尙在天上未終下也。若人夢行至維陽，覺因從維陽悟矣。魂神蜚馳何疾也？疾在必非其狀，必非其狀，則其上天，非實事也。非實事，則爲妖祥也。夫當道之人，簡子病見於帝側，後見當道象人而言，與相見帝側之時，無以異也。由此言之，臥夢爲陰候，覺爲陽占，審矣。

趙襄子既立，知伯益驕，請地韓魏。韓魏予之，請地於趙。趙不予。知伯益怒，遂率韓魏攻趙。襄子懼，乃奔保晉陽。原過從後，至於託平驛，見三人，自帶以上可見，自帶以下不可見。予原過竹二節，莫通。曰：『爲我以是遺趙無恤。』既至，以告襄子。襄子齊三日，親自割竹，有赤書曰：『趙無恤，余雲大山陽侯天子。三月丙戌，余將使汝滅知氏。汝亦祀我百邑，余將賜汝林胡之地。』襄子再拜受神之命。是何謂也？曰：是蓋襄子且勝之祥也。三國攻晉，陽歲餘，引汾水灌其城，城不浸者三板。襄子懼，使相張孟談私於韓魏。韓魏與合謀，竟以三月丙戌之日，大滅知氏，共分其地。蓋妖祥之氣，象人之形，稱雲大山之神，猶夏庭之妖象龍，稱褒之二君。趙簡子之祥象人，稱帝之使也。何以知非雲大山之神也？曰：大山地之禮，猶人有骨節，骨節安得神？如大山有神，宜象大山之形。何則？人謂鬼者，死人之精，其象如生人之形。今大山廣長不與人同，而其精神不異於人，不異於人，則鬼之類人；鬼之類人，則妖祥之氣也。

秦始皇帝三十六年，熒惑守心，有星墜下，至地爲石，刻其石曰：『始皇死而地分。』始皇聞之，令御史逐問，莫服。盡取石旁家人誅之，因燔其石。妖使者從關東夜過韓陰平野，或有人持蠶絲使者曰：『爲我遺鑄池君。』因言曰：『今年相龍死。』使者問之，因忽不見，置其蠶去。使者奉蠶，具以言聞。始皇帝默然良久曰：『山鬼不過知

一歲事，乃言曰：「祖龍者，一人之先也。」使御府視璧，乃二十八年行渡江所沈璧也。明三十七年，夢與海神戰，如人狀。是何謂也？曰：皆始皇且死之妖也。始皇夢與海神戰，意怒入海，候神射大魚，自環邪至，勞成山不見。至之眾山，還見巨魚，射殺一魚，遂旁海西，至平原津而病，到沙丘而崩。當星墜之時，熒惑爲妖，故石旁家人刻書其石，若或爲之。文曰：「始皇死，」或教之也。猶世間童謠，非童所爲，氣導之也。凡妖之發，或象人爲鬼，或爲人象鬼，而使其實一也。

晉公子重耳失國，乏食於道，從耕者乞飯。耕者奉塊土以賜公子。公子怒，咎犯曰：「此吉祥，天賜土地也。」其後公子得國復土，如咎犯之言。齊田單保即墨之城，欲詐燕軍，云：「天神下助我。」有一人前曰：「我可以爲神乎？」田單卻走再拜事之，竟以神下之言聞於燕軍。燕軍信其有神，又見牛若五采之文，遂信畏懼，單破兵北，田單卒勝，復獲侵地。此人象鬼之妖也。使者過華陰，人持璧遮道，委璧而去，妖鬼象人之形也。夫沈璧於江，欲求福也。今還璧，示不受物，福不可得也。璧者，象前所沈之璧，其實非也。何以明之？以鬼象人而見，非實人也。人見鬼象生存之人，定問生存之人，不與已相見，妖氣象類人也。妖氣象人之形，則其所寶持之物，非真物也。祖龍死，謂始皇也。祖人之本，龍人君之象也。人物類，則其言稱亦放矣。

漢高皇以秦始皇崩之歲，爲泗上亭長，送徒至驪山。徒多道亡，因縱所將徒，遂行不還，被酒，夜經澤中，令一人居前。前者還報曰：「前有大蛇當道，願還。」高祖醉曰：「壯士行，何畏？」乃前拔劍擊斬蛇，蛇遂分兩徑，開行數里，醉因臥。高祖從人至蛇所，有一老嫗夜哭之。人曰：「嫗何爲哭？」嫗曰：「人殺吾子。」人曰：「爾子何爲見殺？」嫗曰：「吾子白帝子，化爲蛇，當徑，今者赤帝子斬之，故哭。」人以嫗爲妖言，因欲笞之，嫗因忽不見。何謂也？曰：是高祖初起威勝之祥也。何以明之？以嫗忽然不見也。不見非人，非人則鬼妖矣。夫以嫗非人，則知所斬之蛇，非蛇也。云白帝子，何故爲蛇夜而當道？謂蛇白帝子，高祖赤帝子，白帝子爲蛇，赤帝子爲人，五帝皆天之神也，子或爲蛇，或爲人，人與蛇異物，而其爲帝同種，非天道也。且蛇爲白帝子，則嫗爲白帝后乎？帝者之后，前後宜備，帝者之

子，官屬宜盛。今一蛇死於徑，一嫗突於道，云白帝子，非實明矣。夫非實則象，象則妖也。妖則所見之物，皆非物也；非物則氣也。高祖所殺之蛇，非蛇也，則夫鄼厲公將入鄼之時，邑中之蛇，與邑外之蛇鬪者，非蛇也。厲公將入鄼，妖氣象蛇而鬪也。鄼國鬪蛇，非蛇，則知夏庭二龍爲龍象，爲龍象，則知鄼子產之時，龍戰非龍也。天道難知，使非妖也，使是亦妖也。

留侯張良椎秦始皇，諷中副車。始皇大怒，索求張良。張良變姓名，亡匿下邳，常閑從容步遊下邳泗上。有一老父，衣褐至良所，直墮其履泗下，顧謂張良曰：『孺子下取履。』良愕然欲撻之，以其老，爲彊忍下取履，因跪進履。父以足受履，笑去。良大驚。父去里所復還，曰：『孺子可教矣。後五日平明，與我期此。』良怪之，因跪曰：『諾。』五日平明，良往。父已先在，怒曰：『與老人期，後何也？』去後五日早會。五日雞鳴復往，父又已先在，復怒曰：『後何也？』去後五日復早來。『五日良夜未半往。有頃父來，喜曰：『當如是矣。』出一篇書，曰：『讀是則爲帝者師。』後十三年，子見我濟北穀城山下，黃石，即我也。』遂去，無他言，弗復見。且日視其書，乃太公兵法也。良因異之，習讀之。是何謂也？曰：是高祖將起，張良爲輔之祥也。良居下邳任俠，十年陳涉等起，沛公略地下邳，良從，遂爲師將，封爲留侯。後十三年，從高祖過濟北界，得穀城山下黃石，取而保祠之。及留侯死，并葬黃石，蓋吉凶之象神矣。天地之化巧矣。使老父象黃石，黃石象老父，何其神邪？問曰：『黃石審老父，老父審黃石邪？』曰：『黃石不能爲老父，老父不能爲黃石。妖祥之氣見，故驗也。何以明之？晉平公之時，石言魏榆，平公問于師曠曰：『石何故言？』對曰：『石不能言，或憑依也。不然，民聽偏也。』夫石不能人言，則亦不能入形矣。石言與始皇時石墜東郡，民刻之，無異也。刻爲文，言爲辭，辭之與文，一實也。民刻文，氣發言，民之與氣，一性也。夫石不能自刻，則亦不能言，則亦不能爲人矣。太公兵法，氣象之也。何以知非實者？以老父非人，知書亦非太公之書也。氣象生人之形，則亦能象太公之書。問曰：『氣無刀筆，何以爲文？』曰：魯惠公夫人仲子，生而有文在其掌，曰『爲魯夫人。』晉唐叔虞，文在其手，曰『虞。』魯成季友，文在其手，曰『友。』三文之書性自然，老父之書氣自成也。性自然氣自成，與夫重器口

自言，無以異也。當宣之謠也，不知所受，口自言之。口自言，文自成，或爲之也。推此以省太公，釣得巨魚，刺魚得書云『呂尚封齊』及武王得白魚，喉下文曰『以予發』，蓋不虛矣。因此復原河圖洛書，言與衰存亡，帝王際會，審有其文矣，皆妖祥之氣，吉凶之端也。

訂鬼篇

凡天地之間有鬼，非人死精神爲之也，皆人思念存想之所致也，致之何由？由於疾病。人病則憂懼，憂懼見鬼出。凡人不病則不畏懼，故得病寢衽，畏懼鬼至。畏懼則存想，存想則自虛見。何以效之？傳曰：『伯樂學相馬，願玩所見，無非馬者。』宋之庖丁學解牛，三年不見生牛，所見皆死牛也。『二者用精至矣。』思念存想，自見異物也。人病見鬼，猶伯樂之見馬，庖丁之見牛也。伯樂庖丁，所見非馬與牛，則亦知夫病者所見非鬼也。病者因劇身體痛，則謂鬼持箠杖毆擊之。若見鬼把椎鑊繩纏立守其旁，病痛恐懼，妄見之也。初疾畏驚，見鬼之來，疾困死氣，見鬼之怒，身自疾痛，見鬼之擊，皆存想虛致，未必有其實也。夫精念存想，或泄於目，或泄於口，或泄於耳。泄於目，目見其形；泄於耳，耳聞其聲；泄於口，口言其事。晝日則鬼見，暮臥則夢聞。獨臥空室之中，若有所畏懼，則夢見夫人據案其身哭矣。覺見臥聞，俱用精神，畏懼存想，同一實也。

一曰人之見鬼，目光與臥亂也。人之晝也，氣倦精盡，夜則欲臥，臥而目光反，反而精神見人物之象矣。人病亦氣倦精盡，目雖不臥，光已亂於臥也，故亦見人物象。病者之見也，若臥若否，與夢相似，當其見也，其人能自知覺與夢，故其見物不能知其鬼與人，精盡氣倦之效也。何以驗之？以狂者見鬼也。狂癡獨語，不與善人相得者，病困精亂也。夫病且死之時，亦與狂等，臥病及狂，三者皆精衰倦，目光反照，故皆獨見人物之象焉。

一曰鬼者人所見，得病之氣也。氣不和者中人，中人爲鬼，其氣象人形而見，故病篤者氣盛，氣盛則象人而至；至則病者見其象矣。假令得病山林之中，其見鬼則見山林之精。人或病越地者，病見越人坐其側。由此言之，羗

夫寶墨之徒，或時氣之形象也。凡天地之間，氣皆絀於天，天文垂象於上，其氣降而生物，氣和者養生，不和者傷害。本有象於天，則其降下，有形於地矣。故鬼之見也，象氣爲之也。衆星之體爲人與鳥獸，故其病人，則見人與鳥獸之形。

一曰鬼者，老物之精也。物之老者，其精爲人，亦有未老，性能變化，象人之形。人之受氣，有與物同精也，則其物與之交，及病，精氣衰劣也，則來犯陵之矣。何以效之？成事，俗間與物交者，見鬼之來也。夫病者所見之鬼，與彼病物何以異？人病見鬼來，象其墓中死人來迎呼之者，宅中之六畜也。及見他鬼，非是所素知者，他家若草野之中物爲之也。

一曰鬼者，本生於人，時不成人，變化而去。天地之性，本有此化，非道術之家，所能論辯。與人相觸犯者，病，病人命當死，死者不離人，何以明之？禮曰：顓頊氏有三子，生而故妖死，去爲疫鬼。一居江水，是爲虐鬼；一居若水，是爲魍魎鬼；一居人宮室，區隅樞庫，善驚人小兒。前顓頊之世，生子必多，若顓頊之鬼神以百數也。諸鬼神有形體，法能立樹，與人相見者，皆生於善人，得善人之氣，故能似類善人之形，能與善人相害。陰陽浮游之類，若雲煙之氣，不能爲也。

一曰鬼者，甲乙之神也。甲乙者，天之別（一作剛）氣也，其形象人。人病且死，甲乙之神至矣。假令甲乙之日病，則死見庚辛之神矣。何則？甲乙鬼，庚辛報甲乙，故病人且死，殺鬼之至者，庚辛之神也。何以效之？以甲乙日病者，其死生之期，常在庚辛之日。此非論者所以爲實也。天道難知，鬼神闇昧，故具載列，令世察之也。

一曰鬼者，物也，與人無異。天地之間，有鬼之物，常在四邊之外，時往來中國，與人雜則凶惡之類也；故人病且死者，乃見之。天地生物也，有人如鳥獸；及其生凶物，亦有似人象鳥獸者。故凶禍之家，或見蜚尸，或見走凶，或見人形。三者皆鬼也，或謂之鬼，或謂之凶，或謂之魑，或謂之魅，皆生存實有，非虛無象類之也。何以明之？成事，俗間家人且凶，見流光集其室，或見其形若鳥之狀，時流入室，察其不謂若鳥獸矣。夫物有形則能食，能食則便利，

便利有驗，則形體有實矣。左氏書經曰：『投之四裔，以禦魑魅。』山海經曰：『北方有鬼國，號諸者謂之龍物也。而魑與龍相連，魑則龍之類矣。』又言國人物之靈也。山海經又曰：『滄海之中，有度朔之山，上有大桃木，其屈蟠三千里，其枝間東北曰鬼門，萬鬼所出入也。上有二神人，一曰神荼，一曰鬱壘，主閭領萬鬼，惡害之鬼，執以葦索而以食虎。於是黃帝乃作禮以時驅之，立大桃人，門戶畫神荼鬱壘與虎，懸葦索以禦。凶魅有形，故執以食虎。』案可食之物無空虛者，其物也性與人殊，時見時匿，與龍不常見，無以異也。

一曰人且吉凶，妖祥先見。人之且死見百怪，鬼在百怪之中，故妖怪之動，象人之形，或象人之聲爲應，故其妖動不離人形。天地之間，妖怪非一，言有妖，聲有妖，文有妖，或妖氣象人之形，或人含氣爲妖，象人之形，諸所見鬼是也。人含氣爲妖，巫之類是也。是以實巫之辭，無所因據，其吉凶自從口出，若童之語矣。童語口自言，巫辭意自出口，自言，意自出，則其爲人，與聲氣自立，音聲自發，同一實也。

世稱紂之時，夜郊鬼哭，及蒼頡作書，鬼夜哭，氣能象人聲而哭，則亦能象人形而見，則人以爲鬼矣。鬼之見也，人之妖也。天地之間，禍福之至，皆有兆象，有漸不卒然，有妖不猥來。天地之道，人將亡，凶亦出；國將亡，妖亦見。猶人且吉，吉祥至；國且昌，昌瑞到矣。故夫瑞應妖祥，其實一也。而世獨謂鬼者，不在妖祥之中，謂鬼猶神而能害人，不通妖祥之道，不睹物氣之變也。國將亡，妖見，其亡非妖也；人將死，鬼來，其死非鬼也。亡國者，兵也；殺人者，病也。何以明之？齊襄公將爲賊所殺，遊于姑孃，遂田于貝丘，見大豕，從者曰：『公子彭生也。』公怒曰：『彭生敢見！』引弓射之，豕人立而啼。公懼，墜下車，傷足衰屨，而爲賊殺之。夫殺襄公者，賊也。先見大豕於路，則襄公且死之妖也。人謂之彭生者，有似彭生之狀也。世人皆知殺襄公者非豕，而獨謂鬼能殺人，一惑也。

天地之氣爲妖者，太陽之氣也。妖與毒同，氣中傷人者謂之毒，氣變化者謂之妖。世謂童謠熒惑使之，彼言有所見也。熒惑火星，火有毒熒，故當熒惑守宿，國有禍敗；火氣恍惚，故妖象存亡。龍陽物也，故時變化；鬼陽氣也，時藏時見。陽氣赤，故世人盡見鬼，其色純朱，蜚凶陽也，陽火也，故蜚凶之類爲火光。火熱焦物，故止集樹木，枝葉枯

死。洪範五行，二曰火，五事二曰言，言火同氣，故童謠詩歌爲妖言，言出文成，故世有文書之怪。世謂童子爲陽，故妖言出於小童。童巫含陽，故大雩之祭，舞童暴巫，雩祭之禮，倍陰合陽，故猶日食陰勝，攻社之陰也。日食陰勝，故攻陰之類。天旱陽勝，故愁陽之黨，巫爲陽黨，故魯僖十四年，譏欲焚巫，巫含陽氣，以故陽地之民多爲巫。巫黨於鬼，故巫者爲鬼巫。鬼巫比於童謠，故巫之審者，能處吉凶。吉凶能處，吉凶之徒者，故申生之妖見於巫，巫含陽能見爲妖也。申生爲妖，則知杜伯莊子義厲鬼之徒皆妖也。杜伯之厲爲妖，則其弓矢投皆妖毒也。妖象人之形，其毒象人之兵，鬼毒同色，故杜伯弓矢皆朱形也。毒象人之兵，則其中人，人輒死也。中人微者即爲腓，病者不即時死。何則？腓者，毒氣所加也。妖或施其毒，不見其體，或見其形，不施其毒，或出其聲，不成其言，或明其言，不知其音。若夫申生，見其體，成其言者也。杜伯之厲，見其體，施其毒者也。詩妖童謠，石言之屬，明其言者也。濮水琴聲，紂郊鬼哭，出其聲者也。

妖之見出也，或且凶而豫見，或凶至而因出。因出則妖與毒俱行，豫見妖出不能毒。申生之見，豫見之妖也。杜伯莊子義厲鬼至，因出之妖也。周宣王燕簡公宋夜姑時嘗死，故妖見毒因擊。晉惠公身嘗獲命未死，故妖直見而毒不射。然則杜伯莊子義厲鬼之見，周宣王燕簡公夜姑且死之妖也。申生之出，晉惠公且見獲之妖也。伯有之夢，鬪帶公孫段且卒之妖也。老父結草，魏顆且勝之祥，亦或時杜回見獲之妖也。蒼犬噬呂后，呂后且死，妖象犬形也。武安且卒，妖象寶璽灌夫之面也。故凡世間所謂妖祥，所謂鬼神者，皆太陽之氣爲之也。太陽之氣，天氣也。天能生成之體，故能象人之容。夫人所以生者，陰陽氣也。陰氣生爲骨肉，陽氣生爲精神。人之生也，陰陽氣具，故骨肉堅，精氣盛。精氣爲知，骨肉爲強，故精神言談，形體固守。骨肉精神，合錯相持，故能常見而不滅亡也。太陽之氣，盛而無陰，故徒能爲象，不能爲形。無骨肉，有精氣，故一見恍惚，輒復滅亡也。

或問曰：『天地之間，萬物之性，含血之蟲，有蝮蛇蜂蟄，或懷毒螫，犯中人身，謂獲疾痛，當時不救，流偏一身。草木之中，有巴豆野葛，食之湊癰，頗多殺人。不知此物，稟何氣於天？萬物之生，皆稟元氣，元氣之中，有毒螫乎？』曰：夫毒，太陽之熱氣也。中人人毒，人食湊癰者，其不堪任也。不堪任則謂之毒矣。太陽火氣，常爲毒螫，氣熱也。太陽之地，人民促急，促急之人，口舌爲毒。故楚越之人，促急捷疾，與人談言，口唾射人，則人脈胎腫而爲創。南郡極熱之地，其人祝樹樹枯，唾鳥鳥墜。巫咸能以祝延人之疾，愈人之稱者，生於江南，含烈氣也。夫毒，陽氣也，故其中人，若火灼人，或爲蝮所中，割肉置地焦沸，火氣之驗也。四方極爲維邊，唯東南隅有溫烈氣，溫烈氣發，常以春夏。春夏陽起，東南隅，陽位也。他物之氣，入人鼻目，不能疾痛，火烟入鼻鼻疾，入目目痛，火氣有烈也。物爲靡屑者多，唯一火最烈，火氣所燥也。食甘旨之食，無傷於人。食蜜少多，則令人毒。蜜爲蜂液，蜂則陽物也。人行無所觸犯，體無故痛，痛處若箠杖之跡，人腓，腓謂鬼毆之鬼者，太陽之妖也。微者疾謂之邊，其治用蜜與丹。蜜丹陽物，以類治之也。夫治風用風，治熱用熱，治邊用蜜丹，則知邊者陽氣所爲，流毒所加也。

天地之間，毒氣流行，人當其衝，則面腫疾。世人謂之火流所刺也。人見鬼者，言其色赤。太陽妖氣，自如其色也。鬼爲烈毒，犯人輒死，故杜伯射周宣立崩。鬼所賣物，陽火之類，杜伯弓矢，其色皆赤。南道名毒曰短狐，杜伯之象，執弓而射，陽氣因而激，激而射，故其中人象弓矢之形。火困而氣熱，血毒盛，故食走馬之肝殺人，氣因爲熱也。盛夏暴行，暑竭而死，熱極爲毒也。人疾行汗出，對爐汗出，嚮日亦汗出，疾溫病者亦汗出，四者異事而皆汗出，困同熱等，火日之變也。天下萬物，合太陽氣而生者，皆有毒螫。毒螫溫者，在蟲則爲蝮蛇蜂蟄，在草則爲巴豆冶（一作野）葛，在魚則爲鮭與鰕鰤。故人食鮭肝而死，爲鰕鰤螫有毒。魚與鳥同類，故鳥蜚魚亦蜚，鳥卵魚亦卵。蝮蛇蜂蟄皆卵，同性類也。其在一人也爲小人，故小人之口，爲禍天下。小人皆懷毒氣，陽地小人，毒尤酷烈，故南越之人，祝誓輒效。

諺曰：『衆口鑠金。』口者火也。五行二曰火，五事二曰言。言與火直，故云鑠金。道口舌之鑠，不言拔木燬火，必

云鑠金。金制於火，火口同類也。藥生非一地，太伯辭之吳，鑄多非一工，世稱楚棠溪。溫氣天下有，路畏入南海。鴟鳥生於南，人飲鴟死。辰爲龍，巳爲蛇，辰巳之位，在東南。龍有毒，蛇有蟄，故螻有利牙，龍有逆鱗。木生火，火爲毒，故蒼龍之獸，舍火星。冶葛巴豆皆有毒蟄，故治在東南。巴在西南。土地有燥溼，故毒物有多少。生出有處地，故毒有烈不烈。蝮蛇與魚比，故生於草澤。蜂蟄與鳥同，故產於屋樹。江北地燥，故多蜂蟄；江南地溼，故多蝮蛇。生高燥比陽，陽物縣垂，故蜂蟄以尾刺；生下溼比陰，陰物柔伸，故蝮蛇以口齧。毒或藏於首尾，故螫諸有毒，或藏於體膚，故食之輒癢，或附於唇吻，故舌鼓爲稱。毒蟄之生，皆同一氣，發動雖異，內爲一類。故人夢見火，占爲口舌，夢見蝮蛇，亦口舌。火爲口舌之象，口舌見於蝮蛇，同類共本，所稟一氣也。故火爲言，言爲小人；小人爲妖，由口舌。口舌之徵，由人感天，故五事二曰言。言之咎徵，僭恆陽若。僭者奢麗，故蝮蛇多文。文起於陽，故若致文。陽若則言從，故時有詩妖。妖氣生美好，故美好之人多邪惡。

叔虎之母笑，叔向之母知之，不使視寢。叔向諫，其母曰：『深山大澤，實生龍蛇。彼笑，吾懼其生龍蛇以禍汝。汝弊族也，國多大寵，不仁之人間之，不亦難乎？余何愛焉？』使往視寢，生叔虎笑，有勇力，嬖於欒懷子。及范宣子逐懷子，殺叔虎，稱及叔向。夫深山大澤，龍蛇所生也；比之叔虎之母者，美色之人，懷毒蟄也。生子叔虎笑，有勇力，勇力所生，生於美色，稱難所發，由於勇力。火有光耀，木有容貌，龍蛇東方木含火精，故美色貌麗，隱附於肝，故生勇力。火氣猛故多勇，木剛強故多力也。生妖怪者，常由好色；爲稱難者，常發勇力；爲毒害者，皆在好色。美猶爲毒，酒難多飲，蜂液爲蜜，蜜難益食。勇夫強國，勇夫難近；好女說心，好女難畜；辯士快意，辯士難信。故笑味腐腹，好色惑心，勇夫招禍，辯口致殃。四者，世之毒也。辯口之毒，爲害尤酷，何以明之？孔子見陽虎，卻行白汗交流，陽虎辯有口舌，口舌之毒，中人病也。人中諸舌，一身死之；中於口舌，一國潰亂。詩曰：『讒言罔極，交亂四國。』四國猶亂，况一人乎？故君子不畏虎，獨畏讒夫之口；讒夫之口，爲毒大矣。

賢聖之業，皆以薄葬省用爲務；然而世尙厚葬，有奢泰之失者，儒家論不明，墨家議之非故也。墨家之議，右鬼以爲人死，輒爲神鬼，而有知，能形而害人，故引杜伯之類，以爲效驗。儒家不從，以爲死人無知，不能爲鬼，然而禮祭備物者，示不負死以觀生也。陸賈依儒家而說，故其立語，不肯明處。劉子政舉薄葬之義，務欲省用，不能極論，是以世俗內持狐疑之議，外聞杜伯之類，又見病且終者，臺中死人，來與相見，故遂信是。謂死如生，閔死獨葬，魂孤無副，丘墓閉藏，穀物乏匱，故作偶人，以待尸柩，多藏食物，以敵精魂，積浸流至，或破家盡業，以无死棺，殺人以殉葬，以快生意。非知其內無益，而奢侈之心，外相慕也。以爲死人有知，與生人無以異，孔子非之，而亦無以定實。然而陸賈之論，兩無所處。劉子政奏，亦不能明。儒家無知之驗，墨家有知之故，事莫明於有效，論莫定於有證。空言虛語，雖得道心，人猶不信。是以世俗輕信，信禍福者，畏死不懼，義重死，不顧生，竭財以事神，空家以送終。辯士文人有效驗，若墨家之以杜伯爲據，則死無知之實可明，薄葬省財之教，可立也。

今墨家非儒，儒家非墨，各有所持，故乖不合。業雖齊同，故二家爭論。世無祭祀復生之人，故死生之義，未有所定。實者，死人闇昧，與人殊途，其實荒忽，難得深知。有知無知之情，不可定，爲鬼之實，不可是。通人知士，雖博覽古今，窺涉百家，條入葉貫，不能審知。唯聖心賢意，方比物類，爲能實之。夫論不留精澄意，苟以外效立事，是非信聞見於外，不詮訂於內，是用耳目論，不以心意議也。夫以耳目論，則以虛象爲言；虛象效，則以實事爲非。是非者，不徒耳目，必開心意。墨議不以心而原物，苟信聞見，則雖效驗章明，猶爲失實。失實之議，難以教，雖得愚民之欲，不合知者之心。喪物索用，無益於世，此蓋墨術所以不傳也。

魯人將以瑯瑁斂，孔子聞之，徑庭麗級而諫。夫徑庭麗級，非禮也。孔子爲救患也。患之所由，常由有所貪。瑯瑁，寶物也。魯人用斂，姦人憫之，欲心生矣。姦人欲生，不畏罪法，不畏罪法，則丘墓抽矣。孔子睹微見著，故徑庭麗級，以救患直諫。夫不明死人無知之義，而著丘墓必抽之諫，雖盡比干之執，人人必不聽。何則？諸侯財多不憂貧，戚疆不懼抽。死人之議，狐疑未定，孝子之計，從其重者。如明死人無知，厚葬無益，論定議立，較著可聞，則瑯瑁之禮

不行，徑庭之諫不發矣。今不明其說而彊其諫，此蓋孔子所以不能立其教。孔子非不明死生之實，其意不分別者，亦陸賈之語指也。夫言死無知，則臣子倍其君父，故曰：「喪祭禮廢，則臣子恩絕。」臣子恩絕，則倍死亡先。倍死亡先，則不孝獄多。聖人懼開不孝之源，故不明死無知之實。異道不相連，事生厚，化自生。雖事死，何損於化？使死者有知，倍之非也。如無所知，倍之何損？明其無知，未必有倍死之害。不明無知，成事已有賊生之費。

孝子之養親病也，未死之時，求卜迎醫，冀稍消藥有益也；既死之後，雖審如巫咸，良如扁鵲，終不復生。何則？知死氣絕，終無補益；治死無益，厚葬何益乎？倍死恐傷化，絕卜拒醫，獨不傷義乎？親之生也，坐之高堂之上；其死也，葬之黃泉之下。黃泉之下，非人所居，然而葬之不疑者，以死絕異處，不可同也。如當亦如生存，恐人倍之，宜葬於宅，與生同也。不明無知，爲人倍其親，獨明葬黃泉，不爲離其先乎？親在獄中，罪疑未定，孝子馳走，以救其難，如罪定法立，終無門戶，雖曾子子嚙，坐泣而已。何則？計動無益，空爲煩也。今死親之魂，定無所知，與拘親之罪，決不可救，何以異？不明無知，恐人倍其先，獨明罪定，不爲忽其親乎？聖人立義，有益於化，雖小弗除；無補於政，雖大弗與。今厚死人，何益於恩？倍之弗事，何損於義？孔子又謂明器不成，示意有明。備則偶人，象類生人，故魯用偶人葬，孔子嘆：「賄用人殉之兆也。」故嘆以痛之。卽如生當備物，不示如生，意悉其教；用偶人葬，恐後用生殉；用明器，獨不爲後用審器葬乎？

絕用人之源，不防喪物之路。重人不愛用，痛人不愛國，傳議之所失也。救漏防者，悉塞其穴。則水泄絕，穴不悉塞，水有所漏，漏則水爲患害。論死不悉，則奢禮不絕，不絕則喪物索用。用索物喪，民貧耗之至，危亡之道也。蘇秦爲燕，使齊國之民，高大丘冢，多藏財物，蘇秦身弗以勸勉之。財盡民貧，國空兵弱，燕軍卒至，無以自衛，國破城亡，主出民散。今不明死之無知，使民自竭，以厚葬親，與蘇秦秦計同一敗。墨家之議，自違其術，其薄葬而又右鬼，右鬼引效，以杜伯爲驗。杜伯死人，如謂杜伯爲鬼，則夫死者審有知。如有知而薄葬之，是怒死也。情欲厚而惡薄，以薄受死者之責，雖右鬼其何益哉？如以鬼非死人，則其信杜伯非也；如以鬼是死人，則其薄葬非也。術用乖錯，首

尾相連，故以爲非。非與是不明，皆不可行。夫如是，世俗之人，可一詳覽，詳覽如斯，可一薄葬矣。

四諱篇

俗有大諱四：一曰諱西益宅，西益宅謂之不祥，不祥必有死亡。相懼以此，故世莫敢西益宅。防禁所從來者遠矣。傳曰：『魯哀公欲西益宅，史爭以爲不祥。哀公作色而怒，左右數諫而弗聽，以問其傳宰質。』質曰：『吾欲西益宅，史以爲不祥，如何？』宰質曰：『天下有三不祥，西益宅不與焉。』哀公大悅，有頃復問曰：『何謂三不祥？』對曰：『不行禮義，一不祥也；嗜欲無止，二不祥也；不聽規諫，三不祥也。』哀公繆然深准，慨然自反，遂不益宅。』令史與宰質隲止其益宅，徒爲煩擾，則西益宅祥與不祥，未可知也。令史質隲以爲西益宅審不祥，則史與質隲與今俗人等也。夫宅之四面皆地也，三面不謂之凶，益西面獨謂不祥何？西益宅何傷於地體？何害於宅神？西益不祥，損之能善乎？西益不祥，東益能吉乎？夫不祥必有祥者，猶不吉必有吉矣。宅有形體，神有吉凶。動德致福，犯罪起禍。今言西益宅，謂之不祥，何益而祥者？且惡人西益宅者，誰也？如地惡之，益東家之西，損西家之東，何傷於地？如以宅神不欲西益，神猶人也。人之處宅，欲得廣大，何故惡之？而以宅神惡煩擾，則四面益宅，皆留不祥。諸工技之家，說吉凶之占，皆有事狀。宅家言治宅犯凶神，移徙言忌歲月，祭祀言觸血忌，喪葬言犯剛柔，皆有鬼神凶惡之禁；人不忌避，有病死之禍。至於西益宅何害，而謂之不祥？不祥之禍，何以爲敗？實說其義，不祥者義理之禁，非吉凶之忌也。夫西方，長老之地，尊者之位也。尊長在西，卑幼在東，尊長主也，卑幼助也。主少而助多，尊無二上，卑有百下也。西益主益，主不增助，二上不百下也；於義不尊，故謂不祥；不祥者，不宜也；於義不宜，未有凶也。何以明之？夫墓，死人所藏；田，人所飲食；宅，人所居處。三者於人，吉凶宜等。西益宅不祥，西益墓與田，不言不祥。夫墓，死人所居，因忽不慎；田，非人所處，不設尊卑；宅者，長幼所共，加慎致意者，何可不之諱？義詳於宅，略於墓與田也。

二曰諱被刑爲徒，不上丘墓。但知不可，不能知其不可之意。問其禁之者，不能知其諱，受禁行者，亦不要其忌。

連相放效，至或于被刑。父母死不送葬，若至墓側，不敢臨葬，甚失至於不行弔傷，見他人之柩。夫徒善人也，被刑謂之徒。丘墓之上二親也，死亡謂之先。宅與墓何別？親與先何異？如以徒被刑，先人責之，則不宜入宅，與親相見。如徒不得與死人相見，則親死在堂，不得哭柩。如以徒不得升丘墓，則徒不得上山陵。世俗禁之，執據何義？實聽其意，徒不上丘墓有二義：義理之譴，非凶惡之忌也。徒用心以爲先祖全而生之，子孫亦當全而歸之。故曾子有疾，召門弟子曰：『開予足，開予手。而今而後，吾知免夫。小子！』曾子重慎，臨絕效全，喜免毀傷之禍也。孔子曰：『身體髮膚，受之父母，弗敢毀傷。』孝者怕入刑辟，刻畫身體，毀傷髮膚，少德伯行，不戒慎之所致也。愧負刑辱，深自刻責，故不升墓祀於先。古禮廟祭，今俗墓祀，故不升墓，衡負先人，一義也。墓者，鬼神所在，祭祀之處，祭祀之禮，齊戒潔清，重之至也。今已被刑，刑殘之人，不宜與祭，供侍先人，卑謙謹敬，退讓自賤之意也。緣先祖之意，見子孫被刑，側怛懼傷，恐其臨祀，不忍啟享，故不上墓，二義也。昔太伯見王季有聖子文王，知太王意欲立之，入吳採藥，斷髮文身，以隨吳俗。太王薨，太伯還，王季辟主，太伯再葬，王季不聽。三讓曰：『吾之吳越，吳越之俗，斷髮文身。吾刑餘之人，不可爲宗廟社稷之主。』王季知不可，懼而受之。夫徒不上丘墓，太伯不爲主之義也，是謂祭祀不可，非謂樞嘗葬身不送也。葬死人先祖痛，見刑人先祖哀，懼可哀之身，送可痛之屍，使先祖有知，痛屍哀形，何愧之有？如使無知，丘墓田野也，何愧之有？漸愧先者，謂身體形殘，與人異也。古者用刑，刑毀不全，乃不可耳。方今象刑，象刑重者，髡鉗之法也。若完城旦以下，施刑綵衣系躬，冠帶與俗人殊，何爲不可？世俗信而謂之皆凶，其失至於不弔鄉黨，不升他人之丘墓也。

三曰諱婦人乳子，以爲不吉。將舉吉事，入山林遠行，度川澤者，皆不與之交通。乳子之家亦忌惡之，丘墓廬道畔，踰月乃入，惡之甚也。暫卒見若爲不吉，極原其事，何以爲惡？夫婦人之乳子也，子舍元氣而出，元氣天地之精微也，何凶而惡之？人物也，子亦物也。子生與萬物之生，何以異？諱人之生謂之惡，萬物之生又惡之乎？生與胞俱出，如以胞爲不吉，人之有胞，猶木實之有扶也。包裹兒身，因與俱出，若鳥卵之有殼，何妨謂之惡？如惡以爲不吉，

則諸物有扶穀者宜皆惡之萬物廣多難以盡事人生何以異於六畜皆含血氣懷子子生與人無異獨惡人而不憎畜豈以人體大氣血盛乎則夫牛馬體大於人凡可惡之事無異鈞等獨有一物不見比類乃可疑也今六畜與人無異其乳皆同一狀六畜與人無異諱人不諱六畜不曉其故也世能別人之產與六畜之乳吾將聽其諱如不能別則吾謂世俗所諱妄矣

且凡人所惡莫有腐臭腐臭之氣敗傷人心故鼻聞臭口食腐心損口惡霍亂嘔吐夫更衣之室可謂臭矣鮑魚之肉可謂腐矣然而有甘之更衣之室不以爲忌肴食腐魚之肉不以爲諱意不存以爲惡故不計其可與不也凡可憎惡者若穢墨漆附著人身今日見鼻聞一過則已忽亡軀去何故惡之出見負豕於塗腐漸於溝不以爲凶者誇辱自在彼人不著己之身也今婦人乳子自在其身齋戒之人何故忌之江北乳子不出房室知其無惡也至於犬乳置之宅外此復惡也江北諱犬不諱人江南諱人不諱犬諸俗防惡各不同也夫人與犬何以異房室宅外何以殊或惡或不惡或諱或不諱世俗防禁竟無經也月之晦也日月合宿紀爲一月猶八日月中分謂之弦十五日日月相望謂之望三十日月月合宿謂之晦晦與弦望一實也非月晦日月光氣與月朔異也何故踰月謂之吉乎如實凶踰月未可謂吉如實吉雖未踰月猶爲可也實說諱忌產子乳犬者欲使人常自潔清不欲使人被汚辱也夫自潔清則意精意精則行清行清而貞廉之節立矣

四曰諱舉正月五月子以爲正月五月子殺父與母不得已舉之父母禍死則信而謂之真矣夫正月五月子何故殺父與母人之含氣在腹腸之內其生十月而產共一元氣也正與二月何殊五與六月何異而謂之凶也世傳此言久拘數之人莫敢犯之弘識大材實核事理深睹吉凶之分者然後見之昔齊相田嬰賤妾有子名之曰文文以五月生嬰告其母勿舉也其母竊舉生之及長其母因兄弟而見其子文於嬰嬰怒曰『吾令汝去此子而敢生之何也』文頓首因曰『君所以不舉五月子者何故』嬰曰『五月子者長至戶將不利其父母』文曰『人生受命於天乎將受命於戶邪』嬰嘿然文曰『必受命於天君何憂焉如受命於戶卽高其戶誰能

至者。』嬰嘗其言曰：『子休矣！』其後使文主家待賓客，賓客日進，名聞諸侯。文長過戶而嬰不死。以田文之說言之，以田嬰不死效之，世俗所諱，虛妄之言也。夫田嬰俗父，而田文雅子也。嬰信忌不實義，文信命不避諱。雅俗異材，舉措殊操，故嬰名聞而不明，文聲賢而不滅。實說，世俗諱之，亦有緣也。夫正月歲始，五月盛陽，子以生精熾熱烈，厭勝父母；父母不堪，將受其患，傳相倣效，莫謂不然。有空諱之言，無實凶之效，世俗惑之，誤非之甚也。夫忌諱非一，必託之神怪；若設以死亡，然後世人信用。畏避忌諱之語，四方不同，略舉通語，令世觀覽。若夫曲俗微小之諱，衆多非一，咸勸人爲善，使人重慎，無鬼神之害，凶醜之禍。世諱作豆醬惡聞雷，一人不食，欲使人急作，不欲積家踰至春也。諱厲刀井上，恐刀墮井中也。或說以爲刑之字，井與刀也；厲刀井上，井刀相見，恐殺刑也，毋承屋檐而坐，恐瓦墮擊人首也。毋反懸冠，爲似死人服，或說惡其反而承塵溜也。毋僵癢，爲其象屍也；毋以箸相受，爲其不固也；毋相代掃，爲修冢之人，冀人求代已也。諸言毋者，教人重慎，勉人爲善。禮曰：『毋搏飯，毋流歃。』禮義之禁，未必吉凶之言也。

調時篇

世俗起土與功，歲月有所食；所食之地，必有死者。假令太歲在子，歲食於酉，正月建寅，月食於巳；子實地與功，則酉巳之家見食矣。見食之家，作起厭勝，以五行之物，懸金木水火。假令歲月食西家，西家懸金；歲月食東家，東家懸炭。穀祭祀以除其凶，或空亡徙以辟其殃，連相倣效，皆謂之然。如考實之，虛妄迷也。何以明之？夫天地之神，用心等也，人民無狀，加罪行罰，非有二心兩意，前後相反也。移徙不避歲月，歲月惡其不避己之衝位怒之也。今起功之家，亦動地體，無狀之過，與移徙等。起功之家，當爲歲所食，何故反令巳酉之地受其咎乎？豈歲月之神，怪移徙而咎起功哉？用心措意，何其不平也！鬼神罪過人，猶縣官請罰民也。民犯刑罰多非一，小過宥罪，大惡犯辟，未有以無過受罪，無過而受罪，世謂之冤。今巳酉之家，無過於月歲，子家起宅，空爲見食，此則歲冤無罪也。且夫

太歲在子，子宅直符；午宅爲破，不須興功起事，空居無爲，猶被其害。今歲月所食，待子宅有爲，巳酉乃凶。太歲歲月之神，用罰爲害，動靜殊致，非天從歲月神意之道也。

審論歲月之神，歲則太歲也，在天邊際，立於子位。起室者在中國一州之內，假令揚州在東南，使如鄒衍之言，天下爲一州，又在東南，歲食於酉，食酉之地。東南之地，安得凶禍？假令歲在人民之間，西宅爲酉地，則起功之家，宅中亦有酉地，何以不近食其宅中之酉地，而反食他家乎？且食之者審誰者？如審歲月，歲月，天之從神，飲食與天同，天食不食人，故郊祭不以爲牲。如非天神，亦不食人，天地之間，百神所食，聖人謂當與等人，推生事死，推人事鬼，故百神之祀，皆用衆物，無用人者。物食人者，虎與狼也。歲月之神，豈虎狼之精哉？倉卒之世，穀食乏匱，人民饑餓，自相啖食，豈其啖食死者，其精爲歲月之神哉？歲月之神，日亦有神，歲食月食，日何不食？積日爲月，積月爲時，積時爲歲，千五百三十九歲爲一統，四千六百一十七歲爲一元，增積相倍之數，分餘終竟之名耳。安得鬼神之怪，禍福之驗乎？如歲月終竟者，宜有神，則四時有神，統元有神，月三日魄，八日弦，十五日望，與歲月終竟何異？歲月有神，魄與弦復有神也。一日之中，分爲十二時，平旦寅，日出卯也；十二月建寅卯，則十二月時所加寅卯也。日加十二辰不食，月建十二辰獨食，豈日加無神，月建獨有哉？何故月建獨食，日加不食乎？如日加無神，用時決事非也；如加時有神，獨不食，非也。

神之口腹，與人等也。人饑則食，飽則止，不爲起功乃一食也。歲月之神，起功乃食。一歲之中，興功者希，歲月之神饑乎？倉卒之世，人民亡，室宅荒廢，興功者絕，歲月之神饑乎？且田與宅俱人所治，興功用力，勞逸鈞等。宅掘土而立木，田鑿溝而起堤，堤與木俱立，掘與鑿俱爲。起宅歲月食，治田獨不食，豈起宅時歲月饑，治田時飽乎？何事鈞作同，飲食不等也？說歲月食之家，必銓功之小大，立遠近之步數。假令起三尺之功，食一步之內；起十丈之役，食一里之外。功有大小，禍有近遠。蒙恬爲秦築長城，極天下之半，則其爲禍宜以萬數。秦長城之造，秦民不多死，周公作維，興功至大，當時歲月宜多食，聖人知其審食，宜徙所食地，置於吉祥之位。如不知避，人民多凶。經傳之

文，賢聖宜有刺譏。今聞築雉之民，四方和會，功成事畢，不聞多死，詭歲月之家，殆虛非實也。

且歲月嘗食，猶人口腹之饑必食也。且爲已酉地有厭勝之故，畏一金刀，懼一死炭，豈開口不敢食哉？如實畏懼，宜如其數。五行相勝，物氣鉤適。如泰山失火，沃以一杯之水，河決千里，塞以一培之土，能勝之乎？非失五行之道，小大多少，不能相當也。天地之性，人物之力，少不勝多，小不厭大。使三軍持木杖，匹夫持一刃，伸力角氣，匹夫必死。金性勝木，然而木勝金負者，木多而金寡也。積金如山，燃一炭火以燔燦之，金必不銷。非失五行之道，金多火少，少多小大不鈞也。五尺童子，與孟賁爭，童子不勝，非童子怯，力少之故也。狼衆食人，人衆食狼，敵力角氣，能以小勝大者，希；爭彊量功，能以寡勝衆者，鮮。天道不物，不能以小勝大者，少不能服多。以一刃之金，一炭之火，厭除凶咎，卻歲之殃，如何也？

識日篇

世俗旣信歲時，而又信日；舉事若病死災患，大則謂之犯觸歲月，小則謂之不避日禁。歲月之傳旣用，日禁之書亦行，世俗之人，委心信之，辯論之士，亦不能定。是以世人舉事，不考於心而合於日，不參於義而致於時；時日之書，衆多非一，略舉較著，明其是非。使信天時之人，將一疑而倍之。夫禍福隨盛衰而至，代謝而然。舉事日凶，人畏凶有效；日吉，人冀吉有驗。禍福自至，則述前之吉凶，以相戒懼。此日記所以累世不疑，惑者所以連年不悟也。葬歷曰：『葬避九空地，及日之剛柔，月之奇耦。』日吉無害，剛柔相得，奇耦相應，乃爲吉長，不合此歷，轉爲凶。惡，夫葬藏棺也，斂藏尸也。初死藏尸於棺，少久藏棺於墓，墓與棺何別？斂與葬何異？斂於棺不避凶，葬於墓獨求吉。如以墓爲重，夫墓，土也；棺，木也。五行之性，木土鈞也。治木以羸尸，穿土以埋棺，治與穿同事，尸與棺一實也。如以穿土賊地之體，鑿溝耕園，亦宜擇日。世人能異其事，吾將聽其禁，不能異其事，吾不從其諱。日之不害，又求日之剛柔，剛柔旣合，又索月之奇耦。夫日之剛柔，月之奇耦，合於葬歷，驗之於吉，無不相得，何以明之？春秋之時，天

子諸侯卿大夫死，以千百數，案其葬日，未必合於歷。

又曰：『雨不克葬，庚寅日中乃葬。』假令魯小君以剛日死，至葬日己丑，剛柔等矣。剛柔合，魯日也。不克葬者，避雨也。如魯日，不當以雨之故，廢而不用也。何則？雨不便事耳。不用剛柔，重凶不吉，欲便事而犯凶，非魯人之意。臣子重慎之義也。今廢剛柔，待庚寅日中，以賜焉吉也。禮，天子七月而葬，諸侯五月，卿大夫士三月。假令天子正月崩，七月葬；二月崩，八月葬。諸侯卿大夫士皆然。如驗之葬歷，則天子諸侯葬月，常奇常耦也。衰世好信禁，不肯君好求福。春秋之時，可謂衰矣。隱哀之間，不肯甚矣。然而葬埋之日，不見所諱，無忌之故也。周文之世，法度備具，孔子意密，春秋義纖。如廢吉得凶，妄舉觸禍，宜有微文小義，貶譏之辭，今不見其義，無葬歷法也。祭祀之歷，亦有吉凶；假令血忌月殺之日，固凶，以殺牲設祭，必有患禍。夫祭者，供食鬼也；鬼者，死人之精也。若非死人之精，人未嘗見鬼之飲食也。推生事死，推人事鬼，見生人有飲食，死爲鬼當能復飲食；感物思親，故祭祀也。及他神百鬼之祠，雖非死人，其事之體，亦與死人同，蓋以不見其形，但以生人之體，准況之也。生人飲食無日，鬼神何故有日？如鬼神審有知，與人無異，則祭不宜擇日；如無知也，不能飲食，雖擇日避忌，其何補益？實者百祀無鬼，死人無知，百祀報功，示不忘德；死如事生，示不背亡。祭之無福，不祭無福。祭與不祭，尙無禍福，況日之吉凶，何能損益？如以殺牲見血，避血忌月殺，則生人食六畜，亦宜避之。海內屠肆，六畜死者，日數千頭，不擇吉凶；早死者，未必屠工也。天下死罪，各有斷囚，亦數千人，其刑於市，不擇吉日；受禍者，未必獄吏也。肉盡殺牲，獄具斷囚，囚斷牲殺，創血之實，何以異於祭祀之牲？獨爲祭祀設歷，不爲屠工獄吏立見，世俗用意不實類也。祭非其鬼，又信非其諱，持二非往求一福，不能得也。

沐書曰：『子日沐，令人愛之；卯日沐，令人白頭。』夫人之所愛憎，在容貌之好醜；頭髮白黑，在年歲之稚老。使醜如嫫母，以子日沐，能得愛乎？使十五女子，以卯日沐，能白髮乎？且沐者去首垢也。洗去足垢，盥去手垢，浴去身垢，能去一形之垢，其實等也。洗盥浴不擇日，而沐獨有日。如以首爲最尊，尊則浴亦治面，面亦首也；如以髮爲最

尊，則櫛亦宜尊。日，櫛用水。沐用水，水與木俱五行也。用木不避忌，用水獨擇日。如以水尊於木，則諸用水者宜皆擇日。且水不若火尊，如必以尊卑，則用火者宜皆擇日。且使子沐，人愛之；卯沐，其首白者，誰也？夫子之性，水也；卯，木也。水不可愛，木色不白。子之禽，鼠；卯之獸，兔也。鼠不可愛，兔毛不白。以子日沐，誰使可愛？卯日沐，誰使凝白者？夫如是，沐之日無吉凶；爲沐立日曆者，不可用也。

裁衣有書，書有吉凶。凶日襲衣則有禍，吉日則有福。夫衣與食俱輔人體，食輔其內，衣衛其外。飲食不擇日，襲衣避忌日，豈以衣爲於其身重哉？人道所重，莫如食急，故八政一曰食，二曰貨。衣服，貨也。如以加之於形爲尊重，在身之物，莫大於冠，造冠無禁，裁衣有忌，於是尊者略，卑者詳也。且夫沐去頭垢，冠爲首飾，浴除身垢，衣衛體褻。沐有忌，冠無諱，浴無吉凶，衣有利害，俱爲一體，共爲一身，或善或惡，所諱不均，俗人淺知，不能實也。且衣服不如車馬，九錫之體，一曰車馬，二曰衣服，作車不求良辰，裁衣獨求吉日，俗人所重，失輕重之實也。

工伎之書，起宅蓋屋必擇日。夫屋覆人形，宅居人體，何害於歲月而必擇之？如以障礙人身者神惡之，則夫裝車治船，著蓋施帽，亦當擇日。如以動地穿土神惡之，則夫鑿溝耕園，亦宜擇日。夫動土擾地神，地神能原人，無有惡意。但欲居身自安，則神之聖心，必不忿怒，不忿怒，雖不擇日，猶無禍也。如土地之神，不能原人之意，苟惡人動擾之，則雖擇日何益哉？王法禁殺傷人，殺傷人皆伏其罪。雖擇日犯法，終不免罪。如不禁也，雖妄殺傷，終不入法。縣官之法，猶鬼神之制也，穿鑿之過，猶殺傷之罪也。人殺傷不在擇日，繪治室宅何故有忌？

又學書諱丙日，云：『倉頡以丙日死也。』禮不以子卯舉樂，殷夏以子卯日亡也。如以丙日書，子卯日舉樂，未必有禍；重先王之亡日，懷愴感動，不忍以舉事也。忌日之法，蓋丙與子卯之類也，殆有所諱，未必有凶禍也。堪輿曆，曆上諸神非一，聖人不言，諸子不傳，殆無其實。天道難知，假令有之，諸神用事之日也，忌之何福？不諱何禍？王者以甲子之日舉事，民亦用之。王者聞之，不刑法也。夫王者不怒民不與己相避，天神何爲獨當責之？王法舉事，以人事之可否，不問日之吉凶。孔子曰：『卜其宅兆而安厝之。』春秋祭祀，不言卜日。禮曰：『內事以柔日，外事』

以剛曰。『剛柔以慎內外，不論吉凶以爲稱福。』

卜筮篇

俗言卜筮，謂卜者問天，筮者問地。著神龜靈，兆數報應，故捨人讓而就卜筮，違可否而信吉凶。其意謂天地審告報，著龜真神靈也。如實論之，卜筮不問天地，著龜未必神靈。有神靈，問天地，俗儒所言也。何以明之？子路問孔子曰：『猪肩羊腍，可以得兆，筮莖蓍莖，可以得數。何必以著龜？』孔子曰：『不然！蓋取其名也。夫著之爲言，著也。龜之爲言，舊也。明狐疑之事，常問著舊也。』由此言之，著不神，龜不靈，蓋取其名，未必有實也。無其實，則知其無神靈，無神靈，則知不問天地也。且天地口耳何在，而得問之？天與人同道，欲知天，以人事相問，不自對見其人，親問其意，意不可知。欲問天，天高耳與人相遠，如天無耳，非形體也；非形體，則氣也。氣若雲霧，何能告人？著以問地，地有形體，與人無異，同人相近耳，則人不聞，人不聞，則口不告人。夫言問天，則天爲氣，不能爲兆；問地，則地耳遠，不聞人言。信謂天地告報人者，何據見哉？

人在天地之間，猶蟻虱之著人身也。如蟻虱欲知人意，鳴人耳傍，人猶不聞。何則？小大不均，音語不通也。今以微小之人，問巨大天地，安能通其聲音？天地安能知其旨意？或曰：『人懷天地之氣，天地之氣，在形體之中，神明是矣。人將卜筮，告令著龜，則神以耳聞口言。若已思念，神明從胸腹之中，聞知其旨。故鑽龜揲著，兆見數著。夫人用神思慮，思慮不決，故問著龜。著龜兆數，與意相應，則是神可謂明告之矣。時或意以爲可，兆數不吉；或兆數則吉，意以爲凶。』夫思慮者，己之神也；爲兆數者，亦己之神也。一身之神，在胸中爲思慮，在胸外爲兆數，猶人入戶而坐，出門而行也。行坐不異意，出入不易情，如神明爲兆數，不宜與思慮異。天地有體，故能搖動。搖動，有生之類也；生則與人同矣。問生人者，須以生人，乃能相報。如使死人問生人，則必不能相答。今天地生而著龜死，以死問生，安能得報？枯龜之骨，死著之莖，問生之天地，世人謂之天地報應，誤矣。如著龜爲若版臚，兆數爲若書字，象類

人君出教令乎，則天地口耳何在而有教令？孔子曰：『天何言哉？四時行焉，百物生焉。』天不言，則亦不聽人之言。天道稱自然無爲，今人問天地，天地報應，是自然之有爲以應人也。案易之文，觀揲著之法，二分以象天地，四揲以象四時，歸奇於扚以象閏月，以象類相法，以立卦數耳。豈云天地合報人哉？

人道相問則對，不問不應。無求空叩人之門，無問虛辨人之前，則主人笑而不應，或怒而不對。試使卜筮之人，空鑽龜而卜，虛揲著而筮，戲弄天地，亦得兆數，天地妄應乎？又試使人罵天而卜，毆地而筮，無道至甚，亦得兆數，苟謂兆數天地之神，何不滅其火，灼其手，振其指而亂其數，使之身體疾痛，血氣凌踊，而猶爲之見兆出數，何天地之不憚勞，用心不惡也？由此言之，卜筮不問天地，兆數非天地之報明矣。然則卜筮亦必有吉凶，論者或謂隨人善惡之行也，猶瑞應隨管而至，災異隨惡而到，治之善惡，管惡所致也，疑非天地故應之也。吉人鑽龜，輒從善兆；凶人揲著，輒得逆數。何以明之？紂至惡之君也，當時災異繁多，七十卜而皆凶，故祖伊曰：『格人元龜，罔敢知吉。』賢者不舉，大龜不兆。災變亟至，周武受命，高祖龍興，天人並祐，奇怪既多，豐沛子弟，卜之又吉。故吉人之體，所致無不長，凶人之起，所招無不眚。衛石鮒卒，無適子，有庶子六人，卜所以爲後者，曰：『沐浴佩玉則兆。』五人皆沐浴佩玉。石祁子曰：『焉有執親之喪，而沐浴佩玉？』不沐浴佩玉。石祁子兆，衛人卜以龜爲有知也。龜非有知，石祁子自知也。祁子行善政，有嘉言，言嘉政善，故有明瑞。使時不卜，謀之於衆，亦猶稱善，何則？人心神意，同吉凶也。此言抑然，然非卜筮之實也。

夫鑽龜揲著，自有兆數，兆數之見，自有吉凶；而吉凶之人，適與相逢。吉人與善兆合，凶人與惡數遇，猶吉人行道逢吉事，願見祥物，非吉事祥物爲吉人瑞應也。凶人遭遇凶惡，於道亦如之。夫見善惡非天應答，適與善惡相逢遇也。鑽龜揲著，有吉凶之兆者，逢吉遭凶之類也。何以明之？周武王不豫，周公卜三龜，公曰：『乃逢是吉。』魯卿莊叔生子穆叔，以周易筮之，遇明夷之謙。夫卜曰逢，筮曰遇，實遭遇所得，非管惡所致也。管則逢吉，惡則遇凶，天道自然，非爲人也。推此以論，人君治有吉凶之應，亦猶此也。君德遭賢，時適管子，嘉物奇瑞偶至，不肖之君，

亦反此焉。世人言卜筮者多，得實誠者寡。論者或謂書龜可以參事，不可純用。夫鑿龜擇蓍，兆數輕見，見無常占，占者生意。吉兆而占謂之凶，凶數而占謂之吉。吉凶不效，則謂卜筮不可信。

周武王伐紂，卜筮之逆，占曰：『大凶。』太公推蓍蹈龜而曰：『枯骨死草，何知吉凶？』夫卜筮兆數，非吉凶誤也。占之不審吉凶，吉凶變亂，變亂故太公黜之。夫蓍筮龜卜，猶聖王治世，卜筮兆數，猶王治瑞應。瑞應無常，兆數詭異。詭異則占者惑，無常則議者疑。疑則謂平未治，惑則謂吉不長。何以明之？夫吉兆數，吉人可遭也；治遇符瑞，聖德之驗也。周王伐紂，遇魚鳥之瑞，其曷卜爲逢不吉之兆？使武王不當起，出不宜逢瑞，使武王命當興，卜不宜得凶。由此言之，武王之卜，不得凶占，謂之凶者，失其實也。魯將伐越，筮之得『鼎折足』，『子貢占之以爲凶，何則？鼎而折足，行用足，故謂之凶。』孔子占之以爲吉，曰：『越人水居，行用舟，不用足，故謂之吉。』魯伐越，果克之。夫子貢占鼎折足以爲凶，猶周之占卜者謂之逆矣。逆中必有吉，猶折鼎足之占，宜以伐越矣。周多子貢直占之知，算若孔子詭論之材，故觀非常之兆，不能審也。世因武王卜無非而得凶，故謂卜筮不可純用，略以助政，示有鬼神，明己不得專。

著書記者，探擷行事，若韓非飾邪之篇，明已效之驗，毀卜讐筮，非世信用。夫卜筮非不可用，卜筮之人，占之誤也。洪範稽疑，卜筮之變，必問天子卿士，或時審是。夫不能審占，兆數不驗，則謂卜筮不可信用。晉文公與楚子戰，夢與成王搏，成王在上而鹽其腦。占曰：『凶。』咎犯曰：『吉。』君得天，楚伏其罪。鹽君之腦者，柔之也。『以戰果勝，如咎犯占。』夫占夢與占龜同，晉占夢者不見象指，猶周占龜者不見兆者爲也。象無不然，兆無不審。人之知聞，論之失實也。傳或言武王伐紂，卜之而龜澹，占者曰凶。太公曰：『龜澹，以祭則凶，以戰則勝。』武王從之，卒克紂焉。審若此傳，亦復孔子論卦，咎犯占夢之類也。蓋兆數無不然，而吉凶失實者，占不巧工也。

辯崇蓍

世俗言禍祟，以爲人之疾病死亡，及更患被罪，戮辱權笑，皆有所犯；起功後徙，祭祀喪葬，行作入官嫁娶，不擇吉日，不避歲月，觸鬼逢神，忌時相害。故發病生禍，結法入罪，至於死亡，殫家滅門，皆不重慎，犯觸忌諱之所致也。如實論之，乃妄言也。凡人在世，不能不作事。作事之後，不能不有吉凶。見吉則指以爲前時擇日之福，見凶則刺以爲往者觸忌之禍。多或擇日而得禍，觸忌而獲福。工伎射事者，欲遂其術，見禍忌而不言，聞福匿而不達；積禍以驚不慎，列福以勉畏時。故世人無愚智賢不肖，人君布衣，皆畏懼信向，不敢抵犯。歸之久遠，莫不分明，以爲天地之書，賢聖之術也。人君惜其官，人民愛其身，相隨信之，不復狐疑。故人君與事，工伎滿闕；人民有爲，觸傷問時，奸書僞文，由此滋生；巧惠生意，作知求利；驚惑愚暗，彌富偷貧；愈非古法度聖人之至意也。聖人舉事，先定於義，義已定立，決以卜筮，示不專己，明舉鬼神，同意共指，欲令衆下，信用不疑，故書列七卜，易載八卦，從之未必有福，違之未必有禍。然而禍福之至，時也；死生之到，命也。人命懸於天，吉凶存於時。命窮操行，天不能續；命長操行，惡不能奪。天百神主也，道德仁義，天之道也；戰栗恐懼，天之心也。廢道滅德，賊天之道；嶮隘恣睢，悖天之意。世間不行道德，莫過桀紂；妄行不軌，莫過幽厲。桀紂不早死，幽厲不夭折。由此言之，逢福獲壽，不在擇日避時，涉慮麗禍，不在觸歲犯月，明矣。

孔子曰：『死生有命，富貴在天。』苟有時日，誠有禍祟，聖人何惜不言？何畏不說？案古圖籍，仕者安危，千君萬臣，其得失吉凶，官位高下，位祿升降，各有差品；家人治產，貧富息耗，壽命短長，各有遠近，非高大尊貴舉事以吉日，下小卑賤以凶時也。以此論之，則亦知禍福死生，不在遭逢吉祥，觸犯凶忌也。然則人之生也，精氣育也；人之死也，命窮絕也。人之生，未必得吉逢喜，其死，獨何爲謂之犯凶觸忌？以孔子證之，以死生論之，則亦知夫百禍千凶，非動作之所致也。孔子聖人，知府也；死生，大事也；大事，道效也。孔子云：『死生有命，富貴在天。』衆文微言，不能奪，俗人愚夫不能易，明矣。人之於世，禍福有命；人之操行，亦自致之。其安居無爲，禍福自至，命也；其作事起功，吉凶至身，人也。人之疾病，希有不由風溼與飲食者；嘗風臥溼，握錢問祟，飽飯饕食，齋精解禍，而病不治，謂祟不

得命自絕，謂煞不審，俗人之知也。

夫倮蟲三百六十，人爲之長。人物也，萬物之中，有智慧者也。其受命於天，稟氣於元，與物無異。高有巢棲，獸有窟穴，蟲魚介鱗，來有區處，猶人之有室宅樓臺也。能行之物，死傷病困，小大相害。或人捕取，以給口腹，非作窠穿穴有所觸，東西行徙有所犯也。人有死生，物亦有終始；人有起居，物亦有動作，血脈首足，耳目鼻口，與人不別，惟好惡與人不同，故人不能曉其音，不見其指耳。及其游於黨類，接於同品，其知去就，與人無異。共天同地，並仰日月，而鬼神之禍，獨加於人，不加於物，未曉其故也。天地之性，人爲貴，豈天禍爲貴者作，不爲賤者設哉？何其性類同而禍患別也。

刑不上大夫，聖王於貴者闊也。聖王刑賤不罰貴，鬼神禍貴不殃賤，非易所謂大人與鬼神合其吉凶也。我有所犯，抵觸縣官，濯羈刑法，不曰過所致，而曰家有負。居處不慎，飲食過節，不曰失調和，而曰徒觸時。死者累屬，葬棺至十，不曰氣相汙，而曰葬日凶。有事歸之有犯，無爲歸之所居。居衰宅耗，蜚凶流尸，集人室居，又禱先祖，寢禍遺殃，疾病不請醫，更患不修行，動歸於禍，名曰犯觸。用知淺略，原事不實，俗人之材也。猶繫罪司空作徒，未必到吏日惡，繫役時凶也。使殺人者求吉日，出詣吏，罰罪推善時入獄繫。甯能令事解救，令至哉？人不觸禍，不被罪，不入獄。一旦令至，解械徑出，未必有解除其凶者也。天下千獄，獄中萬囚，其舉事未必觸忌諱也。居位食祿，專城長邑，以千萬數，其遷徙日未必逢吉時也。歷陽之郛，一夕沈而爲湖，其民未必皆犯歲月也。高祖始起，豐沛俱復其民，未必皆慎時日也。項羽攻襄安，襄安無噍類，未必不禱賽也。趙軍爲秦所坑於長平之下，四十萬衆，同時俱死，其出家時，未必不擇時也。辰日不哭，哭有重喪；戊己死者，復尸有隨，一家滅門先死之日，未必辰與戌己也。血忌不殺牲，屠肆不多禍；上朔不會衆，沽舍不觸殃，塗上之暴尸，未必分以往亡；室中之殯柩，未必還以歸忌。由此言之，諸占射禍祟者，皆不可信用；信用之者，皆不可是。

夫使食口十人，居一宅之中，不動鑿錘，不更居處，祠祀嫁娶，皆擇吉日，從春至冬，不犯忌諱，則夫十人比至百

年，能不死乎？占射事者，必將復曰：『宅有盛衰，若歲破直符，不知避也。』夫如是，令數問工伎之家，宅盛即留，衰則避之，及歲破直符，輒舉家移，比至百年，能不死乎？占射事者，必將復曰：『移徙觸時，往來不吉。』夫如是，復令輒問工伎之家，可徙則往，可還則來，比至百年，能不死乎？占射事者，必將復曰：『泊命壽極。』夫如是，人之死生，竟自有命，非觸歲月之所致，有負凶忌之所爲也。

難歲歲篇

俗人險心，好信禁忌，知者亦疑，莫能實定。是以儒雅服從，工伎得勝。吉凶之書，伐經典之義；工伎之說，凌儒雅之論。今略實論，令親覽總核，是非使世一悟。移徙法曰：『徙抵太歲凶，負太歲亦凶。』抵太歲名曰歲下，負太歲名曰歲破，故皆凶也。假令太歲在甲子，天下之人皆不得南北徙，起宅嫁娶亦皆避之。其後東西若徙，四維相之，如者皆吉。何者？不與太歲相觸，亦不抵太歲之衝也。實問避太歲者何意也？令太歲惡人徙乎，則徙者皆有禍。令太歲不禁人徙，惡人抵觸之乎，則道上之人，南北行者皆有殃。太歲之意，猶長吏之心也。長吏在塗，人行觸車馬，於其吏從，長吏怒之，豈獨抱器載物，去宅徙居觸犯之者，而乃責之哉？昔文帝出過霸陵橋，有一人行逢車駕，逃於橋下，以爲文帝之車已過，疾走而出，警乘與馬，文帝怒，以屬廷尉張釋之。釋之嘗論，使太歲之神行若文帝出，則人犯之者，必有如橋下走出之人矣。方今行道略者，暴溺仆死，何以知非觸遇太歲之出也？爲移徙者又不能處，不能處，則犯與不犯未可知；未可知，則其行與不行未可審也。

且太歲之神審行乎，則宜有曲折，不宜直南北也。長吏出舍，行有曲折；如天神直道不曲折乎，則從東西四維徙者，猶干之也。若長吏之南北行，人從東如西，四維相之，如猶抵觸之；如不正南北，南北之徙又何犯？如太歲不動行乎，則宜有宮室營堡，不與人相見，人安得而觸之？如太歲無體與長吏異，若煙雲虹蜺，直經天地，極子午南北陳乎，則東西徙若四維徙者亦干之。譬若今時人行，觸繁露賊氣，無從積負，皆中傷焉，如審如氣，人嘗見之，

雖不移徙，亦皆中傷。且太歲，天別神也，與青龍無異。龍之體不過數千丈，如令神者宜長大，饒之數萬丈，令體掩北方，當言太歲在北方，不當言在子。其東有丑，其西有亥，明不專掩北方，極東西之廣，明矣。今正言在子位，觸土之中，直子午者，不得南北徙耳。東邊直丑巳之地，西邊直亥未之民，何爲不得南北徙？丑與亥地之民，使太歲左右通，得南北徙及東西徙可，則丑在子東，亥在子西，丑亥之民東西徙，觸歲之位，巳未之民東西徙，忌歲所破。

儒者論天下九州，以爲東西南北，盡地廣長。九州之內五千里，竟三河土中。周公卜宅，經曰：『王來紹上帝，自服於土中。』惟則土之中也。鄒衍論之，以爲『九州之內五千里，竟合爲一州在東。東位名曰赤縣州，自有九州者九焉。九九八十一，凡八十一州。』此言殆虛。地形難審，假令有之，亦一難也。使天下九州，如儒者之議，直隴邑以南，對三河以北，豫州、荊州、冀州之部有太歲耳。雍梁之間，青兗徐揚之地，安得有太歲？使如鄒衍之論，則天下九州在東南位，不直子午，安得有太歲？如太歲不在天地極分，散在民間，則一家之宅，輒有太歲，雖不南北徙，猶抵觸之。假令從東里徙西里，西里有太歲，從東宅徙西宅，西宅有太歲，或在人之東西，或在人之南北，猶行途上，東西南北皆逢觸人。太歲位數千萬億，天下之民徙者皆凶，謂移徙者何以審之？如審立於天地之際，猶王者之位，在土中也。東方之民，張弓西射人，不謂之射王者，以不能至王者之都，自止射其處也。今徙豈能北至太歲位哉？自止徙百步之內，何爲謂之傷太歲乎？且移徙之家，禁南北徙者，以爲歲在子位；子者破午，南北徙者，抵觸其衝，故謂之凶。夫破者，須有以雄破之也。如審有所用，則不徙之民，皆被破害；如無所用，何能破之？

夫雷，天氣也，盛夏擊折，折木破山，時暴殺人，使太歲所破，若迅雷也，則聲音宜疾，死者宜暴；如不若雷，亦無能破。如謂衝抵爲破，衝抵安能相破？東西相與爲衝，而南北相與爲抵，如必以衝抵爲凶，則東西常凶，而南北常惡也。如以太歲神，其衝觸凶；神莫過於天地，天地相與爲衝，則天地之間無生人也。或上十二神，登明從魁之輩，——工伎家謂之皆天神也，——常立子丑之位，俱有衝抵之氣。神雖不若太歲，宜有徵敗。後徙者雖避太歲之凶，猶觸十二神之害。爲移徙時者，何以不察？冬氣寒，水也，水位在北方；夏氣熱，火也，火位在南方。案秋冬寒，春夏熱，

者，天下普然，非獨南北之方水火衝也。今太歲位在子耳！天下皆爲太歲，非獨子午衝也。審以所立者爲主，則午可爲大夏，子可爲大冬。冬夏南北，徙者可復凶乎？立春，艮王震相，巽胎離沒，坤死兌凶，乾廢坎休。王之衝徙，相之衝凶。王相衝位，有死囚之氣。乾坤六子，天下正道。伏義文王，象以治世。文爲經所載，道爲聖所信，明審於太歲矣。人或以立春東北徙，抵艮之下，不被凶害。太歲立於子，彼東北徙，坤卦近於午，猶艮以坤徙，觸子位何故獨凶？正月建於寅，破於申，徙寅申徙，相之如者，無有凶害。太歲不指午，而空曰歲破，午實無凶禍，而虛禁南北，豈不妄哉？十二月爲一歲，四時節竟，陰陽氣終，竟復爲一歲，日月積聚之名耳！何故有神，而謂之立於子位耳？積分爲日，累日爲月，連月爲時，紀時爲歲。歲則日月時之類也；歲而有神，日月時亦復有神乎？千五百三十九歲爲一統，四千六百一十七歲爲一元。歲，猶統元也；歲有神，統元復有神乎？論之以爲無，假令有之，何故害人？神莫過於天地，天地不害人；人謂百神，百神不害人。太歲之氣，天地之氣也；何憎於人，觸而爲害？且文曰：『甲子不徙。』言甲與子殊位，太歲立子不居甲，爲移徙者運之而復居甲，爲之而復居甲，爲移徙時者，亦宜復禁東西徙。甲與子鉤，其凶宜同。不禁甲而獨忌子，爲移徙時者，竟妄不可用也。人居不能不移徙，移徙不能不觸歲，不觸歲不能不得時死。工伎之人，見今人之死，則歸禍於往時之徙，俗心險危，死者不絕，故太歲之言，傳世不滅。

詰術篇

圖宅術曰：『宅有八術，以大甲之名，數而第之。第定名立，官商殊別。宅有五音，姓有五聲。宅不宜其姓，姓與宅相賊，則疾病死亡，犯罪遇禍。』詰曰：夫人之在天地之間也，萬物之貴者耳。其有宅也，猶鳥之有巢，獸之有穴也。謂宅有甲乙，巢穴復有甲乙乎？甲乙之神，獨在民家，不在鳥獸何？夫人之有宅，猶有田也。以田飲食，以宅居處。人民所重，莫食最急。先田後宅，田重於宅也。田間阡陌，可以制八術。比土爲田，（一有不字）可以數甲乙。甲乙之術，獨施於宅，不設於田，何也？府廷之內，吏舍比屬。吏舍之形制，何殊於宅？吏之居處，何異於民？不以甲乙第舍，獨

以甲乙數宅，何也？民間之宅，與鄉亭比屋相屬，接界相連，不并數鄉亭，獨第民家，甲乙之神，何以獨立於民家也？數宅之術，行市亭，數巷街以第甲乙，入市門曲折，亦有巷街。人晝夜居家，朝夕坐卧，其實一也；市肆戶何以不第甲乙？州郡列居，縣邑雜處，與街巷民家何以異？州郡縣邑，何以不數甲乙也？

天地開闢，有甲乙邪？後王乃有甲乙。如天地開闢，本有甲乙，則上古之時，巢居穴處，無屋宅之居，街巷之制，甲乙之神，皆何在？數宅既以甲乙，五行之家數日，亦當以甲乙。甲乙有支干，支干有加時，支干加時，專比者吉，相賊者凶。當其不舉也，未必加憂支辱也。事理有曲直，罪法有輕重。上官平心，原其獄狀，未有支干吉凶之驗，而有事理曲直之效，爲支干者，何以對此？武王以甲子日戰勝，紂以甲子日戰負，二家俱期，兩軍相當，旗幟相望，俱用一日，或存或亡，且甲與子專比，昧爽時加寅，寅與甲乙不相賊，武王終以破紂，何也？

日，火也；在天爲日，在地爲火。何以驗之？陽燧鄉日，火從天來。由此言之，火，日氣也。日有甲乙，火無甲乙，何日十而辰十二？日辰相配，故甲與子連，所謂日十者，何等也？端端之日有十邪？而將一有十名也。如端端之日有十甲乙，是其名何以不徒言甲乙，必言子丑？何日廷圖甲乙有位，子丑亦有處，各有部署，刻布五分？若王者營衛，常居不動。今端端之日中行，旦出東方，夕入西方，行而不已，與日廷異，何謂甲乙爲日之名乎？術家更說日甲乙者，自天地神也。日更用事，自用甲乙勝負爲吉凶，非端端之日名也。夫如是，於五行之象，徒當用甲乙決吉凶而已，何爲言加時乎？案加時者，端端之日加也。端端之日安得勝負？

五音之家，用口調姓名，及字，用姓定其名，用名正其字。口有張歛，聲有外內，以定五音宮商之實。夫人之有姓者，用稟於天；天得五行之氣爲姓耶？以口張歛聲外內爲姓也。如以本所稟於天者爲姓，若五穀萬物稟氣矣，何故用張口歛聲內外定正之乎？古者因生以賜姓，因其所生賜之姓也。若夏吞薏苡而生，則姓苡氏；商吞燕子而生，則姓爲子氏；周履大人跡，則姬氏。其立名也，以信以義，以像以假，以類以生名爲信，若魯公子友生，文在其手，曰友也。以德名爲義，若文王爲昌，武王爲發也。以類名爲像，若孔子名丘也。取於物爲假，若宋公名杵臼也。取於

父爲類，有似類於父也。其立字也，展名取同義，名賜字子貢，名予字子我。其立姓則以本所生，置名則以信義像假，類字則展名取同義，不用口張歛外內，調官商之義爲五音，術何據見而用？古者有本姓，有氏姓。陶氏田氏，事之氏姓也；上官氏司馬氏，吏之氏姓也；孟氏仲氏，王父字之氏姓也。氏姓有三，事乎吏乎？王父字乎？以本姓則用所生，以氏姓則用事吏王父字；用口張歛調姓之義何居？匈奴之俗，有名無姓字，無與相調諧，自以壽命終，禍福何在？禮，買妾不知其姓則卜之，不知者，不知本姓也。夫妻必有父母家姓，然而必卜之者，父母姓轉易失實，禮重取同姓，故必卜之。姓徒用口調諧姓族，則禮買妾何故卜之？

圖宅術曰：『商家門不宜南向，徵家門不宜北向。』則商金，南方火也。徵火，北方水也。水勝火，火賊金，五行之氣不相得，故五姓之宅門有宜嚮，嚮得其宜，富貴吉昌；嚮失其宜，貧賤衰耗。夫門之與堂何以異？五姓之門，各有五姓之堂，所向無宜，何門之掩，地不如堂，庶朝夕所處，於堂不於門。圖吉凶者，宜皆以堂，如門人所出入，則戶亦宜然。孔子曰：『誰能出不由戶？』言戶不言門。五祀之祭，門與戶均。如當以門正所嚮，則戶何以不當與門相應乎？且今府廷之內，吏舍連屬，門嚮有南北；長吏舍傳，閭居有東西；長吏之姓，必有官商；諸吏之舍，必有徵羽。安官遷徙，未必角姓門南嚮也；失位貶黜，未必商姓門北出也。或安官遷徙，或失位貶黜，何姓有五音？人之質性，亦有五行。五音之家，商家不宜南嚮門，則人稟金之性者，可復不宜南嚮坐，南行步乎？一曰，五音之門，有五行之人，假令商姓口食五人，五人中各有五色，木人青，火人赤，水人黑，金人白，土人黃，五色之人，俱出南嚮之門，或凶或吉，壽命或短或長，凶而短者，未必色白，吉而長者，未必色黃也。五行之家，何以爲決？南嚮之門，賊商姓家，其貴如何？南方，火也。使火氣之禍，若火延燔，徑從南方來乎？則雖爲北嚮門，猶之凶也。火氣之禍，若夏日之熱，四方洽浹乎，則天地之間，皆得其氣，南嚮門家，何以獨凶？南方火者，火位南方。一曰，其氣布在四方，非必南方獨有火，四方無有也。猶水位在北方，四方猶有水也。火滿天下，水辨四方。火或在人之南，或在人之北，謂火常在南方，是則東方可無金，西方可無木乎？

解除篇

世信祭祀，謂祭祀必有禳。又然解除，謂解除必去凶。解除初禮，先設祭祀。比夫祭祀，若生人相賓客矣。先爲賓客設膳食，已驅以刃杖，鬼神如有知，必悉止戰，不肯徑去。若懷恨反而爲禍，如無所知，不能爲凶，解之無益，不解無損。且人謂鬼神何如狀哉？如謂鬼有形象，形象生人，生人懷恨，必將害人。如無形象，與烟雲同，驅逐雲烟，亦不能除。形既不可知，心亦不可圖。鬼神集止人宅，欲何求乎？如勢欲殺人，當驅逐之時，避人隱匿，驅逐之止，則復還立故處。如不欲殺人，寄託人家，雖不驅逐，亦不爲害。貴人之出也，萬民並觀，填街滿巷，爭進在前。士卒驅之，則走而卻。士卒還去，即復其處。士卒立守，終日不離，僅能禁止。何則？欲在於觀，不爲壹驅逐也。使鬼神與生人同，有欲於宅中，猶萬民有欲於觀也。士卒驅逐，不久立守，則觀者不卻也。然則驅逐鬼者，不極一歲，鬼神不去。今驅逐之，終食之間，則舍之矣。舍之鬼復還來，何以禁之？暴穀於庭，鷄雀啄之；主人驅彈則走，縱之則來，不終日立守，鷄雀不禁。使鬼神乎，不爲驅逐去止，使鬼不神乎，與鷄雀等，不常驅逐，不能禁也。虎狼入都，弓弩巡之，雖殺虎狼，不能除虎狼所爲來之患。盜賊攻城，官軍擊之，雖卻盜賊，不能滅盜賊所爲至之禍。虎狼之來，應政失也；盜賊之至，起世亂也。然則鬼神之集，爲命絕也。殺虎狼，卻盜賊，不能使政得世治；然則盛解除，驅鬼神，不能使凶去而命延。病人困篤，見鬼之至，性猛剛者，挺劍操杖，與鬼戰鬥；戰鬪壹再，錯指受服，如不服，必不終也。夫解除所驅逐鬼，與病人所見鬼，無以殊也。其驅逐之，與戰鬪無以異也。病人戰鬪，鬼猶不去；宅主解除，鬼神必不離。由此言之，解除宅者，何益於事？信其凶去，不可用也。且夫所除，宅中客鬼也。宅中主神有十二焉：青龍白虎，刻十二位；龍虎猛神，天之正鬼也；飛尸流凶，不敢妄集；猶主人猛勇，姦客不敢闖也。有十二神舍之，宅主驅逐，名爲去十二神之客，恨十二神之意，安能得吉？如無十二神，則亦無飛尸流凶。無神無凶，解除何補？驅逐何去？

解逐之法，緣古逐疫之禮也。昔顓頊氏有子三人，生而皆亡：一居江水爲虐鬼，一居若水爲魍魎，一居歐隅之

間，主疫病人。故歲終事畢，驅逐疫鬼，因以送陳迎新內吉也；世相倣效，故有解除。夫逐疫之法，亦禮之失也。行禋，禋之德，天下太平，百災消滅，雖不逐疫，疫鬼不往。行紂，紂之行，海內擾亂，百禍並起，雖日逐疫，疫鬼猶來。袁世好信鬼，愚人好求福。周之季世，信鬼修祀，以求福助。愚主心惑，不顧自行，功猶不立，治猶不定，故在人在鬼，在德不在祀。國期有遠近，人命有短長，如祭祀可以得福，解除可以去凶，則王者可竭天下之財，以興延期之祀；富家翁嫗，可求解除之福，以取踰世之壽。案天下人民，天壽貴賤，皆有祿命；操行吉凶，皆有衰盛。祭祀不爲福，福不由祭祀。世信鬼神，故好祭祀。祭祀無鬼神，故通人不務焉。祭祀，厚事鬼神之道也，猶無吉福之驗；況盛力用威，驅逐神鬼，其何利哉？

祭祀之禮，解除之法衆多，非一旦以一事效其非也。夫小祀足以充大祭，一鬼足以卜百神。世間繕治宅舍，鑿地掘土，功成作畢，解謝土神，名曰解土，爲土偶人，以像鬼形；今巫祝延以解土。神已祭之後，心快意喜，謂鬼神解謝，殃禍除去。如討論之，乃虛妄也。何以驗之？夫土地，猶人之體也。普天之下，皆爲一體，頭足相去，以萬里數。人民居土上，猶蚤蝨著人身也。蚤蝨食人，賊人肌膚，猶人鑿地，賊地之體也。蚤蝨內知，有欲解人之心，相與聚會，解謝於所食之肉旁，人能知之乎？夫人不能知蚤蝨之音，猶地不能曉人民之言也。胡越之人，耳口相類，心意相似，對口交耳而談，尚不相解；况人不與地相似，地之耳口與之相達乎？今所解者地乎？則地之耳遠不能聞也；所解一宅之土，則一宅之土，猶人一分之肉也，安能曉之？如所解宅神乎？則此名曰解宅，不名曰解土。禮入宗廟，無所主意，斬尺二寸之木，名之曰主，主心事之，不爲人像。今解土之祭，爲土偶人，像鬼之形，何能解乎？神荒忽無形，出入無門，故謂之神。今作形像，與禮相違，失神之實，故知其非。象似布藉，不設鬼形；解土之禮，立土偶人。如祭山可爲石形，祭門戶可作木人乎？

晉中行寅將亡，召其太祝，欲加罪焉。曰：『子爲我祀，犧牲不肥澤也，且齋戒不敬也，使吾國亡，何也？』祝簡對曰：『昔日吾先君中行密子，有車十乘，不愛其薄也；憂德義之不足也。今主君有車車百乘，不愛義之薄也，唯患

車之不足也。夫般車飾則賦斂厚，賦斂厚則民謗詛。君若以祀爲有益於國乎，詛亦將爲亡矣。一人祀之一國詛之，一稅不勝萬詛，國亡不亦宜乎？祀其何罪？『中行子乃慚。』今世信祭祀，『中行子』之類也。不修其行而豐其祀，不敬其上而畏其鬼，身死禍至，歸之於祟，謂祟未得，得祟修祀，禍繁不止，歸之於祭，謂祭未敬，夫論解除，解除無益，論祭祀，祭祀無補，論巫祝，巫祝無力。竟在人不在鬼，在德不在祀，明矣哉！

禮義篇

世信祭祀，以爲祭祀者必有福，不祭祀者必有禍，是以病作卜祟，祟得修祀，祀畢意解，意解病已，執意以爲祭祀之助，勉奉不絕，謂死人有知，鬼神飲食，猶相賓客，賓客悅喜，報主人恩矣。其修祭祀，是也，信其事之，非也。實者祭祀之意，主人自盡恩懃而已，鬼神未必欲享之也。何以明之？今所祭者報功，則緣生人爲恩義耳，何敢享之？有今所祭死人，死人無知，不能飲食。何以審其不能敢享飲食也？夫天者，體也，與地同。天有列宿，地有宅舍，宅舍附地之體，列宿著天之形，形體具則有口乃能食，使天地有口能食，祭食宜食盡，如無口，則無體，無體則氣也，若雲霧耳，亦無能食。如天地之精神，若人之有精神矣，以人之精神，何宜飲食？中人之體七八尺，身大四五圍，食斗食，獸斗羹，乃能飽足；多者三四斗。天地之廣大，以萬里數，圓坵之上，一靈粟牛，染飴大羹，不過數斛，以此食天地，天地安能飽？天地用心，猶人用意也，人食不飽足，則怨主人，不報以德矣。必謂天地審能飽食，則夫古之郊者負天地，山猶人之有骨節也，水猶人之有血脈也，故人食腸滿，則骨節與血脈，因以盛矣。今祭天地，則山川隨天地而飽，今別祭山川，以爲異神，是人食已，更食骨節與血脈也。

社稷報生穀物之功，萬民生於天地，猶毫毛生於體也。祭天地則社稷設其中矣。人君重之，故復別祭，必以爲有神，是人之膚肉當復食也。五祀初本在地，門戶用木與土，土木生於地，井竈室中器皆屬於地，祭地，五祀設其中矣。人君重之，復故別祭，必以爲有神，是食已嘗復食形體也。風伯雨師雷公，是羣神也。風猶人之有吹竅也，雨

猶人之有精液也，雷猶人之有腹鳴也。三者附于天地，祭天地，三者在矣。人君重之，故別祭，必以爲有神，則人吹煦精液腹鳴，當復食也。日月猶人之有目，星辰猶人之有髮，三光附天，祭天三光在矣。人君重之，故復別祭，必以爲有神，則人之食已，復食目與髮也。宗廟，己之先也，生存之時，謹敬供養，死不敢不信，故修祭祀，緣先事死，示不忘先。五帝三王，郊宗黃帝，帝學之屬，報功堅力，不敢忘德，未必有鬼神，寧能散享之也。夫不能散享，則不能神，不能神，則不能爲福，亦不能爲禍。禍福之起，由於喜怒，喜怒之發，由於腹腸。有腹腸者，輒能飲食，不能飲食，則無腹腸。無腹腸，則無用喜怒，無用喜怒，則無用爲禍福矣。

或曰：『散氣不能食也。』夫散之與飲食，一實也。用口食之，用口散之。無腹腸則無口，無口無用食，則亦無用散矣。何以驗其不能散也？以人祭祀有過，不能即時犯也。夫散不用口，則用鼻矣。口鼻能散之，則目能見之，目能見之，則手能擊之；今手不能擊，則知口鼻不能散之也。或難曰：『宋公鮑之身有疾，祝曰：『夜姑擊將事於厲者，』厲鬼杖檄而與之言曰：『何而染盛之不膏也？何而芻犧之不肥碩也？何而珪璧之不中度量也？而罪歟？其鮑之罪歟？』夜姑順色而對曰：『鮑身尙幼在襁褓，不預知焉。審是掌之。』厲鬼舉檄而掊之，斃於壇下。此非能言用手之驗乎？』曰：夫夜姑之死，未必厲鬼擊之也，時命當死也。妖象厲鬼，象鬼之形，則象鬼之言，象鬼之言，則象鬼而擊矣。何以明之？夫鬼者，神也，神則先知，先知則宜自見，染盛之不膏，珪璧之失度，犧牲之腥小，則因以責讓夜姑，以檄擊之而已，無爲先問。先問，不知之效也；不知，不神之驗也。不知不神，則不能見體出言，以檄擊人也。夜姑義臣也，引罪自予已，故鬼擊之。如無義而歸之鮑身，則厲鬼將復以檄掊鮑之身矣。且祭祀不備，神怒見體，以殺掌祀。如禮備神喜，肯見體以食賜主祭乎？人有喜怒，鬼亦有喜怒，人不爲怒者身存，不爲喜者身亡。厲鬼之怒，見體而罰。宋國之祀，必時中禮。夫神何不見體以賞之乎？夫怒喜不與人同，則其賞罰不與人等。賞罰不與人等，則其稽夜姑，不可信也。

且夫散者，內氣也；言者，出氣也。能散則能言，猶能吸則能呼矣。如鬼神能散，則宜言於祭祀之上。今不能言，知

不能飲一也。凡能飲者，口鼻通也。使鼻蹇不通，口鉗不開，則不能飲矣。人之死也，口鼻腐朽，安能復飲二也。禮曰：『人死也，斯惡之矣。』與人異類，故惡之也。爲尸不動，朽敗滅亡，其身不與生人同，則知不與生人通矣。身不同，知不通，其飲食不與人鈞矣。胡越異類，飲食殊味，死之與生，非直胡之與越也。由此言之，死人不飲三也。當人之臥也，置衣物其旁，不能知也。覺乃知之，知乃能食之。夫死，長臥不覺者也，安能知食，不能飲之四也。或難曰：『祭則鬼享之，何謂也？』曰：言其修具謹潔，染牲肥香，人臨見之，意飲食之。推己意以況鬼神，鬼神有知，必享此祭。故曰：鬼享之。難曰：易曰：『東鄰殺牛，不如西鄰之禴祭。』夫言東鄰不若西鄰，言東鄰牲大福少，西鄰祭少福多也。今言鬼不享，何以知其福有多少也？曰：此亦謂修具謹潔與不謹潔也。

紂殺牛祭，不致其禮。文王禴祭，竭盡其敬。夫禮不至，則人非之；禮敬盡，則人是之。是之，則舉事多助；非之，則言行見畔。見畔若祭，不見享之禍；多助若祭，見飲之福。非鬼爲祭祀之故有喜怒也。何以明之？苟鬼神不當須人而食，須人而食，是不能神也。信鬼神敬祭祀，祭祀爲稱福，謂鬼神居處何如狀哉？自有儲備耶？將以人食爲飢飽也。如自有儲備，儲備必與人異，不當食人之物。如無儲備，則人朝夕祭乃可耳。壹祭壹否，則神壹飽壹飢，壹飢壹飽，則神壹怒壹喜矣。且病人見鬼，及臥夢與死人相見，如人之形，故其祭祀如人之食。緣有飲食，則宜有衣服，故復以繪製衣，以象生儀；其祭如生人之食，人欲食之，冀鬼饗之。其製衣也，廣縱不過一尺，若五六寸，以所見長大之神，黃一尺之衣，其肯喜而加福於人乎？以所見之鬼爲審死人乎？則其製衣，宜若生人之服；如以所製之衣審鬼衣之乎？則所見之鬼，宜如偶人之狀。夫如是也，鬼神未定，厚禮事之，安得福祐而堅信之乎？

祭意篇

禮王者祭天地，諸侯祭山川，卿大夫祭五祀，士庶人祭其先。宗廟社稷之祀，自天子達於庶人，尚書曰：『肆類于上帝，禋于六宗，望于山川，徧于羣神。』禮曰：『有虞氏禘黃帝而郊，魯祖顓頊而宗堯，夏后氏亦禘黃帝而郊。』

繇祖顓頊而宗禹，殷人禘嘗而郊冥，祖契而宗湯，周人禘嘗而郊稷，祖文王而宗武王，燔柴於大壇，祭天也；瘞埋於大折，祭地也；用騂犢埋少牢於大昭，祭時也；相近於坎壇，祭寒暑也；王宮，祭日也；夜明，祭月也；幽宗，祭星也；零宗，祭水旱也；四坎壇，祭四方也；山林川谷邱陵，能出雲爲風雨見怪物，皆曰神。有天下者，祭百神，諸侯在其地則祭，亡其地則不祭。此皆法度之祀，禮之常制也。王者父事天，母事地，推人事父母之事，故亦有祭天地之祀；山川以下，報功之義也。緣生人有功得賞，鬼神有功亦祀之。山出雲雨潤萬物，大宗居六合之間，助天地變化。王者尊而祭之，故曰大宗。社稷報生萬物之功，社報萬物，稷報五穀。五祀報門戶井竈室中霤之功，門戶人所出入，井竈人所飲食，中霤人所託處，五者功鉤，故俱祀之。

周書曰：『少昊有四叔，曰重，曰該，曰修，曰熙，實能金火木，乃使重爲句芒，該爲蓐收，修及熙爲玄冥，世不失職，遂濟窮桑。此其三祀也。顓頊氏有子曰犁，爲祝融；共工氏有子曰句龍，爲后土；此其二祀也。后土爲社稷，田正也。有烈山氏之子曰柱，爲稷。自夏以上祀之。周秦亦爲稷，自商以來祀之。』禮曰：『烈山氏之有天下也，其子曰柱，能植百穀。夏之衰也，周棄繼之，故祀以爲稷。共工氏之霸九州也，其子曰后土，能平九土，故祀以爲社。』傳或曰：『炎帝作火，死而爲竈，禹勞力天下水，死而爲社。』禮曰：『王爲羣姓立七祀，曰司命，曰中霤，曰國門，曰國行，曰泰厲，曰戶，曰竈。諸侯爲國立五祀，曰司命，曰中霤，曰國門，曰國行，曰公厲，大夫立三祀，曰族厲，曰門，曰行。適士立二祀，曰門，曰行。庶人立一祀，或立戶，或立竈。』社稷五祀之祭，未有所定，皆爲思其德，不忘其功也。中心愛之，故飲食之，愛鬼神者，祭祀之。自禹興修社稷，祀后稷，其後絕廢。

高皇帝四年，詔天下祭靈星。七年，使天下祭社稷。靈星之祭，祭水旱也，於禮舊名曰雩。雩之禮，爲民祈穀雨，祈穀實也。春求實，一歲再祀，蓋重穀也。——春以二月，秋以八月，故論語曰：『暮春者，春服既成，冠者五六人，童子六七人，浴乎沂，風乎舞雩，詠而歸。』暮春，四月也。周之四月，正歲二月也。二月之時，龍星始出，故傳曰：『龍見而雩。』龍星見時，歲已啓蟄而雩。春雩之禮廢，秋雩之禮存，故世常修靈星之祀，到今不絕，名變於舊，故世人不識。

禮廢不具，故儒者不知。世儒崇禮，不知靈星何祀；其難曉而不識，說縣官名曰明星，緣明星之名，說曰歲星，歲星東方也。東方主春，春主生物，故祭歲星，求春之福也。四時皆有力於物，獨求春者，重本尊始也。審如儒者之說，求春之福，及以秋祭，非求春也。月令祭戶以春，祭門以秋，各宜其時。如或祭門以秋，焉之祭戶，論者肯然之乎？不然，則明星非歲星也，乃龍星也。龍星二月見，則零祈穀雨；龍星八月將入，則秋零祈穀實。儒者或見其義，語不空生。春零廢，秋零興，故秋零之名，自若爲明星也。實曰靈星，靈星者，神也。神者，謂龍星；羣神者，謂風伯雨師雷公之屬。風以播之，雨以潤之，雷以動之，四時生成，寒暑變化，日月星辰，人所瞻仰；水旱，人所已惡。四方氣所由來，山林川谷，民所取材用。此鬼神之功也。

凡祭祀之義有二：一曰報功，二曰修先。報功以勉力，修先以崇恩。力勉恩崇，功立化通，聖王之務也。是故聖王制祭祀也，法施於民，則祀之；以死勤事，則祀之；以勞定國，則祀之；能禦大災，則祀之；能捍大患，則祀之。帝嚳能序星辰以著衆，堯能賞均刑法以義終，舜勤民事而野死，鯀勤洪水而殛死，禹能修鯀之功，黃帝正名百物，以明民共財，顓頊能修之，爲司徒而民成，冥勤其官而水死，湯以寬治民而除其虐，文王以文治，武王以武功，去民之災。凡此功烈，施布於民，民賴其力，故祭報之。宗廟先祖，已之親也，生時有養親之道，死亡義不可背，故修祭祀，示如生存。推人事鬼神，緣生事死，人有賞功供養之道，故有報恩祀祖之義。

孔子之畜狗死，使子貢埋之，曰：『吾聞之也，弊帷不棄，爲埋馬也；弊蓋不棄，爲埋狗也。丘也貧，無蓋，於其封（一本注音窆）也，亦與之席，毋使其首陷焉。』延陵季子過徐，徐君好其劍，季子以當使於上國，未之許與。季子使還，徐君已死，季子解劍帶其冢樹，御者曰：『徐君已死，尚誰爲乎？』季子曰：『前已心許之矣，可以徐君死，故負吾心乎？』遂帶劍於冢樹而去。祀爲報功者，其用意猶孔子之埋畜狗也；祭爲不背先者，其恩猶季子帶劍於冢樹也。聖人知其若此，祭猶齋戒畏敬，若有鬼神；修與弗絕，若有禍福；重恩尊功，嚴勲厚恩，未必有鬼而享之者，何以明之？以飲食祭地也。人將飲食，饌進示嘗有所先。孔子曰：『雖疏食菜羹，瓜祭必齋如也。』禮曰：『侍食於

君，君使之祭，然後飲食之。『祭，猶禮之諸祀也，飲食亦可毋祭；禮之諸神，亦可毋祀也。祭祀之實一也，用物之費同也。知祭地無神，猶謂諸祀有鬼，不知類也。經傳所載，賢者所紀，尙無鬼神；況不著篇籍，世間淫祠非鬼之祭，信其有神爲禍福矣。好道學仙者，絕穀不食，與人異食，欲爲清潔也。鬼神清潔於仙人，如何與人同食乎？論之以爲人死無知，其精不能爲鬼，假使有之，其人異食；異食，則不肯食人之食，不肯食人之食，則無求於人；無求於人，則不能爲人禍福矣。凡人之有喜怒也，有求得與不得，得則喜，不得則怒；喜則施恩而爲福，怒則發怒而爲禍。鬼神無喜怒，則雖常祭而不絕，久廢而不修，其何禍福於人？

實知篇

儒者論聖人，以爲前知千歲，後知萬世，有獨見之明，獨聽之聰，事來則名，不學則知，不問自曉，故稱聖則神矣。若著龜之知吉凶，蓍草稱神，龜稱靈矣。賢者才下不能及，智劣不能料，故謂之賢。夫名異則實殊，實同則稱鈞。以聖名論之，知聖人卓絕，與賢殊也。孔子將死，遺讖書曰：『不知何一男子，自謂秦始皇，上我之堂，踞我之牀，顛倒我衣裳，至沙邱而亡。』其後秦王兼吞天下，號始皇，巡狩至魯，觀孔子宅，乃至沙邱，道病而崩。又曰：『董仲舒亂我書，其後江都相董仲舒，論思春秋，造著傳記。又書曰：『亡秦者胡亥也。』其後二世胡亥，竟亡天下。用三者論之，聖人後知萬世之效也。孔子生不知其父，若母匿之，吹律自知，殷宋大夫子氏之世也，不索圖書，不聞人言，吹律精思，自知其世，聖人前知千歲之驗也。

曰：此皆虛也。案神怪之言，皆在讖記，所表皆效圖書。亡秦者胡，河圖之文也。孔子條暢增益，以表神怪；或後人詐記，以明效驗。高皇帝封吳王，送之，捐其背曰：『漢後五十年，東南有反者，豈汝耶？』到景帝時，潁與七國通謀反，漢建此言者，或時觀氣見象，虞其有反，不知主名。高祖見潁之勇，則謂之是。原此以論，孔子見始皇仲舒，或時但言將有觀我之宅，亂我之書者。後人見始皇入其宅，仲舒讀其書，則增益其辭，著其主名。如孔子神而空見始

皇仲舒，則其自爲殷後子氏之世，亦嘗默而知之，無爲吹律以自定也。孔子不吹律，不能立其姓；及其見始皇，隨仲舒，亦復以吹律之類矣。案始皇本事，始皇不至魯，安得上孔子之堂，踞孔子之牀，顛倒孔子之衣裳乎？始皇三十七年十月癸丑，出游至雲夢，望祀虞舜於九嶷，浮江下，觀鵲柯，度梅渚，過丹陽，至錢塘，臨浙江，濤惡，乃西百二十里，從陝中度，上會稽，祭大禹，立石刊頌，望于南海，還過從江，乘勞海上，北至琅邪，自琅邪北至勞成山，因至之罘，遂並海西，至平原津而病，崩於沙邱平。既不至魯，識記何見，而云始皇至魯，至魯未可知，其言孔子曰：『不知何一男子之言』亦未可用。不知何一男子之言不可用，則言董仲舒亂我書，亦復不可信也。行事文記，譎常人言耳。非天地之書，則皆緣前因古，有所據狀。如無聞見，則無所狀，凡聖人見稱稱也，亦揆端推類，原始見終，從閭巷論朝堂，由昭昭察冥冥。

識書秘文，遠見未然，空虛闇昧，豫睹未有，達聞暫見，卓識怪神，若非庸口所能言。放象事類以見禍，推原往驗以處來，賢者亦能，非獨聖也。周公治魯，太公知其後世當爲削弱之患。太公治齊，周公睹其後世當有劫弑之禍。見法術之極，睹禍亂之前矣。紂作象箸而箕子譏，魯以偶人葬而孔子歎。緣象箸見龍干之患，偶人睹殉葬之禍也。太公周公，俱見未然。箕子孔子，並睹未有。所由見方來者，賢聖同也。魯侯老，太子弱，次室之女，倚柱而嘯，由老弱之徵，見敗亂之兆也。婦人之知，尙能推類以見方來，况聖人君子，才高智明者乎？秦始皇十年，嚴襄王母夏太后，夢孝文王后，華陽后與文王葬壽陵。夏太后嚴襄王葬於范陵，故夏太后別葬杜陵曰：『東望吾子，西望吾夫，後百年旁當有萬家邑。』其後皆如其言，必以推類見方來爲聖。次室夏太后聖也，秦昭王十年，樽里子卒，葬於渭南章臺之東曰：『後百年當有天子宮挾我墓。』至漢興，長樂宮在其東，未央宮在其西，武庫正直其墓，竟如其言。先知之效，見方來之驗也。如此效聖，樽里子聖人也，非聖人，先知其方來，不足以明聖。

然則樽里子見天子宮挾其墓也，亦猶辛有知伊川之當戎。昔辛有過伊川，見被髮而祭者曰：『不及百年，此其戎乎。』其後百年，晉靈陸渾之戎於伊川焉。竟如辛有之知當戎，見被髮之兆也。樽里子之見天子挾其墓，亦

見博平之墓也。韓信葬其母，亦行營高敞地，令其旁可置萬家，其後竟有萬家處其墓旁。故博里子之見博平王有宮臺之兆，猶韓信之陷高敞萬家之臺也。先知之見，方來之事，無遠視洞聽之聰明，皆案兆察跡，推事原類。春秋之時，卿大夫相與會遇，見動作之變，聽言談之詭，善則明吉祥之福，惡則處凶妖之禍。明福處禍，遠圖未然，無神怪之知，皆由兆類。以今論之，故夫可知之事者，思慮所能見也；不可知之事，不學不問，不能知也。不學自知，不問自曉，古今行事，未之有也。夫可知之事，惟精思之，雖大無難；不可知之事，厲心學問，雖小無易。故智能之士，不學不成，不問不知。

難曰：『夫項託年七歲教孔子，案七歲未入小學，而教孔子，性自知也。孔子曰：『生而知之上也，學而知之其次也。』夫言生而知之，不言學問，謂若項託之類也。王莽之時，勃海尹方，年二十一，無所師友，性智開敏，明達六藝。魏都牧淳于倉奏：『方不學得文，能讀誦論義，引五經文，文說議事，厭合人之心。』帝徵方使射蜚蟲，策射無非知者。天下謂之聖人。夫無所師友，明達六藝，本不學書，得文能讀，此聖人也。不學自能，無師自達，非神如何？』曰：雖無師友，亦已有所問受矣，不學書，已弄筆墨矣。見始生產，耳目始開，雖有聖性，安能有知？項託七歲，其三四歲時，而受納人言矣。尹方年二十一，其十四五時，多聞見矣。性敏才茂，獨思無所據，不睹兆象，不見類驗，卻念百世之後，有馬生牛，牛生驢，桃生李，李生梅，聖人能知之乎？臣弒君，子弒父，仁如顏淵，孝如曾參，勇如黃育，辯如賜，聖人能見之乎？孔子曰：『其或繼周者，雖百世可知也。』又曰：『後生可畏，焉知來者之不如今也。』論損益言可知，稱後生言焉知；後生難處，損益易明也。此尚爲遠，非所聽察也。使一人立於牆東，令之出聲，使聖人聽之，牆西能知其黑白短長，鄉里姓字所自從出，乎？濤有流壘，渥有枯骨，髮首陋亡，肌肉腐絕，使人詢之，能知其農商老少，若所犯而坐死乎？非聖人無知，其知無以知也。知無以知，非問不能知也。不能知，則賢聖所共病也。

難曰：『詹何坐，弟子侍，有牛鳴於門外，弟子曰：『是黑牛也，而白蹄。』詹何曰：『然是黑牛也，而白其蹄。』使人視之，果黑牛，而以布裹其蹄。詹何，賢者也，尚能聽聲而知其色，以聖人之智，反不能知乎？』曰：能知黑牛白其

蹄，能知此牛誰之牛乎？白其蹄者以何事乎？夫術數直見一端，不能盡其實。雖審一事，曲辯問之，輒不能盡知。何則？不目見口問，不能盡知也。詹僖公二十九年，介葛盧來朝，舍于昌衍之上，聞牛鳴曰：『是牛生三犧，皆已用矣。』或問：『何以知之？』曰：『其音云。』人問牛主，竟如其言。此復用術數，非知所能見也。廣漢楊翁仲，聽鳥獸之音，乘蹇馬之野。田間有放眇馬，相去鳴聲相聞。翁仲謂其御曰：『彼放馬知此馬而目眇。』其御曰：『何以知之？』曰：『罵此轅中馬蹇，此馬亦罵之眇。』其御不信，往視之，目竟眇焉。翁仲之知馬聲，猶詹何介葛盧之聽牛鳴也。據術任數相合，其意不違，視聽遙見，流目以察之也。夫聽聲有術，則察色有數矣。推用術數，若先聞見。衆人不知，則謂神聖。若孔子之見獸，名之曰狴狴；太史公之見張良，似婦人之形矣。案孔子未嘗見狴狴，至輒能名之。太史公與張良異世，而目見其形，使衆人聞此言，則謂神而先知。然而孔子名狴狴，聞昭人之歌，太史公之見張良，觀宣室之臺也。陰見默識，用思深秘。衆人闕略，寡所意識，見賢聖之名物，則謂之神。推此以論，詹何見黑牛白蹄，猶此類也。彼不以術數，則先時聞見於外矣。方今占射事之工，據正術數，術數不中，集以人事。人事於術數而用之者，與神無異。詹何之徒，方今占射事者之類也。如以詹何之徒，性能知之，不用術數，是則棄居者先知風，穴處者先知雨，智明早成，項託尹方其是也。

難曰：『黃帝生而神靈，弱而能言；帝嚳生而自言其名。未有聞見於外，生輒能言稱其名，非神靈之效，生知之驗乎？』曰：『黃帝生而言，然而母懷之二十月生，計其月數，亦已二歲在母身中矣。帝嚳能自言其名，然不能言他人之名，雖有一能，未能徧通，所謂神而生知者，豈謂生而能言其名乎？乃謂不受而能知之，未得能見之也。黃帝嚳雖有神靈之驗，亦皆早成之才也。人才早成，亦有晚就，雖未就師，家問室學，人見其幼成早就，稱之過度。云項託七歲，是必十歲；云教孔子，是必孔子問之；云黃帝帝嚳生而能言，是亦數月；云尹方年二十一，是亦且三十；云無所師友，有不學書，是亦遊學家習。世俗褻稱過實，毀敗隄惡。世俗傳頌淵年十八歲升太山，望見吳昌門外有繫白馬，定攷實顏淵年三十，不升太山，不望吳昌門。項託之稱，尹方之譽，顏淵之類也。』

人才有高下，知物由學。學之乃知，不問自識。子貢曰：『夫子焉不學，而亦何常師之有？』孔子曰：『吾十有五而志乎學。』五帝三王皆有所師。曰：是欲爲人法也。曰：精思，亦可爲人法，何必以學者事難空知？賢聖之才能立也。所謂神者，不學而知，所謂聖者，須學以聖。以聖人學，知其非聖。天地之間，含血之類，無性知者。狴狴知往，鴉鵲知來，稟天之性，自然者也。如以聖人爲若狴狴乎？則夫狴狴之類，鳥獸也。僮諺不學而知，可謂神而先知矣。如以聖人爲若僮諺乎？則夫僮諺者，妖也。世間聖神，以爲巫與鬼神，用巫之口告人。如以聖人爲若巫乎？則夫爲巫者，亦妖也。與妖同氣，則與聖異類矣。巫與聖異，則聖不能神矣。不能神，則賢之黨也；同黨則所知者無以異也。及其有異，以入道也，聖人疾，賢者遲，賢者才多，聖人智多。所知同業，多少異量，所道一途，步騭相過。事有難知易曉，賢聖所共關思也。若夫文質之復，三教之重，正朔相緣，損益相因，賢聖所共知也。

古之水火，今之水火也；今之聲色，後世之聲色也。鳥獸草木，人民好惡，以今而見古，以此而知來，千歲之前，萬世之後，無以異也。追觀上古，探察來世，文質之類，水火之輩，賢聖共之；見兆聞象，圖書禍福，賢聖共之；見怪名物，無所疑惑，賢聖共之。事可知者，賢聖所共知也；不可知者，聖人亦不能知也。何以明之？使聖空坐先知兩也，性能一事知遠道，孔竅不善，未足以論也。所論先知性達者，盡知萬物之性，畢睹千能之要也。如知一不達二，達左不見右，偏駁不純，踦校不具，非所謂聖也。如必謂之聖，是明聖人無以奇也。詹何之徒，聖孔子之黨，亦稱聖，是聖無以異於賢，賢無以乏於聖也。賢聖皆能，何以稱聖奇於賢乎？如俱任用術數，賢何以不及聖？實者，聖賢不能知性，須任耳目以定情實。其任耳目也，可知之事，思之輒決，不可知之事，徒問乃解。天下之事，世間之物，可思而愚夫能開，精不可思而知，上聖不能省。孔子曰：『吾嘗終日不食，終夜不寢，以思，無益，不如學也。』天下事有不可知，猶結有不可解也。見說善解，結無有不可解。結有不可解，見說不能解也。非見說不能解也，結有不可解，及其解之用不能也。聖人知事，事無不可知，事有不可知，聖人不能知，非聖人不能知，事有不可知，及其知之用不知也。故夫難知之事，學問所能及也；不可知之事，問之學之，不能曉也。

知實篇

凡論事者違實，不引效驗，則雖甘義繁說，衆不見信。論聖人不能神而先知，先知之間，不能獨見，非徒空說虛言，直以才智准況之工也。事有證驗，以效實然，何以明之？孔子問公叔文子於公明賈曰：『信乎？夫子不言不笑不取，有諸？』對曰：『以告者過也。夫子時然後言，人不厭其言；樂然後笑，人不厭其笑；義然後取，人不厭其取。』孔子曰：『豈其然乎？豈其然乎？』天下之人，有如伯夷之廉，不取一介於人，未有不言不笑者也。孔子既不能如心揣度，以決然否，心怪不信，又不能遠視遙見，以審其實，問公明賈以知其情。孔子不能先知，一也。

陳子禽問子貢曰：『夫子至於是邦也，必聞其政，求之與？抑與之與？』子貢曰：『夫子溫良恭儉讓以得之。』溫良恭儉讓，尊行也。有尊行於人，人親附之。人親附之，則人告語之矣。然則孔子聞政以人言，不神而自知之也。齊景公問子貢曰：『夫子賢乎？』子貢對曰：『夫子乃聖，豈徒賢乎！』景公不知孔子聖，子貢正其名；子禽亦不知孔子所以聞政，子貢定其實，對景公云：『夫子聖豈徒賢哉！則其對子禽，亦嘗云：『神而自知之，不聞人言。』以子貢對子禽言之，聖人不能先知，二也。』

顏淵炊飯，塵落甕中，欲置之則不清，投地則棄飯，掇而食之。孔子望見，以爲竊食。聖人不能先知，三也。

塗有狂夫，投刃而候，澤有猛虎，厲牙而望。知見之者，不敢前進；如不知見，則遭狂夫之刃，犯猛虎之牙矣。匡人之圖孔子，孔子如審先知，當早易道以遠其害，不知而觸之，故遇其患。以孔子圖言之，聖人不能先知，四也。

子畏於匡，顏淵後，孔子曰：『吾以汝爲死矣。』如孔子先知，當知顏淵必不觸害，匡人必不加悖，見顏淵之來，乃知不死；未來之時，謂以爲死，聖人不能先知，五也。

陽貨欲見孔子，孔子不見，饋孔子豚。孔子時其亡也，而往拜之。遇諸塗，孔子不欲見，既往候時其亡，是勢必不欲見也，反遇於路。以孔子遇陽貨言之，聖人不能先知，六也。

長沮桀溺耦而耕。孔子過之，使子路問津焉。如孔子知津，不當更問。論者曰：欲觀隱者之操，則孔子先知，嘗自知之，無爲觀也。如不知而問之，是不能先知，七也。

孔子母死，不知其父墓，殯於五甫之衢。人見之者，以爲葬也；蓋以無所合葬殯之謹，故人以爲葬也。鄉人鄒曼甫之母告之，然後得合葬於防。有塋自在防，殯於衢路，聖人不能先知，八也。

既得合葬，孔子反門人後，兩甚至。孔子問曰：『何遽也？』曰：『防墓崩。』孔子不應，三，孔子炫然流涕曰：『吾聞之，古不修墓。』如孔子先知，當先知防墓崩。比門人至，宜流涕以俟之。人至乃知之，聖人不能先知，九也。

子入太廟，每事問；不知，故問爲人法也。孔子未嘗入廟，廟中禮器衆多，非一，孔子雖聖，尙能知之，以嘗見，實已知，而復問爲人法。孔子曰：『疑思問。』疑乃嘗問耶？實已知，當復問爲人法。孔子知五經，門人從之學，當復行問以爲人法，何故專口授弟子乎？不以已知五經復問爲人法，獨以已知太廟復問爲人法，聖人用心，何其不一也。以孔子入太廟言之，聖人不能先知，十也。

主人請賓飲食，若呼賓頓首若舍。賓如聞其家有輕子汨孫，必教親徹饌退膳，不得飲食。閉館關舍，不得頓首之執計，則必不往。何則？知請呼無辜，空行勞辱也。如往無辜，勞辱復還，不知其家，不曉其實，人實難知，吉凶難圖。如孔子先知，宜知諸侯惑於讒臣，必不能用，空勞辱已，聘召之到，宜寢不往。君子不爲無益之事，不履辱身之行。無爲周流應聘，以取削跡之辱，空說非主，以犯絕糧之厄。由此言之，近不能知，論者曰：『孔子自知不用，聖恩閑道不行，民在塗炭之中，庶幾欲佐諸侯，行道濟民，故應聘周流，不避患恥，爲道不爲己，故逢患而不惡，爲民不爲名，故蒙謗而不避。』曰：此非實也。孔子曰：『吾自衛反魯，然後樂正雅頌各得其所。』是謂孔子自知時也。何以自知，魯衛天下最賢之國也，魯衛不能用已，則天下莫能用已也，故退作春秋，刪定詩書，以自衛反魯言之，知行應聘時未自知也。何則？無兆象效驗，聖人無以定也。魯衛不能用，自知極也。魯人獲麟，自知絕也。道極命絕，兆象著明，心懷望沮，退而幽思，夫周流不休，猶病未死，壽卜使盜也。死兆未見，冀得活也。然則應聘未見絕證，冀得用也。

死兆見舍，卜還鑿絕，攬筆定書。以應聘周流言之，聖人不能先知，十一也。

孔子曰：『游者可爲綸，走者可爲綸。至於龍，吾不知其乘雲風上升。今日見老子，不猶龍耶？』聖人知物知事，老子與龍，人物也，所從上下，事也，何故不知？如老子神，龍亦神，聖人亦神，聖者同道，精氣交連，何故不知？以孔子不知龍與老子言之，聖人不能先知，十二也。

孔子曰：『孝哉閔子騫，人不問於其父母昆弟之言。』虞舜大聖，隱藏骨肉之過，宜愈子騫。瞽瞍與象，使舜治廩浚井，意欲殺舜，當見殺已之情，早諫豫止，既無如何，宜避不行。若病不爲，何故使父與弟得成殺已之惡，使人聞非父弟，萬世不滅，以虞舜不豫見，聖人不能先知，十三也。

武王不豫，周公請命。壇壇既設，筮祝已畢，不知天之許已與不，乃卜三龜。三龜皆吉。如聖人先知，周公當知天已許之，無爲頓復卜三龜。如聖人不以獨見立法，則更請命，秘藏不見，天意難知，故卜而合兆，兆決心定，乃以從事。聖人不能先知，十四也。

晏子聘於魯，堂上不趨，晏子趨，授玉不跪，晏子跪。門人怪而問於孔子，孔子不知。問於晏子，晏子解之，孔子乃曉。聖人不能先知，十五也。

陳賈問於孟子曰：『周公何人也？』曰：『聖人。』『使管叔監殷，管叔畔也。二者有諍，』曰：『然。』『周公知其畔而使，不知而使之與？』曰：『不知也。』『然則聖人且有過與？』曰：『周公弟也，管叔兄也。周公之過也，不亦宜乎？』孟子，實事之人也。言周公之聖，處其下不能知管叔之畔，聖人不能先知，十六也。

孔子曰：『賜不受命，而貨殖焉，億則屢中。』罪子貢善居積，意貴賤之期，數得其時，故貨殖多，富比陶朱。然則聖人先知也，子貢億數中之類也。聖人據象兆，原物類，意而得之，其見變名物，博學而識之，巧商而善意，廣見而多記，由微見較。若揆之今睹千載，所謂智如淵海。孔子見簋睹微，思慮洞達，材智兼倍，強力不倦，超踰倫等，耳目非有遠視之明，知人所不知之狀也。使聖人遠視遠見，洞聽潛聞，與天地談，與鬼神言，知天上地下之事，乃可謂

神而先知，與人卓異。今耳目聞見，與人無別；遵事睹物，與人無異；差賢一等爾，何以爲神而卓絕？

夫聖，猶賢也。人之殊者，謂之聖，則聖賢差小大之稱，非絕殊之名也。何以明之？齊桓公與管仲謀伐莒，謀未發而聞於國。桓公怪之，問管仲曰：『與仲甫謀伐莒，未發聞於國，其故何也？』管仲曰：『國必有聖人也。』少頃，當東郭牙至，管仲曰：『此必是已。』乃令賓延而上之，分級而立。管仲曰：『子邪？言伐莒？』對曰：『然。』管仲曰：『我不伐莒，子何故言伐莒？』對曰：『臣聞君子善謀，小人善意，臣竊意之。』管仲曰：『我不言伐莒，子何以意之？』對曰：『臣聞君子有三色：驩然喜樂者，鐘鼓之色；愀然清淨者，衰經之色；怫然充滿手足者，兵革之色。君口垂不驗，所言莒也；君舉臂而指，所當又莒也。臣竊慮國小，諸侯不服者，其唯莒乎？臣故言之。』夫管仲，上智之人也，其別物審事矣。云國必有聖人者，至誠謂國必有也。東郭牙至，云此必是已，謂東郭牙聖也。如賢與聖絕輩，管仲知時無十二聖之黨，當云國必有賢者，無爲言聖也。謀未發而聞於國，管仲謂國必有聖人，是謂聖人先知也。及見東郭牙，云此必是已，謂賢者聖也。東郭牙知之審，是與聖人同也。

客有見淳于髡於梁惠王者，再見之，終無言也。惠王怪之，以讓客曰：『子之稱淳于生，言管晏不及，及見寡人，寡人未有得也。寡人未足爲言邪？』客謂髡曰：『固也。吾見王志在遠，後見王志在音，吾是以默然。』客具報。王大駭曰：『嗟乎！淳于生誠聖人也。前淳于生之來，人有獻龍馬者，寡人未及視，會生至。後來，人有獻謳者，未及試，亦會生至。寡人雖屏左右，私心在彼。』夫髡之見惠王，在遠與音也，雖湯禹之察，不能過也。志在胸臆之中，藏匿不見，髡能知之。以髡等爲聖，則髡聖人也。如以髡等非聖，則聖人之知，何以過髡之知？惠王也。觀色以窺心，皆有因緣以准酌之。

楚靈王會諸侯，鄭子產曰：『魯邾宋衛不來。』及諸侯會，四國果不至。趙堯爲符璽御史，趙人方與公謂御史大夫周昌曰：『君之史趙堯，且代君位。』其後堯果爲御史大夫。然則四國不至，子產原其理也。趙堯之爲御史大夫，方與公睹其狀也。原理臆狀，處著方來，有以審之也。當人公孫臣、孝文皇帝時，上嘗言漢士德，其特貴龍當

見後黃龍見成紀。然則公孫臣知黃龍將出，案律歷以處之也。

賢聖之知，事宜驗矣。賢聖之才，皆能先知。其先知也，任術用數，或管商而巧意，非聖人空知神怪，與聖賢殊。道異路也。聖賢知不踰，故用思相出入，遇事無神怪，故名號相貿易。故夫賢聖者，道德智能之號；神者，眇茫恍惚無形之實。實異質不得同，實鈞效不得殊。聖神號不等，故聖者不神，神者不聖。東郭牙善意以知國情，子貢善意以得貨利。聖人之先知，子貢東郭牙之徒也。與子貢東郭同，則子貢東郭之徒亦聖也。夫如是，聖賢之實同而名號殊，未必才相懸絕，智相兼倍也。

太宰問於子貢曰：『夫子聖者歟？何其多能也？』子貢曰：『故天縱之將聖，又多能也。』將者，且也；不言已聖，言且聖者，以爲孔子聖未就也。夫聖若爲賢矣，治行屬操，操行未立，則謂且賢；今言且聖，聖可爲之故也。孔子曰：『吾十有五而志於學，三十而立，四十而不惑，五十而知天命，六十而耳順。』從知天命至耳順，學就知明，成聖之驗也。未五六十之時，未能知天命，至耳順也，則謂之且矣。嘗子貢答太宰時，殆三十四十之時也。

魏昭王問其田蚡曰：『寡人在東宮之時，聞先生之議曰：『爲聖易。』有之乎？』田蚡對曰：『臣之所學也。』昭王曰：『然則先生聖乎？』田蚡曰：『未有功而知其聖者，堯之知舜也；待其有功而後知其聖者，市人之知縣也。今蚡未有功，而王問蚡曰：『若聖乎？』敢問王亦其堯乎？』夫聖可學爲，故田蚡謂之易。如卓與人殊，稟天性而自然，焉可學，而爲之安能成？田蚡之言爲易，聖未必能成。田蚡之言爲易，未必能是。言臣之所學，蓋其實也。賢可學爲勞佚殊，故賢聖之號，仁智共之。

子貢問於孔子：『夫子聖矣乎？』孔子曰：『聖則吾不能；我學不厭而教不倦。』子貢曰：『學不厭者，智也；教不倦者，仁也。仁且智，夫子既聖矣。』由此言之，仁智之人，可謂聖矣。孟子曰：『子夏子游子張得聖人之一體，冉牛閔子騫顏淵具體而微。』六子在其世，皆有聖人之才，或頗有而不具，或備有而不明，然皆稱聖人，聖人可勉成也。孟子又曰：『非其君不事，非其民不使，治則進，亂則退，伯夷也。何事非君？何使非民？治亦進，亂亦進，伊尹也。』

可以仕則仕，可以已則已，可以久則久，可以速則速，孔子也。皆古聖人也。」又曰：「聖人，百世之師也，伯夷柳下惠是也。故聞伯夷之風者，頑夫廉，懦夫有立志；聞柳下惠之風者，薄夫敦，鄙夫寬。奮乎百世之上，百世之下聞者莫不興起，非聖而若是乎？而况親炙之乎？」夫伊尹伯夷柳下惠不及孔子，而孟子皆曰聖人者，賢聖同類，可以共一稱也。宰予曰：「以予觀夫子，賢於堯舜遠矣。」孔子聖，宜言聖於堯舜，而言賢者，聖賢相出入，故其名稱相貿易也。

定賢篇

聖人難知，賢者比於聖人爲易知。世人且不能知賢，安能知聖乎？世人雖言知賢，此言妄也。知賢何用？知之如何？以仕宦得高官，身富貴爲賢乎？則富貴者天命也。命富貴不爲賢，命貧賤不爲不肖，必以富貴效賢不肖，是則仕宦以才不以命也。以事君調合寡過爲賢乎？夫順阿之臣，佞倖之徒是也。唯主而說，適時而行，無廷逆之鄰，則無斥退之患。或骨體嫺麗，面色稱媚，上不憎而善生，恩澤洋溢過度，未可謂賢。朝廷選舉歸善爲賢乎？則夫著見而人所知者舉多，幽隱人所不識者薦少，虞舜是也。堯求則咨於鯀共工，則鯀已不得。由此言之，選舉多少，未可以知賢。或德高而舉之少，或才下而薦之多，明君求善察惡於多少之間，時得善惡之實矣。且廣交多徒，求索衆心者，人愛而稱之。清直不容鄉黨，志潔不交非徒，失衆心者，人憎而毀之。故名多生於知謝，毀多失於衆意。齊威王以毀封卽墨大夫，以譽烹阿大夫。卽墨有功而無譽，阿無效而有名也。子貢問曰：「鄉人皆好之，何如？」孔子曰：「未可也。」鄉人皆惡之，何如？」曰：「未可也。」不若鄉人之善者好之，其不善者惡之。」夫如是，稱譽多而大小皆言善者，非賢也。善人稱之，惡人毀之，毀譽者半，乃可有賢。以善人所稱，惡人所毀，可以知賢乎？夫如是，孔子之言，可以知賢。不知譽此人者賢也，毀此人者惡也。或時稱者惡而毀者善也，人眩惑無別也。

以人衆所歸附，賓客雲合者爲賢乎？則夫人衆所附歸者，或亦廣交多徒之人也。衆愛而稱之，則讒附而歸之。

矣。或尊貴而爲利，或好士下客，折節俟賢，徇陵孟嘗平原春申，食客數千，稱爲賢君。大將軍衛青及霍去病，門無一客，稱爲名將。故賓客之會，在好下之君。利害之賢，或不好士，不能爲輕重，則衆不歸而士不附也。以君位治人，得民心歌詠之爲賢乎？則夫得民心者，與彼得士意者，無以異也。爲虛恩拊循其民，民之欲得，卽喜樂矣。何以效之？齊田成子越王句踐是也。成子欲專齊政，以大斗貸小斗收而民悅。句踐欲重會稽之恥，拊循其民，弔死問病而民喜。二者皆自有所欲爲於他，而僞誘屬其民，誠心不加，而民亦悅。孟嘗君夜出秦關，雞未鳴而關不闔，下坐賤客，鼓臂爲雞鳴，而雞皆和之。關卽闔而孟嘗得出，又誰可以委聲感，則人亦可以僞恩動也。人可以僞恩動，則天亦可巧詐應也。動致天氣宜以精神，而人可陽燧取火於天，銷鍊五石，五月盛夏，鑄以爲器，乃能得火。今又但取刀劍恆銅鉤之屬，切磨以嚮日，亦得火焉。夫陽燧刀劍鉤能取火於日，恆非賢聖，亦能動氣於天，若董仲舒信土龍之能致雲雨，蓋亦有以也。夫如是，應天之治，尙未可爲賢，況徒得人心，卽謂之賢如何？

以居職有成功見效爲賢乎？夫居職何以爲功效？以人民附之，則人民可以僞恩說也。陰陽和百姓安者，時也。時和不肖遭其安，不和雖聖逢其危。如以陰陽和而效賢不肖，則堯以洪水得黜，湯以大旱爲殷下矣。如功效謂事也，身爲之者，功著可見。以道爲計者，效沒不章。鼓無當於五音，五音非鼓不和。師無當於五服，五服非故不親。水無當於五采，五采非水不章。道爲功本，功爲道效。據功謂之賢，是則道人之不肖也。高祖得天下，賞羣臣之功，蕭何爲賞首。何則？高祖論功，比獵者之縱狗也。狗身獲禽，功歸於人。羣臣手戰，其猶狗也；蕭何持重，其猶人也。必據成功謂之賢，是則蕭何無功。功貴不可以效賢，一也。

夫聖賢之治世也有術，得其術則功成，失其術則事廢。譬猶醫之治病也，有方篇劇猶治，無方輒微不愈。夫方猶術，病猶亂；譬猶吏，藥猶教也。方施而藥行，術設而教從，教從而亂止，藥行而病愈。治病之藥，未必惠於不爲醫者。然與治國之吏，未必賢於不能治國者。偶得其方，遭曉其術也。治國須藝以立功，亦有時當自亂，雖用術，功終不立者；亦有時當自安，雖無術，功猶成者。故夫治國之人，或得時而功成，或失時而無效。術人能因時以立功，不

能逆時以致安。良醫能治未嘗死之人命；如命窮壽盡，方用無驗也。故時當亂也，堯舜用術，功終不立；命當死矣，扁鵲行方，不能愈病。射御巧技，百工之人，皆以法術；然後功成事立，效驗可見。觀治國，百工之類也；功立，猶事成也。謂有功者賢，是謂百工皆賢人也。趙人吾邱壽王，武帝時待詔，上使從董仲舒受春秋，高才通明於事，後爲東郡都尉。上以壽王之賢，不置太守。時軍發民騷動，歲惡盜賊不息，上賜壽王書曰：『子在朕前時，輻湊並至，以爲天下少雙，海內寡二。至連十餘城之勢，任四干石之重，而盜賊浮船行攻取於庫兵，甚不稱在前時，何也？』壽王謝言難禁，復召爲光祿大夫，常居左右，論事說議，無不是，才高智深，通明多見。然其爲東郡都尉，歲惡賊盜不息，人民騷動，不能禁止。不知壽王不得治東郡之術耶？亡將東郡適當復亂，而壽王之治偶逢其時也。夫以壽王之賢，治東郡不能立功，必以功觀賢，則壽王棄而不選也。恐必世多如壽王之類，而論者以無功不察其賢。燕有谷氣塞，不生五穀，鄒衍吹律致氣，既寒更爲溫，燕以種黍，黍生豐熟，到今名之曰黍谷。夫和陰陽，當以道德至誠，然而鄒衍吹律，寒谷更溫，黍穀育生，推此以況諸有成功之類，有若鄒衍吹律之法，故得其術也。不肖無不能，失其數也。賢聖有不治，此功不可以效賢，二也。

人之舉事，或意至而功不成，事不立而勢貴山，荆軻醫夏無且是矣。荆軻入秦之計，本欲劫秦王，生致於燕，避追不偶，爲秦所擒。嘗荆軻之逐秦王，秦王環柱而走，醫夏無且以藥囊提荆軻，既而天下名軻爲烈士，秦王賜無且金二百鎰。夫爲秦所擒，生致之功不立，藥囊提刺客，益於救主，然猶稱貴者，意至勢盛也。天下之士，不以荆軻功不成，不稱其義。秦王不以無且無見效，不賞其志，誓不效成功，義至不謀就事，義有餘，效不足，志巨大而功細小，智者賞之，愚者罰之。必謀功不察志論，陽效不存陰計，是則豫讓拔劍斬襄子之衣，不足識也；伍子胥鞭答平王尸，不足載也；張良椎始皇，誤中副車，不足記也。三者道地不便，計畫不得，有其勢而無其功，懷其計而不得爲其事，是功不可以效賢，三也。

以孝於父，弟於兄，爲賢乎？則夫孝弟之人，有父兄者也。父兄不慈，孝弟乃章。舜有瞽瞍，參有曾皙，孝立名成，最

人稱之如無父兄。父兄慈良，無章顯之效，孝弟之名無所見矣。忠於君者，亦與此同。龍逢比干忠著，夏桀桀紂惡也。覆契臯陶忠聞，唐虞堯舜賢也。故螢火之明，掩於日月之光；忠臣之聲，蔽於賢君之名。死作之難，出命捐身，與此同。臣遭其時死難，故立其義而獲其名。大賢之涉世也，翔而有集，色斯而舉，亂君之忠，不累其身。危國之禍，不及其家，安得逢其禍而死其患乎？齊詹問於晏子曰：「忠臣之事其君也，若何？」對曰：「有難不死，出亡不送。」詹曰：「列地而予之，陳爵而貴之，君有難不死，出亡不送，可謂忠乎？」對曰：「言而見用，臣奚死焉？諫而見從，終身不亡，臣奚送焉？若言不見用，有難而死，是妄死也；諫而不見從，出亡而送，是詐僞也。故忠臣者，能盡善於君，不能與陷於難。」案晏子之對，以求賢於世，死君之難，立忠節者，不應科矣。是故大賢寡可名之節，小賢多可稱之行，可得簠者小，而可得量者少也。惡至大，簠弗能數；至多，升斛弗能有。小少易名之行，又發於衰亂易見之世，故節行顯而名聲聞也。浮於海者，迷於東西，大也。行於溝，咸識舟楫之跡，小也。小而易見，衰亂亦易察。故世不危亂，奇行不見；主不悖惑，忠節不立。鴻卓之義，發於顛沛之朝；清高之行，顯於衰亂之世。

以全身免害，不被刑戮，若南容懼白圭者爲賢乎？則夫免於害者幸，而命祿吉也，非才智所能禁，推行所能卻也。神蛇能斷而復屬，不能使人弗斷；聖賢能困而復通，不能使人弗害。南容能自免於刑戮，公冶以非罪在縲紲，伯玉可懷於無道之國，文王拘羑里，孔子厄陳蔡，非行所致之難，掩己而至，則有不得自免之患，累己而滯矣。夫不能自免於患者，猶不能延命於世也。命窮，賢不能自續；時厄，聖不能自免。

以委國去位，棄富貴就貧賤爲賢乎？則夫委國者有所迫也。若伯夷之徒，昆弟相讓以國，恥有分爭之名。及太王亶甫重戰，故其民皆委國及去位者，道不行而志不得也。如道行志得，亦不去位。故委國去位，皆有以也。謂之爲賢，無以者可謂不肖乎？且有國位者，故得委而去之；無國位者何委？夫割財用及讓下受分，與此同實。無財何割？口饑何讓？倉廩實，民知禮節，衣食足，民知榮辱，讓生於有餘，爭生於不足。人或割財助用，袁將軍再與兄子分家，財多者以爲恩義。崑山之下，以玉爲石；彭蠡之濱，以魚食犬豕。使廉讓之人，財若崑山之玉，彭蠡之魚，家財再

分，不足爲也。韓信寄食於南昌亭長，何財之割？顏淵簞食瓢飲，何財之讓？管仲分財取多，無廉讓之節；貧乏不足，志義廢也。

以避世離俗，清身潔行爲賢乎？是則委國去位之類也。富貴人情所貪，高官大位，人之所欲，樂去之而隱，生不遭遇，志氣不得也。長沮桀溺避世隱居，伯夷於陵去貴取賤，非其志也。恬澹無欲，志不在於仕。苟欲全身養性爲賢乎？是則老聃之徒也。道人與賢殊科者，憂世濟民於難。是以孔子棲棲，墨子遑遑，不進與孔墨合務，而還與黃老同操，非賢也。

以舉義千里，師將朋友無廢禮爲賢乎？則夫家富財饒，筋力勁彊者能堪之，匱乏無以舉禮，羸弱不能奔遠，不能任也。是故百金之家，境外無絕交，千乘之國，同盟無廢贈，財多故也。使穀食如水火，雖貪恣之人，越境而布施矣。故財少則正禮不能舉一，有餘則妄施能於千家，貧無斗膏之儲者，難責以交施矣。舉擔千里之人，材策越彊之士，手足胼胝，面目黧黑，無傷感不任之疾，筋力皮革，必有與人異者矣。推此以況爲君要證之吏，身被疾痛而口無一辭者，亦肌肉骨節堅彊之故也。堅彊則能隱事而立義，軟弱則誣時而毀節。豫讓自賊，妻不能識，高後筆身無完肉，實體有不與人同者，則其節行有不與人鈞者矣。

以經明帶徒聚衆爲賢乎？則夫經明儒者是也。儒者，學之所爲也。儒者學，學儒矣。傳先師之業，習口誦以教，無胸中之造，思定然否之論。鄙人之過書，門者之傳教也，封完書不遺教，審令不遺誤者，則爲善矣。傳者傳學，不妄一言，先師古語，到今具存。雖帶徒百人以上，位博士文學，鄙人門者之類也。

以通覽古今秘隱傳記，無所不記爲賢乎？是則傳者之次也。才高好事，勤學不舍，若專成之苗裔。有世祖遺文，得成其篇業，觀覽輒誦，若典官文書。若太史公及劉子政之徒，有主領書記之職，則有博覽通達之名矣。

以權詐卓譎，能將兵御衆爲賢乎？是韓信之徒也。戰國獲其功，稱爲名將，世平能無所施，還入禍門矣。高鳥死，夏弓藏，狡兔得，良犬烹，權詐之臣，高鳥之弓，狡兔之犬也。安平身無宜，則弓藏而犬烹。安平之主，非棄臣而賤士，

世所用助上者，非其宜也。向令韓信用權變之才，爲若叔孫通之事，安得謀反誅死之禍哉？有功疆之權，無守平之經，曉將兵之計，不得已定之義，居平安之時，爲反逆之謀，此其所以功滅國絕，不得名爲賢也。

以辯於口，言甘辭巧爲賢乎？則夫子貢之徒是也。子貢之辯勝顏淵，孔子序置於下，實才不能高，口辯機利，人決能稱之。夫自文帝尙多虎圈齋夫，少上林尉，張釋之稱周勃張相如，文帝乃悟。去辯於口，虎圈齋夫之徒也，難以觀賢。以敏於筆文墨兩集爲賢乎？夫筆之與口一實也。口出以爲言，筆書以爲文。口辯才未必高，然則筆敏，知未必多也。且筆用何爲敏，以敏於官曹事，事之難者，莫過於獄。獄疑則有請讞。蓋世優者莫過張湯，張湯文深，在漢之朝，不稱爲賢，太史公序以湯爲酷，酷非賢者之行。魯林中哭婦，虎食其夫，又食其子，不能去者，善政不苛，吏不暴也。夫酷苛暴之黨也，難以爲賢。以敏於賦頌，爲弘麗之文爲賢乎？則夫司馬長卿揚子雲是也。文麗而務巨，言眇而趨深，然而不能處定是非，辯然否之實。雖文如錦繡，深如河漢，民不覺知是非之分，無益於彌爲崇實之化。

以清節自守，不降志辱身爲賢乎？是則避世離俗，長沮桀溺之類也。雖不離俗節，與離世者鈞，清其身而不輔其主，守其節而不勞其民。大賢之在世也，時行則行，時止則止，銓可否之宜，以制清濁之行。子貢讓而止，善；子路受而觀德，夫讓，廉也；受則貪也。貪有益，廉有損，推行之節，不得常清眇也。伯夷無可，孔子謂之非，操達於聖，難以爲賢矣。或問於孔子曰：『顏淵何人也？』曰：『仁人也，丘不如也。』曰：『子貢何人也？』曰：『辯人也，丘弗如也。』『子路何人也？』曰：『勇人也，丘弗如也。』客曰：『三子者皆賢於夫子，而爲夫子服役，何也？』孔子曰：『丘能仁且忍，辯且詘，勇且怯，以三子之能，易丘之道，弗爲也。』孔子知所設施之矣。有高才潔行，無知明以設施之，則與愚而無操者，同一實也。夫如是，皆有非也，無一非者，可以爲賢乎？是則鄉原之人也。孟子曰：『非之，無舉也；刺之，無刺也。同乎流俗，合乎污世，居之似忠信，行之似廉潔，衆皆悅之，自以爲是，而不可與入堯舜之道。故孔子曰：『鄉原，德之賊也。』似之而非者，孔子惡之。』夫如是何以知實賢？知賢竟何用？世人之檢，苟見才高能茂，有成

功見效，則謂之賢。若此甚易，知賢何難？書曰：『知人則哲，惟帝難之。』據才高卓異者，則謂之賢耳，何難之有？然而難之，獨有難者之故也。

夫虞舜不易知人，而世人自謂能知賢，誤也。然則賢者，竟不可知乎？曰：易知也；而稱難者，不見所以知之則難。聖人不易知也，及見所以知之，中才而察之，譬猶工匠之作器也，曉之則無難，不曉則無易。賢者易知於作器，世無別故，真賢集於俗士之間，俗士以辯惠之能，據官爵之尊，望顯盛之寵，遂專爲賢之名。賢者還在閭巷之間，貧賤終老，被無驗之謗；若此何時可知乎？然而必欲知之，觀善心也。夫賢者，才能未必高也，而心明，智力未必多而舉是，何以觀心必以言，有善心則有善言，以言而察行，有善言則有善行矣。言行無非，治家親戚有倫，治國則尊卑有序，無善心者，白黑不分，善惡同倫，政治錯亂，法度失平，故心善無不善也，心不善無能善，心善則能辯，然否然否之義定，心善之效明，雖貧賤困窮，功不成而效不立，猶爲賢矣。故治不謀功，要所用者是，行不責效，期所爲者正。正是審明，則言不須繁，事不須多。故曰：言不務多，務審所謂；行不務遠，務審所由。言得道理之心，口雖訥不辯，辯在胸臆之內矣。故人欲心辯，不欲口辯，心辯則言隨而不違，口辯則辭好而無成。

孔子稱少正卯之惡，曰：『言非而博，順非而澤，內非而外以才能飾之，衆不能見，則以爲賢。』夫內非外飾，是世以爲賢，則夫內是外無以自表者，衆亦以爲不肖矣。是非亂而不治，聖人獨知之。人言行多若少正卯之類，賢者獨識之。世有是非錯謬之言，亦有審觀紛亂之事，決錯謬之言，定紛亂之事，惟賢聖之人爲能任之。聖心明而不闇，賢心理而不亂，用明察非，非無不見，用理銓疑，疑無不定。與世殊指，雖言正是，衆不曉見，何則？沈溺俗言之日久，不能自還以從實也。是故正是之言，爲衆所非，離俗之禮，爲世所譏。管子曰：『君子言堂滿堂，言室滿室。』怪此之言何以得滿，如正是之言出，堂之人皆有正是之知，然後乃滿。如非正是，人之乖刺異，安得爲滿？夫歌曲妙者，和者則寡，言得實者，然者則鮮，和歌與聽言，同一實也。曲妙人不能盡和，言是人不能皆信。

魯文公逆祀，去者三人，定公順祀，畔者五人。實於俗者，則謂禮爲非，曉禮者寡，則知是者希。君子言之，堂室安

能備夫人不謂之滿，世則不得見。口談之實語，筆墨之餘跡，隙在簡策之上，乃可得知。故孔子不王，作春秋以明意。案春秋虛文義，以知孔子能王之德。孔子，聖人也。有若孔子之業者，雖非孔子之才，斯亦賢者之實驗也。夫賢與聖同軌而殊名，賢可得定，則聖可論也。問周道不弊，孔子不作春秋，春秋之作起，周道弊也。如周道不弊，孔子不作者，未必無孔子之才，無所起也。夫如是，孔子之作春秋，未可以觀聖；有若孔子之業者，未可知賢也。曰周道弊，孔子起而作之，文義褒貶是非，得道理之實，無非僻之誤，以故見孔子之賢，實也。夫無言則察之以文，無文則察之以言，設孔子不作，猶有遺言，言必有起，猶文之必有爲也。觀文之是非，不願作之所起，世間爲文者衆矣，是非不分，然否不定。桓君山論之，可謂得實矣。論文以察實，則君山漢之賢人也。陳平未仕，割肉閭里，分均若一，能爲丞相之驗也。夫割肉與割文，同一實也。如君山得執漢平用心，與爲論不殊指矣。孔子不王，素王之業，在於春秋，然則桓君山素丞相之跡，存於新論者也。

正說篇

儒者說五經，多失其實。前儒不見本末，空生虛說；後儒信前師之言，隨趣述故，滑習辭語，苟名一師之學，趨爲師教授，及時蚤仕，汲汲競進，不暇留精用心，考實根核，故虛說傳而不絕，實事沒而不見，五經並失其實。尙書春秋事較易，略正題目麤粗之說，以照篇中微妙之文。

說尙書者，或以爲本百兩篇，後遭秦燔詩書，遺在者二十九篇。夫言秦燔詩書是也，言本百兩篇者妄也。蓋尙書本百篇，孔子以授也。遭秦用李斯之議，燔燒五經。濟南伏生抱百篇藏於山中。孝景皇帝時，始存尙書。伏生已出山中，景帝遣鼂錯往從受尙書二十餘篇。伏生老死，書殘不竟，鼂錯傳於倪寬。至孝宣皇帝之時，河內女子發老屋，得逸易禮尙書各一篇，奏之。宣帝下示博士，然後易禮尙書各益一篇，而尙書二十九篇始定矣。至孝景帝時，魯共王壞孔子教授堂以爲殿，得百篇尙書於牆壁中。武帝使使者取視，莫能讀者，遂秘於中，外不得見。至孝

成皇帝時，徵爲古文、尙書學。東海張霸案百篇之序，空造百兩之篇，獻之成帝。帝出祕百篇以校之，皆不相應，於是下霸於吏。吏白霸罪當至死，成帝高其才而不誅，亦惜其文而不滅。故百兩之篇傳在世間者，傳見之人，則謂尙書本有百兩篇矣。

或言秦燔詩書者，燔詩經之書也，其經不燔焉。夫詩經獨燔，其詩書五經之總名也。傳曰：『男子不讀經，則有博戲之心。』子路使子羔爲費宰，孔子曰：『賊夫人之子。』子路曰：『有民人焉，有社稷焉，何必讀書，然後爲學。』五經總名爲書，傳者不知秦燔書所起，故不審燔書之實。秦始皇二十四年，置酒咸陽宮，博士七十人前爲壽。侯射周青臣進頌秦始皇，齊人淳于越進諫，以爲始皇子弟卒有田常六卿之難，無以救也。議青臣之頌，謂之爲諛。秦始皇下其議丞相府，丞相斯以爲越言不可用，因此謂諸生之言惑亂黔首，乃令吏官盡燒五經，有敢藏詩書百家語者刑，唯博士官乃得有之。五經皆燬，非獨諸家之書也。傳者信之，見言詩書，則獨謂經謂之書矣。

傳者或知尙書爲秦所燬，而謂二十九篇其遺脫不燒者也。審若此言，尙書二十九篇，火之餘也。七十一篇爲炭灰，二十九篇獨遺耶？夫伏生年老，鼃錯從之學時，適得二十餘篇，伏生死矣，故二十九篇獨見，七十一篇遺脫。遺脫者七十一篇，反謂二十九篇遺脫矣。

或說尙書二十九篇者，法北斗七宿也，四七二十八篇，其一曰斗矣，故二十九。夫尙書滅絕於秦，其見在者二十九篇，安得法乎？宣帝之時，得佚尙書及易禮各一篇，禮易篇數亦始足，焉得有法？案百篇之序，闕遺者七十一篇，獨謂二十九篇立法，如何？或說曰：孔子更選二十九篇，二十九篇獨有法也。蓋俗儒之說也，未必傳記之明也。二十九篇，殘而不足，有傳之者，因不足之數，立取法之說，失聖人之意，違古今之實。夫經之有篇也，猶章句也。有章句，猶有文字也。文字有意以立句，句有數以連章，章有體以成篇，篇則章句之大者也。謂篇有所法，是謂章句復有所法也。詩經舊時亦數千篇，孔子刪去複重，正而存三百篇，猶二十九篇也。謂二十九篇有法，是謂三百五篇復有法也。

或說春秋十二月也；春秋十二公，猶尚書之百篇，百篇無所法，十二公安得法？說春秋者曰：『二百四十二年，人道浹，王道備，善惡惡，撥亂世，反諸正，莫近於春秋。』若此者，人道王道，適具足也。三軍六師，萬二千人，足以陵敵伐寇，橫行天下，令行禁止，未必有所法也。孔子作春秋，紀魯十二公，猶三軍之有六師也。士衆萬二千，猶年有二百四十二也。六師萬二千人，足以成軍；十二公二百四十二年，足以立義。說事者好神道設教，不肯以遺禍，是故經傳篇數，皆有所法。考實根本，論其文義，與彼賢者作書詩，無以異也。故聖人作經，賢者作書，義窮理竟，文辭備足，則爲篇矣。其篇也，種類相從，科條相附，殊種異類，論說不同，更別爲篇。意異則文殊，事改則篇更，據事意作，安得法象之義乎？

或說春秋二百四十二年者，上壽九十，中壽八十，下壽七十，孔子據中壽三世而作，三八二十四，故二百四十年也。又說爲赤制之中數也。又說二百四十二年，人道浹，王道備，夫據三世，則浹備之說非。言浹備之說爲是，則據三世之論誤。二者相伐而立其義，聖人之意何定哉？凡紀事言年月日者，詳悉重之也。洪範五紀，歲月日星，紀事之文，非法象之言也。紀十二公享國之年，凡有二百四十二，凡此以立三世之說矣。實孔子紀十二公者，以爲十二公事，適足以見王道耶？據三世，三世之數，適得十二公而足也。如據十二公，則二百四十二年，不爲三世見也。如據三世，取三八之數，二百四十年而已，何必取二說者？又曰：『欲合隱公之元也，不取二年。隱公元年，不載於經。』夫春秋自據三世之數而作，何用隱公元年之事爲始？須隱公元年之事爲始，是竟以備足爲義，據三世之說不復用矣。說隱公享國五十年，將盡紀元年以來耶？中斷以備三八之數也。如盡紀元年以來，三八之數其中斷，如中斷以備三世之數，則隱公之元不合，何如？且年與月日，小大異耳，其所記載，同一實也。二百四十二年，謂之據三世，二百四十二年中之日月，必有數矣。年據三世，月日多少，何據哉？夫春秋之有年也，猶尚書之有年，章以首義，年以紀事。謂春秋之年有據，是謂尚書之章亦有據也。

說易者皆謂伏犧作八卦，文王演爲六十四。夫聖王起，河出圖，洛出書，伏犧王，河圖從河水中出，易卦是也。禹

之時得洛書，書從洛水中出，洪範九章是也。故伏羲以卦治天下，禹按洪範以治洪水，古者烈山氏之王得河圖，夏后因之曰連山，烈山氏之王得河圖，殷人因之曰歸藏，伏羲氏之王得河圖，周人曰周易，其經卦皆六十四。文王周公因象十八章究六爻，世之傳說易者，言伏羲作八卦不實，其本則謂伏羲真作八卦也。伏羲得八卦，非作之，文王得成六十四，非演之也。演作之言，生於俗傳，苟信一文，使夫真是幾滅不存，既不知易之爲河圖，又不知存於俗何家易也。或時連山歸藏，或時周易，案禮夏殷周三家，相損益之制，較著不同。如以周家在後論，今爲周易，則禮亦宜爲周禮，六典不與今禮相應，今禮未必爲周，則亦疑今易未必爲周也。案左邱明之傳引周家，以卦與今易相應，始周易也。

說禮者，皆知禮也，爲禮何家禮也？孔子曰：『殷因於夏禮，所損益可知也。周因於殷禮，所損益可知也。』由此言之，夏殷周各自有禮，方今周禮耶？夏殷也？謂之周禮，周禮六典，案今禮經不見六典，或時殷禮未絕，而六典之禮不傳，世因謂此爲周禮也。案周官之法，不與今禮相應，然則周禮六典是也。其不傳，猶古文尙書春秋左氏不與矣。

說論語者，皆知說文解語而已，不知論語本幾何篇，但周以八寸爲尺，不知論語所獨一尺之意。夫論語者，弟子共紀孔子之言行，勅記之時甚多，數十百篇，以八寸爲尺紀之，約省懷持之便也。以其遺非經傳文，記載恐忘，故但以八寸尺，不二尺四寸也。漢興失亡，知武帝發取孔子壁中古文，得二十一篇，齊魯二河間九篇——三十篇。至昭帝女讀二十一篇，宣帝下太常博士，時尙稱書難曉，名之曰傳，後更隸篇以傳誦。初孔子孫孔安國以教魯人扶卿，官至荊州刺史，始曰論語，今時稱論語二十篇，又失齊魯河間九篇，本三十篇，分布亡失。或二十一篇目或多或少，文讀或是或誤。說論語者，但知以剝解之問，以纖微之難，不知存問本根，篇數章目，溫故知新，可以爲師，今不知古，稱師如何？

孟子曰：『王者之迹熄而詩亡，詩亡然後春秋作。晉之乘，楚之檮杌，魯之春秋，一也。』若孟子之言，春秋者，魯

史記之名，乘橈同。孔子因舊故之名，以號春秋之經，未必有奇詭異意，深美之據也。今俗儒說之，春者歲之始，秋者其終也。春秋之經，可以奉故養終，故號爲春秋。春秋之經，何以異尙書？尙書者，以爲上古帝王之書，或以爲上所爲下所書。授事相實而爲名，不依違作意以見奇。說尙書者，得經之實，說春秋者，失聖之意矣。春秋左氏傳，桓公十有七年冬十月朔，日有食之。不書日，官失之也。謂官失之言，蓋其實也。史官記事，若今時縣官之書矣。其年月尙大，難失，日者微小，易忘也。蓋記以善惡爲實，不以日月爲意。若夫公羊穀梁之傳，日月不具，輒爲意使，失平常之事，有怪異之說，徑直之文，有曲折之義，非孔子之心。夫春秋實及言夏，不言者，亦與不書日月同一實也。唐虞夏殷周者，土地之名。堯以唐侯嗣位，舜從虞地得達，禹由夏而起，湯因殷而興，武王階周而伐，皆本所興冒之地，重本不忘始，故以爲號。若人之有姓矣，說尙書謂之有天下之代號。唐虞夏殷周者，功德之名，盛隆之意也。故唐之爲言蕩蕩也，虞者樂也，夏者大也，殷者中也，周者至也。堯則蕩蕩民無能名，舜則天下虞樂，禹承二帝之業，使道尙蕩蕩，民無能名，殷則道得中，周武則功德無不至，其立義美也，其褒五家大矣！然而違其正實，失其初意。唐虞夏殷周，猶秦之爲漢，漢之爲秦，秦起於秦，漢興於漢中，故曰猶秦漢，猶王莽從新都侯起，故曰亡新，使秦漢在經傳之上，說者將復爲秦漢作道德之說矣。

堯者求禪，四嶽舉舜，堯曰：『我其試哉！』說尙書曰：『試者用也；我其用之爲天子也。』文爲天子也。文又曰：『女于時，觀厥刑于二女。』觀者，觀爾虞舜於天下，不謂堯自觀之也。若此者，高大堯舜，以爲聖人相見已審，不須觀試，精耀相照，曠然相信。又曰：『四門穆穆，入於大麓，烈風雷雨不迷。』言大麓三公之位也。居一公之位，大總錄二公之事，衆多並吉。若疾風大雨，夫聖人才高，未必相知也。聖成事，舜難知，使臯陶陳知人之法，侯難知，聖亦難別。堯之才，猶舜之知也。舜知侯，堯知聖，堯聞舜賢，四嶽舉之，心知其奇，而未必知其能，故言『我其試哉！』試之於職，妻以二女，觀其夫婦之法，職治修而不廢，夫道正而不僻，復令人庶之野而觀其聖。逢烈風疾雨，終不迷惑。堯乃知其聖，授以天下。夫文言觀試，觀試其才也。說家以爲譬喻增飾，使事失正是，誠而不存，曲折失意，使

優說傳而不絕，造說之傳，失之久矣。後生精者，有欲明經不原實，而原之者亦校古隨舊，重是之文，以爲說證，經之傳不可從，五經皆多失實之說。尚書春秋，行事成文，較著可見，故頗獨論。

書解篇

或曰：『士之論高，何必以文？』答曰：夫人有文質乃成，物有華而不實，有實而不華者。易曰：『聖人之情見乎辭。』出口爲言，集札爲文，文辭施設，實情敷烈。夫文德世服也，空書爲文，實行爲德，著之於衣爲服，故曰德彌盛者文彌攝，德彌彰者人彌明。大人德懷其文炳，小人德熾其文斑，官尊而文繁，德高而文積。華而說者，大夫之簪，曾子寢疾，命元起易。由此言之，衣服以品賢，賢以文爲差。愚傑不別，須文以立折，非唯於人，物亦咸然。龍鱗有文，以蛇爲神；鳳羽五色，於鳥爲君；虎猛毛蚡蚴，龜知背負文。四者體不質，於物爲聖賢。且夫山無林則爲土山，地無毛則爲漏土，人無文則爲樸人。土山無藥，漏土無五穀，人無文德，不爲聖賢。上天多文，而后土多理。二氣協和，聖賢稟受，法象本類，故多文彩。瑞應符命，莫非文者。晉唐叔虞，魯成季友，惠公夫人，號曰仲子，生而怪奇，文在其手。張良當貴，出與神會；老父授書，卒封留侯。河神故出圖，洛靈故出書。竹帛所記，怪奇之物，不出潢垮。物以文爲表，人以文爲基。棘子成欲彌文，子貢譏之，謂文不足奇者，子成之徒也。

著作者爲文儒，說經者爲世儒。二儒在世，未知何者爲優，或曰：『文儒不若世儒。世儒說聖人之經，解賢者之傳，義理廣博，無不實見。故在官常位，位最尊者爲博士，門徒聚衆，招會千里，身雖死亡，學傳於後。文儒爲華淫之說，於世無補，故無常官。弟子門徒，不見一人，身死之後，莫有紹傳。此其所以不如世儒者也。』答曰：不然！夫世儒說聖情，共起並驗，俱追聖人。事殊而務同，言異而義鈞。何以謂之文儒之說無補於世？世儒業易爲，故世人學之多，非事可析第，故官廷設其位。文儒之業，卓絕不循人，寡其書，業雖不請，門雖無人，書文奇偉，世人亦傳。彼虛說，此實篇，折衷一者，孰者爲賢？案古俊乂，著作辭說，自用其業，自明於世。世儒當時雖尊，不處文儒之書，其跡不傳。

周公制禮樂，名垂而不滅。孔子作春秋，聞傳而不絕。周公孔子，難以論言。漢世文章之徒，陸賈司馬遷劉子政楊子雲，其材能若奇，其稱不由人。世傳詩家膏肓申公，書家千乘歐陽公孫，不遺太史公，世人不聞。夫以業自顯，孰與須人乃顯？夫能紀百人，孰與廬能顯其名？

或曰：「著作者，思慮間也，未必材知出異人也。居不幽，思不至，使著作之人，總衆事之凡，典國境之職，汲汲忙忙，或暇著作，試使庸人，續閑暇之思，亦能成篇八十數。文王日昃不暇食，周公一沐三握髮，何暇優游爲笑麗之文於筆札？孔子作春秋，不用於周也。司馬長卿不預公卿之事，故能作子虛之賦；揚子雲存中郎之官，故能成太玄經就法言，使孔子得王春秋，不作長卿子雲爲相，賦玄不工。」答曰：「文王日昃不暇食，此謂殫易而益卦。周公一沐三握髮，爲周政法制而周道不弊。孔子不作休，思慮間也，周法闕疎，不可因也。夫稟天地之文，發於胸臆，豈爲間作不暇日哉？感傷起妄，源流氣蒸，管仲相桓公，致於九合，商鞅相孝公，爲秦開帝業，然而二子之書，篇章數十。長卿子雲，二子之倫也，俱感故才並，才同故業鈞，皆士而各著，不以思慮間也。問事彌多而見彌博，官彌劇而識彌泥，居不幽則思不至，思不至則筆不利，豐頤之人，有幽室之思，雖無憂不能著一字。蓋人材有能，無有不暇，有無材而不能思，無有知而不能著。有鴻材作而無起，細知以問而能記。蓋奇有無所因，無有不能言，兩有無所睹，無不暇造作。」

或曰：「凡作者精思已極，居位不能領職，蓋人思有所倚着，則精有所盡索。著作之人，書言通奇，其材已極，其知已能。案古作書者多位，布散衆解，輔傾甯危，非著作之人所能爲也。夫有所偏，有所泥，則有所自，篇章數百，呂不韋作春秋，魯家徙蜀，淮南王作道書，稱至誠族，韓非著治術，身下秦獄，身且不全，安能輔國？夫有長於彼，安能不短於此？深於作文，安能不淺於政治？」答曰：「人有所優，固有所劣；人有所工，固有所拙。非劣也，志意不爲也，非拙也，精誠不加也。志有所存，顧不見泰山；思有所至，有身不暇徇也。稱干將之利，刺則不能擊；擊則不能刺，非刃不利，不能一旦二也。駢彈雀則失鷄，射鵰則失鴈，方員畫不俱成，左右視不並見，人材有兩爲，不能成一，使干將

寡刺而更鑿，駢捨鵠而射鴈，則下射無失矣。人委其篇章，專爲政治，則子產子賤之跡，不足侔也。古作書者，多立功不用也。管仲晏嬰功書並作，商鞅虞卿篇治俱爲高祖既得天下，馬上之計未敗。陸賈造新語，高祖粗納采。呂氏橫道，劉氏將傾，非陸賈之策，帝室不甯。蓋材知無不能，在所遭遇。遇亂則知立功，有起則以其材著書者也。出口爲言，著文爲篇。古以言爲功者多，以文爲敗者希。呂不韋淮南王，以他爲遇，不以書有非。使客作書，不身自爲，如不作書，猶蒙此章章之稱。夫古今違屬，未必皆著作材知極也。鄒陽舉疏，免罪於梁，徐樂上書，身拜郎中，材能以其文爲功於人，何嫌不能營衛其身？韓宣信公子非，國不傾危，及非之死，李斯如奇非以著作材，極不能復有爲也。春物之傷，或死之也，殘物不傷，秋亦大長。假令非不死，秦示可知。故才人能令其行可尊，不能使人必法已，能令其言可行，不能使人必采取之矣。

或曰：「古今作書者非一，各穿鑿夫經之實，傳違聖人質，故謂之葺殘，比之玉屑。故曰葺殘滿車，不成爲道；玉屑滿筵，不成爲寶。前人近聖，猶爲葺殘；況遠聖從後復重爲者乎？其作必爲妄，其言必不明，安可採用而施行？」答曰：聖人作其經，賢者造其傳，述作者之意，探聖人之志，故經須傳也。俱賢所爲，何以獨謂經傳是他書記非？彼見經傳，傳經之文，經須而解，故謂之是。他書與書相違，更造端緒，故謂之非。若此者，違是於五經，使言非五經，雖是不見聽，使五經從孔門出，到今常令人不缺滅，謂之統一信之可也。今五經遺亡，秦之奢侈，觸李斯之橫議，燔燒禁防，伏生之休，抱經深藏，漢興收五經，經書缺滅而不明，篇章棄散而不具，龜錯之輩，各以私意分拆文字，師徒相因相授，不知何者爲是，亡秦無道，敗亂之也。秦雖無道，不燔諸子，諸子尺書，文篇具在，可觀讀以正說，可採掇以示後人。後人復作，猶前人之造也。夫俱燬而知，皆傳記所稱，文義與經相薄，何以獨謂文書失經之實？由此言之，經缺而不完，書無佚本，經有遺篇，折累二者，孰與葺殘？易據事象，詩采民以爲篇，樂須不離，禮待民平。四經有據，篇章乃成。尚書春秋，采掇史記，史記與無異書，以民事一意，六經之作皆有據。由此言之，書亦爲本，經亦爲末，未失事實，本得道實，折累二者，孰爲玉屑？知屋漏者在宇下，知失政者在草野，知經誤者在諸子，諸子尺書，文

明實是說章句者，終不求解扣明師，師相傳初爲章句者，非通覽之人也。

案書篇

儒家之宗孔子也，墨家之祖墨翟也，且案儒道傳而墨法廢者，儒之道義可傳，而墨之法義難從也。何以驗之？墨家薄葬右鬼，道乖相反，違其實，宜以難從也。乖違如何？使鬼非死人之精也，右之未可知。今墨家謂鬼審人之精也，厚其精而薄其屍，此於其神厚而於其體薄也。薄厚不相勝，華實不相副，則怒而降禍，雖有其鬼，終以死恨人情欲厚惡薄，神心猶然。用墨子之法，事鬼求福，福罕至而禍常來也。以一沉百，而墨家爲法，皆若此類也。廢而不傳，蓋有以也。

春秋左氏傳者，蓋出孔子壁中。孝武皇帝時，魯共王壞孔子教授堂以爲宮，得佚春秋三十篇。左氏傳也。公羊高穀梁寅胡毋氏皆傳春秋各門異戶，獨左氏傳爲近得實，何以驗之？禮記造於孔子之堂，太史公漢之通人也。左氏之言，與二書合，公羊高穀梁寅胡毋氏不相合。又諸家去孔子遠，遠不如近，聞不如見。劉子政玩弄左氏童僕妻子，皆呻吟之。光武皇帝之時，陳元范叔上書連屬，條事是非，左氏遂立。范叔尋因罪罷，元叔天下極才，諱論是非，有餘力矣。陳元言訥，范叔章詘，左氏得實明矣。言多怪，頗與孔子不語怪力相違反也。呂氏春秋亦如此焉。國語左氏之外傳也。左氏傳經，辭語尙略，故復選錄國語之辭以實。然則左氏國語世儒之寶書也。

公孫龍著堅白之論，析言剖辭，務折曲之言，無道理之較，無益於治。齊有三鄒衍之書，瀆泮無涯，其文少驗，多驚耳之言。案大才之人，率多俊縱，無實是之驗，華虛誇誕，無審察之實。商鞅相秦，作耕戰之術，管仲相齊，造輕重之篇，富民豐國，疆主弱敵，公賞罰，與鄒衍之書並言，而太史公兩紀，世人疑惑，不知所從。案弱儀與蘇秦同時，蘇秦之死，儀固知之，儀知各審，宜從儀言，以定其實，而說不明，兩傳其文。東海張商亦作列傳，豈蘇秦、商之所爲邪？何文相連甚也？三代世表，言五帝三王，皆贊帝子孫，自黃帝轉相生，不更稟氣於天，作殷本紀，言契母簡狄浴於

川遇玄鳥陸卵吞之，遂生契焉。及周本紀，言后稷之母姜嫄，野出見大人跡，履之則妊身，生后稷焉。夫觀世表，則契與后稷，黃帝之子孫也。讀殷周本紀，則玄鳥大人之精氣也。二者不可兩傳，而太史公兼紀不別。案帝王之妃，不宜野出浴於川水。今言浴於川，吞玄鳥之卵，出於野，履大人之跡，違尊貴之節，誤是非之言也。

新語陸賈所造，蓋董仲舒相被服焉。皆言君臣政治得失，言可采行，事美足觀，鳩知所言，參貳經傳，雖古聖之言，不能過增。陸賈之言，未見遺闕，而仲舒之言，零祭可以應天，土龍可以致雨，頗難曉也。夫政旱者以零祭，不夏郊之祀，豈晉侯之過邪？以致失道，陰陽不和也。晉廢夏郊之祀，晉侯寢疾，用鄭子產之言，祀夏郊而疾愈。如晉零不修，龍不治，與晉同禍，焉之再也。以政致旱，宜復以政，政虧而復，修零治龍，其何益哉？春秋公羊氏之說，亢陽之節，足以復政。陰陽相混，旱澍相報，天道然也。何乃修零設龍乎？零祀神喜哉，或雨至亢陽不政，旱禍不除，變復之義，安所施哉？且夫寒溫與旱澍同，俱政所致，其咎在人，獨爲亢旱求福，不爲寒溫求祐，未曉其故。如嘗復報寒溫，宜爲零龍之事，鳩材巨識，第兩疑焉。

董仲舒著書不稱子者，意殆自謂諸子也。漢作書者多，司馬子長揚子雲，河漢也；其餘涇渭也。然而子長少臆中之說，子雲無世俗之論，仲舒說道術奇矣。北方三家尙矣。識書云：『董仲舒，亂我書。』蓋孔子言也。讀之者或爲亂我書者，煩亂孔子之書也。或以爲亂者，理也，理孔子之書也。共一亂字，理之與亂，相去甚遠，然而讀者用心不同，不省本實，故說誤也。夫言煩亂孔子之書，才高之語也。其言理孔子之書，亦知奇之言也。出入聖人之門，亂理孔子之書，子長子雲，無此言焉。世俗用心不實，省事失情，二語不定，轉側不安。案仲舒之書，不違儒家，不及孔子，其言煩亂孔子之書者非也。孔子之書不亂，其言理孔子之書者，亦非也。孔子曰：『師摯之始，關雎之亂，洋洋乎盈耳哉。』亂者於孔子言也。孔子生周始其本，仲舒在漢終其末，盡也。皮續太史公書，蓋其義也。賦頌篇下其有亂曰章，蓋其類也。孔子終論，定於仲舒之言，其修零治龍，必將有義，未可怪也。

顏淵曰：『縣何人也？予何人也？』五帝三王，顏淵獨慕縣者，知己步趨有同也。知德所慕，默識所追，同一實也。

仲舒之言，道德政治，可嘉矣也。質定世事，論說世疑，桓君山莫上也。故仲舒之文可及，而君山之論難追也。驥與衆馬絕迹，或蹈驥馭，有焉於此，足行千里，終不名驥者，與驥毛色異也。有人於此，文偶仲舒，論次君山，終不同於二子者，姓名殊也。故馬效千里，不必驥馭；人期賢知，不必孔墨。何以驗之？君山之論難追也。兩刃相割，利鈍乃知；二輪相訂，是非乃見。是故韓非之四難，桓寬之鹽鐵，君山新論之類也。世人或疑，言非是僞，論者實之，故難爲也。卿決疑訟，獄定嫌罪，是非不決，曲直不立。世人必謂卿獄之吏，才不任職。至於論不務全疑，兩傳并紀，不宜明處，孰與剖破渾沌，解決亂絲？言無不可知，文無不可曉哉。案孔子作春秋，采毫毛之善，貶纖芥之惡，可褒則義以明其行，善可貶則明其惡，以譏其操，新論之義，與春秋會一也。

夫俗好珍古不貴今，謂今之文不如古書。夫古今一也。才有高下，言有是非，不論善惡而徒貴古，是謂古人賢今人也。案東晉鄒伯奇臨淮袁太伯袁文術，會稽吳君高周長生之輩，位雖不至公卿，誠能知之囊橐，文雅之英雄也。觀伯奇之元思，太伯之易章，句文術之咸銘，君高之越紐錄，長生之洞歷，劉子政楊子雲不能過也。善才有淺深，無有古今，文有真僞，無有故新。廣陵陳子迴顏方，今尙書郎班固，蘭臺令楊終傳毅之徒，雖無篇章，賦頌記奏，文辭斐炳，賦象屈原賈生，奏象唐林谷永，並比以觀好，其美一也。當今未顯，使在百世之後，則子政子雲之黨也。韓非著書，李斯采以言事，楊子雲作太玄，侯傭子隨而宣之，非私同門，雲傭共朝，觀奇見益，不爲古今變心易意，實事貪善，不遠爲術，併肩以述相輕，好奇無已，故奇名無窮。楊子雲反離騷之經，非能盡反一篇，文往往見非，反而奪之。六略之錄，萬三千篇，雖不盡見，指趣可知。略借不合義者，案而論之。

對作篇

或問曰：「賢聖不空生，必有以用其心。上自孔墨之黨，下至荀孟之徒，教訓必作垂文，何也？」對曰：「聖人作經，賢者傳記，匡濟薄俗，驅民使之歸實誠也。案六略之書，萬三千篇，增善消惡，割截橫拓，驅役遊慢，期便道善，歸正

道焉。孔子作春秋，周民弊也，故采求毫毛之善，貶纖芥之惡，撥亂世反諸正，人道流，王道備，所以揜押靡薄之俗者，悉具密致。夫防決不備，有水溢之害，網解不結，有獸失之患。是故周道不弊，則民不文薄；民不文薄，春秋不作。楊墨之學不亂傳義，則孟子之傳不造；韓國不小弱，法度不壞廢，則韓非之書不爲；高祖不辦得天下，馬上之計未轉，則陸賈之語不奏；衆事不失實，凡論不壞亂，則桓譚之論不起。故夫賢聖之興文也，起事不空爲，因書不妄作；作有益於化，化有補於正。故漢立蘭臺之官，校審其書，以考其言。董仲舒則道術之書，頗言災異政治所失；書成文具，表在漢室，主父偃之誣奏其書，天子下仲舒於吏，當謂之下愚。仲舒當死，天子赦之。夫仲舒言災異之事，孝武猶不罪而尊其身，況所論無觸忌之言，核道實之事，收故實之語乎？故夫賢人之在世也，進則盡忠宣化，以明朝廷；退則稱論貶說，以覺失俗。俗也不知還，則立道輕爲非。論者不追救，則迷亂不覺悟。

是故論衡之造也，起衆書並失實，虛妄之言勝真美也。故虛妄之語不黜，則華文不見息；華文放流，則實事不見用。故論衡者，所以銓輕重之言，立真僞之平，非苟調文飾辭，爲奇偉之觀也。其本皆起人間有非，故盡思極心以譏世俗。世俗之性，好奇怪之語，說虛妄之文，何則？實事不能快意，而華虛驚耳動心也。是故才能之士，好談論者，增益實事，爲美盛之語；用筆墨者，造生空文，爲虛妄之傳。聽以爲真然，說而不合，覽者以爲實事，傳而不絕。不絕則文載竹帛之上，不舍則誤入賢者之耳。至或南面稱師，賦奏僞之說，典城佩紫，讀虛妄之書，明辨然否，疾心傷之，安能不論？孟子傷楊墨之譏，大奪儒家之論，引平直之說，襄是抑非，世人以爲好辯。孟子曰：『予豈好辯哉？予不得已！』今吾不得已也。虛妄顯於真，實誠亂於僞，世人不悟，是非不定。朱紫雜廁，瓦玉集糅，以情言之，豈吾心所能忍哉？衡謬乘者，越職而呼車，惻怛發心，恐上之危也。夫論說者閱世憂俗，與衡謬乘者同一心矣。怒精神而幽魂魄，動胸中之靜氣，賊年損壽，無益於性，禍重於顏回，違負黃老之教，非人所食，不得已故爲論衡。文露而旨直，辭表而情實，其政務言治民之道，論衡諸篇，實俗間之凡人所能見，與彼作者無以異也。若夫九虛三增，論死訂鬼，世俗所久惑，人所不能覺也。人君遭弊，政教於上，人臣愚惑，作論於下，實得則上教從矣。冀悟迷惑之心，

使知虛實之分，實虛之分定，而華僞之文滅，華僞之文滅，則純誠之化日以孳矣。

或曰：『聖人作，賢者述。以賢而作者，非也。』論衡政務，可謂作者。『非曰作也，亦非述也。』論也。論者述之次也。五經之興，可謂作矣。太史公書，劉子政序，班叔皮傳，可謂述矣。桓君山新論，鄒伯奇檢論，可謂論矣。今觀論衡政務，桓鄒之二論也，非所謂作也。造端更爲，前始未有，若倉頡作書，奚仲作車是也。易言伏犧作八卦，前是未有八卦，伏犧造之，故曰作也。文王圖八，自演爲六十四，故曰衍。謂論衡之成，猶六十四卦，而又非也。六十四卦，以狀衍增，益其卦，溢其數多。今論衡就世俗之書，訂其真僞，辨其實虛，非造始更爲，無本於前也。儒生就先師之說，詰而難之，文吏就獄卿之事，覆而考之，謂論衡爲作，儒生文吏謂作乎？

上書奏記，陳列便宜，皆欲輔政。今作書者，猶書奏記，說發胸臆，文成手中，其實一也。夫上書謂之奏，奏記轉易，其名謂之書。建初孟年，中州頗歉，潁川汝南民流四散，聖主憂懷，詔書數至。論衡之人，奏記郡守，宜禁奢侈，以備困乏，言不納用，退題記草，名曰備乏。酒廩五穀，生起盜賊，沈湎飲酒，盜賊不絕。奏記郡守，禁民酒，退題記草，名曰禁酒。由此言之，夫作書者，上書奏記之文也。記謂之造作上書，上書奏記是作也。晉之乘，而楚之檮杌，魯之春秋，人事各不同也。易之乾坤，春秋之元，楊氏之玄，卜氣號不均也。由此言之，唐林之奏，谷永之章，論衡政務，同一趨也。

漢家極筆墨之林，書論之造，漢家尤多。陽成子張作樂，揚子雲造玄，二經發於臺下，讀於闕掖，卓絕驚耳，不述而作，材疑聖人，而漢朝不識，況論衡網說微論，解釋世俗之疑，辯照是非之理，使後進曉見然否之分，恐其廢失，著之簡牘，祖經章句之說，先師奇說之類也。其言伸繩彈劾，俗傳蔽惑，僞書放流，賢通之人，疾之無已。孔子曰：『詩人疾之不能默，丘疾之不能伏，是以論也。』玉亂於石，人不能別，或若楚之工尹，以玉爲石，卒使卞和受刖足之誅，是反爲非，虛轉爲實，安能不言，俗傳既過，俗書又僞。若夫鄒衍謂今天下爲一州，四海之外，有若天下者九州。淮南書言共工與顓頊爭爲天子，不勝，怒而觸不周之山，使天柱折，地維絕。堯時十日並出，堯上射九日。

魯陽戰而日暮，援戈麾日，日爲卻還。世間書傳，多若等類，毋妄虛僞，沒奪正是。心漬痛，筆手擾，安能不論？論則考之以心，效之以事，虛浮之事，輒立證驗。若太史公之書，據許由不隱，燕太子丹不使日再中，讀見之者，莫不稱善。政務爲郡國守相，縣邑令長，陳通政事，所嘗尙務，欲令全民立化，奉稱國恩。論衡九，虛三增，所以使俗務實誠也。論死訂鬼，所以使俗薄喪葬也。孔子徑庭麗級，被棺斂者不省，劉子政上薄葬，奉送藏者不約。光武皇帝草車茅馬，爲明器者不姦。何世書俗言，不載信死之語，故燭之也。今著論死及死僞之篇，明死無知，不能爲鬼。冀觀覽者，將一曉解約葬，更爲節儉。斯蓋論衡有益之驗也。言苟有益，雖作無害。倉頡之書，世以紀事，奚仲之車，世以自載，伯余之衣，以辟寒暑，桀之瓦屋，以辟風雨，夫不論其利害，而徒譏其造作，是則倉頡之徒有非，世十五家皆受責也。故夫有益也，雖作無害也。雖無害何補？古有命使采爵，欲觀風俗，知下情也。詩作民間，聖王可云『汝民也何發作？』囚罪其身，沒滅其詩乎？今已不然，故詩傳至今。論衡政務，其猶詩也。冀望見采而云有過，斯蓋論衡之書，所以與也。且凡造作之過，意其言妄而誹謗也。論衡實事疾妄，齊世宣漢，恢國驗符，盛衰須頌之言，無非謗之辭。造作如此，可以免於罪矣。

自紀篇

王充者，會稽上虞人也，字仲任。其先本魏郡元城一姓，孫一幾世嘗從軍有功，封會稽陽亭。一歲倉卒國絕，因家焉。以農桑爲業。世祖勇任氣，卒咸不揆於人。歲凶橫道傷殺，怨讎衆多。會世擾亂，恐爲怨讎所擒，祖父汎舉家檐載，就安會稽，留錢塘縣，以賈販爲事。生子二人，長曰蒙，少曰誦。誦即充父。祖世任氣，至蒙誦滋甚，故蒙誦在錢塘，勇勢凌人，未復與豪家丁伯等結怨，舉家徙處上虞。建武三年，充生，爲小兒與儕儕遊戲，不好狎侮。儕儕好掩雀捕鵲，戲錢林，充獨不肯。誦奇之。六歲教書，恭愿仁順，禮敬具備，矜莊寂寥，有巨人之志。父未嘗笞，母未嘗非，閭里未嘗讓。八歲出於書館。書館小僮百人以上，皆以過失袒謫，或以書醜得鞭。充書日進，又無過失。手書既成，

辭師受論語、尚書、日誦千字。經明德就，謝師而專門，援筆而衆奇。所讀文書，亦日博多。才高而不尙苟作，口辯而不好談對，非其人終日不言。其論說始若詭於衆，極聽其終，衆乃是之。以筆著文，亦如此焉。操行事上，亦如此焉。在縣位至掾功曹，在都尉府位亦掾功曹，在太守爲列掾五官功曹行事，入州爲從事。不好徵名於世，不爲利害見將。常言人長，希言人短。專薦未達，解已進者過。及所不善亦弗書，有過不解，亦弗復陷。能釋人之大過，亦悲夫人之細非。好自周，不肯自彰，勉以行操爲基，恥以材能爲名。衆會平坐，不問不言，賜見君將，不及不對。在鄉里慕蘧伯玉之節，在朝廷貪史子魚之行。見奸傷不肯自明，位不進亦不懷恨。貧無一畝庇身，志佚於王公，賤無斗石之秩，意若食萬鍾。得官不欣，失位不恨。處逸樂而欲不放，居貧苦而志不倦。誼讀古文，甘聞異言。世書俗說，多所不安。幽處獨居，考論實虛。

充爲人清重，遊必擇友，不好苟交。所友位雖微卑，年雖幼稚，行有離俗，必與之友。好傑友雅徒，不泛結俗材。俗材因其微過，褻條陷之，然終不自明，亦不非怨其人。或曰：『有良材奇文，無罪見陷，胡不自陳？』牟勝之徒，摩口膏舌，鄒陽自明，入獄復出。苟有完全之行，不宜爲心所缺。既耐勉自伸，不宜爲人所屈。』答曰：『不清不見塵，不高不見危，不廣不見創，不盈不見虧。士茲多口，爲人所陷，蓋亦其宜。好進故自明，憎退故自陳。吾無好憎，故默無言。』勝爲讒，或使之也，鄒陽得免，或拔之也。孔子稱命，孟子言天，吉凶安危，不在於人。昔人見之，故歸之於命，委之於時，浩然恬忽，無所怨尤。福至不謂己所得，禍到不謂己所爲。故時進意不爲豐，時退志不爲虧。不嫌虧以求盈，不違險以趨平，不鬻智以干祿，不辭爵以弔名，不貪進以自明，不惡退以怨人。同安危而齊死生，鈞吉凶而一敗成。遭十牟勝，謂之無傷。動歸於天，故不自明。

充性恬澹，不貪富貴，爲上所知，拔擢越次。不慕高官，不爲上所知，貶黜抑屈，不愾下位。比爲縣吏，無所擇避。或曰：『心難而行易，好友同志，仕不擇地，獨操傷行，世何效放？』答曰：『可效放者，莫過孔子。孔子之仕，無所避矣。爲乘田委吏，無於邑之心；爲司空相國，無說豫之色。雖耕歷山，若終不免；及受堯禪，若卒自得。憂德之不豐，不患爵

之不尊，恥名之不自，不惡位之不遷。垂棘與瓦同積，明月與礫同囊。苟有二寶之質，不害爲世所同。世能知善，雖賤猶顯；不能別白，雖尊猶辱。處卑與尊齊操，位賤與貴比德，斯可矣。

俗性貪進，忽退，收成棄敗。充升擢在位之時，衆人蟻附；廢退窮居，舊故叛去。志俗人之寡恩，故閑居作讒俗節義十二篇。冀俗人觀書而自覺，故真露其文，集以俗言。或譏謂之淺。答曰：以聖典而示小雅，以雅言而說丘野，不得所曉，無不逆者。故蘇秦精說於趙，而李兌不說商鞅；以王說秦，而孝公不用。夫不得心意所欲，雖盡堯舜之言，猶飲牛以酒，啖馬以脯也。故鴻麗深懿之言，關於大而不通於小，不得已而強聽，入胸者少。孔子失馬於野，野人閉不與；子貢妙稱而怒，馬圖諧說而懿。俗曉露之言，勉以深鴻之文，猶和神仙之藥，以治瓢欬；制貂狐之裘，以取薪榮也。且禮有所不待，事有所不須，斷失知事，不必臯陶，調和葵韭，不俟狄牙；閭巷之樂，不用韶武；里母之祀，不待太牢。既有不須，而又不宜，牛刀割鷄，舒戟采葵，鉄鉞裁箸，益盎酌卮，大小失宜，善之者希。何以爲辯？喻深以淺，何以爲智？喻難以易。賢聖銓材之所宜，故文能爲淺深之差。

充旣疾俗情，作讒俗之書，又閔人君之政，待欲治人，不得其宜，不曉其務，愁精苦思，不睹所趣，故作政務之書。又傷僞書俗文，多不實誠，故爲論衡之書。夫賢聖歿而大義分，踳跽殊趨，各自開門，通人觀覽，不能釘銓，遙聞傳授，筆寫耳取，在百歲之前，歷日彌久，以爲昔古之事，所言近是，信之入骨，不可自解，故作實論。其文盛其辯爭，浮華虛僞之語，莫不澄定，沒華虛之文，存敦龐之朴，撥流失之風，反宓戲之俗。

充書形露易觀。或曰：「口辨者其言深，筆敏者其文沈。」案經藝之文，賢聖之言，鴻重優雅，難卒曉睹。世讀之者，訓古乃下。蓋賢聖之材鴻，故其文語與俗不通。玉隱石間，珠匿魚腹，非玉工珠師，莫能采得。實物以隱閉不見，實語亦宜深沈難測。讒俗之書，欲悟俗人，故形露其指，爲分別之文。論衡之書，何爲復然？豈材有淺極，不能爲覆？何文之弊，與彼經藝殊軌轍也？答曰：玉隱石間，珠匿魚腹，故爲深覆。及玉色剖於石心，珠光出於魚腹，其隱乎，猶吾文未集於簡札之上，藏於胸臆之中，猶玉隱珠匿也。及出扶露，猶玉剖珠出乎！爛若天文之照，順若地理之曉，嫌

疑隱微，盡可名處。且名白事自定也。論衡者，論之平也。口則務在明言，筆則務在露文。高士之文雅，言無不可曉，指無不可睹。觀讀之者，曉然若賣之開目，聆然若響之通耳。三年育子，卒見父母，不察察相識，安肯說喜道畔巨樹，塹邊長溝，所居昭察，人莫不知。使樹不巨而隱，溝不長可匿，以斯示人，堯舜猶惑。人面色部，七十有餘，頰肌明潔，五色彩別，隱微憂喜，皆可得察。占射之者，十不失一。使面黝而黑醜，垢重襲而覆部，占射之者，十而失九。夫文由語也，或淺露分別，或深迂優雅，孰爲辯者？故口言以明志，言恐滅遺，故著之文字。文字與言同趣，何爲猶營隱閉，指意獄當嫌辜，脚決疑事，渾沌難曉，與彼分明可知，孰爲良吏？夫口論以分明爲公，筆辯以扶露爲通。吏文以昭察爲良，深覆典雅，指意難睹，唯賦頌耳。經傳之文，賢聖之語，古今言殊，四方談異也。當言事時，非務難知，使指閉隱也。後人不曉，世相離遠，此名曰語異，不名曰材鴻。淺文讀之難曉，名曰不巧，不名曰知明。秦始皇讀韓非之書，歎曰：「朕獨不得此人同時。」其文可曉，故其事可思。如深鴻優雅，須師乃學，投之於地，何嘆之有？夫筆著者，欲其易曉而難爲，不貴難知而易造。口論務解分而可聽，不務深迂而難睹。孟子相賢，以眸子明瞭者，察文以義可曉。

充書違詭於俗，或難曰：「文貴夫順合衆心，不違人意，百人讀之莫譴，千人聞之莫怪。故管子曰：『言室滿室，言堂滿堂。』」今殆說不與世同，故文刺於俗，不合於衆。」答曰：「論貴是而不務華，事尙然而不高合。論說辯然否，安得不諱常心，逆俗耳？衆心非而不從，故喪黜其僞，而存定其真。如當從衆順人心者，循舊守雅，諷習而已，何辯之有？孔子待坐於魯哀公，公賜桃與黍，孔子先食黍而啖桃，可謂得食序矣。然左右皆掩口而笑，貴俗之日久也。今吾實猶孔子之序食也，俗人違之，猶左右之掩口也。善雅歌於鄭，爲人悲，禮舞於趙，爲不好。堯舜之典，伍伯不肯觀，孔墨之籍，季孟不肯讀。寧危之計，黜於閭巷；撥世之言，譽於品俗。有笑味於斯，俗人不嗜，欲牙甘食。有寶玉於是，俗人投之，卞和佩服，孰是孰非，可信者誰？禮俗相違，何世不然？魯文逆祀，畔者五人，蓋猶是之語。高士不舍俗，夫不好惑衆之書，賢者欣頌，愚者逃頓。」

充書不能純矣。或曰：『口無擇言，筆無擇文，文必麗以好，言必辯以巧，言瞭於耳，則事味於心；文察於目，則篇留於手。故辯言無不聽，麗文無不寫。』今新書既在論譬，詭俗爲戾，又不美好，於觀不快。蓋師曠調音，曲無不悲，狄牙和膳，肴無不饕。然則通人造書，文無瑕穢。呂氏淮南，懸於市門，觀讀之者，無訾一言。今無二書之美文，雖衆盛猶多譴毀。』答曰：夫養實者不育華，調行者不飾辭。豐草多華英，茂林多杌枝。爲文欲顯白其爲，安能令文而無譴毀？救火極溺，義不得好；辯論是非，言不得巧。入澤隨龜，不暇調足；探淵捕蛟，不暇足手。言委辭簡，指趨妙遠，語甘文峭，意務淺小。稻穀千鍾，糠皮太半，閤錢滿幄，穿袂出萬。太羹必有瘡味，至寶必有瑕穢，大簡必有大好，良工必有不巧。然則辯言必有所屈，通文猶有所黜。言金由貴家起，文羹自賤室出。淮南呂氏之無累害，所由出者，家富官貴也。夫貴故得懸於市，害故有千金罰。觀讀之者，惶恐畏忌，雖見乖不合，焉敢隨一字。

充書既成，或稽合於古，不類前人。或曰：『謂之飾順偶辭，或徑或迂，或屈或舒。謂之論道，實事委環，文給甘酸，諧於經不驗，集於傳不合。稽之子長不當，內之子雲不入。文不與前相似，安得名佳好？稱工巧。』答曰：飾貌以彊類者失形，辭調以務似者失情。百夫之子，不同父母，殊類而生，不必相似；各以所稟，自爲佳好。文必有與合，然後稱善，是則代匠斯不傷手，然後稱工巧也。文士之務，各有所從，或調辭以巧文，或辯僞以實事。必謀慮有合，文辭相襲，是則五帝不異事，三王不殊業也。美色不同面，皆佳於目；悲音不共聲，皆快於耳。酒醴異氣，飲之皆醉；百穀殊味，食之皆飽。謂文當前合，是謂睚眉當復入采，禹目當復重瞳。

充書文重，或曰：『文貴約而指通，言尙省而趨明；辯士之言要而達，文人之辭寡而章。今所作新書出萬言，繁不省，則讀者不能盡；篇非一，則傳者不能領。被躁人之名，以多爲不省，語約易言，文重難得。玉少石多，多者不爲珍；龍少魚衆，少者固爲神。』答曰：有是言也。蓋寡言無多，而華文無寡。爲世用者，百篇無害；不爲用者，一章無補。如皆爲用，則多者爲上，少者爲下。累積千金，比於一百，孰爲富者？蓋文多勝算，財寡愈貧。世無一卷，吾有百篇；人無一字，吾有萬言。孰者爲賢？今不曰所言非而云泰多，不曰世不好省而曰不能領，斯著吾書所以不得省也。夫

宅舍多土地不得小戶口衆簿籍不得少今失實之事多華虛之語衆指實定宜辯爭之言安得約徑韓非之書一條無異篇以十第文以萬數大形大衣不得稱事衆文不得稱事衆文饒水大魚多帝都穀多王市肩磨書雖文重所論百種按古太公望近董仲舒傳作書篇百有餘吾書亦纔出百而云泰多蓋謂所以出者微觀讀之者不能不讀呵也河水沛沛比夫衆川孰者爲大蟲豸重厚稱其出絲孰者爲多

充仕數不偶而徒著書自紀或虧曰『所貴鴻材者仕宦偶合身容說納事得功立故爲高也今吾子涉世落魄仕數黜斥材未練於事力未盡於職故徒幽思屬文著記笑言何補於身衆多欲以何趨乎』答曰材鴻莫過於孔子孔子才不容斥逐伐樹接淅見圍創迹困餓陳蔡門徒菜色今吾材不逮孔子不偶之厄未與之等偏可輕乎且違者未必知窮者未必愚遇者則得不遇失之故夫命厚祿薄庸人尊顯命薄祿惡奇俊落魄必以偶合稱材量德則夫專城食土者材賢孔墨身貴而名賤則居潔而行墨食千鍾之祿無一長之德乃可戲也若夫德高而名白官卑而祿薄非才能之過未足以爲累也士願與憲共廬不慕與賜同衡樂與夷俱旅不貪與蹠比迹高士所貴不與俗均故其名稱不與世同身與草木俱朽聲與日月並彰行與孔子比窮文與揚雄爲雙吾榮之身通而知困官大而德細於彼爲榮於我爲累偶合容說身尊體佚百載之後與物俱歿名不流於一嗣文不遺於一札官雖傾倉文德不豐非吾所減德汪濊而淵懿知滂沛而盈溢筆瀧漉而雨集言濞瀟而泉出富材發知貴行尊志體列於一世名傳於千載乃吾所謂異也

充細族孤門或囑之曰『宗祖無淑懿之基文墨無篇籍之遺雖著鴻麗之論無所稟階終不爲高夫氣無漸而卒至曰變物無類而妄生曰異不常有而忽見曰妖詭於衆而突出曰怪吾子何祖其先不載況未嘗履墨塗出儒門吐論數千萬言宜爲妖變安得寶斯文而多賢』答曰烏無世鳳凰獸無種麒麟人無祖聖賢物無常嘉珍才高見屈遭時而然士貴故孤與物貴故獨產文孰常在有以放賢是則澧水有故源而嘉禾有舊根也屈奇之士見個儒之辭生度不與俗協庸角不能程是故罕發之迹記於牒籍希出之物勒於鼎銘五帝不一世而起

伊望不同家而出，千里殊跡，百載異發。士貴雅材而慎興，不因高據以顯達。母驪犢，無害犧牲。祖獨裔清，不勝奇人。鯀惡禹，聖叟頑舜神。伯牛寢疾，仲弓潔全。顏路庸固，回傑超倫。孔墨祖愚，丘翟聖賢。揚家不通，卓有子雲。桓氏稽可，適出君山。更稟於元，故能著文。

充以元和三年徙家，辟詣揚州，都丹陽。九江廬江，後入爲治中，材小任大，職任刺割，筆札之思，歷年寢廢。章和二年，罷州家居，年漸七十，時可戀輿，仕路隔絕，志窮無如，事有否然，身有利害，髮白齒落，日月踰邁，儔倫彌索，鮮所恃賴，貧無供養，志不娛快，歷數冉冉，庚辛域際，雖懼終徂，愚猶沛沛，乃作養性之書，凡十六篇。養氣自守，適食則酒，閉明塞聰，愛精自保。適輔服藥引導，庶冀性命可延。斯須不老，既晚無還，垂書示後。惟人性命，長短有期，人亦蟲物，生死一時。年歷但記，孰使留之？猶入黃泉，消爲土灰。上自黃唐，下臻秦漢，而來折衷以聖道，析理於通材，如衡之平，如鑑之開，幼老生死，古今罔不詳該，命以不延，吁歎悲哉！

後序

王充氏論衡，崇文總目三十卷，世所傳本，或爲二十七卷，史館本與崇文總目同。諸本繕寫，互有同異。宋慶曆中，進士楊文昌所定者，號稱完善。番陽洪公重刻於會稽，蓋萊閣下。歲月既久，文字漫滅，不可復讀。江南諸道行御史臺經歷克莊公，以所藏善本，重加校正，紹興路總管宋公文瓚爲之補刻，而其本復完。充生會稽，而受業太學，閱書市肆，遂通衆流，其爲學博矣！閉門絕慶弔，著論衡六十一篇，凡二十餘萬言，其用功勤矣！書成，蔡邕得之，秘之帳中，以爲談助。王朗得之，及來許下，人稱其才進，故時人以爲異書，遂大行於世。傳之至今，蓋其爲學博，其用功勤，其著述誠有出於衆人之表者也。嘗試論之：天地之大，萬物之衆，無一定之形，而有一定之理，人由之而不能知，知之而不能名也。古昔聖人，窮神知化，著之簡編，使天下之人，皆知其所以然之故，而各有以全其才。五三六經，爲萬世之準則者，此也。先王之澤熄，家自爲學，人自爲書，繁朱雜廁，瓦玉集揉，羣經專門，猶失其實。諸子尺書，人人或誕，論說紛然，莫知所宗。充心不能忍，於是作論衡之書，以爲衡者，論之乎也。其爲九虛三增，論死訂鬼，以祛世俗之惑，使見者曉然知然否之分，論者之大旨如此，非所謂出於衆人之表者乎？然觀其爲書，其釋物類也，好舉形似以相質正，而其理之一者，有所未明，其辯詖謬也，或疑或決，或信其所聞，而任其所見，尙有不得其事實者。况乎天人之際，性命之理，微妙而難知者乎？故其爲書，可以謂之異書，而不可以爲經常之典。觀其書者，見謂才進，而實無以自成其才，終則以爲談助而已。充之爲書，或得或失，不得而不論也。窮然自漢以來，操觚之士，焦心勞思，求一言之傳而不可得。論衡之書，獨傳至今，譬之三代鼎彝之器，宜乎爲世之所寶也。且充之時，去三代未遠，文賢所傳見於是書者多矣，其可使之無傳乎？今世刻本，會稽者最善，克莊公爲之校正而補刻之，傳之人，其與帳中之書，戒人勿廣者，可謂達絕矣！至元七年仲春，安陽韓性書。